

Samantapāsādikāya Vinayaṭṭhakathāya

Atthavaṇṇanābhūtā

Bhadantacoḷiyakassapattherena katā

# Vimativinodanīṭikā

(Dutiyo bhāgo)

---



Romanized from Myanmar version published in 1960

© Buddhasāsana Society

Ṭikā Series 05

First published in 2008 by Ministry of Religious Affairs

Yangon, Myanmar



# Vimativinodanīṭikā

## Dutiyabhāga

---

Mātikā

Piṭṭhaṅka

### 5. Pācittiyakaṇḍa

#### 1. Musāvādavagga

1. Musāvādasikkhāpadavaṇṇanā	...	...	1
2. Omasavādasikkhāpadavaṇṇanā	...	...	2
3. Pesuññasikkhāpadavaṇṇanā	...	...	3
4. Padasodhammasikkhāpadavaṇṇanā	...	...	4
5. Sahaseyyasikkhāpadavaṇṇanā	...	...	5
6. Dutiyasahaseyyasikkhāpadavaṇṇanā	...	...	7
7. Dhammadesanāsikkhāpadavaṇṇanā	...	...	8
8. Bhūtārocanasikkhāpadavaṇṇanā	...	...	8
9. Duṭṭhullārocanasikkhāpadavaṇṇanā	...	...	9
10. Pathavīkhaṇanasikkhāpadavaṇṇanā	...	...	9

#### 2. Bhūtagā mavagga

1. Bhūtagāmasikkhāpadavaṇṇanā	...	...	10
2. Aññavādakasikkhāpadavaṇṇanā	...	...	12
3. Ujjhāpanakasikkhāpadavaṇṇanā	...	...	13
4. Paṭhamasenāsanāsikkhāpadavaṇṇanā	...	...	14
5. Dutiyasenāsanāsikkhāpadavaṇṇanā	...	...	16
6. Anupakhajjasikkhāpadavaṇṇanā	...	...	17
7. Nikkaḍḍhanāsikkhāpadavaṇṇanā	...	...	17
8. Vehāsakuṭisikkhāpadavaṇṇanā	...	...	17

Mātikā	...	...	Piṭṭhaṅka
9. Mahallakavīhārasikkhāpadavaṇṇanā	...	...	18
10. Sappāṇakasikkhāpadavaṇṇanā	...	...	19

### 3. Ovādavagga

1. Ovādasikkhāpadavaṇṇanā	...	...	20
2. Atthaṅgatasikkhāpadavaṇṇanā	...	...	22
3. Bhikkhunupassayasikkhāpadavaṇṇanā	...	...	23
4. Āmisasikkhāpadavaṇṇanā	...	...	23
6. Cīvarasibbanasikkhāpadavaṇṇanā	...	...	23
7. Saṃvidhānasikkhāpadavaṇṇanā	...	...	24
8. Nāvābhiruhanasikkhāpadavaṇṇanā	...	...	25
9. Paripācitasikkhāpadavaṇṇanā	...	...	25
10. Rahonisajjasikkhāpadavaṇṇanā	...	...	26

### 4. Bhojanavagga

1. Āvasathapiṇḍasikkhāpadavaṇṇanā	...	...	26
2. Gaṇabhojanasikkhāpadavaṇṇanā	...	...	26
3. Paramparabhojanasikkhāpadavaṇṇanā	...	...	28
4. Kāṇamātāsikkhāpadavaṇṇanā	...	...	29
5. Paṭhamapavāraṇāsikkhāpadavaṇṇanā	...	...	29
6. Dutiyapavāraṇāsikkhāpadavaṇṇanā	...	...	31
7. Vikālabhojanasikkhāpadavaṇṇanā	...	...	31
8. Sannidhikāraśikkhāpadavaṇṇanā	...	...	32
9. Paṇītabhojanasikkhāpadavaṇṇanā	...	...	34
10. Dantaponasikkhāpadavaṇṇanā	...	...	35

### 5. Acelakavagga

1. Acelakasikkhāpadavaṇṇanā	...	...	39
2. Uyyojanasikkhāpadavaṇṇanā	...	...	39

Mātikā		Piṭṭhaṅka
3. Sabhojanasikkhāpadavaṇṇanā	...	39
6. Cārittasikkhāpadavaṇṇanā	...	40
7. Mahānāmasikkhāpadavaṇṇanā	...	40
8. Uyyuttasenāsikkhāpadavaṇṇanā	...	41
9. Senāvāsasikkhāpadavaṇṇanā	...	41
10. Uyyodhikasikkhāpadavaṇṇanā	...	41

### 6. Surāpānavagga

1. Surāpānasikkhāpadavaṇṇanā	...	42
2. Aṅgulipatodakasikkhāpadavaṇṇanā	...	42
3. Hasadhammasikkhāpadavaṇṇanā	...	43
4. Anādariyasikkhāpadavaṇṇanā	...	43
5. Bhimsāpanasikkhāpadavaṇṇanā	...	43
6. Jotisikkhāpadavaṇṇanā	...	43
7. Nahānasikkhāpadavaṇṇanā	...	44
8. Dubbaṇṇakaraṇasikkhāpadavaṇṇanā	...	44
9. Vikappanasikkhāpadavaṇṇanā	...	44
10. Cīvara-apanidhānasikkhāpadavaṇṇanā	...	45

### 7. Sappāṇakavagga

1. Sañciccaṇasikkhāpadavaṇṇanā	...	45
2. Sappāṇakasikkhāpadavaṇṇanā	...	45
3. Ukkoṭanasikkhāpadavaṇṇanā	...	45
4. Duṭṭhullasikkhāpadavaṇṇanā	...	46
5. Ūnavīsativassasikkhāpadavaṇṇanā	...	46
6. Theyyasatthasikkhāpadavaṇṇanā	...	47
8. Ariṭṭhasikkhāpadavaṇṇanā	...	48

Mātikā			Piṭṭhaṅka
9. Ukkhittasambhogasikkhāpadavaṇṇanā	...	...	49
10. Kaṇṭakasikkhāpadavaṇṇanā	...	...	49

### 8. Sahadhammikavagga

1. Sahadhammikasikkhāpadavaṇṇanā	...	...	49
2. Vilekhanasikkhāpadavaṇṇanā	...	...	49
3. Mohanasikkhāpadavaṇṇanā	...	...	51
4. Pahārasikkhāpadavaṇṇanā	...	...	51
5. Talasattikasikkhāpadavaṇṇanā	...	...	52
6. Amūlakasikkhāpadavaṇṇanā	...	...	52
7. Kukkuccuppādanasikkhāpadavaṇṇanā	...	...	52
8. Upassutisikkhāpadavaṇṇanā	...	...	52
9. Khiyyanasikkhāpadavaṇṇanā	...	...	53
10. Pakkamanasikkhāpadavaṇṇanā	...	...	53
11. Dubbalasikkhāpadavaṇṇanā	...	...	53

### 9. Rājavagga

1. Antepurasikkhāpadavaṇṇanā	...	...	54
2. Ratanasikkhāpadavaṇṇanā	...	...	54
3. Vikālagāmappavisanasikkhāpadavaṇṇanā	...	...	54
4. Sūciḡharasikkhāpadavaṇṇanā	...	...	56
5. Mañcapīṭhasikkhāpadavaṇṇanā	...	...	56
6. Tūlonaddhasikkhāpadavaṇṇanā	...	...	56
7. Nisīdanasikkhāpadavaṇṇanā	...	...	57

### 6. Pāṭidesanīyakaṇḍa

1. Paṭhamapāṭidesanīyasikkhāpadavaṇṇanā	...	...	58
---	-----	-----	----

Mātikā

Piṭṭhaṅka

**7. Sekhiyakaṇḍa**

1. Parimaṇḍalavaggavaṇṇanā	...	...	59
2. Ujjagghikavaggavaṇṇanā	...	...	62
3. Khambhakatavaggavaṇṇanā	...	...	62
4. Sakkaccavaggavaṇṇanā	...	...	63
5. Kabaḷavaggavaṇṇanā	...	...	64
6. Surusuruvaggavaṇṇanā	...	...	64
7. Pādukavaggavaṇṇanā	...	...	65

**Bhikkhunīvibhaṅgavaṇṇanā****1. Pārājikakaṇḍa**

1. Ubbhajāṇumaṇḍalikasikkhāpadavaṇṇanā	...	...	67
2. Vajjapaṭicchādikasikkhāpadavaṇṇanā	...	...	69
4. Aṭṭhavatthukasikkhāpadavaṇṇanā	...	...	69

**2. Saṃghādisesakaṇḍa**

1. Paṭhamasaṃghādisesasikkhāpadavaṇṇanā	...	...	71
2. Dutiyasaṃghādisesasikkhāpadavaṇṇanā	...	...	72
3. Tatiyasaṃghādisesasikkhāpadavaṇṇanā	...	...	73
4. Catutthasaṃghādisesasikkhāpadavaṇṇanā	...	...	73
5. Pañcamasaṃghādisesasikkhāpadavaṇṇanā	...	...	74
6. Chaṭṭhasaṃghādisesasikkhāpadavaṇṇanā	...	...	74

**3. Nissaggiyakaṇḍa**

2. Dutyanissaggiyādipācittiyasikkhāpadavaṇṇanā	...	...	75
--	-----	-----	----

**4. Pācittiyakaṇḍa****1. Lasuṇavagga**

1. Paṭhamalasuṇādisikkhāpadavaṇṇanā	...	...	76
-------------------------------------	-----	-----	----



Mātikā			Piṭṭhaṅka
	<b>2. Andhakāravagga</b>		
1. Paṭhamādisikkhāpadavaṇṇanā	...	...	77
	<b>3. Naggavagga</b>		
1. Paṭhamādisikkhāpadavaṇṇanā	...	...	77
	<b>4. Tuvattavagga</b>		
10. Dasamasikkhāpadavaṇṇanā	...	...	78
	<b>5. Cittāgāravagga</b>		
1. Paṭhamādisikkhāpadavaṇṇanā	...	...	79
	<b>8. Kumāribhūtavagga</b>		
1. Paṭhamādisikkhāpadavaṇṇanā	...	...	79
	<b>5. Pāṭidesanīyakaṇḍa</b>		
Pāṭidesanīyasikkhāpadavaṇṇanā	...	...	81

# Mahāvaggavaṇṇanā

Mātikā

Piṭṭhaṅka

## 1. Mahākhandaḥaka

Bodhikathāvaṇṇanā	...	...	83
Ajapālakathāvaṇṇanā	...	...	85
Mucalindakathāvaṇṇanā	...	...	86
Rājāyatanakathāvaṇṇanā	...	...	86
Brahmayācanakathāvaṇṇanā	...	...	87
Pañcavaggiyakathāvaṇṇanā	...	...	88
Pabbajjākathāvaṇṇanā	...	...	93
Dutiyamārakathāvaṇṇanā	...	...	96
Bhaddavaggiyakathāvaṇṇanā	...	...	96
Uruvelapāṭihāriyakathāvaṇṇanā	...	...	96
Bimbisārasamāgamakathāvaṇṇanā	...	...	98
Sāriputtamoggallānapabbajjākathāvaṇṇanā	...	...	100
Upajjhāyavattakathāvaṇṇanā	...	...	101
Saddhivihārikavattakathāvaṇṇanā	...	...	103
Nasammāvattanādikathāvaṇṇanā	...	...	103
Rādhabrāhmaṇavatthukathāvaṇṇanā	...	...	104
Ācariyavattakathāvaṇṇanā	...	...	105
Paṇāmanākhamāpanākathāvaṇṇanā	...	...	105
Nissayapaṭippassaddhikathāvaṇṇanā	...	...	106
Upasampādetabbapañcakakathāvaṇṇanā	...	...	107
Aññatitthiyapubbavatthukathāvaṇṇanā	...	...	108
Pañcābādhavatthukathāvaṇṇanā	...	...	109
Rājabhaṭṭavatthukathāvaṇṇanā	...	...	109
Coravatthukathāvaṇṇanā	...	...	110

Mātikā	Piṭṭhaṅka
Ināyikavatthukathāvaṇṇanā	110
Dāsavatthukathāvaṇṇanā	110
Kammārabhaṇḍuvatthādīkathāvaṇṇanā	111
Rāhulavatthukathāvaṇṇanā	112
Sikkhāpadadaṇḍakammavatthukathāvaṇṇanā	114
Anāpucchāvaraṇavatthu-ādīkathāvaṇṇanā	116
Paṇḍakavatthukathāvaṇṇanā	118
Theyyasaṁvāsakavatthukathāvaṇṇanā	120
Titthiyapakkantakathāvaṇṇanā	122
Tiracchānavatthukathāvaṇṇanā	123
Mātughātakādīkathāvaṇṇanā	123
Ubhatobyañjanakavatthukathāvaṇṇanā	124
Anupajjhāyakādivatthukathāvaṇṇanā	125
Apattakādivatthukathāvaṇṇanā	126
Hatthacchinnādivatthukathāvaṇṇanā	127
Alajjinissayavatthukathāvaṇṇanā	129
Gamikādinissayavatthukathāvaṇṇanā	129
Dve upasampadāpekkhādivatthukathāvaṇṇanā	131
Upasampadāvidhīkathāvaṇṇanā	132
Cattāronissayādīkathāvaṇṇanā	138

## 2. Uposathakkhandhaka

Sannipātānujānanādīkathāvaṇṇanā	140
Sīmānujānanakathāvaṇṇanā	141
Uposathāgārādīkathāvaṇṇanā	154
Avippavāsasīmānujānanakathāvaṇṇanā	155
Gāmasīmādīkathāvaṇṇanā	156
Uposathabhedādīkathāvaṇṇanā	169

Mātikā	Piṭṭhaṅka
Pātimokkhuddesakathāvaṇṇanā ...	170
Adhammakammaṭṭhikāsanādikathāvaṇṇanā ...	170
Pakkhagaṇanādi-uggahaṇānujānanakathādivaṇṇanā ...	171
Chandadānakathādivaṇṇanā ...	172
Anāpattipannarasakādikathāvaṇṇanā ...	173
Liṅgādidassanakathādivaṇṇanā ...	174

### 3. Vassūpanāyikakkhandhaka

Vassūpanāyika-anujānanakathādivaṇṇanā ...	175
Pahiteyeva-anujānanakathāvaṇṇanā ...	175
Antarāye anāpattivassacchedakathāvaṇṇanā ...	176
Vajādisuvassūpagamanakathāvaṇṇanā ...	178
Adhammikakatikādikathāvaṇṇanā ...	178

### 4. Pavāraṇākkhandhaka

Aphāsuvihāarakathādivaṇṇanā ...	180
Bhaṇḍanakāravatthukathāvaṇṇanā ...	181
Pavāraṇāsaṅgahakathāvaṇṇanā ...	181

### 5. Cammakkhanda

Soṇakoḷivisaṅgathādivaṇṇanā ...	182
Diguṇādi-upāhanapaṭikkhepakathāvaṇṇanā ...	183
Ajjhārāme upāhanapaṭikkhepakathādivaṇṇanā ...	184
Gihivikatānuññātādikathāvaṇṇanā ...	185

### 6. Bhesajjakkhandhaka

Pañcabhesajjādikathāvaṇṇanā ...	186
Guḷādi-anujānanakathāvaṇṇanā ...	187
Yāgumadhugoḷakādikathāvaṇṇanā ...	187

Mātikā			Piṭṭhaṅka
Pāṭaligāmaṅgaṭṭhukathāvaṅṅanā	...	...	187
Koṭigāmesaccakathāvaṅṅanā	...	...	188
Sīhasenāpativaṅṅu-ādikaṭṭhāvaṅṅanā	...	...	188
Kappiyabhūmi-anujānanakathāvaṅṅanā	...	...	189
Keṇiyajaṭilavaṅṅuṭṭhukathāvaṅṅanā	...	...	191
Rojamaḷḷādivaṅṅuṭṭhukathāvaṅṅanā	...	...	191
Catumaḥāpadesakathāvaṅṅanā	...	...	192

### 7. Kathinakkhandhaka

Kathinānujānanakathāvaṅṅanā	...	...	193
Ādāyasattakakathāvaṅṅanā	...	...	194

### 8. Cīvarakkhandhaka

Jīvakavaṅṅuṭṭhukathādivaṅṅanā	...	...	197
Bhaṅḍāgārasammuti-ādikaṭṭhāvaṅṅanā	...	...	198
Cīvararajanakathādivaṅṅanā	...	...	198
Samghikacīvaruppādakathāvaṅṅanā	...	...	199
Upanandasakyaputtavaṅṅuṭṭhukathāvaṅṅanā	...	...	200
Gilānavatṭhukathāvaṅṅanā	...	...	201
Matasantakakathādivaṅṅanā	...	...	201
Aṭṭhacīvaramātikākathāvaṅṅanā	...	...	202

### 9. Campeyyakkhandhaka

Kassapagottabhikkhuvatṭhukathādivaṅṅanā	...	...	205
Dvenissaraṅḍādikathāvaṅṅanā	...	...	205

### 10. Kosambakakkhandhaka

Kosambakavivādakathāvaṅṅanā	...	...	207
Pālileyakagamanakathāvaṅṅanā	...	...	209
Aṭṭhārasavaṅṅuṭṭhukathāvaṅṅanā	...	...	209

# Cūlavaggavaṇṇanā

Mātikā

Piṭṭhaṅka

## 1. Kammakkhandhaka

Tajjanīyakammakathāvaṇṇanā	...	...	211
Adhammakammadvādasakathādivaṇṇanā	...	...	212
Niyassakammakathādivaṇṇanā	...	...	213

## 2. Pārivāsikakkhandhaka

Pārivāsikavattakathāvaṇṇanā	...	...	216
-----------------------------	-----	-----	-----

## 3. Samuccayakkhandhaka

Sukkavissaṭṭhikathāvaṇṇanā	...	...	218
Paṭicchannaparivāsakathāvaṇṇanā	...	...	218
Samodhānaparivāsakathāvaṇṇanā	...	...	220
Agghasamodhānaparivāsakathāvaṇṇanā	...	...	220

## 4. Samathakkhandhaka

Sativinayakathādivaṇṇanā	...	...	222
Adhikaraṇakathāvaṇṇanā	...	...	223
Adhikaraṇavūpasamanasamathakathādivaṇṇanā	...	...	227

## 5. Khuddakavattukkhandhaka

Khuddakavattukathāvaṇṇanā	...	...	228
---------------------------	-----	-----	-----

## 6. Senāsanakkhandhaka

Vihārānujānanakathāvaṇṇanā	...	...	237
Senāsanaggāhakathāvaṇṇanā	...	...	240
Upanandavattukathāvaṇṇanā	...	...	244
Avissajjiyavattukathāvaṇṇanā	...	...	245
Navakammadānakathāvaṇṇanā	...	...	247

Mātikā	Piṭṭhāṅka
Aññatraparibhogapaṭikkhepādikathāvaṇṇanā	... 248
Samghabhattādi-anujānanakathāvaṇṇanā	... 249
Uddesabhattakathāvaṇṇanā	... 249
Nimantanabhattakathāvaṇṇanā	... 250
Salākabhattakathāvaṇṇanā	... 250
Pakkhikabhattādikathāvaṇṇanā	... 251
<b>7. Samghabhedakakkhandhaka</b>	
Chasakyapabbajjākathādivaṇṇanā	... 253
Samghabhedakakathāvaṇṇanā	... 254
Upālīpañhākathāvaṇṇanā	... 255
<b>8. Vattakkhandhaka</b>	
Āgantukavattakathāvaṇṇanā	... 258
Āvāsikavattakathāvaṇṇanā	... 258
Anumodanavattakathāvaṇṇanā	... 258
Bhattaggavattakathāvaṇṇanā	... 258
Piṇḍacārikavattakathādivaṇṇanā	... 259
<b>9. Pātimokkhaṭṭhapanakkhandhaka</b>	
Pātimokkhuddesayācanakathāvaṇṇanā	... 261
Pātimokkhasavanārahakathādivaṇṇanā	... 262
Attādāna-aṅgakathādivaṇṇanā	... 262
<b>10. Bhikkhunikkhandhaka</b>	
Mahāpajāpatigotamīvatthukathāvaṇṇanā	... 264
Bhikkhunī-upasampadānujānanakathāvaṇṇanā	... 264
<b>11. Pañcasatikakkhandhaka</b>	
Khuddānukhuddakasikkhāpadakathāvaṇṇanā	... 266
<b>12. Sattasatikakkhandhaka</b>	
Dasavatthukathāvaṇṇanā	... 268

## Parivāraṇṇanā

Mātikā		Piṭṭhaṅka
<b>Mahāvagga</b>		
Paññattivāraṇṇanā	...	271
Samuṭṭhānasīsavaṇṇanā	...	272
<b>Antarapeyyāla</b>		
Katipucchāvāraṇṇanā	...	275
Cha āpattisamuṭṭhānapāraṇṇanā	...	275
Katāpattivāraṇṇanā	...	276
Āpattisamuṭṭhānagāthāvaṇṇanā	...	277
Vipattipaccayavāraṇṇanā	...	277
Adhikaraṇapaccayavāraṇṇanā	...	278
<b>Samathabheda</b>		
Adhikaraṇapariyāyavāraṇṇanā	...	279
Sādhāraṇavārādivaṇṇanā	...	280
Samathāsamathassasādhāraṇavāraṇṇanā	...	280
Samathasammukhāvinayavārādivaṇṇanā	...	281
Samsaṭṭhavārādivaṇṇanā	...	281
Bhajativāraṇṇanā	...	283
<b>Khandhakupucchāvāra</b>		
Pucchāvisajjanāvaṇṇanā	...	284
<b>Ekuttarikanaya</b>		
Ekakavāraṇṇanā	...	285
Dukavāraṇṇanā	...	286



Mātikā			Piṭṭhaṅka
Tikavāraṇṇanā	...	...	287
Catukkavāraṇṇanā	...	...	288
Pañcakavāraṇṇanā	...	...	289
Chakkavārādivaṇṇanā	...	...	290
Uposathādipucchāvissajjanāvaṇṇanā	...	...	291

### Paññattivagga

#### Paṭhamagāthāsaṅgaṇika

Sattanagaresupaññattasikkhāpadavaṇṇanā	...	...	292
Pārājikādi-āpattivaṇṇanā	...	...	294

#### Adhikaraṇabheda

Ukkoṭanabhedādikathāvaṇṇanā	...	...	295
Adhikaraṇanidānādivaṇṇanā	...	...	295
Sattasamathanānāthādivaṇṇanā	...	...	296

#### Dutiyaḡāthāsaṅgaṇika

Codanādipucchāvissajjanāvaṇṇanā	...	...	297
---------------------------------	-----	-----	-----

#### Codanākaṇḡa

Anuvijjakakiccavaṇṇanā	...	...	298
------------------------	-----	-----	-----

#### Cūlasaṅgāma

Anuvijjakassa paṭipattivaṇṇanā	...	...	299
--------------------------------	-----	-----	-----

#### Mahāsaṅgāma

Voharantena jānitabbādivaṇṇanā	...	...	302
--------------------------------	-----	-----	-----

Mātikā			Piṭṭhaṅka
<b>Kathinabheda</b>			
Kathina-atthatādivaṇṇanā	...	...	303
Pubbakaraṇanidānādivihāgavaṇṇanā	...	...	304
Kathinādijanitabbavihāgavaṇṇanā	...	...	304
<b>Saṅghavagga</b>			
<b>Upālīpañcaka</b>			
Nappaṭippassambhanavaggavaṇṇanā	...	...	306
Vohāravaggādivaṇṇanā	...	...	307
<b>Aparadutiyagāthāsaṅgaṇika</b>			
Kāyikādi-āpattivaṇṇanā	...	...	309
Pācittiyavaṇṇanā	...	...	310
Avandanīyapuggalādivaṇṇanā	...	...	311
<b>Sedamocanagāthā</b>			
Avippavāsapañhāvaṇṇanā	...	...	312
Pārājikādīpañhāvaṇṇanā	...	...	312
<b>Pañcavagga</b>			
Kammavaggavaṇṇanā	...	...	314
Apalokanakammakathāvaṇṇanā	...	...	316
Atthavasavaggādivaṇṇanā	...	...	320

**Vimativinodanīṭikāya dutiyabhāge mātikā niṭṭhitā.**

# Vinayapiṭaka

## Vimativinodanīṭikā

(Dutiyo bhāgo)

Namo tassa Bhagavato Arahato Sammāsambuddhassa.

### 5. Pācittiyakaṇḍa

#### 1. Musāvādavagga

##### 1. Musāvādasikkhāpadavaṇṇanā

1. Musāvādavaggassa paṭhamasikkhāpade **khuddakānanti** ettha “**khuddaka**-saddo bahu-saddapariyāyo”ti vadanti. **Tatthā**ti tesu vaggesu, khuddakesu vā. “Jānitabbato”ti hetuno vipakkhepi nibbāne vattanato anekantikatte parehi vutte “na mayā ayam hetu vutto”ti taṃ kāraṇaṃ paṭicchādetuṃ puna “jātidhammatoti mayā vuttan”ti-ādīni vadati. “Sampajānan”ti vattabbe anunāsikalopena niddesoti āha “**jānanto**”ti.

2. **Sampajānamusāvādeti** attanā vuccamānassa atthassa vitathabhāvaṃ pubbepi jānitvā, vacanakkhaṇe ca jānantassa musāvādabhaṇane. Tenāha “**jānitvā**”ti-ādi. **Musāvādeti** ca nimittatthe bhummaṃ, tasmā musābhaṇananimittam pācittiyanti evamettha, ito paresupi īdisesu attho veditabbo.

3. Vadanti etāyāti vācāti āha “**micchā**”ti-ādi. “Dhanunā vijjhatī”ti-ādīsu viya “cakkhunā diṭṭhan”ti pākaṭavasena vuttanti āha “**oḷārikenā**”ti.

11. **Gato bhavissatī**ti etthāpi sanniṭṭhānato vuttattā musāvādo jāto. **Āpattinti** pācittiyāpattim, na dubbhāsitaṃ. Jāti-ādīhi dasahi akkosavatthūhi paraṃ davā vadantassa hi taṃ hoti. **Cāresunti** upanesuṃ. Vatthuviparītata, viśāmvādanapurekkhāratā, yamatthaṃ vattukāmo, tassa puggalassa viññāpanapayogo cāti imānettha tīṇi aṅgāni. Vatthuviparītātāya hi asati viśāmvādanapurekkhāratāya viññāpītepi musāvādona hoti, dukkaṭamattameva hoti. Tasmā sāpi aṅgamevābhi gahetabbaṃ. Uttarimanussadhammā-rocanatthaṃ musā bhaṇantassa pārājikaṃ pariyāyena thullaccayaṃ, amūlakena pārājikena anuddhamśanattaṃ saṃghādiseso, saṃghādisesenānuddhamśana-omasavādādīsu<sup>1</sup> pācittiyāṃ, anupasampannesu dukkaṭaṃ, ukkaṭṭhahīnajāti-ādīhi davā akkosantassa dubbhāsitaṃ, kevalaṃ musā bhaṇantassa idha pācittiyāṃ vuttaṃ.

Musāvādasikkhāpadavaṇṇanā niṭṭhitā.

## 2. Omasavādasikkhāpadavaṇṇanā

13. Dutiye **pubbe patiṭṭhitārappadesaṃ puna are patteti** paṭhamāṃ bhūmiyāṃ patiṭṭhitanemippadese parivattetvā puna bhūmiyāṃ patiṭṭhiteti attho.

15. **Pubbeti aṭṭhuppattiyāṃ. Pupphachaḍḍakā** nāma gabbhamalādhīhāraḱā. **Tacchakakammanti** pāsāṇakoṭṭanādivaḍḍhakīkammaṃ. **Hatthamuddāgaṇanā**ti aṅgulisaṅkocaneneva gaṇanā. **Acchiddakagaṇanā** nāma ekaṭṭhānadasatṭhānādīsu sāriyo ṭhapetvā anukkamena gaṇanā. **Ādi**-saddena saṅkalanapaṭuppadānavoklanabhāgahārādivasena pavattā piṇḍagaṇanā gahitā. Yassa sā paḡuṇā, so rukkhampi disvā “ettakāni ettha

1. Saṃghādisesenānuddhamśanaṃ omasavādādīsu (Sī)

paññānī”ti jānāti. **Yabha**-methuneti vacanato āha “**ya-kāra bha-kāre**”ti-ādi.

16. **Na purimenāti** musāvādasikkhāpadena. **Sopi āpattiyāti** upasaggādivisiṭṭhehipi vadanto pācittiyāpattiyāva kāretabbo.

26. **Dubbhāsītanti** sāmāññato vuttattā pāḷiyam anāgatehipi parammukhā vadantassapi dubbhāsītamevāti ācariyā vadanti tato lāmakāpattiyā abhāvā, anāpattiyāpettha bhavitum ayuttattā. **Sabbasattāti** ettha vacanattavidūhi tīracchānādayopi gahitā.

35. Anusāsanīpurekkhāratāya vā pāpagarahitāya vā vadantānam cittassa lahuparivattibhāvato antarantarā kope uppannepi anāpatti. Kāyavikāramattenapi omasanasambhavato “**tisamuṭṭhānam, kāyakamman**”ti ca vuttam. **Parivāre** pana “catutthena āpattisamuṭṭhānena -pa-. Dubbhāsītam āpajjeyyāti. Na hīti vattabban”ti-ādinā<sup>1</sup> itarāni samuṭṭhānāni paṭikkhipitvā pañcamasseva vuttattā āha “**dubbhāsītāpatti panettha vācācittato samuṭṭhātī**”ti. Davakamyatāya hi kāyavācācittēhi omasantassapi vācācittameva āpattiyā aṅgam hoti, na pana kāyo vijjamānopi dhammadesanāpatti viya kevalam kāyavikāreneva. Omasantassa pana kiñcāpi idha dubbhāsītāpattiyā anāpatti, atha kho kāyakīlāpaṭikkhepasikkhāpadena dukkaṭamevāti daṭṭhabbam. Upasampannam jāti-ādīhi anaññāpadesena akkosanam, tassa jānanam, atthapurekkhāratādīnam abhāvoti imānettha tīṇi aṅgāni.

Omasavādasikkhāpadavaṇṇanā niṭṭhitā.

### 3. Pesuññasikkhāpadavaṇṇanā

36. Tatiye bhaṇḍanam jātam etesanti **bhaṇḍana-jātā**. Pisatīti pisuṇā, vācā, samagge bhinne karotīti attho. Tāya vācāya samannāgato pisuṇo, tassa kamman **pesuññanti** evamettha attho veditabbo.

---

1. Vi 5. 170 piṭṭhe.

Idhāpi jāti-ādīhi dasahi vatthūhi pesuññam upasamharantasseva pācittiyam, itarehi akkosavatthūhi dukkaṭam. Anakkosavatthūhi pana upasamharantassa dukkaṭamevāti vadanti. Jāti-ādīhi anaññāpadesena akkosantassa bhikkhuno sutvā bhikkhussa upasamharaṇam, piyakamyatābhedādhippāyesu aññataratā, tassa vijānanāti imānettha tīṇi aṅgāni.

Pesuññasikkhāpadavaṇṇanā niṭṭhitā.

#### 4. Padasodhammasikkhāpadavaṇṇanā

45. Catutthe **purimabyañjanena sadisanti** “rūpaṃ aniccaṃ”ti ettha anicca-saddena sadisaṃ “vedanā aniccā”ti ettha anicca-saddam vadati. **Akkharasamūhoti** avibhattiko vutto. **Padanti** vibhatti-antaṃ vuttaṃ.

**Ekam padanti** gāthāpadameva sandhāya vadati. **Padagaṇanāyāti** gāthāpadagaṇanāya. **Apāpuṇitvāti** saddhim akathetvā. Etena gāthāya pacchimapāde vuccamāne sāmaṇero paṭhamapādādīm vadati, āpattiyeva, tasmim<sup>1</sup> nissadde **eva** itarena vattabbanti dasseti.

**Aṭṭhakathānissitoti** saṅgītittayārulham porāṇaṭṭhakatham sandhāya vadati. Idānipi “yathāpi dīpiko nāma, niliyivā gaṇhate mige”ti<sup>2</sup>, evamādikaṃ aṭṭhakathāvacanaṃ attheva, **buddhaghosācariyādīhi** porāṇaṭṭhakathāyena vuttampi idha saṅgahetabbanti vadanti. **Pālinissitoti** udānavaggasaṅgahādiko. **Vivaṭṭūpanissitanti** nibbānanissitaṃ. **Therassāti** nāgasenattherassa. **Maggakathādīni** pakaraṇāni.

46. Pāliyaṃ **akkharāyāti**-ādi līngavipallāsenā vuttaṃ, akkharenāti-ādinaṃ attho gaḥetabbo.

48. **Upacāram muñcivāti** parisāya dvādasahattam muñcivā ekato ṭhitassa vā nisinnassa vā anupasampannassa akathetvā aññe uddissa

1. Ekasmim (Sī)

2. Khu 11. 352; Visuddhi 1. 262; Dī-Ṭṭha 2. 354; Ma-Ṭṭha 1. 253; Vi-Ṭṭha 2. 12; Paṭisaṃ-Ṭṭha 2. 89 piṭṭhesu.

bhaṇantassāpi anāpatti. Sace pana dūre nisinnampi uddissa bhaṇati, āpatti eva. **Opātetīti** saddhiṃ katheti. Anupasampannatā, vuttalakkaṇadhammaṃ padaso vācanatā, ekato bhaṇanañcāti imānettha tīpi āngāni.

Padasodhammasikkhāpadavaṇṇanā niṭṭhitā.

### 5. Sahaseyyasikkhāpadavaṇṇanā

50-51. Pañcame tatrīdaṃ nidassananti seso. **Dirattatirattanti** ettha dirattaggahaṇaṃ vacanālaṅkāratthaṃ, nirantaraṃ tissova rattiyo vasitvā catutthadivasādīsu sayantasseva āpatti, na ekantarikādivasena sayantassāti dassanattampīti daṭṭhabbaṃ. Dirattavisiṭṭhañhi tirattaṃ vuccamānaṃ, tena anantarikameva tirattaṃ dīpetīti. **Pañcahi chadanehīti** iṭṭhaka silā sudhātiṇa paṇṇehi. **Vācuggatavasenāti** paṇṇavasena. **Diyadḍhahatthubbedho** vadḍhakīhatthena gahetabbo. **Ekūpacāro** ekena maggena pavisitvā abbhokāsaṃ anukkamitvā sabbattha anuparigamanayoggo, etaṃ<sup>1</sup> bahudvārampi ekūpacārova. Tattha pana<sup>2</sup> kuṭṭādīhi rundhitvā visuṃ dvāraṃ yojenti, nānūpacāro hoti. Sace pana rundhati eva, visuṃ dvāraṃ na yojenti, “etampi ekūpacārameva mattikādīhi pihitadvāro viya gabbho”ti gahetabbaṃ. Aññathā gabbhe pavisitvā pamukhādīsu nipannānupasampannehi sahaseyyāparimuttīyā gabbhadvāraṃ mattikādīhi pidahāpetvā uṭṭhite aruṇe vivarāpentassapi anāpatti bhaveyyāti.

**Tesaṃ payoge payoge bhikkhussa āpattīti** ettha keci “anuṭṭhahanena akiriyasamuṭṭhānā āpatti vuttā tasmīṃ khaṇe sayantassa kiriyābhāvā. Idañhi sikkhāpadaṃ siyā kiriyāya samuṭṭhāti, siyā akiriyāya samuṭṭhāti. Kiriyāsamuṭṭhānatā cassa tabbahulavasena vuttāti vadati. Yathā cetam, evaṃ divāsayanampi. Anuṭṭhahanena, hi dvārāsaṃvaraṇena cetam akiriyasamuṭṭhānampi hotī”ti vadanti. Idañca yuttaṃ viya dissati, vīmaṃsitvā gahetabbaṃ.

1. Ekam (Sī)

2. Yattha pana (Ka)

“**Uparimatalena saddhir̥m asambaddhabhittikassā**”ti idaṃ sambaddhabhittike vattabbameva natthīti dassanattam̥ vuttam̥. Uparimatale sayitassa saṅkā eva natthīti “**heṭṭhāpāsāde**”ti-ādi vuttam̥. **Nānūpacāreti** bahi nisseniyā ārohaṇīye.

**Sabhāsaṅkhepenā**ti sabhākārena. “**Aḍḍhakuṭṭake**”ti iminā saṅṭhānam dasseti. Yattha tīsu dvīsu vā passesu bhittiyō baddhā, chadanam̥ vā asampattā aḍḍhabhitti, idaṃ aḍḍhakuṭṭakam̥ nāma. **Vālasaṅghāto** nāma parikkhepassa anto thambhādīnam̥ upari vāḷarūpehi katasāṅghāto. **Parikkhepassa bahigateti** ettha yasmim̥ passe parikkhepo natthi, tattha sace bhūmito vatthu uccam̥ hoti, ubhato uccavatthuto heṭṭhā bhūmiyam̥ nibbakosabbhantarepi anāpatti eva hattha senāsanavohārābhāvato. Atha vatthu nīcam̥ bhūmisamameva senāsanassa heṭṭhimatale tiṭṭhati, tattha parikkheparahitadisāya nibbakosabbhantare sabbattha āpatti hoti, paricchedābhāvato parikkhepassa bahi eva anāpattīti daṭṭhabbam̥. **Parimaṇḍalam̥ vā**ti-ādi majjhe udakapatanatthāya ākāsaṅgaṇavantaṃ senāsanam̥ sandhāya vuttam̥. Tattha **aparicchinnagabbhūpacāreti** ekekagabbhassa dvīsu passesu pamukhena gamanam̥ paricchinditvā diyaḍḍhayatthubbedhato anūnam̥ kuṭṭam̥ katvā ākāsaṅgaṇena pavesam̥ karonti, evam̥ akatoti<sup>1</sup> attho. **Gabbhaparikkhepoti** caturassapāsādādisu samantā ṭhitagabbhabhittiyō sandhāya vuttam̥.

**Pāṭekkasannivesā**ti ekekadisāya gabbhapāḷīyo itaradisāsu gabbhapāḷīnam̥ abhāvena, bhāvepi vā aññamaññabhitticchadanehi asambandhatāya pāṭekkasannivesā nāma vuccati. **Tam̥ -pa- sandhāya vuttanti** tattha pācittiyena anāpattīti vuttam̥, na dukkaṭena. Tādisāya hi gabbhapāḷīyā pamukham̥ tīsu disāsu bhittīnam̥ abhāvena ekadisāya gabbhabhittimattena sabbacchannam̥ cūḷapāricchannam̥ nāma hoti. Tasmā dukkaṭameva. Yadi pana tassa pamukhassa itaradisāsūpi ekissam̥, sabbāsu vā bhittim̥ karonti, tadā sabbacchanna-upaḍḍhapāricchannādibhāvato pācittiyameva hotīti daṭṭhabbam̥. **Bhūmiyam̥ vinā jagatiyā pamukham̥ sandhāyā**ti ettha uccavatthum̥ akatvā bhūmiyam̥ katagehassa pamukham̥ sandhāya aparikkhitte pācittiyena anāpattīti idaṃ

---

1. Āṇādhara (Ka)



kathitaṃ. Uccavatthukaṃ ce pamukhaṃ hoti, tena vatthunā parikkhittasaṅkhyameva pamukhaṃ gacchatīti adhippāyo. **Tatthāti** andhakaṭṭhakathāyaṃ. **Jagatiyā pamāṇaṃ vatvāti** pakatibhūmiyā nipanno yathā jagatiyā upari sayitaṃ na passati, evaṃ uccāti-uccavatthussa ubbedhappamāṇaṃ vatvā. Ekadisāya ujukameva dīghaṃ katvā sannivesito pāsādo **ekasālasanniveso**. Dvīsu, tīsu vā catūsūpi vā disāsu siṅghāṭakasaṅghānādivasena katā<sup>1</sup> dvisālādisannivesā veditabbā. Sālappabhedadīpanameva cettha purimato visesoti. **Parikkhepo viddhastoti** pamukhassa parikkhepaṃ sandhāya vadati.

53. Upaḍḍhacchanna-upaḍḍhaparicchannaṃ senāsaṇaṃ dukkaṭassa ādiṃ vatvā pāḷiyaṃ dassitattā tato adhikaṃ sabbacchanna-upaḍḍhaparicchannādikampi sabbaṃ pāḷiyaṃ avuttampi pācittiyasseva vatthubhāvena dassitaṃ sikkhāpadassa paṇṇattivajjattā, garuke ṭhātabbato cāti veditabbā. **Satta pācittiyānīti** pāḷiyaṃ vuttapācittiyadvayaṃ sāmāññato ekattena gahetvā vuttaṃ.

54. Pāḷiyaṃ “tatiyāya rattiyā purāruṇā nikkhamitvā puna vasatī”ti idaṃ ukkaṭṭhavasena vuttaṃ, anikkhamitvā pana purāruṇā uṭṭhahitvā antochadane nisinnassāpi punadivase sahaseyyena anāpatti eva. **Senambamaṇḍapavaṇṇaṃ hotīti**<sup>2</sup> sīhaḷadīpe kira uccavatthuko sabbacchanno sabba-aparicchanno evaṃnāmako sannipātamaṇḍapo atthi, taṃ sandhāyetaṃ vuttaṃ. Ettha catutthabhāgo **cūḷakaṃ**, dve bhāgā **upaḍḍhaṃ**, tīsu bhāgesu dve bhāgā **yebhuyyanti** iminā nayena cūḷakacchannaparicchannatādīni veditabbāni. Pācittiyavatthukasenāsaṇaṃ, tattha anupasampanna saha nipajjanaṃ, catutthadivase sūriyatthaṅgamananti imānettha tīṇi aṅgāni.

Sahaseyyasikkhāpadavaṇṇanā niṭṭhitā.

## 6. Dutiyasahaseyyasikkhāpadavaṇṇanā

55. Chaṭṭhe mātugāmena saddhiṃ catutthadivase sayantassāpi iminā sikkhāpadena ekāva āpatti. Keci pana purimasikkhāpadenāpīti dve āpattiyo vadanti, taṃ na yuttaṃ “anupasampanna”ti anitthiliṅgena vuttattā

1. Katvā (Ka)

2. Senambamaṇḍapaṃ hotīti (Sī, Ka)

napuṃsakena pana catutthadivase sayantassa sadukkaṭapācittiyaṃ vattuṃ yuttaṃ. Kiñcāpettha pāḷiyaṃ paṇḍakavaseneva dukkaṭaṃ vuttaṃ, tadanulomikā pana purisa ubhatobyañjanakena saha sayantassa iminā dukkaṭaṃ, purimena catutthadivase sadukkaṭapācittiyaṃ. Itthi-ubhatobyañjanako itthigatikovāti ayaṃ amhākaṃ khanti. Matitthiyā anāpattīti vadanti. Pācittiyavattukasenāsanāṃ, tattha mātugāmena saddham nipajjanāṃ, sūriyatthaṅgamananti imānettha senāsanāṃ, tattha mātugāmena saddhiṃ nipajjanāṃ, sūriyatthaṅgamananti imānettha tīṇi aṅgāni.

Dutiyasahaseyyasikkhāpadavaṇṇanā niṭṭhitā.

---

### 7. Dhammadesanāsikkhāpadavaṇṇanā

60. Sattame **na yakkhenāti**-ādīnaṃ “aññatra viññunā”ti iminā sambandho. Aññatra viññunā purisaviggahena, na yakkhādināpīti evamattho gahetabboti adhippāyo. Tādisenapi hi saha t̥hitāya desetuṃ na vaṭṭati, taṃtaṃdesabhāsāya atthaṃ yathāruci vaṭṭati eva.

Iriyāpathāparivattanaṃ, purisaṃ vā dvādasahatthūpacāre apakkosāpanaṃ ettha akiriya. Vuttalakkhaṇassa dhammassa channaṃ vācānaṃ upari desanā, vuttalakkhaṇo mātugāmo, iriyāpathāparivattanābhāvo, viññūpurisābhāvo, apañhavissajjanāti imānettha pañca aṅgāni.

Dhammadesanāsikkhāpadavaṇṇanā niṭṭhitā.

---

### 8. Bhūtārocanasikkhāpadavaṇṇanā

77. Aṭṭhame **antarāti** parinibbānakālato pubbepi. **Atikaḍḍhiyamānenāti** “vadatha bhante, kiṃ tumhehi adhigatan”ti evaṃ nippīliyamānena atibaddhiyamānena. Tathārūpe paccaye sati vattabbameva. **Sutapariyattisīlaguṇanti** ettha atthakusalatā sutaguṇo, pālipāṭhakusalatā pariyattiguṇoti daṭṭhabbaṃ. **“Cittakkhepassa vā abhāvā”**ti iminā khittacittavedanāṭṭatāpi ariyānaṃ natthīti dasseti.

**Pubbe avuttehī**ti catutthaparājike avuttehi. Idañca sikkhāpadam paṇṇatti-ajānavasena ekantato acittakasamuṭṭhānameva hoti ariyānaṃ paṇṇattivītikkamābhāvā. Jhānalābhīnañca satthu āṇāvītikkamapaṭighacittassa jhānaparihānato bhūtārocanam na sambhavati. Uttarimanussadhammassa bhūtata, anupasampannassa ārocanam, taṅkhaṇavijānanā, anaññāpadesoti imānettha cattāri aṅgāni.

Bhūtārocanasikkhāpadavaṇṇanā niṭṭhitā.

### 9. Duṭṭhullārocanasikkhāpadavaṇṇanā

78. Navame **tattha bhaveyyā**ti tattha kassaci mati evam bhaveyya. Aṭṭhakathāvacanameva upapattito daḥam katvā patitṭhapento “**imināpi cetan**”ti-ādimāha.

82. **Ādito pañca sikkhāpadānī**ti pāṇātipātādīni pañca. **Sesānī**ti vikālabhojanādīni. Sukkavissaṭṭhi-ādi ajjhācārova. Antimavatthum anajjhāpannassa bhikkhuno savatthuko saṃghādiseso, anupasampannassa ārocanam, bhikkhusammutiyā abhāvoti imānettha tīni aṅgāni.

Duṭṭhullārocanasikkhāpadavaṇṇanā niṭṭhitā.

### 10. Pathavīkhaṇanasikkhāpadavaṇṇanā

86. Dasame appapaṃsumattikāya pathavīyā anāpattivatthubhāvena vuttatā upaḍḍhapaṃsumattikāyapi pācittiyamevāti gahetabbaṃ. Na hetam dukkaṭavattḥūti sakkā vattum jātājātavinimuttāya tatiyapathavīyā abhāvato.

**Vaṭṭatī**ti imasmim ṭhāne pokkharaniṃ khaṇāti okāsassa aniyamittā vaṭṭati. **Imam vallim khaṇāti** pathavīkhaṇanam sandhāya vuttatā imināva sikkhāpadena āpatti, na bhūtagāmasikkhāpadena.

Ubhayampi sandhāya vutte pana dvepi pācittiyā honti. **Udakapappatakoti** udake antobhūmiyaṃ pavittthe tassa uparibhāgaṃ chādetvā tanukapaṃsu vā mattikā vā paṭalam hutvā patamānā tiṭṭhati, tasmim udake sukkhepi taṃ paṭalam vātena calamānā tiṭṭhati, taṃ udakapappaṭako nāma.

**Akatapabbhāreti** avaḷañjanatṭhānadassanatthaṃ vuttaṃ. Tādise eva hi vammikassa sambhavoti. **Mūsikukkaram** nāma mūsikāti khanitvā bahi katapaṃsurāsi. **Acchadananti**-ādivuttattā ujukaṃ ākāśato patitavassodakena ovaṭṭhameva jātapathavī hoti, na chadanādisu patitvā tato pavatta-udakena tintanti veditabbaṃ. **Maṇḍapatthambhanti** sākhamāṇḍapatthambhaṃ. **Uccāletvāti** ukkhipivā. **Tatoti** purāṇasenāsanato.

88. **Mahāmattikanti** bhittilepanaṃ. Jātapathavitā, tathāsaññitā, khaṇanamaṇāpanānaṃ aññataranti<sup>1</sup> imānettha tīṇi aṅgāni.

Pathavīkhaṇanasikkhāpadavaṇṇanā niṭṭhitā.

Niṭṭhito musāvādavaggo paṭhamo.

## 2. Bhūtagāmaṃvagga

### 1. Bhūtagāmasikkhāpadavaṇṇanā

89. Dutiyavaggassa paṭhame **niggahetum asakkontoti** sākhaṭṭhakavimāne sākhyā chijjamānāya chijjante tattha achedanattāya devatāya upanītaṃ puttaṃ disvāpi kuṭṭharinikkhepavegaṃ nivattatum asakkontoti attho. **Rukkhadhammeti** rukkhassa pavattiyam. Rukkhānaṃ viya chedanādisu akuppanaṃhi rukkhadhammo nāma.

**Uppatitanti** uppannaṃ. **Bhantanti** dhāvantaṃ. **Vārayeti** niggaṇṇheyya. **Itaroti** uppannaṃ kodhaṃ aniggaṇṇanto rāja-uparājādīnaṃ rasmimattaggāhakajano viya na uttamasārathīti attho. **Visaṭam sappavisanti** sarīre dāṭhāvaṇānusārena vitthiṇṇaṃ byāpetvā ṭhitaṃ kaṇhasappaviṣaṃ viya. **Jahāti orapāranti** pañcorambhāgiyasaññojanāni tatiyamaggena jahāti. “Orapāran”ti hi orimatīraṃ

---

1. Khaṇanakhaṇāpanaṅcāti (Sī, Ka)

vuccati. Atha vā **soti** tatiyamaggena kodham vinetvā ṭhito bhikkhu arahattamaggena orapāraṃ jahātīti attho. Tattha **oraṃ** nāma sakattabhāvo, ajjhattikāni vā āyatanāni. **Pāraṃ** nāma para-attabhāvo, bāhirāni vā āyatanāni. Tadubhaye pana chandarāgaṃ jahanto “jahāti orimapāraṃ”ti vuccati.

90. **Bhavantīti** vaḍḍhanti. **Ahuvuntīti**<sup>1</sup> babbhūvu. Tenāha “**jātā vaḍḍhitā**”ti. **Bhūtānaṃ gāmoti** mahābhūtānaṃ haritatiṇḍātibhāvena samaggānaṃ samūho. Tabbinimuttassa gāmassa abhāvaṃ dassetuṃ “**bhūtā eva vā gāmo**”ti vuttaṃ. **Pātabya**-saddassa **pā** pāneti dhātvattha sandhāyāha “**paribhuñjittabbatā**”ti. Sā ca pātabyatā chedanādi eva hotīti āha “**tassā -pa-bhūtagāmassa jātā chedanādipaccayā**”ti.

91. **Jāta**-saddo ettha vijātapariyāyoti “puttaṃ vijātā itthī”ti-ādīsu viya pasūtavacanoti āha “**pasūtāni**”ti, nibbattapaṇṇamūlānīti attho.

**Tāni dassetoti** tāni bijāni dasseto. Kāriyadassanamukheneva kāraṇaṅca gahitanti āha “**bijato nibbattena bijāṃ dassitan**”ti.

92. “**Bijato sambhūto bhūtagāmo bijan**”ti iminā uttarapadalopena “padumagacchato nibbattaṃ pupphaṃ paduman”ti-ādīsu viyāyaṃ vohāroti dasseti. **Yaṃ bijāṃ bhūtagāmo nāma hotīti** nibbattapaṇṇamūlaṃ sandhāya vadati. **Yathārutanti** yathāpāṭhaṃ.

“**Sañciccā**”ti vuttattā sarīre laggabhāvaṃ ñatvāpi uṭṭhahati, “taṃ uddharissāmī”tisaññāya abhāvato vaṭṭati. **Anantaka**ggahaṇena sāsapamattikā gahitā, nāmañhetam tassā sevārajātiyā. Mūlapaṇṇānaṃ abhāvena “**asampuṇṇabhūtagāmo nāmā**”ti vuttaṃ. So bijagāmena saṅgahitoti. Avaḍḍhamānepi bhūtagāmamūlakattā vuttaṃ “**amūlakabhūtagāme saṅgahaṃ gacchatī**”ti. Nāḷikerassa āveṇikaṃ katvā vadati.

---

1. Ahuvanti cāti (sabbattha)

**Seleyyakam** nāma silāya sambhūtā ekā gandhajāti. **Pupphitakālato paṭṭhāyāti** vikasitakālato pabhuti. **Chattakam gaṇhantoti** vikasitam gaṇhanto. Maḷam pana rukkhattacam akopentenapi gahetum na vaṭṭati, phullam vaṭṭati. **Hatthakukkuccenāti** hatthacāpallena.

“**Pānīyam na vāsetabban**”ti idam attano pivanapānīyam sandhāya vuttam, aññesam pana vaṭṭati anuggahitattā. Tenāha “**attanā khāditukāmenā**”ti. **Yesam rukkhānam sakhā ruhatīti** mūlam anotāretvā paṇṇamattaniggamanamattenapi vadḍhati. Tattha kappiyampi akaronto chinnanāḷikeraveḷudaṇḍādayo kopetum vaṭṭati.

“**Caṅkमितatṭhānam dassessāmī**”ti vuttattā kevalam caṅkamanādhippāyena vā maggagamanādhippāyena vā akkamantassa, tiṇānam upari nisīdanādhippāyena nisīdantassa ca doso natthi.

**Samaṇakappēhīti** samaṇānam kappiyavohārehi, abījanibbaṭṭabījanipi kappiyabhāvato “samaṇakappānī”ti vuttāni. **Abījam** nāma taruṇa-ambaphalādīni. Nibbaṭṭetabban viyojetabban bījam yasmiṃ, tam panasādi **nibbaṭṭabījam** nāma. **Kappiyanti vatvāvāti** pubbakālakiriyāvasena vuttepi vacanakkhaṇeva aggisatthādinā bījagāme vaṇam kātabbanti vacanato pana pubbe kātum na vaṭṭati, tañca dvidhā akatvā chedanabhedanameva dassetabban. Karontena ca bhikkhunā “kappiyam karohī”ti yāya kāyaci bhāsāya vutteyeva kātabban. **Bījagāmaparimocanattam puna kappiyam kāretabbanti** kārapanassa paṭhamameva adhikatattā. “**Kaṭāhepi kātum vaṭṭati**”ti vuttattā kaṭāhato nīhatāya miñjāya vā bīje vā yattha katthaci vijjhītum vaṭṭati eva. Bhūtagāmo, bhūtagāmasaññitā, vikopanam vā vikopāpanam vāti imānettha tīṇi aṅgāni.

Bhūtagāmasikkhāpadavaṇṇanā niṭṭhitā.

## 2. Aññavādakasikkhāpadavaṇṇanā

94. Dutiye **aññam vacananti** yam dosavibhāvanattam parehi vuttavacanam tam tassa ananucchavikena aññena vacanena paṭicarati.

98. Yadetam aññenaññam paṭicaraanavasena pavattavacanam, tadeva pucchitamattham ṭhapetvā aññam vadati pakāsetīti aññavādakanti āha “**aññenaññam paṭicaraanassetam nāman**”ti. **Tuṇhībhūtassetam nāmanti** tuṇhībhāvassetam nāman, ayameva vā pāṭho. **Aññavādakam āropetunti** aññavāde āropetum. **Vihesakanti** vihesakattam.

99. Pāḷiyam **na ugghāṭetukāmoti** paṭicchādetukāmo.

100. **Anāropite aññavādaketi** vuttadukkaṭam pāḷiyam āgata-aññenaññapaṭicaraanavasena yujjati, aṭṭhakathāyam āgatanayena pana musāvādena aññenaññam paṭicaranatassa pācittiyena saddhim dukkaṭam, āropite imināva pācittiyam. Keci pana “musāvādapācittiyena saddhim pācittiyadvayan”ti vadanti, vīmaṇsitabbam. Ādikammikassapi musāvāde imināva anāpattīti daṭṭhabbam. Dhammakammena āropitatā, āpattiyā vā vatthunā vā anuyuñjyamānatā, chādetukāmatāya aññenaññam paṭicaraanam, tuṇhībhāvo cāti imānettha tīni aṅgāni.

Aññavādakasikkhāpadavaṇṇanā niṭṭhitā.

### 3. Ujjhāpanakasikkhāpadavaṇṇanā

103. Tatiye cintāyanatthassa **jhe**-dhātussa anekatthātāya olokanatthasambhavato vuttam “**olokāpentī**”ti. **Chandāyāti** līngavipallāsoti āha “**chandenā**”ti.

105. Bhikkhum lāmakato cintāpanattham aññesam tam avaṇṇakathanam **ujjhāpanam** nāma. Aññesam pana avatvā aññamaññam samullapanavasena bhikkhuno dosappakāsanam **khiyyanam** nāmāti ayametesam bhedo.

106. **Aññam anupasampannam ujjhāpetīti** aññena anupasampannena ujjhāpeti. **Tassa vā tam santiketi** tassa anupasampannassa santike tam saṅghena sammatarūpasampannam khiyyati. Idhāpi musāvādena ujjhāpanādīnam sambhavato dukkaṭaṭṭhānāni ca ādikammikassa anāpattī ca iminā eva sikkhāpadena

vuttāti veditabbaṃ sabbattha musāvādapācittiyassa anivattito.  
Dhammakammena sammataṭā, upasampannatā, agatigamanābhāvo, tassa  
avaṇṇakāmatā, yassa santike vadati, tassa upasampannatā, ujjhāpanaṃ vā  
khiyyanaṃ vāti imānettha cha aṅgāni.

Ujjhāpanakasikkhāpadavaṇṇanā niṭṭhitā.

#### 4. Paṭhamasenāsanāsikkhāpadavaṇṇanā

110. Catutthe **apaññātetī** appasiddhe. Imaṃ pana aṭṭha māse  
maṇḍapādīsū ṭhapanasaṅkhātāṃ atthavisesaṃ gahetvā bhagavatā  
paṭhamameva sikkhāpadaṃ paññattanti adhippāyaṃ “anujānāmi bhikkhave  
aṭṭhamāse”ti-ādivacanena anupaññattisadisena pakāsetvā visuṃ anupaññatti  
na vuttā. **Parivāre** panetaṃ anujānanavacanaṃ anupaññattiṭṭhānanti “ekā  
anupaññattī”ti<sup>1</sup> vuttaṃ.

**Navavāyīmoti** adhunā suttena vītakacchena paliveṭṭhitamañco.  
**Onaddhoti** kappiyacamma onaddho. Te hi vassena sīghaṃ na nassanti.  
“**Ukkaṭṭha-abbhokāsiko**”ti idaṃ tassa sukhapaṭipattidassanamattaṃ,  
ukkaṭṭhassāpi pana cīvarakuṭi vaṭṭateva. **Kāyānugatikkattāti** bhikkhuno  
tattheva nisīdanabhāvaṃ dīpeti, tena ca vassabhayena sayāṃ aññattha  
gacchantassa āpattīti dasseti. Abbhokāsikānaṃ temanatthāya niyametvā  
dāyakehi dinnampi attānaṃ rakkhantena rakkhitabbameva.

“**Valāhakānaṃ anuṭṭhitabhāvaṃ sallakkhetvā**”ti iminā gimhānepi  
meghe uṭṭhite abbhokāse nikkhipituṃ na vaṭṭatīti dīpeti. **Tatra tatrāti**  
cetiyaṅgaṇāḍike tasmim tasmim abbhokāse niyametvā nikkhittā. **Majjhato**  
**paṭṭhāya pādattṭhānābhīmukhāti** yattha samantato sammajjitvā aṅgaṇamajjhe  
sabbadā kacavarassa saṅkaḍḍhanena majjhe vālikā sañcitā hoti, tattha  
kattabbavidhidassanatthaṃ vuttaṃ. Uccavatthupādaṭṭhānābhīmukhaṃ vā  
vālikā haritabbā. Yattha vā pana koṇesu vālikā sañcitā, tattha tato paṭṭhāya  
aparadisābhīmukhā haritabbāti keci atthaṃ vadanti. Keci pana

1. Vi 5. 24 piṭṭhe.



“sammatṭhaṭṭhānassa padavaḷaṅḡjēna avikopānāthāya sayāṃ  
asammatṭhaṭṭhāne ṭhatvā attāno pādābhimukhaṃ vālikā haritabbāti vuttān”ti  
vadānti, tāttha “majjhato paṭṭhāyā”ti vacānassa payojānaṃ na dissati.

111. Vaṅkapādatāmātena kuḷīrapādakassa sēsēhi viśeso, na aṭānīsu  
pādappavesānaviśesēnāti dassetuṃ “yo vā paṇa koci”ti-ādi vuttāṃ. **Tassāti**  
upāsāmpānāsēva.

**Nisīditvā -pa- pācittiyānti** ettha megghuṭṭhānābhāvaṃ ṇātvā “pacchā  
āgantvā uddharissāmi”ti ābhogēna gacchāntassa anāpatti, tena  
punāgantabbāvēva. Kappāṃ labhitvāti “gaccha, mā idha tiṭṭhā”ti  
vuttavacānaṃ labhitvā.

**Āvāsikānaṃyēva palibodhoti** āgantukēsū kiṅci avātvā nisīditvā “āvāsikā  
ēva uddharissānti”ti gatesupī āvāsikānāvēva palibodho. **Mahāpaccarivāde**  
paṇa “idaṃ amhākaṃ”ti avātvāpī nisinnānāvēvāti adhippāyo. “Santharivā  
vā santharāpetvā vā”ti  
vuttattā anāṇattiyā paṇṇāpitattāpī dukkaṭe kāraṇāṃ vuttāṃ. **Ussārakoti**  
sarabhāṇako. So hi uddhāṃ uddhāṃ pāḷipāṭhāṃ sāretī pavattētīti ussārakoti  
vuccati.

112. **Vaṅṇānurakkhaṇatthāṃ katāti** paṭakhaṇḍādīhi sibbitvā katā.  
**Bhūmiyāṃ attharitabbāti** cimilikāya sātī tassā uparī, asātī suddhabhūmiyāṃ  
attharitabbā. “**Sīhacammādīnaṃ parihaṇeyēva paṭikkhepo**”ti iminā  
maṅcapīṭhādīsū attharivā puna sāmharivā ṭhapanādivāsēna attāno atthāya  
pariharaṇāvēva na vaṭṭati, bhūmattharaṇādivāsēna paribhogo paṇa attāno  
pariharaṇāṃ na hotīti dassetī. **Khēndhake** hi “antopī maṅce paṇṇattānī hontī,  
bahipī maṅce paṇṇattānī hontī”ti<sup>1</sup> evāṃ attāno attāno atthāya maṅcādīsū  
paṇṇāpetvā **pariharaṇavattusmīṃ**—

“Na bhikkhave mahācammānī dhāretabbānī sīhacammaṃ  
byagghacammaṃ dīpicammaṃ. Yo dhāreyya, āpatti dukkaṭassā”ti<sup>1</sup>—

---

1. Vi 3. 281 piṭṭhe.

paṭikkhepo kato. Tasmā vuttanayenevettha adhippāyo daṭṭhabbo.

**Dārumayapīṭhanti** phalakamayapīṭhameva. **Pādakathalikanti** adhotapādaṃ yasmim̄ ghaṃsantā dhovanti, taṃ dāruphalakādi.

113. “Āgantvā uddharissāmīti gacchatī”ti vuttattā aññenapi kāraṇena anotāpentassapi āgamane sāpekkhassa anāpatti. Teneva **mātikāṭṭhakathāyaṃ** “mañcādīnaṃ saṃghikatā, vuttalakkhaṇe dese santharaṇaṃ vā santharāpanaṃ vā, apalibuddhatā, āpadāya abhāvo, nirapekkhatā, leḍḍupātātikkamo”<sup>1</sup>ti evamettha nirapekkhatāya saddhim̄ cha aṅgāni vuttāni.

Paṭhamasenāsanāsikkhāpadavaṇṇanā niṭṭhitā.

### 5. Dutiyasenāsanāsikkhāpadavaṇṇanā

116. Pañcame **pāvāro kojavoti** paccattharaṇatthāyeva ṭhapitā uggatalomā attharaṇavisesā. **Ettakameva vuttanti** aṭṭhakathāsu vuttaṃ. **Senāsanatoti** sabbapacchimasenāsanato.

117. **Kurundaṭṭhakathāyaṃ** vuttamevatthaṃ savisesaṃ katvā **dassetuṃ** “**kiñcāpi vutto**”ti-ādi āradḍhaṃ. **Vattabbaṃ natthīti** rukkhamūlassa pakaṭattā vuttaṃ. **Palujjatīti** vinassati.

118. Yena mañcaṃ vā piṭhaṃ vā vīnanti, taṃ **mañcapīṭhakavānaṃ**. **Siluccayaleṇanti** pabbataguhā. “**Āpucchanāṃ pana vatthan**”ti iminā āpatti natthīti dasseti. Vuttalakkhaṇaseyyā, tassā saṃghikatā, vuttalakkhaṇe vihāre santharaṇaṃ vā santharāpanaṃ vā, apalibuddhatā, āpadāya abhāvo, anapekkhassa disāpakkamaṇaṃ, upacārasīmātikkamoti imānettha satta aṅgāni.

Dutiyasenāsanāsikkhāpadavaṇṇanā niṭṭhitā.

---

1. Kaṅkhā-Ṭṭha 202 piṭṭhe.

## 6. Anupakhajjasikkhāpadavaṇṇanā

119. Chaṭṭhe **anupavisitvā**ti samīpaṃ pavisitvā.

122. **Upacāraṃ ṭhapetvā**ti diyaḍḍhahatthūpacāraṃ ṭhapetvā. Saṃghikavihāratā, anuṭṭhāpanīyabhāvajānanam, sambādhētukāmatā, upacāre nisīdanam vā nipajjanam vāti imānettha cattāri aṅgāni.

Anupakhajjasikkhāpadavaṇṇanā niṭṭhitā.

## 7. Nikkaḍḍhanasikkhāpadavaṇṇanā

126. Sattame **koṭṭhakānī**ti dvārakoṭṭhakāni.

128. “**Sakalasaṃghārāmato nikkaḍḍhituṃ na vaṭṭati**”ti idaṃ ananurūpato vuttam. Pāpagaragitāya hi akupitacittena nikkaḍḍhāpentassa iminā sikkhāpadena āpatti natthi “kupito anattamano”ti vuttattā. Aññāpekkhā<sup>1</sup> āpatti na dissati. Pāḷiyam “**alajjirṃ nikkaḍḍhati**”ti-ādīsu cittassa lahuparivattitāya antarantarā kope uppannepi anāpatti alajjitā dipaccayeneva nikkaḍḍhanassa āradhattā. Saṃghikavihāro, upasampannassa bhaṇḍanakārahāvādivinimuttatā, kopena nikkaḍḍhanam vā nikkaḍḍhāpanam vāti imānettha tīṇi aṅgāni.

Nikkaḍḍhanasikkhāpadavaṇṇanā niṭṭhitā.

## 8. Vehāsakuṭisikkhāpadavaṇṇanā

129. Aṭṭhamam uttānameva. Saṃghiko vihāro, asīsaghaṭṭavehāsakuṭi, heṭṭhā paribhogatā, apaṭṭānidinne āhaccapādake nisīdanam vā nipajjanam vāti imānettha cattāri aṅgāni.

Vehāsakuṭisikkhāpadavaṇṇanā niṭṭhitā.

---

1. Aññāpekkhāpi (?)

### 9. Mahallakavīhārasikkhāpadavaṇṇanā

135. Navame “mahallako nāma vihāro sassāmiko”ti vuttattā saññācīkāya kuṭiyā anāpattīti vadanti. **Yassāti** vihārassa. **Sā aparipūrūpacārāpi hotīti** vivariyamānaṃ kavāṭaṃ yaṃ bhittim āhanati, sā sāmantā<sup>1</sup> kavāṭavithhārapamāṇā upacārahitāpi hotīti attho. Ālokaṃ vātapānaṃ sandheti ghaṭayatīti **ālokasandhīti** kavāṭaṃ vuccati. Dvāravātapānūpacārato aññattha punappunaṃ limpanādim karontassa piṇḍagaṇanāya pācittiyam.

Keci pana “pāliyaṃ pācittiyassa avuttattā dukkaṭaṇ”ti vadanti. **Adhiṭṭhātabbanti** saṃvidhātabbaṃ. **Harite ṭhito adhiṭṭhāti, āpatti dukkaṭassāti** haritayutte khette ṭhatvā chādentassa dukkaṭanti attho. Keci pana “tādise khette vihāraṃ karontassa dukkaṭaṇ”ti vadanti, taṃ pāliyā na sameti.

136. **Ujukameva chādananti** chādanamukhavaṭṭito paṭṭhāya yāva piṭṭhivaṃsakūṭāgāraṇṇikādi, tāva iṭṭhakādīhi ujukaṃ chādanaṃ. Iminā pana yena sabbasmim vihāre ekavāraṃ chādite taṃ chādanaṃ ekamagganti gahetvā pāliyaṃ “dve magge”ti-ādi vuttaṃ. Pariyāyena chādanampi imināva nayena yojetabbanti vadanti, taṃ “punappunaṃ chādāpesī”ti imāya pāliyā ca “sabbampi cetam chādanaṃ chādanūpari veditabbaṇ”ti iminā aṭṭhakathāvacanena ca sameti.

Pāliyaṃ “maggena chādentassa pariyāyena chādentassā”ti idaṅca iṭṭhakādīhi, tiṇapaṇṇehi ca chādanappakārebhedadassanattam vuttaṃ. Keci pana “pantiyā chāditaṃ chādanassa upari chādanamukhavaṭṭito paṭṭhāya uddham ujukameva ekavāraṃ chādanaṃ ekamagganti gahetvā ‘dve magge’ti-ādi vuttaṃ, na pana sakalavīhārachādanaṃ. Esa nayo pariyāyena chādanepī”ti vadanti, taṃ pāli-aṭṭhakathāhi na sameti.

**Tatiyāya magganti** ettha **tatiyāyāti** upayogathe sampadānavacanam, tatiyaṃ magganti attho. Ayameva vā pāṭho. **Tiṇapaṇṇehi labbhatīti** tiṇapaṇṇehi chādetvā upari ullittāvalittakaraṇam sandhāya vuttaṃ.

---

1. Samantā (Ka)

kevalam tiṇakuṭiyā hi anāpatti vuttā<sup>1</sup>. **Tiṇṇam maggānanti** maggavasena chādītānam tiṇṇam chadanānam. **Tiṇṇam pariyāyananti** etthāpi eseva nayo. Mahallakavīhāratā, attano vāsāgaratā, uttari adhiṭṭhānanti imānettha tīṇi aṅgāni.

Mahallakavīhārasikkhāpadavaṇṇanā niṭṭhitā.

### 10. Sappāṇakasikkhāpadavaṇṇanā

140. Dasame **mātikāyam** sappāṇaka-udakam tiṇena vā mattikāya vā siñceyya, chaḍḍeyyāti attho. Atha vā udakam gahetvā bahi siñceyya, tasmīṅca uduke tiṇam vā mattikam vā āharitvā pakkhipeyyāti ajjhāharitvā attho vedītabbo. Tenāha “**sakaṭabhāramattañcepi**”ti-ādi. **Idanti** tiṇamattikapakkhipanavidhānam. **Vuttanti** mātikāyam “tiṇam vā mattikam vā”ti evam vuttam, aṭṭhakathāsu vā vuttam.

Idaṅca sikkhāpadam bāhiraparibhogam sandhāya vatthivasena vuttam abbhantaraparibhogassa visum vakkhamānattā. Tadubhayampi “sappāṇakan”ti katvā vadhakacittam vināva siñcane paññattattā “paṇṇattivajjan”ti vuttam. Vadhakacitte pana sati sikkhāpadantareneva pācittiyam, na imināti daṭṭhabbam. Udakassa sappāṇakatā, “siñcanena pāṇakā marissantī”ti jānanam, tādīsameva ca udakam vinā vadhakacetanāya kenacideva karaṇīyena tiṇādīnam siñcananti imānettha cattāri aṅgāni.

Sappāṇakasikkhāpadavaṇṇanā niṭṭhitā.

Niṭṭhito senāsanavaggo dutiyo.

“Bhūtagāmaṅgavaggo”tipi etasseva nāmaṅ.

---

1. Vuttattāti (Ka)

### 3. Ovādavagga

#### 1. Ovādasikkhāpadavaṇṇanā

144. Tatiyavaggassa paṭhame **tiracchānabhūta**nti tirokaraṇabhūtaṃ, bāhirabhūtaṃ attho. **Samiddhoti** paripuṇṇo. **Sahitatto** atthayutto. Atthagambhīratādinā **gambhīro**.

145-147. **Paratoti** uttari. **Karontovāti** paribāhire karonto. **Vibhaṅgeti** jhānavibhaṅge. **Carāṇanti** nibbānagamanāya pādaṃ.

**Yadassāti** yaṃ assa. **Dhāretīti** avinassamaṇaṃ dhāreti. **Parikathanatthanti** pakiṇṇakakathāvasena paricchinnadhammakathanattham. **Tisso anumodanāti** saṃghabhaddādisu dānānisaṃsappaṭisaṃyuttā **nidhikuṇḍasuttā**di<sup>1</sup>anumodanā, gehappavesamaṅgalādisu **maṅgalasuttā**di<sup>2</sup>anumodanā, matakabhaddādi-amaṅgalesu **tirokuṭṭā**di<sup>3</sup> anumodanāti imā tisso anumodanā. **Kammākammavinicchayoti** parivārāvasāne **kammavagge**<sup>4</sup> vuttavinicchayo. **Samādhivasenāti** samathapubbakavasena. **Vipassanāvasena vāti** diṭṭhivisuddhi-ādikāya sukkhavipassanāya vasena. Attano sīlarakkhaṇattham aparānapekkhatāya yena kāmaṃ gantum catasso disā arahati, assa vā santi, tāsū vā sādhuṭi **cātuddiso**.

**Abhivinayeti** pātimokkhasaṃvarasaṅkhāte saṃvaravinaye, tappakāsake vā vinayapiṭake. **Vinetunti** sikkhāpetum pakāsetum. **Paguṇā vācuggatāti** pāṭhato ca atthato ca paguṇā mukhe sannidhāpanavasena vācuggatā kātabbā, atthamattavasena pettha yojanaṃ karonti. **Abhidhammeti** lakkhaṇarasādivasena paricchinne nāmarūpadhamme. Pubbe kira mahātherā pariyatti-anantaradhānāya ekekassa gaṇassa dīghanikāyādi-ekekadhammakotṭhāsaṃ niyyātentā “tumhe etaṃ pālito ca aṭṭhakathāto ca pariharatha, sakkontā uttaripi uggaṇhathā”ti evaṃ sakaladhammaṃ ganthavasena<sup>5</sup> niyyātentī, tattha te ca bhikkhū ganthanaṃmena dīghabhāṇakā majjhimabhāṇakāti voharīyanti, te ca attano bhārabhūtaṃ koṭṭhāsaṃ pariccajivā

1. Khu 1. 9 piṭṭhe Khuddakapāṭhe.

2. Khu 1. 3. 318 piṭṭhesu.

3. Khu 1. 8; Khu 2. 129 piṭṭhesu.

4. Vi 5. 380 piṭṭhe.

5. Gaṇavasena (Ka)

aññaṃ uggahetuṃ na labhanti. Taṃ sandhāyāya “**sace majjhimabhāṇako hotī**”ti-ādi.

Tattha **heṭṭhimā vā tayo vaggā**ti mahāvaggato heṭṭhimā sagāthakavaggo<sup>1</sup>, nidānavaggo<sup>2</sup>, khandhavaggāti<sup>3</sup> ime tayo vaggā. **Tikanipātato paṭṭhāya heṭṭhā**ti ekakanipātadukanipāte sandhāya vuttaṃ. Dhammapadampi saha vatthunā jātakabhāṇakena attano jātakena saddhim uggahetabbaṃ. **Tato oram na vaṭṭatī**ti mahāpaccarivādassa adhippāyo. **Tato tatoti** dīghanikāyādito. Uccinitvā uggahitaṃ saddhammassa ṭhitiyā, bhikkhunopi pubbāparānusandhi-ādikusalatāya ca na hotīti “taṃ na vaṭṭatī”ti paṭikkhittaṃ. **Abhidhamme kiñci uggahetabbanti na vuttanti** ettha yasmā vinaye kusalattikādivibhāgo, suttantesu samathavipassanāmaggo ca abhidhammapāṭhaṃ vinā na viññāyati, andhakāre pavittakālo viya hoti, tasmā suttavinayānaṃ gahaṇavasena abhidhammaggaṇaṃ vuttamevāti visuṃ na vuttanti veditabbaṃ. Yathā “bhojanaṃ bhuñjitabban”ti vutte “byañjanaṃ khāditabban”ti avuttampi vuttameva hoti tadavinābhāvato, evaṃsampadamidaṃ daṭṭhabbaṃ.

**Parimaṇḍalapadabyañjanāyā**ti parimaṇḍalāni paripuṇṇāni padesu sithiladhanitādibyañjanāni yassaṃ, tāya. Purassa esāti **porī**, nagaravāsīnaṃ kathāti attho. **Anelagalāyā**ti ettha **elā**ti kheḷaṃ taggaḷanavirahitāya. **Kalyāṇavākkaraṇoti** ettha vācā eva vākkaraṇaṃ, udāharaṇagghoso. Kalyāṇaṃ madhuraṃ vākkaraṇamassāti kalyāṇa vākkaraṇo. Upasampannāya methuneneva abhabbo hoti, na sikkhamānāsāmaṇerīsūti āha “**bhikkhuniyā kāyasamsaggaṃ vā**”ti-ādi.

148. **Garukehī**ti garukabhaṇḍehi. **Ekato upasampannāyā**ti upayogatthe bhummavacanaṃ. **Bhikkhūnaṃ santike upasampannā** nāma parivattaliṅgā vā pañcasatasākīyāniyo vā. Etā pana ekato-upasampannā ovadantassa pācittiyameva.

149. **Na nimantitā hutvā gantukāmā**ti nimantitā hutvā bhojanapariyosāne gantukāmā na honti, tattheva vasitukāmā

1. Saṃ 1. 1 piṭṭhādīsu.

2. Saṃ 1. 243 piṭṭhādīsu.

3. Saṃ 2. 1 piṭṭhādīsu.

hontīti attho. **Yatoti** bhikkhunupassayato. **Yācivvāti** “tumhehi ānīta-ovādeneva mayampi vasissāmā”ti yācivvā. **Tatthāti** tasmim bhikkhunupassaye. Abhikkhukāvāse vassam vasantiyā pācittiyam, apagacchantiyā dukkaṭam.

Imāsu katarāpatti pariharitabbāti codanam pariharanto āha “**sā rakkhitabbā**”ti. Sā vassānugamanamūlikā āpatti rakkhitabbā, itarāya anāpattikāraṇam atthīti adhippāyo. Tenāha “**āpadāsu hī**”ti-ādi.

**Ovādatthāyāti** ovāde yācanatthāya. **Dve tissoti** dvīhi tīhi, karaṇatthe cetam paccattavacanam. **Pāsādikenāti** pasādajanakena kāyakammādinā. **Sampādetūti** tividham sikkham sampādetu. Asammatatā, bhikkhuniyā paripuṇṇūpasampannatā, ovādasena aṭṭhagarudhammadānanti imānettha tīṇi aṅgāni.

Bhikkhunovādasikkhāpadavaṇṇanā niṭṭhitā.

## 2. Atthaṅgatasikkhāpadavaṇṇanā

153. Dutiye **kokanadanti** padumavisesam, tam kira bahupattam vaṇṇasampannam. Ayañhettha attho—yathā kokanadasaṅkhātam padumam, evam phullamukhapadumam avītaguṇagandham nimmale antalikkhe ādiccam viya ca attano tejasā tapantam tato eva virocāmānam aṅgehi niccharaṇakajutiyā aṅgīrasam sammāsambuddham passāti. **Rajoharaṇanti** sarīre rajam puñchatīti rajoharaṇanti puñchanacoḷassa nāmam. Obhāsavissajjanapubbakā bhāsitaḡāthā **obhāsagāthā** nāma. **Visuddhimaggādīsū**<sup>1</sup> pana “rāgo rajo na ca pana reṇu vuccatī”ti-ādi obhāsagāthā vuttā, na panesā “adhicetaso”ti ḡāthā. Ayañca **cūlapanthakatherassa** udānagāthāti udānapāḷiyam natthi, **ekudāniyattherassa** panāyam udānagāthāti tattha<sup>2</sup> vuttam. Idha pana pāḷiyā eva vuttattā therassāpi udānagāthāti gahetabbam. Idha ca agarudhammenāpi<sup>3</sup>

1. Visuddhi 2. 16 piṭṭhe. 2. Theragāthā-Ṭṭha 1. 192 piṭṭhe.

3. Aṭṭhagarudhammenāpi (Sī, Ka)



ovādato pācittiyameva. Atthaṅgatasūriyatā, paripuṇṇūpasampannatā, ovadananti imānettha tīṇi aṅgāni.

Atthaṅgatasikkhāpadavaṇṇanā niṭṭhitā.

---

### 3. Bhikkhunupassayasikkhāpadavaṇṇanā

162. Tatiyaṃ uttānameva. Upassayūpagamaṇaṃ, paripuṇṇūpasampannatā, samayābhāvo, garudhammehi ovadananti imānettha cattāri aṅgāni.

Bhikkhunupassayasikkhāpadavaṇṇanā niṭṭhitā.

---

### 4. Āmisasikkhāpadavaṇṇanā

164. Catutthe āmisānirapekkhampi āmisahetu ovadātītisaññāya bhaṇantassapi anāpatti sacittakattā sikkhāpadassa. Sesamettha uttānameva. Upasampannatā, dhammena laddhasammutitā, anāmisantarātā, avaṇṇakāmatāya evaṃ bhaṇananti imānettha cattāri aṅgāni.

Āmisasikkhāpadavaṇṇanā niṭṭhitā.

169. Pañcamaṃ cīvaradānasikkhāpadaṃ uttānameva.

---

### 6. Cīvarasibbanasikkhāpadavaṇṇanā

176. Chaṭṭhe **kathinavattanti** kathinamāse cīgaraṃ karontānaṃ sabrahmacārīnaṃ sahāyabhāvūpagamaṇaṃ sandhāya vuttam. **Vañcetvā**ti “tava ñātikāyā”ti avatvā “ekissā bhikkhuniyā”ti ettakameva vatvā “ekissā bhikkhuniyā”ti sutvā te aññātikasaññino ahesunti āha **“akappiye niyojittā”**ti. Aññātikāya bhikkhuniyā santakatā, nivāsanapārūpanūpagatā, vuttanayena sibbanam vā sibbāpanam vāti imānettha tīṇi aṅgāni.

Cīvarasibbanasikkhāpadavaṇṇanā niṭṭhitā.

### 7. Saṁvidhānasikkhāpadavaṇṇanā

183. Sattame pāliyaṃ **gacchāma bhagini gacchāmāyyāti** bhikkhupubbakaṃ saṁvidhānaṃ, itaraṃ bhikkhunipubbakaṃ. **Ekaddhānamagganti** ekato addhānasaṅkhātaṃ maggaṃ. **Hiyyoti** suve. **Pareti** tatiye divase.

**Dvidhā vuttappakāro**ti pādagamane pakkhagamaneti dvidhā vuttappakāro. **Upacāro na labbhatī**ti yo parikkhittādigāmassa ekaleḍḍupātādi-upacāro vutto, so idha na labbhati āsannattā. Etena ca antaraghareyevettha gāmoti adhippeto, na sakalaṃ gāmakhettaṃ. Tatthāpi upacāro labbhati, tattha upacārokkamane eva āmpattīti dasseti. Tenāha “**ratanamattantaro**”ti-ādi. Upacārokkamanañcetta upacārabbhantare pavisaṇameva hoti. Tattha appavisitvāpi upacārato bahi addhayaṇjanabbhantaragatena maggena gacchantopi maggassa dvīsu passesu addhayaṇjanabbhantaragataṃ gāmūpacāraṃ sabbaṃ okkamitvā gacchaticceva vuccati. Addhayaṇjanato bahi gatena maggena gacchanto na gāmūpacāragaṇanāya kāretabbo, addhayaṇjanagaṇanāyeva kāretabbo. Evañca sati anantarasikkhāpade nāvāyeva gāmatīrapassena gacchantassa gāmūpacāragaṇanāya āpatti samatthitā hoti. Na hi sakkā nāvāya gāmūpacārabbhantare pavisitum. Tiṇṇaṃ maggānaṃ sambandhaṭṭhānaṃ **siṅghāṭakaṃ**. **Etthantare saṁvidahitē**ti ettha na kevalaṃ yathāvuttarathikādīsu eva saṁvidahane dukkaṭaṃ, antarāmaggepi adhippāyo.

**Addhayaṇjanaṃ atikkamantassā**ti asati gāme addhayaṇjanaṃ atikkamantassa. Yasmiñhi gāmakhettabhūtepi araññe addhayaṇjanabbhantare gāmo na hoti, tampi idha agāmakāṃ araññanti adhippetāṃ, na viñjhātavādayo.

185. **Ratthabhedeti** ratthavilope. **Cakkasamāruḷhā**ti iriyāpathacakkāṃ, sakaṭacakkāṃ vā samāruḷhā. Dvinnampi saṁvidahitvā maggappaṭipatti, avisaṅketāṃ, samayābhāvo, anāpadā, gāmantarokkamaṇaṃ vā addhayaṇjanātikkaṃ vāti imānettha pañca aṅgāni. Ekato upasampannādīhi saddhiṃ saṁvidhāya gacchantassa pana mātugāmasikkhāpadena āpatti.

Saṁvidhānasikkhāpadavaṇṇanā niṭṭhitā.

### 8. Nāvābhiruhasikkhāpadavaṇṇanā

189. Aṭṭhame **ekam tīram -pa- nirantaranti** nadito addhayoanabbhantare padese niviṭṭhagāmehi nirantaratā vuttā. **Ekam agāmakam araṇṇanti** tathā niviṭṭhagāmābhāvena vuttam. **Agāmakatīrapassenāti-**ādi pana atireka-addhayoanavittatam nadim sandhāya vuttam. Tato unavittthārāya hi nadiyā majjhenāpi gamane tīradvayassāpi addhayoanabbhantare gatattā gāmantara gaṇanāya, addhayoanagaṇanāya ca āpattiyo paricchinditabbā. Teneva **“yojanavittatā -pa- addhayoanagaṇanāya pācittiyāni”**ti vuttam. Teneva hi yojanato unāya nadiyā addhayoanabbhantaragatatīravaseneva āpattigaṇanam vuttameva hoti. **“Sabba-aṭṭhakathāsū”**ti-ādinā vuttamevattham samattheti. Tattha kiñcāpi samuddataḷākādīsu pācittiyam na vuttam, tathāpi kīḷāpurekkhārassa tathā dukkaṭamevāti gahetabbam, paṭhamam kīḷāpurekkhārassāpi pacchā nāvāya niddupagatassa, yoniso vā manasikarontassa gāmantarokkamanādīsipi āpattisambhavato paṇṇattivajjatā, ticittatā cassa sikkhāpadassa vuttāti veditabbam. Sesam suviññeyyameva.

Nāvābhiruhasikkhāpadavaṇṇanā niṭṭhitā.

### 9. Paripācitasikkhāpadavaṇṇanā

197. Navame pāḷiyam **“sikkhamānā -pa- pañca bhojanāni ṭhapetvā sabbattha anāpattī”**ti idam iminā sikkhāpadena anāpattim sandhāya vuttam. Pañcahi sahadhammikehi kataviññattiparikathādīhi uppannam paribhuñjantassa dukkaṭameva. Bhikkhuniyā paripācitatā, tathā jānanam, gihisamārambhābhāvo, bhojanatā, tassa ajjhoharaṇanti imānettha pañca aṅgāni.

Paripācitasikkhāpadavaṇṇanā niṭṭhitā.

## 10. Rahonisajjasikkhāpadavaṇṇanā

198. Dasame upanandassa catutthasikkhāpadenāti mātugāmena rahonisajjasikkhāpadam sandhāya vuttam, tam pana acelakavagge pañcamampi upanandam ārabha paññattesu catutthattā evam vuttanti daṭṭhabbam.

Rahonisajjasikkhāpadavaṇṇanā niṭṭhitā.

Niṭṭhito bhikkhunivaggo tatiyo.

## 4. Bhojanavagga

### 1. Āvasathapiṇḍasikkhāpadavaṇṇanā

206. Catutthavaggassa paṭhame imesaṃyevāti imesaṃ pāsaṇḍānaṃyeva. Ettakānanti imasmim pāsaṇḍe ettakānam.

208. “Gacchanto vā āgacchanto vā”ti idam addhayaohanavasena gahetabbam. Aññe uddissa paññattañca bhikkhūsu appasannehi titthiyehi sāmāñnatopi paññattampi bhikkhūnam na vaṭṭati eva. Āvasathapiṇḍatā, agilānatā, anuvasitvā bhojananti imānettha tīṇi aṅgāni.

Āvasathapiṇḍasikkhāpadavaṇṇanā niṭṭhitā.

### 2. Gaṇabhojanasikkhāpadavaṇṇanā

209. Dutiye Abhimāreti abhibhavitvā bhagavantaṃ māraṇatthāya payojite dhanudhare. Nanu “rājānampi mārāpesī”ti vacanato idam sikkhāpadam ajātasattuno kāle paññattanti siddham, evaṃca sati pāḷiyam “tena kho pana samayena rañño māgadhasa -pa- ñātisālohito ājīvakesu pabbajito hoti -pa- bimbisāram etadavocā”ti-ādi virujjhatīti? Na virujjhati. So kira ājīvako bimbisārakālato pabhuti antarantarā bhikkhū nimantetvā dānam dento ajātasattukālepi sikkhāpade paññattepi bhikkhūnam santikedūtam pāhesi, bhikkhū ca kukkucāyantā nivāresum. Tasmā ādito paṭṭhāya tam vatthu dassitanti veditabbam.

215. Aññamaññaṃ visadisam rajjam virajjam, virajjato āgatā **verajjakā**. Te ca yasmā jātigottādito nānāvidhā, tasmā **nānāverajjaketipi** attho.

217-8. Imassa sikkhāpadassa vatthuvaseveva viññattito gaṇabhojanatthatā siddhāti taṃ avatvā padabhājane asiddhameva nimantanato gaṇabhojanam dassitanti veditabbam. Tenāha “**dvihākārehi**”ti-ādi. “**Yena kenaci vevacanenā**”ti vuttattā “bhojanam gaṇhathā”ti-ādisāmaññanāmenāpi gaṇabhojanam hoti. Yam pana pāḷiyam addhānagamanādivatthūsu “idheva bhuñjathā”ti vuttavacanassa kukkucāyanam, tampi odanādināmaṃ gahetvā vuttattā eva katanti veditabbam. **Ekato gaṇhantī**ti aññamaññaassa dvādasahattham amuñcivā ekato ṭhatvā gaṇhanti.

“**Amhākam catunnampi bhattam dehi**”ti vuttattā pāḷi (vaṇṇanā) yam “tvam ekassa bhikkhuno bhattam dehi”ti-ādino vuttattā ca bhojananāmena viññattameva gaṇabhojanam hoti, tañca aññaena viññattampi ekato gaṇhantānam sabbesampi hotīti daṭṭhabbam. Visum gahitam pana viññattam bhuñjato paṇītabhojanādisikkhāpadehi āpatti eva.

**Āgantukapaṭṭanti** acchinditvā anvādhiṃ āropetvā karaṇacīvaram sandhāya vuttam. **Ṭhapetī**ti ekaṃ antam cīvare bandhanavasena ṭhapeti. **Paccāgatam sibatī**ti tasseva dutiya-antam parivattitvā āhatam sibbati. **Āgantukapaṭṭam bandhatī**ti cīvarena laggam karonto punappunam tattha tattha suttana bandhati. **Ghaṭṭetī**ti pamāṇena gahetvā daṇḍādīhi<sup>1</sup> ghaṭṭeti. **Suttam karotī**ti guṇādibhāvena vaṭṭeti. **Valetī**ti anekaguṇasuttam hatthena vā cakkadaṇḍena vā vaṭṭeti ekattam karoti. **Parivattanam karotī**ti parivattanadaṇḍayantakam karoti, yasmim suttaguḷam pavesetvā veḷunālikādīsu ṭhapetvā paribbhamāpetvā suttakoṭito paṭṭhāya ākaḍḍhanti.

220. **Animantitacatutthanti** animantito catuttho yassa bhikkhucatuḅkassa, tam animantitacatuttham. Evam sesesupi. Tenāha “**pañcannam catukkānan**”ti. **Sampavesetvā**ti tehi yojetvā. **Gaṇo bhijjati**ti nimantitasamgho na hotīti attho.

**Adhivāsetvā gatesūti** ettha akappiyanimantanādhivāsanakkhaṇe pubbapayoge dukkaṭampi natthi, viññattito pasavane pana viññattikkhaṇe itarasikkhāpadehi dukkaṭam hotīti gahetabbam. **Nimantanam sādiyathāti** nimantanabhattham paṭiggaṇhatha. **Tāni cāti** kummāsādīni ca tehi bhikkhūhi ekena pacchā gahitattā ekato na gahitāni.

“**Bhattuddesakena paṇḍitena bhavitabbarū -pa- mocetabbā**”ti etena bhattuddesakena akappiyanimantane sādite sabbesampi sāditaṃ hoti, ekato gaṇhantānam gaṇabhojanāpatti ca hotīti dasseti. Dūtassa dvāre āgantvā puna “**bhattam gaṇhathā**”ti vacanabhayena “**gāmadvāre aṭṭhatvā**”ti vuttam. Gaṇabhojanatā, samayābhāvo, ajjhoharaṇanti imānettha tīṇi aṅgāni.

Gaṇabhojanasikkhāpadavaṇṇanā niṭṭhitā.

### 3. Paramparabhojanasikkhāpadavaṇṇanā

221. Tatiye pāḷiyam **bhattapaṭipāṭi aṭṭhitāti** kulapaṭipāṭiyā dātabbā bhattapaṭipāṭi aṭṭhitā na ṭhitā, abbochinnā nirantarappavattāti attho. Badaraphalāni pakkhipitvā pakkayāgu-ādikaṃ “**badarasāḷavan**”ti vuccati.

Pāḷiyam **paramparabhojaneti** yena paṭhamam nimantito, **tassa** bhojanato parassa bhojanassa bhujjane. Vikappanāva idha anupaññattivāsena mātikāyam anāropitāpi **parivāre** “catasso anupaññattiyo”<sup>1</sup> anupaññattiyam gaṇitā. Tattha kiñcāpi aṭṭhakathāyam mahāpaccarivādassa pacchā kathanena parammukhāvikkappanā patiṭṭhapitā, tathāpi sammukhāvikkappanāpi gahetabbāva. Teneva **mātikāṭṭhakathāyampi** “yo bhikkhu pañcasu sahadhammikesu aññatarassa ‘mayham bhattapaccāsam tuyham dammī’<sup>2</sup> ti vā ‘vikappemī’<sup>2</sup> ti vā evam sammukhā”<sup>2</sup> ti-ādi vuttam.

229. **Khīram vā rasam vāti** pañcabhojanāmisam bhattato upari ṭhitam sandhāya vuttam. Tañhi abhojanattā uppaṭipāṭiyā pivatopi anāpatti. Tenāha “**bhujjantena**”<sup>2</sup> ti-ādi.

1. Vi 5. 29 piṭṭhe.

2. Kaṅkhā-Ṭṭha 217 piṭṭhe.

Vikappanāya akaraṇato akiriyāvasena idaṃ vācāyapi samuṭṭhanti āha “**vacīkamman**”ti. Paramparabhojanatā, samayābhāvo, ajjhoharaṇanti imānettha tīṇi aṅgāni.

Paramparabhojanasikkhāpadavaṇṇanā niṭṭhitā.

#### 4. Kāṇamātāsikkhāpadavaṇṇanā

231. Catutthe pāḷiyam **paṭiyālokanti** pacchimadisam, pacchādisanti attho. Apātheyyādi-atthāya paṭiyāditantisāññāya gaṇhantassāpi āpatti eva acittakattā sikkhāpadassa. Attano atthāya “imassa hatthe dehī”ti vacanenāpi āpajjanato “**vacīkamman**”ti vuttam. Vuttalakkaṇapūvamanthata, asesakata, appaṭippassaddhagamanatā, aññātakādītā, atirekapaṭiggahaṇanti imānettha pañca aṅgāni.

Kāṇamātāsikkhāpadavaṇṇanā niṭṭhitā.

#### 5. Paṭhamapavāraṇasikkhāpadavaṇṇanā

237. Pañcame “**ti-kāraṃ avatvā**”ti iminā kātabbasaddasāmatthiyā laddham itī-padam katakāle na vattabbanti<sup>1</sup> dasseti. Idha pana ajānantehi itī-sadde payuttepi atirittam katameva hotīti daṭṭhabbam.

238-9. “Pavārito”ti idaṅca kattu-atthe nipphannanti dassetuṃ “**katapavāraṇo**”ti-ādi vuttam. Bhuttāvī-padassa niratthakabhāvameva sādhetuṃ “**vuttampi cetan**”ti-ādi vuttam. **Tāhī**ti puthukāhi. **Sattumodakoti** sattum temetvā kato apakko. Sattum pana pīṭṭhā katvā temetvā pūvam katvā pacanti, tam na pavāreti. “**Paṭikkhipitabbatṭhāne ṭhitameva paṭikkhipati nāmā**”ti vuttattā yaṃ yaṃ alajjisantakam vā attano apāpuṇakasamghikādīm vā paṭikkhepato pavāraṇā na hotīti daṭṭhabbam.

**Āsannataram aṅganti** hatthapāsato bahi ṭhatvā onamitvā dentassa sīsam āsannataram hoti, tassa orimantena paricchinditabbam.

1. Sabbasaddasāmatthiyāsu likhitam itisaddapayogaṃ katakāle na vattabbanti (Sī, Ka)

**Apanāmetvā**ti abhimukhaṃ haritvā. “**Imaṃ bhattaṃ gaṇhā**”ti vadatīti kiñci anāmetvā vadati. Kevalaṃ vācābhīhārassa anadhippetattā gaṇhathāti gaheṭuṃ āradhaṃ kaṭacchunā anukkhittampi pubbepi evaṃ abhihaṭṭā pavāraṇā hotīti “**abhihaṭṭāva hoti**”ti vuttaṃ. **Uddhaṭṭamatteti** bhājanato viyojitamatte. **Dvinnam samabhārepīti** parivesakassa ca aññassa ca bhattapacchibhājanavahane samakepīti attho.

**Rasaṃ gaṇhathāti** ettha kevalaṃ maṃsarasassa apavāraṇājanakassa nāmena vuttattā paṭikkhipato pavāraṇā na hoti. **Maccharasanti**-ādīsu maccho ca rasañcāti atthassa sambhavato vatthunopi tādisattā pavāraṇā hoti, “idaṃ gaṇhathā”tipi avatvā tuṅhībhāvena abhihaṭṭaṃ paṭikkhipatopi hoti eva. **Karambakoti** missakādhivacanametam. Yañhi bahūhi missetvā karonti, so “karambako”ti vuccati.

“**Uddissa katan**”ti maññamānoti ettha vatthuno kappiyattā “**pavāritova hoti**”ti vuttaṃ. Tañce uddissa katameva hoti, paṭikkhepo natthi. **Ayamettha adhippāyoti** “yenāpucchito”ti-ādinā vuttamevatthaṃ sandhāya vadati. **Kāraṇaṃ panettha duddasanti** bhattassa bahutarabhāvena pavāraṇāsambhava-kāraṇaṃ duddasaṃ, aññathā karambakepi macchādibahubhāve pavāraṇā bhaveyyāti adhippāyo. Yathā cettha kāraṇaṃ duddasaṃ, evaṃ parato “missakaṃ gaṇhathā”ti etthāpi kāraṇaṃ duddasamevāti daṭṭhabbaṃ. Yañca “idaṃ pana bhattamissakamevā”ti-ādi kāraṇaṃ vuttaṃ, tampi “appataraṃ na pavāretī”ti vacanena na sameti. **Visuṃ katvā detīti** “rasaṃ gaṇhathā”ti-ādinā vācāya visuṃ katvā detīti attho gaheṭabbo, na pana kāyena rasādīṃ viyojetvāti. Tathā aviyojitepi paṭikkhipato pavāraṇāya asambhavato appavāraṇāpahoṇakassa nāmena vuttattā bhattamissakayāguṃ āharitvā “yāguṃ gaṇhathā”ti vuttaṭṭhānādīsu viya, aññathā vā ettha yathā pubbāparaṃ na virujjhati, tathā adhippāyo gaheṭabbo.

**Nāvā vā setu vāti**-ādimhi nāvādi-abhiruhanādikkhaṇe kiñci ṭhatvāpi abhiruhanādikātabbattepi gamanatapparatāya ṭhānaṃ nāma na hoti, janasammaddena pana anokāsādibhāvena kātuṃ na vaṭṭati. **Acāletvāti**



vuttaṭṭhānato aññasmimpi padese vā uddham vā apesetvā tasmim eva pana ṭhāne parivattetuṃ labhati. Tenāha “**yena passenā**”ti-ādi.

**Akappiyabhojanam vāti** kuladūsanādinā uppannam, tam “akappiyan”ti iminā tena missam odanādi atirittam hoti evāti dasseti. Tasmā yam tattha akappakataṃ kandaphalādi, tam apanetvā sesam bhuñjitabbameva.

**So puna katum na labhatīti** tasmiññeva bhājane kariyamānam paṭhamakatena saddhim kataṃ hotīti puna so eva katum na labhati, añño labhati. Aññena hi katato añño puna katum labhati. Aññasmim pana bhājane tena vā aññena vā katum vaṭṭati. Tenāha “**yena akatam, tena kātabbam, yañca akatam, tam kātabban**”ti. **Evam katanti** aññasmim bhājane kataṃ. **Sace pana āmisasamsaṭṭhānīti** ettha mukhādīsu laggampi āmisam sodhetvāva atirittam bhuñjitabbanti veditabbam.

241. Vācāya āṇāpetvā atirittam akārāpanato akiriyasamuṭṭhānanti daṭṭhabbam. Pavāritabhāvo, āmisassa anatirittatā, kāle ajjhoharaṇanti imānettha tīṇi aṅgāni.

Paṭhamapavāraṇāsikkhāpadavaṇṇanā niṭṭhitā.

## 6. Dutiyapavāraṇāsikkhāpadavaṇṇanā

243. Chaṭṭhe “bhuttasmin”ti mātikāyam vuttatā bhojanapariyosāne pācittiyam. Pavāritatā, tathāsaññitā, āsādanāpekkhatā, anatirittena abhihaṭapavāraṇā, bhojanapariyosānanti imānettha pañca aṅgāni.

Dutiyapavāraṇāsikkhāpadavaṇṇanā niṭṭhitā.

## 7. Vikālabhojanasikkhāpadavaṇṇanā

247. Sattame naṭānam nāṭakāti **naṭānāṭakā**, sītāharaṇādīni.

248-9. **Khādanīye khādanīyatthanti** pūvādikhādanīye vijjamānakhādanīyakiccaṃ khādanīyehi kātabbam jighacchāharaṇasaṅkhātāṃ attham payojanam **neva**

**pharanti** na nipphādentī. Ekasmim̄ dese āhāra-kiccaṃ sādheṃtaṃ vā aññasmim̄ dese uṭṭhitabhūmirasādibhedena āhāra-kiccaṃ asādheṃtempī vā sambhaveyyāti āha “**tesu tesu janapadesū**”ti-ādi. Keci pana “ekasmim̄ janapade āhāra-kiccaṃ sādheṃtaṃ sesajanapadesupī vikāle na kappatī evāti dassanattamaṃ vuttan”tipī<sup>1</sup> vadanti. **Pakati-āhāravasenā**ti aññehi yāvakaḷikehi ayojitaṃ attano pakatiyāva āhāra-kiccakaraṇavasena. **Sammohoyeva hotī**ti anekathānaṃ nāmānaṃ appasiddhānaṃca sambhavato sammoho eva siyā. Tenevettha mayampi mūlakamūlādīnaṃ pariyāyantaradassanena adassanaṃ karimha upadesatova gahetabbato.

**Yanti** vaṭṭakandaṃ. **Muḷā**lanti thūlataṇṇamūlameva, **rukkhavallī-ādīnaṃ matthakoti** heṭṭhā vuttameva sampiṇḍetvā vuttaṃ. Acchivādīnaṃ aparipakkāneva phalāni yāvajīvikānīti dassetuṃ “**aparipakkānī**”ti vuttaṃ. **Harītakādīnaṃ aṭṭhīnī**ti ettha miṅṇaṃ yāvakaḷikanti keci vadanti, taṃ na vuttaṃ aṭṭhakathāyaṃ avuttattā.

Hiṅgurukkhato paggharitanīyyāso **hiṅgu** nāma. **Hiṅgujatu**-ādayo ca hiṅguvikatiyova. Tatha **hiṅgujatu** nāma hiṅgurukkhassa daṇḍapattāni pacitvā kataniyyāso. **Hiṅgusipāṭikā** nāma hiṅgupattāni pacitvā kataniyyāso. Aññena missetvā katotipi vadanti. **Takanti** aggakoṭiyā nikkhantasīleso. **Takapattinti** pattato nikkhantasīleso. **Takapaṇṇinti** palāse bhajjitvā katasīleso. Daṇḍato nikkhantasīlesotipi vadanti. Vikālatā, yāvakaḷikatā, ajjhoharaṇanti imānettha tīni aṅgāni.

Vikālabhojanasikkhāpadavaṇṇanā niṭṭhitā.

## 8. Sannidhikāra-kasikkhāpadavaṇṇanā

252-3. Aṭṭhame **tādisanti** asūpabyañjanaṃ. **Yāvakaḷikaṃ vā yāmakālikaṃ vā -pa-** **pācittiyanti** ettha kiñcāpi pāḷiyaṃ khādanīyabhojanīya padehi yāvakaḷikameva saṅgahitaṃ, na yāmakālikaṃ, tathāpi “anāpatti yāmakālikaṃ yāme nidahitvā bhuñjati”ti idha ceva—

1. Sārattha-Ṭī 3. 65 piṭṭhe.

“Yāmakālikena bhikkhave sattāhakālikam -pa- yāvajīvikam tadahupaṭiggahitam yāme kappati, yāmātikkante na kappati”<sup>1</sup>—

aññattha ca vuttatā, “yāmakālikan”<sup>2</sup>ti vacanasāmatthiyato ca bhagavato adhippāyaññūhi aṭṭhakathācariyehi yāmakālikam sannidhikārakakataṃ pācittiyavatthumeva vuttanti daṭṭhabbāṃ. **Yanti** pattam, ghaṃsanakiriyāpekkhāya cetam upayogavacanam. **Āngulilekhā paññāyatī** sinehābhāvepi pattassa succhavitāya paññāyati. **Yanti** yāvakālikam, yāmakālikañca. **Apariccattamevā**ti nirapekkhatāya anupasampannassa adinnam, apariccattañca<sup>2</sup> yāvakālikādivatthumeva sandhāya vadati, na pana taggatapaṭiggahaṇam. Na hi vatthum apariccajitvā tatthagatapaṭiggahaṇam pariccajitum sakkā, na ca tādisam vacanamatthi. Yadi bhaveyya, “sace patto duddhoto hoti -pa- bhuñjantassa pācittiyān”<sup>3</sup>ti vacanam virujjheyya. Na hi dhovanena āmisam apanetum vāyamantassa paṭiggahaṇe apekkhā<sup>3</sup> vattati. **Yena** punadivase bhuñjato pācittiyam janeyya, patte pana vattamānā apekkhā taggatike āmisepi vattati evanāmāti āmise anapekkhatā ettha na labbhati, tato āmise avijahitapaṭiggahaṇam punadivase pācittiyam janetīti idam vuttam. Atha matam “yadaggenettha āmisānapekkhatā na labbhati, tadaggena paṭiggahaṇānapekkhāpi na labbhati”<sup>4</sup>ti. Tathā sati yattha āmisāpekkhā atthi, tattha paṭiggahaṇāpekkhāpi na vigacchatīti āpannam, evañca paṭiggahaṇe anapekkhavissajjanam visum na vattabbam siyā. **Aṭṭhakathāyañcetampi** paṭiggahaṇavijahanakāraṇattena abhimatam siyā, idam suṭṭhutarāṃ katvā visum vattabbam cīvarāpekkhāya vattamānāyapi paccuddhārena adhiṭṭhānavijahanam viya. Etasmiñca upāye sati gaṇṭhikāhatapattesu avaṭṭanatā<sup>4</sup> nāma na siyāti vuttovāyamatto. Tasmā yam vuttam **sāratthadīpaniyam** “yam parassa pariccajitvā adinnampi sace paṭiggahaṇe nirapekkhanissajjanena vijahitapaṭiggahaṇam hoti, tampi dutiyadivase vaṭṭati”<sup>5</sup>ti-ādi<sup>5</sup>, tam na sārato paccetabbam.

**Pakati-āmiseti** odanādikappiyayāvakālike. **Dveti** purebhattam paṭiggahitam yāmakālikam purebhattam sāmisenā mukhena bhuñjato sannidhipaccayā ekam, yāmakālikasamsaṭṭhatāya yāvakālikattabhajanena

1. Vi 3. 349 piṭṭhe.

2. Chaḍḍitañca (Sī)

3. Apekkho (Sī)

4. ...patte suvaṭṭanatā (Ka)

5. Sārattha-Ṭī 3. 67 piṭṭhe.

anatirittapaccayā ekanti dve pācittiyāni. **Vikappadvayeti** sāmisanirāmisapakkhadvaye. **Thullaccayañca dukkaṭaṅcāti** manussamañse thullaccayaṃ, sesesu dukkaṭaṃ. Yāvakālikayāmakālikatā, sannidhibhāvo, tassa ajjhoharaṇanti imānettha tīṇi aṅgāni.

Sannidhikāraśikkhāpadavaṇṇanā niṭṭhitā.

### 9. Paṇītabhojanasikkhāpadavaṇṇanā

259. Navame **paṇītasamsaṭṭhāni bhojanāni paṇītabhojanānīti** pāḷiyam pana bhojanāni pubbe vuttatā pākaṭānīti adassitāni, tādisehi paṇītehi missatā paṇītabhojanāni nāma honti. Tesam pabhedadassanattam **“seyyathidaṃ sappi navanītan”**ti-ādi vuttam. **Sappibhattanti** ettha kiñcāpi sappinā samsaṭṭham bhattam, sappi ca bhatañcātipi attho viññāyati, aṭṭhakathāyaṃ pana **“sālibhattam viya sappibhattam nāma natthi”**ti-ādinā<sup>1</sup> vuttatā na sakkā aññaṃ vuttam. Aṭṭhakathācariyā eva hi idisesu ṭhānesu pamāṇam.

**Mūlanti** kappiyabhaṇḍam vuttam. **Tasmā anāpattīti** ettha visaṅketena pācittiyābhāvepi sūpodanadukkaṭā na mucatīti vadanti. **“Kappiyasappinā, akappiyasappinā”**ti ca idaṃ kappiyākappiyamañsasattānam vasena vuttam.

261. **Mahānāmasikkhāpadaṃ** nāma upari cātumāsapaccayapavāraṇāsikkhāpadaṃ<sup>2</sup>. Agilāno hi appavāritatṭhāne viññāpentopi kālaparicchedam, bhesajjaparicchedam vā katvā saṅghavasena pavāritatṭhānato taduttari viññāpentena, paricchedabbhantarepi na bhesajjakaraṇīyena rogena bhesajjam viññāpentena ca samo hotīti **“mahānāmasikkhāpadena kāretabbo”**ti vuttam. Paṇītabhojanatā, agilānatā, akataviññattiyā paṭilābho, ajjhoharaṇanti imānettha cattāri aṅgāni.

Paṇītabhojanasikkhāpadavaṇṇanā niṭṭhitā.

1. Ādinam (Ka)

2. Vi 2. 135 piṭṭhe.

### 10. Dantaponasikkhāpadavaṇṇanā

263. Dasame **ghanabaddhoti** ghanamaṁsena sambaddho, kathinasamhataasarīroti attho.

264. **Mukhadvāranti** mukhato heṭṭhā dvāraṁ mukhadvāraṁ, galanāḷikanti attho. Evañca nāsikāya pavitṭhampi mukhadvāraṁ pavitṭhameva hoti, mukhe pakkhittamattañca appavitṭhaṁ. **Āhāranti** ajjhoharitabbaṁ kālikaṁ adhippetam, na udakaṁ. Tañhi bhesajjasan̄gahitampi akālikameva paṭiggahitasseva kālikattā. Udeke hi paṭiggahaṇaṁ na ruhati. Teneva bhikkhunā tāpitenā udakena cirapaṭiggahitena ca akappiyakuṭiyam̄ vutthena ca saha āmisam̄ bhuñjantassāpi sāmāpākādidoso na hoti. Vakkhati hi “bhikkhu yāgu-atthāya -pa- udakaṁ tāpeti, vaṭṭatī”ti-ādi<sup>1</sup>. Bhikkhū pana etaṁ adhippāyam̄ tadā na jāniṁsu. Tenāha “**sammā atthaṁ asallakkhetvā**”ti-ādi.

265. **Rathareṇumpīti** rathe gacchante uṭṭhahanareṇusadisareṇum̄. Tena tato sukhumaṁ ākāse paribbhamanaṁ dissamānampi abbohārikanti dasseti. **Akallakoti** gilāno.

“**Gahetuṁ vā -pa- tassa orimantenā**”ti iminā ākāse ujum̄ ṭhatvā parena ukkhittam̄ gaṇhantassāpi āsannaṅabhūtapādatalato paṭṭhāya hatthapāso paricchinditabbo, na pana sīsantato<sup>2</sup> paṭṭhāyāti dasseti. Tattha “**orimantenā**”ti imassa heṭṭhimantenāti attho gahetabbo.

Ettha ca **pavāraṇāsikkhāpadaṭṭhakathāyam̄** “sace bhikkhu nisinno hoti, āsanassa<sup>3</sup> pacchimantato paṭṭhāyā”ti-ādinā<sup>4</sup> paṭiggāhakānaṁ āsannaṅgassa pārimantato paṭṭhāya paricchedassa dassitattā idhāpi ākāse ṭhitassa paṭiggāhakassa āsannaṅabhūtapādaṅgulassa pārimantabhūtato paṇhipariyantassa heṭṭhimatalato paṭṭhāya, dāyakassa pana orimantabhūtato pādaṅgulassa heṭṭhimatalato paṭṭhāya hatthapāso paricchinditabboti daṭṭhabbam̄. Imināva nayena bhūmiyam̄ nipajjitvā ussise nisinnassa hatthato paṭiggāṇhantassāpi āsannaṁsāṅgassa pārimantabhūtato gīvantato

1. Vi-Ṭṭha 3. 117 piṭṭhe.

3. Ānisadassa (Kaṅkhā-Ṭṭha 221 piṭṭhe.)

2. Sīsato (Sī)

4. Vi-Ṭṭha 3. 92 piṭṭhe.

paṭṭhāyeva hatthapāso minitabbo, na pādatalato paṭṭhāya. Evaṃ nipajjitvā dānepi yathānurūpaṃ veditabbaṃ. “Yaṃ āsannataraṃ aṅgaṃ”ti hi vuttaṃ.

**Paṭiggahaṇasaññāyāti** “mañcādinā paṭiggahessāmī”ti uppāditasaññāya, iminā “paṭiggahaṇhāmī”ti vācāya vattabbakiccaṃ natthīti dasseti. **Katthaci** aṭṭhakathāsu, padesesu vā. **Asaṃhāriṃ phalaketī** thāmamajjhimena purisena asaṃhāriye. **Puñchitvā paṭiggahetvāti** puñchitepi rajanacunṇasaṅkāya sati paṭiggahaṇatthāya vuttaṃ, nāsati. **Taṃ panāti** patitarajaṃ appaṭiggahetvā upari gahitapaṇḍapātāṃ. **Anāpattīti** durupaciṇṇādidoso natthi. “Anupasampannassa dassāmī”ti-ādipi vinayadukkaṭaparīhārāya vuttaṃ. Tathā akatvā gahitepi paṭiggahetvā paribhuñjato anāpatti eva. “**Anupasampannassa datvā**”ti idampi purimābhogaṇugūṇatāya vuttaṃ.

**Carukenāti** khuddakabhājanena. **Abhihaṭṭatīti** diyyamānakkhaṇaṃ sandhāya vuttaṃ. Datvā apanayanakāle pana chārikā vā bindūni vā patanti, puna paṭiggahetabbaṃ abhihārassa vigatattīti vadanti. Taṃ yathā na patati, tathā apanessāmīti parihaarante yujjati. Pakatisaññāya apanente abhihāro na chijjati, taṃ paṭiggahitameva hoti. **Mukhavatṭiyāpi gahetuṃ vaṭṭatīti** abhihariyamānassa pattassa mukhavatṭiyā uparibhāge hatthaṃ pasāretvā phusituṃ vaṭṭati.

**Pādena pelletvāti** “pādena paṭiggahessāmī”tisaññāya akkamitvā. **Kecīti** abhayagirivāsino. **Vacanamattamevāti** paṭibaddhappaṭibaddhanti saddamattameva nānaṃ, kāyapaṭibaddhameva hoti. Tasmā tesāṃ vacanaṃ na gahetabbanti adhippāyo.

**Tena āharāpetunti** yassa bhikkhuno santikaṃ gataṃ, taṃ idha ānehīti āṇāpetvā tena āharāpetuṃ itarassa vaṭṭatīti attho. **Na tato paranti** tadaheva sāmaṃ appaṭiggahitaṃ sandhāya vuttaṃ. Tadaheva paṭiggahitaṃ pana punadivasādisu appaṭiggahetvāpi paribhuñjituṃ vaṭṭatīti vadanti.

**Khiyyantīti** khayam gacchanti, tesāṃ cuṇṇehi thullaccaya-appaṭiggahaṇāpattiyo na hontīti adhippāyo. “**Navasamutṭhitan**”ti eteneva

ucchu-ādīsu abhinaivalaggattā abbohārikam na hotīti dasseti. **Eseva nayoti** sannidhidosādīm sandhāya vadati. Tenāha “**na hī**”ti-ādi. Tena ca paṭiggahaṇaṅgesu pañcasupi samiddhesu ajjhoharitukāmatāya gahitameva paṭiggahitam nāma hoti ajjhoharitabbesu eva paṭiggahaṇassa anuññātattāti dasseti. Tathā bāhiraparibhogatthāya gahetvā ṭhapitatelādīm ajjhoharitukāmatāya sati paṭiggahetvā paribhuñjitum vaṭṭati.

**Kesañcīti**-ādīsu anupasampannam atthāya katthaci ṭhapiyamānampi hatthato muttamatte eva paṭiggahaṇam na vijahati, atha kho bhājane patitameva paṭiggahaṇam vijahati. Bhājanañca bhikkhunā punadivasatthāya apekkhitamepāti taggatampi āmisam duddhotapattagatam viya paṭiggahaṇam na vijahatīti<sup>1</sup> āsānkāya “sāmaṇerassa hatthe pakkhipitabban”ti vuttanti veditabbam. Īdisesu hi yutti na gavesitabbā, vuttanayeneva paṭipajjitabbam. “**Pattagatā yāgū**”ti iminā pattamukhavaṭṭiyā phuṭṭhepi kūṭe yāgu paṭiggahitā, uggahitā vā na hoti bhikkhuno anicchāya phuṭṭhattāti dasseti. **Āropetīti** hattham phusāpeti. **Paṭiggahaṇūpagaṃ bhāram** nāma majjhimassa purisassa ukkhepārahaṃ. **Na pidahitabbanti** hatthato muttam sandhāya vuttam, hatthagatam pana itarena hatthena pidahato, hatthato muttampi vā aphisitvā uparipidhānam pātentassa na doso.

**Paṭiggaṇhātīti** chāyatthāya upari dhārayamānā mahāsākhā yena kenaci chijjeyya, tattha laggarajam mukhe pāteyya cāti kappiyam kārāpetvā paṭiggaṇhātī. **Kuṇḍaketi** mahāghaṭe. **Tasmimpīti** cāṭighaṭepi. **Gāhāpetvāti** appaṭiggahitam kālikam gāhāpetvā.

**Dutiyattherassāti** “therassa pattam mayham dethā”ti tena attano pariccajāpetvā dutiyattherassa deti. **Ettha panāti** pattaparivattane. **Kāraṇanti** ettha yathā “sāmaṇerā ito amhākampi dentī”ti vitakko uppajjati, na tathāti<sup>2</sup> kāraṇam vadanti, tañca yuttam. Yassa pana tādiso vitakko natthi, tena aparivattetvāpi bhuñjitum vaṭṭati.

---

1. Vijahatīti (Sī)

2. Na Tatthāti (Ka)

**Niccāletunti** cāletvā pāsānasakkhārādi-apanayaṃ kātuṃ. **Uddhanaṃ āropetabbanti** anaggikaṃ uddhanaṃ sandhāya vuttaṃ. Uddhane paccamānassa āluḷane upari apakkataṇḍulā heṭṭhā pavisitvā paccatīti āha “**sāmānpākañceva hotī**”ti.

**Ādhārake patto ṭhapitoti** appaṭiggahitāmisso patto puna paṭiggahaṇatthāya ṭhapito. **Ekaggahaṇenevāti** sāmaṇerānaṃ gahitassa puna acchaḍḍanavasena gahaṇena. **Bhuñjituṃ vaṭṭatīti** dhūmavaṭṭiyā tadahupaṭiggahitattā vuttaṃ. **Bhattuggāroti**-ādi abbohārikappasaṅgena vikālabhojanavinicchayadassanaṃ. **Samuddodakenāti** appaṭiggahitena. **Himakarakā** nāma kadāci vassodakena saha patanakā pāsāṇalekhā viya ghanībhūta-udakavisesā, tesu paṭiggahaṇakiccaṃ natthi. Tenāha “**udakagatikā evā**”ti. **Purebhattameva vaṭṭatīti** appaṭiggahitāpattīhi abbohārikampi vikālabhojanāpattīhi sabbohārikanti dasseti.

**Laggatīti** mukhe ca hattheca mattikāvaṇṇaṃ dasseti. **Bahalanti** hatthamukhesu alagganakampi paṭiggahetabbam. **Vāsamatthanti** reṇukhīrābhāvaṃ dasseti. **Ākirati paṭiggahetabbanti** puppharasassa paññāyanato vuttaṃ.

**Mahābhūtesūti** pāṇasarīrasannissitesu pathavī-ādimaḥābhūtesu. **Sabbaṃ vaṭṭatīti** attano, paresaṅca sarīranissitaṃ sabbaṃ vaṭṭati. Akappiyamaṃsānulomatāya thullaccayādim na janetīti adhippāyo. **Patatīti** attano sarīrato vicchinditvā patati. “Rukkhatto chinditvā”ti vuttattā mattikatthāya pathaviṃ khaṇituṃ, aññampi yaṃkiñci mūlapaṇṇādivisabhesajjaṃ chinditvā chārikaṃ akatvāpi appaṭiggahitampi paribhuñjituṃ vaṭṭatīti daṭṭhabbam. Appaṭiggahitatā, ananuññātata, dhūmādi-abbohārikatābhāvo, ajjhoharaṇanti imānettha cattāri aṅgāni.

Udakadantaponasikkhāpadavaṇṇanā niṭṭhitā.

Niṭṭhito bhojanavaggo catuttho.



## 5. Acelakavagga

### 1. Acelakasikkhāpadavaṇṇanā

273. Pañcamavaggassa paṭhame **mayhaṃ nāmāti** bhikkhunā bhūmiyaṃ ṭhapetvā dinnampi sandhāya vadati. Aññatitthiyatā, ananuññātātā, ajjhoharaṇīyatā, ajjhoharaṇatthāya sahatthā anikkhittabhājane dānanti imānettha cattāri aṅgāni.

Acelakasikkhāpadavaṇṇanā niṭṭhitā.

---

### 2. Uyyojanasikkhāpadavaṇṇanā

274. Dutiye anācāraṃ ācaritukāmatā, tadatthameva upasampannassa uyyojanā, tassa upacārātikkamoti imānettha tīṇi aṅgāni.

Uyyojanasikkhāpadavaṇṇanā niṭṭhitā.

---

### 3. Sabhojanasikkhāpadavaṇṇanā

281. Tatiye pāḷiyaṃ **khuddake ghareti** ettha khuddakaṃ gharaṃ nāma pañcahatthato ūnakavittāraṃ adhippetam. Tattha ca piṭṭhasaṅghāto hatthapāse avijahitepi piṭṭhivaṃsātikkamo hotīti āha “**piṭṭhivaṃsaṃ atikkamivā**”ti. **Yathā tathā vā katassāti** piṭṭhivaṃsaṃ āropetvā vā anāropetvā vā katassa.

283. Pāḷiyaṃ **vītarāgāti** apariyuṭṭhitarāgānaṃ, anāgāmīnaṃ saṅgaho. **Sacittakanti** anupavisitvā nisīdanacittena sacittakaṃ. Pariyuṭṭhitarāgajāyampatikānaṃ sannihitatā, sayanigharatā, dutiyassa bhikkhuno abhāvo, anupakhajja nisīdananti imānettha cattāri aṅgāni.

Sabhojanasikkhāpadavaṇṇanā niṭṭhitā.

284-289. Catutthapañcamāni vuttatthāni.

## 6. Cārittasikkhāpadavaṇṇanā

298. Chaṭṭhe “**pariyesitvā ārocanakiccaṃ nāma natthi**”ti vuttattā yo अपariyesitabbo upasaṅkamtum yuttaṭṭhāne dissati, so sacepi pakativacanassa savanūpacāraṃ atikkamma ṭhito upagantvā āpucchitabbo. Tenāha “**api ca -pa- yaṃ passati, so āpucchitabbo**”ti-ādi.

302. Anāpattivāre cettha antarārāmādīnaññeva vuttattā vihārato gāmvāthim̐ anuññātakāraṇaṃ vinā atikkamantassāpi āpatti hoti, na pana gharūpacāraṃ atikkamantasseva.

Yaṃ pana pāḷiyaṃ “aññassa gharūpacāraṃ okkamantassa -pa-. Paṭhamaṃ pādaṃ ummāraṃ atikkāmeti”ti-ādi vuttaṃ, taṃ gāme pavīṭṭhaṃ sandhāya vuttaṃ. Tathāpi aññassa gharūpacāraṃ anokkamitvā vīthimajjheneva gantvā icchiticchitagharadvārābhimukhe ṭhatvā manusse oloketvā gacchantassāpi pācittiyameva. Tattha keci “vīthiyaṃ atikkamantassa gharūpacāraṇanāya āpattiyo”ti vadanti. Aññe pana “yāni kulāni uddissa gato, tesaṃ gaṇanāyā”ti. Pañcannaṃ bhojanānaṃ aññatarena nimantanasādiyaṇaṃ, santaṃ bhikkhūṃ anāpucchanā, bhattiyagharato aññagharūpasaṅkamaṇaṃ, majjhanhikānatikkamo, samayāpadānaṃ abhāvoti imānettha pañca aṅgāni.

Cārittasikkhāpadavaṇṇanā niṭṭhitā.

## 7. Mahānāmasikkhāpadavaṇṇanā

303. Sattame **mahānāmoti** sukkodanassa putto anuruddhattherassa, sattu ca jeṭṭhabhātā. Ānandatthero amitodanassa puttho, nandatthero pana suddhodanasseva.

305. Pāḷiyaṃ **kālaṃ āharissathāti** ajjatanāṃ kālaṃ vītināmessatha, sve bhesajjāṃ harissathāti vā attho. “Atthi pavāraṇā bhesajjapariyantā ca rattipariyantā cā”ti tatiyakotṭhase niyamitameva bhesajjāṃ niyamitakālantareyeva gahetabbaṃ, na tato bahi.

Itarathā visum payojanam natthīti daṭṭhabbam. Sapariyantā saṅghapavāraṇā, taduttari bhesajjavīññatti, agilānatāti imānettha tīṇi aṅgāni.

Mahānāmasikkhāpadavaṇṇanā niṭṭhitā.

### 8. Uyyuttasenāsikkhāpadavaṇṇanā

315. Aṭṭhame **ekamekanti** ettha duvaṅginīpi tivaṅginīpi senā saṅgayhati. Uyyuttacaturaṅgasenādassanāya tathārūpapaccayādim vinā gamanam, ananuññātokāse dassananti imānettha dve aṅgāni.

Uyyuttasenāsikkhāpadavaṇṇanā niṭṭhitā.

### 9. Senāvāsasikkhāpadavaṇṇanā

319. Navame senāya catuttho sūriyatthaṅgamo, agilānatāti imānettha dve aṅgāni.

Senāvāsasikkhāpadavaṇṇanā niṭṭhitā.

### 10. Uyyodhikasikkhāpadavaṇṇanā

322. Dasame pāliyam **kati te lakkhāni laddhānīti** kittakā tayā laddhāti<sup>1</sup> attho. Uyyodhikādidassanāya tathārūpapaccayam vinā gamanam, ananuññātokāse dassananti imānettha dve aṅgāni.

Uyyodhikasikkhāpadavaṇṇanā niṭṭhitā.

Niṭṭhito acelakavaggo pañcama.

## 6. Surāpānavagga

### 1. Surāpānasikkhāpadavaṇṇanā

328. Chaṭṭhavaggassa paṭhame pāḷiyam **kiṇṇapakkhittā**ti piṭṭhapūvādim apakkipitvā kiṇṇasankhātā dhañṇānkurādisurābijam pakkhipitvā katā. **Sambhārasamyuññuttā**ti sāsapādi-anekasambhārehi saññuttā.

Madhukatālanāḷikerādipupphādiraso ciraparivāsito **pupphāsavo** nāma. Tathā panasādi **phalāsavo**. Muddikaraso **madhvāsavo**. Uccuraso **gulāsavo**. Tiphalaṭikaṭukādinānāsambhārānam raso ciraparivāsito **sambhārasamyutto**. **Bijato paṭṭhāyā**ti yathāvuttānam piṭṭhādīnam majjathāya bhājane pakkhittakālato paṭṭhāya.

329. **Loṇasovīrakam sutta**ñca anekehi dabbasambhārehi abhisankhato bhesajjaviseso. Uyyuttasikkhāpadānam acittakalokavajjesu lokavajjatā pubbe vuttanayāvāti tattha kiñcipi avatvā idha tehi asādharāṇavatthuvisesasiddhāya acittakapakkhepi akusalacittatāya tam lokavajjatādivisesam dassetumeva “**vatthu-ajānanatāya cetthā**”ti-ādīnā vuttanti veditabbam. Yam panettha vattabbam, tam paṭhamapārājikavaṇṇanāyam vitthārato **sāratthadīpaniyam** viraddhaṭṭhānavisodhanavasena vuttanti tattheva gahetabbam. Majjabhāvo, tassa pānañcāti imānettha dve aṅgāni.

Surāpānasikkhāpadavaṇṇanā niṭṭhitā.

### 2. Aṅgulipatodakasikkhāpadavaṇṇanā

330. Dutiye hasādhippāyatā, upasampannassa kāyena kāyāmasananti imānettha dve aṅgāni.

Aṅgulipatodakasikkhāpadavaṇṇanā niṭṭhitā.

### 3. Hasadhammasikkhāpadavaṇṇanā

338. Tatiye pāḷiyaṃ **hasadhamme hasadhammasaññīti**-ādīsu uplavādimattaṃ kiṃ hasadhammo hotīti gahaṇavasena sati karaṇīye kariyamānaṃ hasadhammaṃ hasadhammoti gahaṇavasena attho veditabbo. **Ussārentoti** uduke ṭhitaṃ nāvaṃ tīre āropento.

**Patanuppattanavāresūti** udakassa uparitale maṇḍūkagatiyā patanuppattanavasena gamanatthaṃ khittāya ekissā kathalāya vasena vuttaṃ. Udakassa uparigoppakatā, hasādhippāyena kīlananti dve aṅgāni.

Hasadhammasikkhāpadavaṇṇanā niṭṭhitā.

---

### 4. Anādariyasikkhāpadavaṇṇanā

344. Catutthe **suttānulomanti** mahāpadesā. Aṭṭhakathātipi vadanti. Upasampannassa paññattena vacanaṃ, anādariyakaraṇanti dve aṅgāni.

Anādariyasikkhāpadavaṇṇanā niṭṭhitā.

---

### 5. Bhimsāpanasikkhāpadavaṇṇanā

345. Pañcame upasampannatā, tassa dassanasavanavisaye bhimsāpetukāmatāya vāyamananti dve aṅgāni.

Bhimsāpanasikkhāpadavaṇṇanā niṭṭhitā.

---

### 6. Jotisikkhāpadavaṇṇanā

354. Chaṭṭhe **alātaṃ patitanti** aggikapālato bahi patitaṃ. **Vijjhātanti** vijjhātaṃ alātaṃ kapālaggimhi pakkhipitvā jālentassa pācittiyaṃ, tathā kevalaṃ indhanaṃ pātentassapi vijjhātaṃ kapālaggim mukhavātādinā uj jālentassapi. Gilānatādikāraṇābhāvo, visibbetukāmatā, samādahananti tīṇi aṅgāni.

Jotisikkhāpadavaṇṇanā niṭṭhitā.

### 7. Nahānasikkhāpadavaṇṇanā

357. Sattame pāliyaṃ **nagare thakiteti** ettha raññā ciraṃ nahāyitukāmena “ahaṃ bahi uyyāne katārakkho vasissami, nagaraṃ thaketvā gopethā”ti anuññātā, te thakimsūti daṭṭhabbam. **Asambhinnenāti** anaṭṭhena, taṃ divasaṃ puna aggaḥitālaṅkārena ( )<sup>1</sup> pabuddhamattenāti adhippāyo. Majjhimadese ūnakaddhamāsanahānaṃ, samayādīnaṃ abhāvoti dve aṅgāni.

Nahānasikkhāpadavaṇṇanā niṭṭhitā.

### 8. Dubbaṇṇakaraṇasikkhāpadavaṇṇanā

368. Aṭṭhame **paṭiladdhanavacīvarenāti** ettha pubbe akatakappaṃ katipāhaṃ nivāsanatthāya tāvakālikavasena laddhampi saṅgayhatīti vadanti.

369. “Navam nāma akatakappaṃ”ti sāmāññato vuttattā aññena bhikkhunā kappabinduṃ datvā paribhuttaṃ cīvaraṃ, tena vā, tato labhitvā aññena vā kenaci dinnampi katakappameva navam nāma na hotīti daṭṭhabbam. “**Nivāsetuṃ vā pārupituṃ vā**”ti vuttattā aṃsabaddhakāsāvampi<sup>2</sup> pārupitabbato kappam kātabbanti vadanti. **Cammakāranīlam** nāma cammaṃ nilavaṇṇam kātuṃ yojiyamānaṃ nilam. Pakatinīlamevāti keci. Yathāvuttacīvarassa akatakappatā, anaṭṭhacīvarādītā, nivāsanādītāti tīni aṅgāni.

Dubbaṇṇakaraṇasikkhāpadavaṇṇanā niṭṭhitā.

### 9. Vikappanasikkhāpadavaṇṇanā

374. Navame **yenāti** yena saddhim, yassa santiketi attho. Sāmaṃ vikappitassa apaccuddhāro, vikappanupagacīvaratā, avissāsena paribhogoti tīni aṅgāni.

Vikappanasikkhāpadavaṇṇanā niṭṭhitā.

1. Etc aññe nagaraṃ pavisantīti bhayavasena chādanatthāya (Ka)

2. Aṃsakāsāvammi (Sī, Ka)

## 10. Cīvara-apanidhānasikkhāpadavaṇṇanā

378. Dasame pāḷiyam **antamaso hasāpekkhopīti api**-saddena attheyyacittam kodhena dukkhāpetukāmaṃ, avaṇṇam pakāsetukāmañca saṅgayhati. Teneva “**tivedanan**”ti vuttam. Upasampannassa pattādīnam apanidhānam, vihesetukāmatādīti dve aṅgāni.

Cīvara-apanidhānasikkhāpadavaṇṇanā niṭṭhitā.

Niṭṭhito surāpānavaggo chaṭṭho.

## 7. Sappāṇakavagga

### 1. Sañciccaṇasikkhāpadavaṇṇanā

382. Sattamassa paṭhame usum saram asati khipatīti **issāso**. Na hettha kiñci jīvitam nāma visum tiṭṭhatīti sambandho. Tattha **pāṇeti** satte. **Appamattena vattam kātabbanti** yathā pāṇakānam vihesāpi na hoti, evam sallakkhetvā otāpanasammajjanādivattam kātabbam. Sesam vuttanayameva.

Sañciccaṇasikkhāpadavaṇṇanā niṭṭhitā.

### 2. Sappāṇakasikkhāpadavaṇṇanā

387. Dutiye **udakasaṅṭhānakappadeseti** kaddamapāsāṇādibhūmiyam. **Tatthāti** āsitte kappiya-udake. Sesam vuttanayameva.

Sappāṇakasikkhāpadavaṇṇanā niṭṭhitā.

### 3. Ukkoṭanasikkhāpadavaṇṇanā

392. Tatiye “**tassa bhikkhuno santikam gantvā**”ti vuttattā yassa adhikaraṇam saṅghakammena nihataṃ, tassa sammukhe eva ukkoṭentassa pācittiyam. Parammukhe pana dukkaṭameva.

395. “**Dhammakamme adhammakammasaññī ukkoṭeti, anāpatti**”ti vuttatā anādariyatādi viya ukkoṭanam sayam akusalam na hoti, dhammakammasaññāya, pana vimatiyā ca ukkoṭaneneva akusalam hoti. Yathādhammam nihatatā, jānanā, ukkoṭanāti tīṇi aṅgāni.

Ukkoṭanasikkhāpadavaṇṇanā niṭṭhitā.

#### 4. Duṭṭhulasikkhāpadavaṇṇanā

399. Catutthe āpattiṃ āpajjatiyevāti dhuranikkhepapakkhe vuttam, **vatthupuggaloti** āpannapuggalo. Chādetukāmatāya hi sati eva avassam aññassa ārocanam vuttam, vatthupuggalassa ca ārocanā nāma na hotīti paṭicchādanamevāti adhippāyo. **Koṭi chinnā hotīti** chādessāmīti dhuranikkhepe satipi puggalaparamparāya gacchantī āpattikoṭi chijjati.

400. “**Anupasampannassa sukkavissatṭhi ca kāyasaṃsaggo cāti ayam duṭṭhulla-ajjhācāro nāmā**”ti idam duṭṭhullārocanasikkhāpadaṭṭhakathāyam “anupasampannassa -pa- ādito pañca sikkhāpadāni duṭṭhullo nāma ajjhācāro, sesāni aduṭṭhullo. Sukkavissatṭhikāyasaṃsaggaduṭṭhulla-attakāmā panassa ajjhācāro nāmā”ti<sup>1</sup> iminā vacanena virujjhatīti vīmaṃsitabham. Puggalapemena chādayato cettha “aññe garahissantī”ti bhayavasena chādanakkhaṇe paṭighova uppajjatīti “**dukkhavedanan**”ti vuttanti daṭṭhabham. Upasampannassa duṭṭhullāpattijānanam, paṭicchādetukāmatāya dhuranikkhepoti dve aṅgāni.

Duṭṭhulasikkhāpadavaṇṇanā niṭṭhitā.

#### 5. Ūnavīsativassasikkhāpadavaṇṇanā

402. Pañcame rūpasippanti heraññikasippam. Gabbhe sayitakālena saddhiṃ vīsatimam vassam paripuṇṇamassāti **gabbhavīso**.

---

1. Vi-Ṭṭha 3. 20 piṭṭhe.



404. **Nikkhamanīya puṇṇamāsī**ti sāvaṇamāsassa puṇṇamiyā āsālhipuṇṇamiyā anantarapuṇṇamī. **Pāṭipadadivaseti** pacchimikāya vassūpanāyikāya. Dvādasa māse mātu kucchismiṃ vasitvā mahāpavāraṇāya jātamaṃ upasampādentīti attho. “tiṃsa rattindivo māso, dvādasamāsiko samvaccharo”<sup>1</sup>ti vacanato “**cattāro māsā parihāyanti**”ti vuttamaṃ. **Vassaṃ ukkaḍḍhanti**ti vassaṃ uddhamaṃ kaḍḍhanti, “ekamāsamā adhikamāso”ti chaḍḍetvā vassaṃ upagacchantīti attho. Tasmā tatiyo tatiyo samvaccharo terasamāsiko hoti. **Te dve māse gahetvā**ti nikkhamanīyapuṇṇamāsato yāva jātadivasabhūtā mahāpavāraṇā, tāva ye dve māsā anāgatā, tesamaṃ atthāya adhikamāsato laddhe dve māse gahetvā. Henāha “yo pavāretvā vīsativasso bhavissati”ti-ādi. “**Nikkankhā hutvā**”ti idamaṃ aṭṭhārasannaṃ vassānaṃ eka-adhikamāse gahetvā tato vīsatiyā vassesupi cātuddasī-atthāya catunnaṃ māsānaṃ parihāpanena sabbadā paripuṇṇavīsativassataṃ sandhāya vuttamaṃ. **Pavāretvā vīsativasso bhavissati**ti mahāpavāraṇādivase atikkante gabbhavassena saha vīsativasso bhavissati attho. **Tasmāti** yasmā gabbhamālāpi gaṇanūpagā honti, tasmā. **Ekavīsativassoti** jātiyā vīsativassaṃ sandhāya vuttamaṃ.

406. **Aññaṃ upasampādeti**ti upajjhāyo, ācariyo vā hutvā upasampādeti. **Sopi**ti upasampādentopi anupasampanno. Ūnavīsativassatā, taṃ ñatvā upajjhāyena hutvā upasampādananti dve aṅgāni.

Ūnavīsativassasikkhāpadavaṇṇanā niṭṭhitā.

## 6. Theyyasatthasikkhāpadavaṇṇanā

409. Chaṭṭhe theyyasatthabhāvo, ñatvā samvidhānaṃ, avisaṅketena gamananti tīṇi aṅgāni.

Theyyasatthasikkhāpadavaṇṇanā niṭṭhitā.

412. Sattamaṃ vuttanayameva.

---

1. Am 1. 213; Am 3. 85; Abhi 2. 437 piṭṭhesu.

### 8. Ariṭṭhasikkhāpadavaṇṇanā

417. Aṭṭhame **antarāyanti** antarā vemajjhe eti āgacchatīti antarāyo, diṭṭhadhammikādi-anattho. **Ānantariyadharmā**ti anantare bhave phalanibbattane niyuttā cetanādidhammāti attho. “**Na saggassā**”ti idaṃ bhikkhunidūsanakammasa ānantariyattābhāvato vuttam. Ariyasāvikaṣu, pana kalyāṇaputhujjanabhūtāya ca balakkārena dūsentassa ānantariyasadisameva. Mokkhanantarāyikatā pana lolāyapi pakatattabhikkhuniyā dūsakassa tasmim attabhāve magguppattiyā abhāvato vuttā.

Tasmim attabhāve anivattanakā ahetuka-akiriyanatthikadiṭṭhiyova **niyatamicchādiṭṭhidhammā**. Paṇḍakādīnaṃ gahaṇaṃ nidassanamattaṃ. Sabbāpi duhetukāhetukapaṭisaṇḍhiyo **vipākantarāyikā**va duhetukānampi maggānuppattito.

**Ayanti** ariṭṭho. **Rasena rasanti** anavajjena paccayaparibhuñjanarasena pañcakāmaguṇaparibhogarasam samānetvā. **Upanento viyāti** ghaṭento viya, so eva vā pāṭho.

**Aṭṭhikaṅkalūpamā**ti ettha aṭṭhi eva nimmaṃsatāya kaṅkalanti ca vuccati. **Palibhañjanaṭṭhenā**ti avassam patanaṭṭhena. **Adhikuṭṭanaṭṭhenā**ti ati viya kuṭṭanaṭṭhena. Pāḷiyam “tathāham bhagavatā -pa- nālam antarāyāyā”ti idaṃ vatthu-anurūpato vuttam. Evaṃ pana aggahetvā aññenapi ākārena yaṃ kiñci bhagavatā vuttam viparītato gahetvā parehi vuttepi amuñcitvā voharantassāpi vuttanayānusārena tadanuguṇam samanubhāsanakammavācam yojetvā āpattiyā āropetum, āpattiyā adassanādīsu tīsu yaṃ kiñci abhirucitam nimittam katvā ukkhepanīyakammaṃ kātuñca labbhati, samanubhāsanam akatvāpi “māyasmā evam avacā”ti bhikkhūhi vuttamate laddhiyā appaṭinissajjanapaccayāya dukkaṭāpattiyāpi ukkhepanīyakammaṃ kātumpi vaṭṭatevāti daṭṭhabbam. Dhammakammata, samanubhāsanāya appaṭinissajjananti dve aṅgāni.

Ariṭṭhasikkhāpadavaṇṇanā niṭṭhitā.

## 9. Ukkhittasambhogasikkhāpadavaṇṇanā

424. Navame “**ukkhitto anosārito**”ti vuttattā aritṭhassa ukkhepanīyakammaṃ katanti daṭṭhabbaṃ.

425. Pāliyaṃ “ekacchanne”ti sāmaññato vuttattā nānūpacārepi ekacchanne nipajjane paṇṇattiṃ ajānantassa arahatopi ukkhittānuvattakānampi pācittiyameva. Akatānudhammatā, ñatvā sambhogādikaraṇanti dve aṅgāni.

Ukkhittasambhogasikkhāpadavaṇṇanā niṭṭhitā.

---

## 10. Kaṇṭakasikkhāpadavaṇṇanā

428. Dasame **pireti** sambodhanatthe nipātapadaṃ. Sesam anantarasikkhāpadadvaye vuttanayameva.

Kaṇṭakasikkhāpadavaṇṇanā niṭṭhitā.

Niṭṭhito sappāṇakavaggo sattamo.

---

## 8. Sahadhammikavagga

### 1. Sahadhammikasikkhāpadavaṇṇanā

434. Aṭṭhamavaggassa paṭhame upasampannassa paññattena vacanaṃ, asikkhitukāmassa lesena evaṃ vacananti dve aṅgāni.

Sahadhammikasikkhāpadavaṇṇanā niṭṭhitā.

---

### 2. Vilekhanasikkhāpadavaṇṇanā

438. Dutiye **alajjitāti** alajjitāya. Evaṃ sesesupi. **Sañcicca āpattim āpajjatīti**-ādi bhikkhubhikkhunīnaññeva vuttaṃ alajjilakkaṇaṃ, sāmaṇerādīnaṃ, pana gahaṭṭhānañca sādharmaṇavasena yathāsakaṃ sikkhāpadavītikkamanapaṭigūhanādito veditabbaṃ. Lajjilakkaṇepi eseva nayo.

Kiñcāpi kukkucce uppannepi madditvā karonto, kappiye akappiyasaññitāya karontopi tañkhaṇikāya alajjitāya evaṃ karonti, tathāpi kukkuccādibhede visuṃ gahitāti daṭṭhabbāṃ.

**Vajjiputtakā** dasavatthudīpakā. **Parūpahāra-aññāṇakañkhāparavitāraṇādivādā**ti ettha arahattaṃ paṭijānantānaṃ kuhakānaṃ sukkavissaṭṭhiṃ disvā “mārakāyikā devatā asuciṃ upasaṃharanti”tigāhino **parūpahāravādā** nāma. Arahato sabbesaṃ itthipurisādīnaṃ nāmādi-ajānane **aññāṇaṃ**, tattha sanniṭṭhānabhāvena **kañkhā**, parato<sup>1</sup> sutvā nāmādi jānanaena **paravitāraṇo** atthitīvādino aññāṇavādā, kañkhāvādā, paravitāraṇavādā ca tesāṃ, mahāsaṃghikādīnañca vibhāgo **kathāvatthupakaraṇe**<sup>2</sup> vutto.

**Cattāro maggā ca phalāni cāti** ettha **ca**-kārena abhiññāpaṭisambhidāpi saṅgahitāti daṭṭhabbāṃ. **Kecīti** pariyattidharā dhammakathikā. Puna **kecīti** paṭipattidharā paṃsukūlikattherā. **Itarepanāti**-ādīsu ayaṃ adhippāyo— dhammakathikattherā pana paṃsukūlikattherehi ābhataṃ suttaṃ sutvā—

“Yāva tiṭṭhanti suttantā, vinayo yāva dippati.

Tāva dakkhanti ālokaṃ, sūriye abbhutṭhite yathā.

Suttantesu asantesu, pamuṭṭhe vinayamhi ca.

Tamo bhavissati loke, sūriye atthaṅgate yathā.

Suttante rakkhite sante, paṭipatti hoti rakkhitā.

Paṭipattiyāṃ ṭhito dhīro, yogakkhemā na dhamṣatī”ti<sup>3</sup>—

idaṃ suttaṃ āharitvā attanova vādaṃ patiṭṭhapentā pārājikānāpajjanavasena ṭhitā paṭipattisaṅgahitā pariyattiyeva mūlanti āhamsūti. Tenāha “sace pañca bhikkhū cattāri pārājikāni rakkhaṇakā -pa- sāsaṇaṃ vuḍḍhiṃ viruḷhiṃ gamayissanti”ti. Etena ca parikkhīṇe kāle lajjigaṇaṃ alabhantena vinayadharena alajjinopi pakatatte saṅgahetvā tehi saha dhammāmisasambhogaṃ saṃvāsaṃ karontena bahū kulaputte upasampādetvā

1. Paravihārato (Ka)

2. Abhi 4. 128 piṭṭhādīsu.

3. Am-Ṭṭha 1. 72 piṭṭhe.

sāsanam paggahetum vaṭṭatīti idam sijjhatīti daṭṭhabbam. Garahitukāmatā,  
upasampannassa santike sikkhāpadavaṇṇananti dve aṅgāni.

Vilekhanasikkhāpadavaṇṇanā niṭṭhitā.

### 3. Mohanasikkhāpadavaṇṇanā

444. Tatiye pāḷiyam **ko pana vādo bhiiyoti** tehi aññehi bhikkhūhi  
diṭṭhadvattivārato bhiiyo pana vitthārena uddisiyamāne pātimokkhe  
nisinnapubbatā atthi ce, tatha kimeva vattabbam, āpattimokkho natthi evāti  
adhippāyo. **Taṅca yathā dhammo kāretabboti tanti** kāraṇatthe  
upayogavacanam, tāyāti attho. Yathā dhammo ca vinayo ca ṭhito, tathā tāya  
āpattiyā kāretabboti vuttam hoti. Mohāropanam, tikkhattum sutabhāvo,  
mohetukāmassa mohananti tīni aṅgāni.

Mohanasikkhāpadavaṇṇanā niṭṭhitā.

### 4. Pahārasikkhāpadavaṇṇanā

451. Catutthe pāḷiyam **kāyapaṭibaddhena vāti** ettha  
pāsāṇādinissaggiyapahāropi saṅgahito.

452. **Rattacittoti** kāyasamsaggarāgena vuttam. Methunarāgena pana  
pahārato purisādīsu dukkaṭameva. Mokkhādhippāyena daṇḍakoṭiyā  
sappādim ghaṭṭetvā maṇḍūkādīm mocentassapi anāpatti eva. Kupitatā,  
upasampannassa na mokkhādhippāyena pahāroti dve aṅgāni.

Pahārasikkhāpadavaṇṇanā niṭṭhitā.

### 5. Talasattikasikkhāpadavaṇṇanā

457. Pañcame na paharitukāmatāya dinnattā dukkaṭanti ettha kimidaṃ dukkaṭaṃ, pahārapaccayā, udāhu uggiraṇapaccayāti? Uggiraṇapaccayāva, na pahārapaccayā. Na hi paharitukāmatāya asati tappaccayā kāci āpatti yuttā, uggiraṇassa pana attano sabhāvena asaṅghitattā tappaccayā pācittiyāṃ na jātaṃ, asuddhacittena katapayogattā ca ettha anāpatti na yuttāti dukkaṭaṃ vuttanti gahetabbaṃ.

458. Pubbeti anantarasikkhāpade. Sesāṃ anantarasadisameva.

Talasattikasikkhāpadavaṇṇanā niṭṭhitā.

---

### 6. Amūlakasikkhāpadavaṇṇanā

459. Chaṭṭhe “attaparittāṇaṃ karontā”ti idaṃ na ca veramūlikā anuddhamsanāti dassanattamaṃ vuttaṃ. Anuddhamsanakkhaṇe pana kopacittameva uppajjati. Teneva “dukkhavedanaṃ”ti vuttaṃ. Sesāṃ vuttanayameva.

Amūlakasikkhāpadavaṇṇanā niṭṭhitā.

---

### 7. Kukkuccuppādanasikkhāpadavaṇṇanā

464. Sattame upasampannassa aphāsukāmatā, kukkuccuppādananti dve aṅgāni.

Kukkuccuppādanasikkhāpadavaṇṇanā niṭṭhitā.

---

### 8. Upassutisikkhāpadavaṇṇanā

471. Aṭṭhame suyyatīti suti, vacanaṃ. Tassā samīpaṃ upassuti. Suyyati etthāti sutīti evaṃ hi atthe gayhamāne savanaṭṭhānasamīpe aññasmiṃ assavanaṭṭhāne tiṭṭhatīti āpajjati. Aṭṭhakathāyañca upassuti-saddasseva atthaṃ dassetuṃ “yattha ṭhatvā”ti-ādi vuttaṃ, na suti-saddamattassa.

473. **Ekaparicchedānī**ti kadāci akiriyato, kadāci kiriyato samuṭṭhānasāmaññaena vuttam. Upasampannaena codanādhippāyo, savananti dve aṅgāni.

Upassutisikkhāpadavaṇṇanā niṭṭhitā.

---

### 9. Khiyyanasikkhāpadavaṇṇanā

474. Navame dhammakammata, jānanam, chandam datvā khiyyananti tīṇi aṅgāni.

Khiyyanasikkhāpadavaṇṇanā niṭṭhitā.

---

### 10. Pakkamanasikkhāpadavaṇṇanā

481. Dasame vinicchayakathāya dhammikata, tam nātvā kammato paṭṭhāya ekasīmaṭṭhassa samānasamvāsikassa hatthapāsavijahananti dve aṅgāni.

Pakkamanasikkhāpadavaṇṇanā niṭṭhitā.

---

### 11. Dubbalasikkhāpadavaṇṇanā

484. Ekādasame upasampanna dhammena laddhasammutitā, saṅghena saddhim cīvaram datvā khiyyitukāmatāya khiyyananti dve aṅgāni.

Dubbalasikkhāpadavaṇṇanā niṭṭhitā.

489. Dvādasamaṃ vuttanayameva.

Niṭṭhito sahadhammikavaggo aṭṭhamo.

## 9. Rājavagga

### 1. Antepurasikkhāpadavaṇṇanā

499. Navamavaggassa paṭhame pāḷiyam **saṃsuddhagahaṇikoti** ettha **gahaṇīti** gabbhāsayaasaññito mātu kucchippadeso, purisantarasukkāsamphuṭṭhatāya saṃsuddhagahaṇiko. Abhisittakhattiyatā, ubhinnampi sayanigharato anikkhantatā, appaṭisaṃviditassa indakhīlātikkamoti tīṇi aṅgāni.

Antepurasikkhāpadavaṇṇanā niṭṭhitā.

### 2. Ratanasikkhāpadavaṇṇanā

506. Dutiye **āvasathassāti** ettha anto ārāme vā hotu aññattha vā, yattha katthaci attano vasaṇaṭṭhānam āvasatho nāma. **Chandenapi bhayenapīti** vadḍhaki-ādīsu chandena, rājavallabhesu bhayena. **Ākiṇṇamanussepi jāte -pa- āsaṅkantīti** tasmim nimmanussaṭṭhāne pacchā ākiṇṇamanusse jātepi visarivā gamanakāle aññassa adiṭṭhattā tameva bhikkhum āsaṅkanti. **Patirūpaṃ** nāma kappiyabhaṇḍe sayam paṃsukūlam gahetvā akappiyabhaṇḍe patirūpanam upāsakādīnam dassetvā cetiyādipuñṇe niyojanam vā dāpetvā nirapekkhagamanaṃ vā. **Samādapetvāti** yācitvā. Parasantakatā, vissāsaggāhapaṃsukūlasaññānam abhāvo, ananuññātakāraṇā uggahaṇādi cāti tīṇi aṅgāni.

Ratanasikkhāpadavaṇṇanā niṭṭhitā.

### 3. Vikālagāmappavisanasikkhāpadavaṇṇanā

508. Tatiye pāḷiyam **bhayakathanti** rājacorādibhayam vā rogāmanussa-dubbhikkhakantārādibhayam vā ārabbha pavattam. **Visikhākathanti** suniviṭṭhādivīthikatham. **Kumbhaṭṭhānakathanti** udakatitthakatham, kumbhadāsīkatham vā. **Pubbapetakathanti** atītañātikatham. **Nānattakathanti** vuttāhi, vakkhamānāhi ca vimuttam



nānāsabhāvaṃ niraṭṭhakakathāṃ. **Lokakkhāyikanti** “ayaṃ loko kena nimmito”ti-ādinā lokasabhāvakkhānavasena pavattanakathā. Evaṃ **samuddakkhāyikā** veditabbā. Iti bhavo iti abhavoti yaṃ vā taṃ vā niraṭṭhakakāraṇaṃ vatvā pavattitakathā **itibhavābhavakathā**. Ettha ca bhavossataṃ, vuḍḍhi, kāmasukhañcāti tividho, abhavo tabbiparītavasena. Iti imāya chabbidhāya itibhavābhavakathāya saddhiṃ **dvattimsatiracchānakathā** nāma honti. Atha vā pāḷiyaṃ sarūpato anāgatāpi araṇṇapabbatanadīpapakathā iti-saddena saṅgahetvā dvattimsatiracchānakathāti vuccanti. **Iti vāti** ettha **iti-saddo** pakāratthe. **Vā-saddo** vikappatthe. Tasmā evaṃ pakāraṃ ito aññaṃ vā tādisaṃ niraṭṭhakakathāṃ kathetīti attho gahetabbo.

512. **Ussāhaṃ paṭippassambhetvā vihāraṃ gacchantāti** ettha gāmūpacārato bahi nikkhante antarārāmādīnamupacāraṃ paviṭṭhe sandhāya vuttaṃ. Gāmūpacārabbhantare pana paṭippassaddhussāhānampi puna tameva vā aññaṃ vā gāmaṃ pavisitukāmatāya sati āpucchanakiccaṃ natthi. **“Kulaghare vā -pa- gantabban”**ti idaṃ pana purebhattaṃ paviṭṭhānaṃ vikāle sañjāte vikāle gāmappavesassa āpucchitabbatāya vuttaṃ. **Adinnādāne vuttanayenāti** dutiyaleḍḍupātaṃ sandhāya vuttaṃ.

515. **Antarārāmanti-ādīsūti** ettha ussavadivasādīsu manussehi gāme padakkhiṇaṃ kārentaṃ **jinabimbādīm** pūjetukāmehi vā rogavūpasamādiyattaṃ manussehi yācitehi vā bhikkhūhi suppaṭicchannādividhiṃ akatvāpi vīthimajjheneva gāmaṃ padakkhiṇaṃ kātum vaṭṭatīti vadanti, taṃ na gahetabbaṃ anāpattivāre avuttattā, “maggā anokkamitvā -pa- pācittiyān”ti<sup>1</sup> paṭikkhittattā ca. Vesālīm anupariyāyitvā parittaṃ karontenāpi ānandattherena suppaṭicchannatādīm akopenteneva, apaññatte vā sikkhāpade katanti daṭṭhabbaṃ. Keci pana “antarārāmādigāmantare ṭhitehi garuṭṭhānīyānaṃ paccuggamanānuggamanādivasena gāmavīthim otaritum vaṭṭatī”ti vadanti, tampi antaragharaṃ pavisantaṃ pati kātum na vaṭṭati eva. Antarārāmādikappiyabhūmiṃ pana uddissa gacchantaṃ pati kātum vaṭṭatīti khāyati, vīmaṃsitabbaṃ. Santaṃ bhikkhūṃ

---

1. Kaṅkhā-Ṭṭha 268 piṭṭhe.

anāpucchanā, ananuññātakāraṇā vikāle gāmappavesoti dve aṅgāni.

Vikālagāmappavisanasikkhāpadavaṇṇanā niṭṭhitā.

---

#### 4. Sūciḡharasikkhāpadavaṇṇanā

520. Catutthe pāliyaṃ **vāsijaṭeti** vāsidaṇḍake. Aṭṭhimayādisūciḡharatā, karaṇakārāpanādivasena attano paṭilābhoti dve aṅgāni.

Sūciḡharasikkhāpadavaṇṇanā niṭṭhitā.

---

#### 5. Mañcapīṭhasikkhāpadavaṇṇanā

521. Pañcame pāliyaṃ **āsayato bhikkhave moghapuriso veditabboti** hīnajjhāsayasena ayaṃ tucchapurisoti ñātabbo, hīnāyapaccaye lolatāya puggalassa tucchatā ñātabbāti adhippāyo. Imasmim sikkhāpade, ito paresu ca pañcasu attanā kārāpitassa paṭilābhe eva pācittiyaṃ. Paribhoge panassa, aññesañca dukkaṭameva. Pamāṇātikkantamañcapīṭhatā, attano karaṇakārāpanavasena paṭilābhoti dve aṅgāni.

Mañcapīṭhasikkhāpadavaṇṇanā niṭṭhitā.

---

#### 6. Tūlonaddhasikkhāpadavaṇṇanā

526. Chaṭṭhe **poṭakitūlanti** tiṇagacchajātikānaṃ tūlaṃ. Sesam vuttanayameva.

Tūlonaddhasikkhāpadavaṇṇanā niṭṭhitā.

### 7. Nisīdanasikkhāpadavaṇṇanā

531-536. Sattame nisīdanassa pamāṇātikkantatā, attano karaṇādinā paṭilābhoti dve aṅgāni.

Nisīdanasikkhāpadavaṇṇanā niṭṭhitā.

---

537-547. Iminā nayena aṭṭhamanavamadasamesupi aṅgāni veditabbāni. Sesam̐ sabbattha suviññeyyamevāti.

Niṭṭhito rājavaggo navamo.

Khuddakavaṇṇanānayo niṭṭhito.

## 6. Pāṭidesanīyakaṇḍa

### 1. Paṭhamapāṭidesanīyasikkhāpadavaṇṇanā

553. Pāṭidesanīyesu paṭhame **paṭidesetabbākāradassananti** evaṃ āpattim navakassa santike desetabbākāradassanaṃ. Iminā lakkhaṇena sambahulānaṃ āpattīnampi vuḍḍhassa santike ca desetabbākāro sakkā viññātunti. Tatrāyaṃ nayo—“gārayhe āvuso dhamme āpajjīm asappāye pāṭidesanīye”ti evaṃ sambahulāsu. Vuḍḍhassa pana santike “gārayhaṃ bhante dhammaṃ -pa-gārayhe bhante dhamme”ti yojanā veditabbā. Tattha **asappāyanti** saggamokkhantarāyakaranti attho. Aññātikāya bhikkhuniyā antaraghare ṭhitāya hatthato sahatthā yāvakālikaggahaṇaṃ, ajjhoharaṇanti dve aṅgāni.

Paṭhamapāṭidesanīyasikkhāpadavaṇṇanā niṭṭhitā.

558. Dutiye paripuṇṇūpasampannāya ananuññātākārena vosāsanā, anivāretvā bhojanajjhohāroti dve aṅgāni.

563. Tatiye sekkhasammatatā, gharūpacāre animantitatā, gilānassa aniccabhaddādiṃ gahetvā bhuñjananti tīṇi aṅgāni.

570. Catutthe sāsānkāraññasenāsanatā, ananuññātāṃ yāvakālikāṃ appaṭisaṃviditaṃ ajjhārāme paṭiggahetvā agilānassa ajjhoharaṇanti dve aṅgāni. Sesāṃ uttānameva.

Pāṭidesanīyavaṇṇanānayo niṭṭhito.

## 7. Sekhiyakaṇḍa

### 1. Parimaṇḍalavaggavaṇṇanā

576. Sekhiyesu yasmā **vattakkhandhake**<sup>1</sup> vuttavattānipi sikkhitabbattā sekhiyāneva, tasmā pārājikādīsu viyettha pāḷiyam paricchedo na kato. Cārittanaḍḍassanattaṅca “yo pana bhikkhū olambento nivāseyya, dukkaṭaṇ”ti avatvā “sikkhā karaṇīyā”ti sabbattha pāḷi āropitā. Padabhājane pana “āpatti dukkaṭassā”ti vuttattā sabbattha anādariyakaraṇe dukkaṭam veditabban̄.

**Aṭṭhaṅgulamattanti matta-**saddena tato kiñci adhikam, ūnampi saṅgaṇhāti. Teneva nisinnassa caturaṅgulamattampi vuttam. Na hi nisinnassa caturaṅgulappamāṇam, ṭhitassa aṭṭhaṅgulamevāti sakkā niyametuṃ ūnādhikattasambhavato. Tasmā yathā sāruppaṃ hoti, evam aṭṭhaṅgulānusārena nivāsanaññeva adhippetanti gahetabban̄. Teneva vakkhati “yo pana bhikkhu sukkhajaṅgho vā”ti-ādi. **Kurundiyaṃ** “ajānantassa anāpattī”ti ādaram katvā uggaṇhantassāpi ajānanam sandhāya vuttam. Tenāpi nirantaram nivāsanapārūpanavattam sikkhitabban̄, asikkhito anādariyameva. Parimaṇḍalaggahaṇena ukkhipitvā nivāsanampi paṭikkhittanti āha “**ukkhipitvā vā otāretvā vā**”ti.

**Sacittakanti** vatthuvijānanacittena sacittakam. **Sāratthadīpaniyaṃ** pana **upatissattheravādanayena** lokavajjattam gahetvā “vatthuvijānanacittena, paṇṇattivijānanacittena ca sacittakan”ti<sup>2</sup> vuttam. Tattha ca vatthuvijānanam visum na vattabban̄. Paṇṇattivijānanena tassāpi antogadhabhāvato idam vatthum evam vītikkamantassa āpattīti vijānanto hi paṇṇattim vijānātīti vuccati. **Upatissattheravāde** cettha paṇṇattim ajānitvā aparimaṇḍalanivāsanādivatthumeva jānantassa paṇṇattivītikkamānādariyābhāvā sabbasekhiyesu anāpatti eva abhimatā, taṅca na yuttam **kosambakkhandhake**<sup>3</sup> vaccakuṭiyam udakāvasesam ṭhapentassa paṇṇattivijānanābhāvepi āpattiyā vuttattā. Vuttañhi tattha “tena kho pana samayena aññataro bhikkhu āpattim āpanno

1. Vi 4. 373 piṭṭhe.

2. Sārattha-Ṭī 3. 104 piṭṭhe.

3. Vi 3. 480 piṭṭhe.

hoti -pa- so aparena samayena tassā āpattiyā anāpattidiṭṭhi hotī”ti-ādi<sup>1</sup>.  
**Aṭṭhakathāyañ** cassa “tvaṃ ettha āpattibhavaṃ na jānāsīti, āma na jānāmīti.  
 Hotu āvuso, ettha āpattīti, sace hoti, desessāmīti. Sace pana te āvuso  
 asañcicca asatiyā kataṃ, natthi āpattīti. So tassā āpattiyā anāpattidiṭṭhi  
 ahoṣī”ti<sup>2</sup> vuttaṃ, tathā “adhammavādīti ukkhittānuvattakesu aññataro”ti<sup>3</sup> ca  
 vuttaṃ. Khandhakavattānañhi sekhiyattā tattha vutto nayo imesaṃ, idha  
 vutto ca tesāṃ sādharmaṇova hotīti. Teneva “asañcicca asatiyā kataṃ, natthi  
 āpattī”ti evaṃ idha vutto āpattinayo tathāpi dassito. Tasmā  
**phussadevattheravāde** eva ṭhatvā vatthuvijānanacitteneva sabbasekhiyāni  
 sacittakāni na paṇṇattivijānanacittena. Bhiyyokamyatāyasūpabyañjana-  
 paṭicchādāna-ujjhānasaññīti dve sikkhāpadāni lokavajjāni akusalacittāni,  
 sesāni paṇṇattivajjāni, ticittāni, tivedanāni cāti gahaṇameva yuttataraṃ  
 dissati. Tenevettha “asañciccāti purato vā pacchato vā olambetvā  
 nivāsessāmīti evaṃ asañciccā”ti-ādinā vatthu-ajānanavaseneva  
 anāpattivaṇṇanā katā, na paṇṇattivijānanacittavasena.

Apica “yassa sacittakapakkhe cittaṃ akusalameva hoti, taṃ  
 lokavajjan”ti<sup>4</sup> iminā lakkhaṇavacanenaṃpi cetāṃ sijjhāti.  
 Vatthuvijānanacittavaseneva hettha “sacittakapakkhe”ti vuttaṃ. Itarathā  
 paṇṇattivijānanacittavasena sabbasikkhāpadānampi sacittakapakkhe cittaṃ  
 akusalattaniyamena lokavajjattappasaṅgato paṇṇattivajjameva na siyā,  
 idaṅca vacanaṃ niratthakaṃ siyā iminā vacanena nivattetabbassa  
 sikkhāpadassa abhāvā. Na ca sekhiyesu vatthuvijānanacittena  
 sacittakapakkhe cittaṃ paṇātipātādīsu viya akusalamevāti niyamo atthi,  
 yenettha lokavajjatā pasajjeyya, “anādariyaṃ paṭiccā”ti cetāṃ pāḷivacanāṃ  
 vatthuṃ jānitvā tīhi cittehi vītikkamameva anādariyaṃ katvā vuttaṃ, na  
 paṇṇattiṃ jānitvā akusalacitteneva vītikkamanti gahetabbaṃ. Aññathā  
**khandhakapāliya**, **aṭṭhakathāyañ** ca pubbāparaṅca virujjhanatoti amhākaṃ  
 khanti. Yathā vā na virujjhati, tathā ettha adhippāyo gavesitabbo.  
 Anādariyaṃ,

1. Vi 3. 480 piṭṭhe.

3. Vi-Ṭṭha 3. 432 piṭṭhe.

2. Vi-Ṭṭha 3. 431 piṭṭhe.

4. Kaṅkhā-Ṭṭha 112 piṭṭhe.

anāpattikāraṇabhāvo, aparimaṇḍalanivāsananti imānettha tīṇi aṅgāni. Yathā cettha, evaṃ sabbattha. Kevalaṃ tattha tattha vuttapaṭipakkhakarāṇavasena tatiyaṅgayojanameva viseso.

577. Dutiyādīsu **ghipārutanti** setapaṭapārutādi. **Vihārepi** saṅghasannipāta-buddhupaṭṭhānādikālaṃ sandhāya vuttaṃ.

578. **Gaṇṭhikaṃ paṭimuñcitvāti**-ādi paṭicchādanavidhidassanaṃ. **Gīvaṃ paṭicchādetvāti**-ādinā<sup>1</sup> vuttattā sañcicca gīvaṃ, maṇibandhanañca appaṭicchādentassa āpatti. Etthāpi parimaṇḍalasikkhāpadassa sādharmaṇattā jāṇumaṇḍalato heṭṭhā caturaṅgulamattaṃ otāretvā anolambetvā parimaṇḍalameva pārupitabbaṃ.

579. **Vivaritvā nisīdatoti** vihāre viya ekamsapārūpanaṃ sandhāya vuttaṃ. “Vāsathāya upagatassā”ti vuttattā vāsādhippāyaṃ vinā dhammadesanaparittabhaṇanādi-atthāya sucirampi nisīdantena sabbhaṃ antaragharavattaṃ pūrenteneva nisīditabbaṃ. Nisīdanapaṭisaṃyuttetu eva ca sikkhāpadesu “vāsūpagatassā”ti anāpattiyā vuttattā vāsathāya antaragharāṃ upagacchantenāpi suppaṭicchannatādisabbhaṃ akopenteneva gantabbaṃ. “Vāsūpagatassā”ti hi vuttaṃ, na pana upagacchamānassāti. Keci pana “ekekasmim paṭhamam gantvā vāsapariggahe kate tato aññehi yathāsukhaṃ gantuṃ vaṭṭati”ti vadanti. Apare pana “gehassāmikhehi ‘yāva tumhe nivasissatha, tāva tumhākaṃ imaṃ gehaṃ demī’ti dinne aññehi avāsādhippāyehi antarārāme viya yathāsukhaṃ gantuṃ, nisīdituñca vaṭṭati”ti vadanti, taṃ sabbhaṃ na ghetabbaṃ tathāvacaṇābhāvā, dānalakkhaṇābhāvā, tāvattakena vihārasaṅkhyānupagamanato ca. “Yāva nisīdissatha, tāva tumhākaṃ imaṃ gehaṃ demī”ti dentopi hi tāvakālikameva deti vatthupariccāgalakkhaṇattā dānasa.

582. **Catuhatthappamāṇanti** vaḍḍhakīhatthaṃ sandhāya vuttanti vadanti.

---

1. Gaṇṭhikaṃ Paṭimuñcitvāti-ādinā (Ka)

584. **Ukkhittacīvaro hutvā**ti kaṭito uddham kāyabandhanādidassana-vasenevukkipanam sandhāya vuttam piṇḍāya carato pattaḡgahaṇādimattassa anuññātattā. Teneva “**nisinnakāle pana dhamakaraṇam**”ti-ādi vuttam. Nisinnakāle hi khandhe laggapattatthavikādito dhamakaraṇam nīharantassa kaṭito uddhampi dissati, tathā adassetvā nīharitabbanti adhippāyo. Āsane nisīdantassāpi ca pārupitacīvaram kiñci ukkhipitvā saṅghāṭim jaṅghapiṇḍehi anukkhipitvāva nisīditabbam. Imasmiññeva pana sikkhāpade “vāsūpagatassā”ti vuttattā nisīdanapaṭisaṃyuttetu chaṭṭha-aṭṭhamesu avuttattā vāsūpagatenāpi susaṃvutena okkhittacakkhunāva nisīditabbam<sup>1</sup>. Teneva **mātikāṭṭhakathāyampi** tesam visesaṃ avatvā idheva “vāsūpagatassa pana anāpatti”ti<sup>2</sup> vuttā.

Parimaṇḍalavaggavaṇṇanā niṭṭhitā.

## 2. Ujjagghikavaggavaṇṇanā

586. Dutiyavaggādi-ujjagghika-appasaddesu nisīdanapaṭisaṃyuttesu vāsūpagatassa anāpatti na vuttā, kāyappacālakādīsu eva pana vuttā. Pāḷipotthakesu panetaṃ kesuci peyyālena byāmohitattā na suṭṭhu viññāyati. Yattha ca antaraghare dhammam vā desetassa, pātimokkham vā uddisantassa mahāsaddena yāvaparisaṃvānēpi anāpatti evāti daṭṭhabbam tathā ānandattheramahindattherādīhi ācaritattā.

Ujjagghikavaggavaṇṇanā niṭṭhitā.

## 3. Khambhakatavaggavaṇṇanā

603. Patte gahaṇasaññā assa atthīti pattasaññīti imamattham dassetuṃ “**patte saññam katvā**”ti vuttam.

604. **Oloṇīti** ekā byañjanavikati. Kañjikatakkādirasoti keci. Maṃsarasādīnīti **ādi**-saddena avasesā sabbāpi byañjanavikati saṅghitā.

1. Vasitabbam (Ka)

2. Kaṅkhā-Ṭṭha 279 piṭṭhe.



605. **Samabharitanti** racitaṃ. **Heṭṭhā orohatīti** samantā okāsasambhavato hatthena samaṃ kariyamānaṃ heṭṭhā bhassati. Pattamatthake ṭhapitāni pūvāni eva vaṭaṃsakākārena ṭhapitattā “**pūvavaṭaṃsakan**”ti vuttāni. Keci pana “pattaṃ gahetvā thūpīkataṃ piṇḍapātaṃ racitvā diyyamānameva gaṇhato āpatti, hatthagate eva pana patte diyyamāne thūpīkatampi gahetuṃ vaṭṭatī”ti vadanti, taṃ na gahetabbameva “**samatittikan**”ti bhāvanapumsakavasena sāmāññato vuttattā.

Khambhakatavaggavaṇṇanā niṭṭhitā.

#### 4. Sakkaccavaggavaṇṇanā

608. Catutthavaggādīsu **sapadānanti** ettha dānaṃ vuccati avakhaṇḍanaṃ, apetaṃ dānato apadānaṃ, saha apadānena sapadānaṃ, avakhaṇḍanavirahitaṃ anupaṭipāṭiyāti vuttaṃ hoti. Tenāha “**tattha tattha odhim akatvā**”ti-ādi.

611. **Viññattiyanti** sūpodanaviññattisikkhāpadaṃ sandhāya vadati. “**Vattabbaṃ natthī**”ti iminā pāḷiyāva sabbaṃ viññāyatīti dasseti. Tattha pāḷiyam **asañciccāti**-ādīsu vatthumattaṃ ñatvā bhuñjanaṃ āpattim āpajjantasseva puna paṇṇattim ñatvā mukhagataṃ chaddetukāmassa yaṃ aruciya paviṭṭhaṃ, taṃ asañcicca paviṭṭhaṃ nāma, tattha anāpatti. Tadeva puna aññavihitatāya vā aviññattamidantisaññāya vā bhuñjane “**asatiyā**”ti vuccati.

613. “**Aññassatthāyā**”ti idamassa sikkhāpadassa attano atthāya viññāpetvā sayam bhuñjane eva paññattattā iminā sikkhāpadena anāpattim sandhāya vuttaṃ. Pañcasahadhammikānaṃ pana atthāya aññātaka-appavāritatṭhāne viññāpento viññattikkhaṇe aṭṭhakathāsu suttānulomato vutta-akataviññattidukkaṭato na muccati. Sañcicca bhuñjanakkhaṇe sayañca aññe ca micchājīvato na muccantīti gahetabbaṃ.

615. “**Kukkuṭaṇḍaṃ atikhuddakan**”ti idaṃ asāruppavasena vuttaṃ, atimahante eva āpattīti daṭṭhabbaṃ. Bhuñjantena pana corādibhayaṃ paṭicca mahantampi

aparimaṇḍalampi katvā sīghaṃ bhuñjanavasenettha **āpadā**. Evamaññesupi yathānurūpaṃ daṭṭhabbaṃ.

Sakkaccavaggavaṇṇanā niṭṭhata.

### 5. Kabalavaggavaṇṇanā

617. Anāhaṭe kabaḷe mukhadvāravivaraṇe pana payojanābhāvā “āpadāsū”ti na vuttaṃ. Evamaññesupi īdisesu.

618. **Sabbaṃ hatthanti** hatthekadesā aṅguliyo vuttā “hatthamuddā”ti-ādīsu viya, tasmā ekaṅgulimpi mukhe pakkipitum na vaṭṭati.

Kabalavaggavaṇṇanā niṭṭhitā.

### 6. Surusuruvaggavaṇṇanā

627. Pāliyaṃ **sīṭikatoti** sītapīlito. **Silakabuddhoti** parihāsavacanametam. Silakañhi kiñci disvā “buddho ayan”ti voharanti.

628. “**Aṅguliyo mukhe pavesetvā bhuñjitum vaṭṭati**”ti iminā sabbaṃ hatthaṃ antomukhe pakkipanasikkhāpadassapi pavitṭhaṅgulinillehanena imassapi sikkhāpadassa anāpattim dasseti. **Eseva nayoti** ghanayāgu-ādīsu pattam hatthena, oṭṭhañca jivhāya nillehitum vaṭṭatīti atidisati. **Tasmāti** yasmā ghanayāgu-ādivirahitaṃ nillehitum na vaṭṭati.

634. **Vilīvacchattanti** veṇupesikāhi kataṃ. **Maṇḍalabaddhānti** dīghasalākāsu tiriyaṃ valayākārena salākāṃ ṭhapetvā suttehi baddhāni dīghaṅca tiriyaṅca ujukameva salākāyo ṭhapetvā daḷhabaddhāni ceva tiriyaṃ ṭhapetvā dīghadaṇḍakeheva saṅkocārahaṃ katvā sutteheva tiriyaṃ baddhāni. **Tatthajātakadaṇḍakena katanti** saha daṇḍakena chinnatālapaṇṇādīhi kataṃ. **Chattapādukāyāti** yasmim chattadaṇḍakoṭim pavesetvā chattaṃ ujukaṃ ṭhapetvā heṭṭhā chāyāya nisīdanti, tiṭṭhanti vā, tādise chattādhāre.

637. **Cā**poti majjhe vaṅkakājadaṇḍasadisā dhanuvikati. **Kodaṇḍoti** viddhadaṇḍā dhanuvikati.

Surusuruvaggavaṇṇanā niṭṭhitā.

### 7. Pādukavaggavaṇṇanā

647. Sattamavagge **rukkhato patitoti** ekam olambanasākham gahetvā patito. **Pā**liyāti attano ācārappakāsakaganthassa. **Dhī**rattḥūti dhī atthu, nindā hotūti attho. **Vinipātanahetunā**ti vinipātanassa hetubhāvena. **Tvanti** upayogatthe paccattavacanam, tam icceva vā pāṭho. **Asmā**ti pāsāno.

649. **Na kathetabbanti** therena attano kaṅkhāṭṭhānassa pucchitattā vuttam. Daharassa atthakosallam nātum pucchitena uccāsane nisinnassa ācariyassa anuyogadānanayena vattum vaṭṭati.

652. **Khe**lena **cettha siṅghānikāpi saṅgahitā**ti ettha udakagaṇḍusakam katvā ucchukacavarādīñca mukheneva haritum<sup>1</sup> udakesu chaḍḍetum vaṭṭatīti daṭṭhabbam. Sesam sabbattha uttānameva.

Pādukavaggavaṇṇanā niṭṭhitā.

Sekhiyavaṇṇanānayo niṭṭhito.

655. Adhikaraṇasamathesu ca idha vattabbam natthi.

Iti samantapāsādikāya vinayaṭṭhakathāya vimativinodaniyam

**Bhikkhuvibhaṅgavaṇṇanānayo niṭṭhito.**

---

1. Haritvā (Ka)



# Bhikkhunīvibhaṅgavaṇṇanā

Namo tassa Bhagavato Arahato Sammāsambuddhassa.

## 1. Pārājikakaṇḍa

### 1. Ubbhajāṇumaṇḍalikasikkhāpadavaṇṇanā

656. Bhikkhunīvibhaṅge **migāramāyati** migāramātu, visākhāyati attho. Pāḷiyam “ehi bhikkhunīti bhikkhunī, tīhi saraṇagamehi upasampannāti bhikkhunī”ti idaṃ bhikkhuvibhaṅgapāḷiyā samadassanattamā aṭṭhagarudhammappaṭiggahaṇena laddhūpasampadam mahāpajāpatigotamiñceva tāya saha nikkhantā bhagavato āṇāya bhikkhūnaññeva santike ekato upasampannā pañcasatasākiyāniyo ca sandhāya vuttam. Tā hi bhagavatā ānandattherassa yācanāya pabbajjam anujānanta “etha bhikkhuniyo, mama sāsane tumhepi pavisathā”ti vuttā viya jātā. Sākiyāniyo eva saraṇasilāni datvā kammavācāya upasampādittā “tīhi saraṇagamehi upasampannā”ti vuttā. Na hi etāhi aññā ehibhikkhunibhāvādinā upasampannā nāma santi. Yam pana therīgāthāsu **bhaddāya kuṇḍalakesiyā**—

“Nihacca jāṇum vanditvā, sammukhā añjalim akam.

‘Ehi bhadde’ti maṃ avoca, sā me āsū’pasampadā”ti<sup>1</sup>—

vuttam. Yañca apadānēpi—

“Āyācito tadā āha, ‘ehi bhadde’ti nāyako.

Tadāham upasampannā, parittam toyamaddasan”ti<sup>2</sup>—

vuttam. Tampi “ehi tvaṃ bhikkhunīnam santike pabbajjam, upasampadañca gaṇhāhi”ti bhagavato āṇā upasampadāya kāraṇattā upasampadā ahoṣīti imamattam sandhāya vuttam. Tathā hi vuttam **therīgāthāṭṭhakathāyam** “ehi bhadde,

1. Khu 2. 391 piṭṭhe.

2. Khu 4. 243 piṭṭhe.

bhikkhunupassayaṃ gantvā bhikkhunīnaṃ santike pabbajja upasampajjassūti maṃ avaca āṇāpesi, sā satthu āṇā mayhaṃ upasampadāya kāraṇattā upasampadā āsi ahoṣī”ti <sup>1</sup>.

657. **Sādhāraṇapārājikehī**ti methunādīhi catūhi. Tāni, pana aññāni ca sādharmaṇasikkhāpadāni yasmā bhikkhuvibhaṅge vuttanidānavatthādīsu eva sādharmaṇavasena paññattāni, pacchā pana tāni bhikkhunīnaṃ pātimokkhuddesaṃ anujānanta bhagavato tāsāṃ sikkhāpaccakkhānābhāvena “yā pana bhikkhunī chandaso methunaṃ dhammaṃ paṭiseveyyā”ti-ādinā tadanurūpavasena parivattetvā asādhāraṇasikkhāpadehi saddhiṃ saṃsandetvā bhikkhunipātimokkhuddesavasena ekato saṅgahitāni. Yasmā ca nesaṃ **bhikkhuvibhaṅge**<sup>2</sup> vuttanayeneva sabbopi vinicchayo sakkā nāturū, tasmā tāni vajjetvā asādhāraṇānaṃ eva idha vibhaṅgo vuttoti veditabbaṃ.

659. Bhikkhūnaṃ “kāyasāmsaggaṃ sādīyeyyā”ti avatvā “samāpajjeyyā”ti vuttattā “**bhikkhu āpattiyā na kāretabbo**”ti vuttaṃ. **Tabbahulanayenā**ti kiriyāsamuṭṭhānasseva bahulabhāvato, etena akiriyāsamuṭṭhānāpi ayaṃ āpatti hotīti dasseti. Kiñcāpi dasseti, mayaṃ panettha evaṃ takkayāma “kāyasāmsaggakkhaṇe sādīyantiyā kiriyāya abhāvepi tato pubbe pavattitānaṃ paṭicchannaṭṭhānagamana-īṅgitākāradassanādikiriyānaṃ vaseneva kiriyāsamuṭṭhānameva, parehi magge kariyamānupakkamena niccalassa sādīyato sukkavissatṭhi viya pubbapayogābhāvepi vā tasmiññeva khaṇe parūpakkamena janiyamānāya attano kāyacalanādīsaṅkhātāya kiriyāya, sā hi sādīyamānena<sup>3</sup> tassā cittenāpi samuṭṭhitā kiriyā nāma hoti avāyāmitvā parūpakkamena methunasādīyane viya, bhikkhūnaṃ pana parupakkamajanitaṃ kiriyāṃ abbohārikaṃ katvā attanā kariyamānapayogavaseneva ‘kāyasāmsaggaṃ samāpajjeyyā’ti evaṃ viresetvāva sikkhāpadassa paññattattā sādīyamānepi na doso. Itarathā hi tabbahulanayenettha kiriyatthe gayhamāne aññesampi kiriyākiriyasikkhāpadānaṃ kiriyataggahaṇappasaṅgo siyā”ti.

1. Therīgāthā-Ṭīha 111 piṭṭhe.

2. Vi 1. 28 piṭṭhādīsu.

3. Kiriyāya Sādīyanena Sā (Sī, Ka)

Tasmā vīmaṁsitvā gaḥetabbaṁ. **Sāti** kiriyāsamuṭṭhānatā. **Tathevāti** kāyasaṁsaggarāgī eva.

Ubbhajāṇumaṇḍalikasikkhāpadavaṇṇanā niṭṭhitā.

## 2. Vajjapaṭicchādikasikkhāpadavaṇṇanā

666. Dutiye **purimenāti**-ādi sundarīnandāya vajjapaṭicchādane paññattataṁ sandhāya vuttaṁ. “**Aṭṭhanna**”ti vuttattā vajjapaṭicchādanassāpi paṭicchādane pārājikamevāti daṭṭhabbaṁ. “**Dhuraṁ nikkhattamte**”ti vuttattā paṇṇattiṁ aṇantiyāpi “idaṁ vajjaṁ na pakāsessāmī”ti chandena dhuraṁ nikkhepakkaṇe pārājikanti daṭṭhabbaṁ. Taṁ pana paṭicchādanam yasmā “pesalā ṇatvā garahissanti”ti bhayeneva hoti, bhayañca kodhacittasampayuttaṁ, tasmā idaṁ “**dukkhavedana**”ti vuttaṁ. Yaṁ pana **sāratthadīpaniyam** “kiñcāpi vajjapaṭicchādanam pemavasena hoti, tathāpi sikkhāpadavīkikkamacittaṁ domanassitameva hotī”ti<sup>1</sup> evaṁ paṇṇattivīkikkamacitteneva chādanam domanassatte kāraṇam vuttaṁ, taṁ akāraṇam paṇṇattivijānanam vināpi āpajjitabbatova.

Vajjapaṭicchādikasikkhāpadavaṇṇanā niṭṭhitā.

669. Tatiyaṁ uttānameva.

## 4. Aṭṭhavatthukasikkhāpadavaṇṇanā

675. Catutthe lokassādasāṅkhātāṁ mittehi aññamaññaṁ kātabbaṁ **santhavam**. Vuttamevattham pariyaṅantarena dassetuṁ “**kāyasaṁsaggarāgenā**”ti vuttaṁ.

**Tissitthiyo methunam taṁ na seveti** yā tisso itthiyo, tāsu vuttaṁ taṁ methunam na seveyya. **Anariyapaṇḍaketi** tayo anariye, tayo paṇḍake ca upasaṅkamitvā methunam na seveti attho.

1. Sārattha-Ṭī 3. 114 piṭṭhe.

**anariyā**ti cettha ubhatobyañjanakā adhippetā. **Byañjanasminti** attano vaccamukhamaggepi. Chedo eva **chejjaṃ**, pārājikaṃ.

**Vaṇṇāvaṇṇoti** dvīhi sukkavissatṭhi vuttā. **Gamanuppādananti** sañcarittā. “**Methunadhammassa pubbabhāgattā paccayo hotī**”ti iminā kāriyopacārena kāyasamsaggo methunadhammoti vuttoti dasseti. **Sabbapadesūti** saṅghāṭikaṇṇaggahaṇādipadesu. Kāyasamsaggarāgo, sa-  
ussāhatā, aṭṭhamavatthussa pūraṇanti tīṇettha aṅgāni.

Aṭṭhavatthukasikkhāpadavaṇṇanā niṭṭhitā.

Pārājikavaṇṇanānayo niṭṭhito.



## 2. Saṃghādisesakaṇḍa

### 1. Paṭhamasaṃghādisesasikkhāpadavaṇṇanā

679. Saṃghādisesakaṇḍe “dutiyaassa ārocetī”ti etthāpi dvīsupi aḍḍakārakesu yassa kassaci dutiyassa katham̐ yo koci ārocetīti evamattho gahetabboti āha “eseva nayo”ti.

**Gatigatanti** cirakālapavattam̐. **Āpattīti** āpajjanam̐. “Nissāraṇīyan”ti idam̐ kattu-atthe siddhanti āha “nissāretī”ti. Āpannam̐ bhikkhunim̐ saṃghato viyojeti, viyojanahetu hotīti attho.

**Gīvāyevāti** āṇattiyā abhāvato. **Tesam̐ anattakāmatāyāti** “coro”ti vuttam̐ mama vacanam̐ sutvā keci daṇḍissanti jīvitā voropessantīti evam̐ saññāya. Etena kevalam̐ bhayena vā parikkhāraggahaṇattham̐ vā sahasā “coro”ti vutte daṇḍitepi na dosoti dasseti. Rājapurisānañhi “coro ayan”ti uddissa kathane eva gīvā, bhikkhūnam̐, pana āramikādīnam̐ vā sammukhā “asuko coro evamakāsī”ti kenaci vuttavacanam̐ nissāya āramikādīsū rājapurisānam̐ vatvā daṇḍāpentesupi bhikkhussa na gīvā rājapurisānam̐ avuttattā. Yesañca vuttam̐, tehi sayam̐ corassa adaṇḍitattāti gahetabban̐. “Tvam̐ etassa santakam̐ acchindā”ti āṇattopi hi sace aññena acchindāpeti, āṇāpakassa anāpatti visaṅketattā. “**Attano vacanakaran**”ti idam̐ sāmīcivasena vuttam̐. Vacanam̐ akarontānam̐ rājapurisānam̐pi “iminā gahitaparikkhāram̐ āharāpehi, mā cassa daṇḍam̐ karohī”ti uddissa vadantassāpi daṇḍe gahitepi na gīvā eva daṇḍaggahaṇassa paṭikkhittattā, “asukabhaṇḍam̐ avaharo”ti āṇāpetvā vipaṭisāre uppanne puna paṭikkhipane<sup>1</sup> viya.

Dāsādīnam̐ sampaṭicchane viya tadatthāya aḍḍakaraṇe bhikkhūnam̐pi dukkaṭanti āha “**akappiya-aḍḍo nāma na vaṭṭatī**”ti. Kenaci pana bhikkhūnā khettādi-atthāya vohārikānam̐ santikam̐ gantvā aḍḍe katepi tam̐ khettādisampaṭicchane viya sabbesam̐ akappiyam̐ na hoti pubbe eva saṃghassa

---

1. Vi 1. 67 piṭṭhe.

santakattā, bhikkhusseva pana payogavasena āpattiyo honti, dāsādīnampi pana atthāya rakkhaṃ yācituṃ vohārikena puṭṭhena saṃghassa uppannaṃ kappiyakkamaṃ vattuṃ, ārāmikādīhi ca aḍḍaṃ kārāpetuṅca vaṭṭati eva. Vihāravatthādīkappiya-aḍḍaṃ pana bhikkhuno sayampi kātuṃ vaṭṭati.

**Bhikkhunīnaṃ vuttoti** rakkhaṃ yācantiṇaṃ bhikkhunīnaṃ vutto uddissa-anuddissā vasena rakkhāyācanavinicchayo, na sabbo sikkhāpadavinicchayo asādhāraṇattā sikkhāpadassa. Tenāha “**bhikkhunopī**”ti-ādi. Anākaḍḍhitāya aḍḍakaraṇaṃ, aḍḍapariyosānanti dve aṅgāni.

Paṭhamasaṃghādisesasikkhāpadavaṇṇanā niṭṭhitā.

## 2. Dutiyasaṃghādisesasikkhāpadavaṇṇanā

683. Pāḷiyaṃ dutiye **mallagaṇabhaṭṭiputtagaṇādīkanti**-ādīsū mallarājūnaṃ gaṇo **mallagaṇo**. **Bhaṭṭiputtā** nāma keci gaṇarājāno, tesam gaṇo. Keci pana “nārāyanabhattiko puñṇakāragaṇo mallagaṇo. Tathā kumārabhattiko ca gaṇo bhaṭṭiputtagaṇo”tipi<sup>1</sup> vadanti. **Dhammagāṇoti** sāsane, loke vā anekappakārapuñṇakārako gaṇo. Gandhavikatikārako gaṇo **gandhikaseṇī**. Pesakārādigaṇo **dussikaseṇī**. **Kappagatikanti** kappiyabhāvagataṃ, pabbajitapubbanti attho.

685. Pāḷiyaṃ **vuṭṭhāpetī**ti upasampādeti. Akappagatampi pabbājentiyaṃ dukkaṭanti vadanti. Khīṇāsavāyapi āpajjitabbato “**ticittan**”ti vuttaṃ. Coritā, taṃ ṇatvā ananuñṇātakāraṇā vuṭṭhāpananti dve aṅgāni.

Dutiyasaṃghādisesasikkhāpadavaṇṇanā niṭṭhitā.

---

1. Sārattha-Ṭī 3. 117 piṭṭhe.

### 3. Tatiyaśaṃghādisesaśikkhāpadavaṇṇanā

692. Tatiye **parikkhepaṃ atikkāmentiyā**ti gāmantarassa parikkhepaṃ atikkāmentiyā. “Gāmantaraṃ gaccheyyā”ti hi vuttaṃ.

Vikālagāmapavesanaśikkhāpade viya “aparikkhittassa upacāraṃ okkamantiyā”ti avatvā “atikkāmentiyā”ti pāḷiyam vuttattā gāmaṃ pavisantiyā gharūpacāre ṭhitassa dutiyaleḍḍupātasāṅkhātassa upacārassa atikkamo nāma paṭhamaleḍḍupātaṭṭhānasāṅkhātassa parikkhepārahaṭṭhānassa atikkamo evāti āha “**parikkhepārahaṭṭhānaṃ ekena pādena atikkamati**”ti.

**Majjheti** gāmamajjhe. **Pacchāti** aparakāle. “**Catugāmasādhāraṇattā**”ti iminā vihārato catūsu gāmesu yattha katthaci pavisitum vaṭṭatīti ettha kāraṇamāha.

**Paratīrameva akkamantiyā**ti nadinā anotaritvā orimatīrato laṅghitvā vā ākāśādinā vā paratīrameva atikkāmentiyā. **Orimatīrameva āgacchati, āpattīti** pāragamanāya otiṇṇattā vuttaṃ.

**Tādise araṇṇeti** indakhīlato bahibhāvalakkhaṇe araṇṇe. “**Tenevā**”ti-ādinā dassanūpacāre virahite savanūpacārassa vijjamaṇattepi āpatti hotīti dasseti. **Aṇṇaṃ maggaṃ gaṇhātīti** maggamūḷhattā gaṇhāti, na dutiyikaṃ ohiyitum. Tasmā anāpatti. Anantarāyena ekabhāvo, anāpadāya gāmantaragamanādīsu ekanti dve aṅgāni.

Tatiyaśaṃghādisesaśikkhāpadavaṇṇanā niṭṭhitā.

### 4. Catutthaśaṃghādisesaśikkhāpadavaṇṇanā

694. Catutthe **kāraḷagaṇassāti** imassa kammaṃ kātabbanti yehi sanniṭṭhānaṃ kataṃ, te sandhāya vuttaṃ. Kammavācakkhaṇe sahaṭṭhite keci. **Netthāravatteti** nittharaṇahetumhi vatte.

698. Pāḷiyaṃ **asante kārakasam̄gheti** ettha vijjamānaṃ sudūrampi gantvā āpucchitabbaṃ. Antarāye pana sati sammā vattantaṃ osāretuṃ vaṭṭatīti. Dhammakammaṇa ukkhittatā, ananuññātakāraṇā osāraṇanti dve aṅgāni.

Catutthasam̄ghādisesasikkhāpadavaṇṇanā niṭṭhitā.

---

### 5. Pañcamasam̄ghādisesasikkhāpadavaṇṇanā

701. Pañcame **tanti mahā-aṭṭhakathāyaṃ** avacanaṃ “anavassutoti jānanāti paṭiggahaṇhātī”ti-ādipāḷiyā sameti. Ubhato avassutabhāvo, udakadantaponato aññaṃ sahatthā gahetvā ajjhoharaṇanti dve aṅgāni.

Pañcamasam̄ghādisesasikkhāpadavaṇṇanā niṭṭhitā.

---

### 6. Chaṭṭhasam̄ghādisesasikkhāpadavaṇṇanā

705. Chaṭṭhe **paṭiggaho tena na vijjatīti** teneva “na detī”ti vuttakāraṇena uyyojitāya hatthato itarāya paṭiggahopi natthi. **Paribhogapaccayāti** uyyojitāya bhojanapariyosānapaccayāti attho. Manussapurisassa avassutatā, taṃ ñatvā ananuññātakāraṇā uyyojanā, tena itarissā gahetvā bhojanapariyosānanti tīṇi aṅgāni.

Chaṭṭhasam̄ghādisesasikkhāpadavaṇṇanā niṭṭhitā.

709-727. Sattamato yāvadasamapariyosānāni uttānāneva.

Sam̄ghādisesavaṇṇanāyāyo niṭṭhito.

### 3. Nissaggiyakaṇḍa

#### 2. Dutiyānissaggiyādiṭṭhācittiyasikkhāpadavaṇṇanā

733. Nissaggiyesupi paṭhamam uttānameva.

740. Dutīye **ayyāya dammīti evam paṭiladdhanti** nissaṭṭhapaṭiladdham, nissaṭṭham paṭilabhitvāpi yaṃ uddissa dāyakehi dinnam, tattheva dātabbam. Tenāha “**yathādāneyeva upanetabban**”ti. Akālacīvaratā, tam ṇatvā kālacīvaranti lesena bhājāpanam, paṭilābhoti tīṇi aṅgāni.

743. Tatiye **me’tanti** mamevetam cīvaram. Upasampannatā, parivattitavikappanupagacīvarassa sakasaññāya acchindanādīti dve aṅgāni.

748-752. Catutthe **āhaṭasappim datvāti** attano datvā. **Yamakam pacitabbanti** sappiṇca telaṇca ekato pacitabbam. Lesena gahetukāmatā, aññassa viññatti, paṭilābhoti tīṇi aṅgāni.

753. Pañcame **sāti** thullanandā. **Ayanti** sikkhamānā. **Cetāpetvāti jānāpetvāti** idha vuttam, **mātikāṭṭhakathāyam** pana “attano kappiyabhaṇḍena ‘idam nāma āharā’ti aññam parivattāpetvā”ti<sup>1</sup> vuttam.

758. Chaṭṭhe **pāvārikassāti** dussavāṇijakassa.

764. Sattame **saññācītakenāti** sayam yācītakenapīti attho.

769-789. Aṭṭhamato yāvadvādasamā uttānameva.

Nissaggiyavaṇṇanānayo niṭṭhito.

## 4. Pācittiyakaṇḍa

### 1. Lasuṇavagga

#### 1. Paṭhamalasūṇādisikkhāpadavaṇṇanā

797. Pācittiyesu lasuṇavaggassa paṭhame **badarasālavam** nāma badaraphalāni sukkhāpetvā tehi kattabbabyañjanavikati. Āmakamāgadhalasuṇaṅceva, ajjhoharaṇaṅcāti dve aṅgāni.

799-812. Dutiyādīni uttānatthāni.

815. Chaṭṭhe pāḷiyam **āsumbhivāti** pātetvā.

817. **Dadhimatthūti** dadhimhi pasannodakam. **Rasakhīrādīnanti** maṃsarasakhīrādīnam. Bhuñjantassa bhikkhuno hatthapāse ṭhānam, pānīyassa vā vidhūpanassa vā gahaṇanti dve aṅgāni.

822. Sattame **aviññattiyā laddhanti** attano viññattim viṇā laddham. **Pubbāparaviruddhanti** sayam karaṇe pācittiyanti idam kārāpane dukkaṭavacanena virujjhanam sandhāya vuttam. Tenāha “**na hī**”ti-ādi, “aviññattiyā laddhan”ti-ādivacanena vā virujjhanam sandhāya vuttam. Aññāya viññattipi hi imissā aviññattiyā laddhamevāti. Āmakadhaññaviññāpanādi, tam bhajjanādīnā ajjhoharaṇanti dve aṅgāni.

824. Aṭṭhame **nibbiṭṭhoti** laddho. **Keṇīti** rañño dātabbo āyo, āyuppatiṭṭhānanti attho. Tenāha “**ekam ṭhānantaran**”ti-ādi. **Ṭhānantaranti** ca gāmajanapadānāyattam<sup>1</sup>. Vaḷaṅṅijyamānatirokuṭṭādītā, anapaloketvā uccārādīnam chaḍḍanādīti dve aṅgāni.

830. Navame “**matthakacchinnanāḷikerampī**”ti vuttattā haritūpari chaḍḍanameva paṭikkhittam. Tenāha “**anikkhittabījesū**”ti-ādi. Yattha ca chaḍḍetum vaṭṭati, tattha harite vaccādīm kātumpi vaṭṭati eva. **Sabbesanti** bhikkhubhikkhunīnam.

836-7. Dasame **tesamye**vāti yesaṃ niccaṃ passati. **Ārāme** **ṭhatvā**ti ṭhitanisannaṭṭhāne eva ṭhatvā samantato gīvaṃ parivattetvāpi passati, anāpatti. Ṭhitaṭṭhānato gantvā passituṃ na vaṭṭati. Keci pana “vaṭṭati”ti vadanti. Taṃ pana “dassanāya gaccheyya, pācittiyān”ti sāmāññato gamanassa paṭikkhittattā, anāpattiyampi gamanāya avuttattā ca na gahetabbaṃ. Naccādītā, ananuññatakāraṇā gamanaṃ, dassanādi cāti tīṇi aṅgāni.

Niṭṭhito lasuṇavaggo paṭhamo.

## 2. Andhakāravagga

### 1. Paṭhamādisikkhāpadavaṇṇanā

841. Dutiyavaggassa paṭhame **dāne** **vā**ti dānanimittāṃ. Rattandhakāre purisassa hatthapāse ṭhānādi, rahoṭṭhā, saḥāyābhāvoti tīṇi aṅgāni.

842-850. Dutiyādīni uttānāni.

854. Pañcame **pallaṅkassa** **anokāseti** ūrubaddhāsanassa appahonake. Purebhataṃ antaraghare pallaṅkappahonakāsane nisajjā, ananuññākakāraṇā anāpucchā vuttaparicchedātikkamoti dve aṅgāni.

860-879. Chaṭṭhādīni uttānāni.

Niṭṭhito andhakāravaggo dutiyo.

## 3. Naggavagga

### 1. Paṭhamādisikkhāpadavaṇṇanā

883-887. Tatiyavaggassa paṭhamadutiyaṇi uttānāni.

893. Tatiye **visibbetvā**ti vijātetvā. **Dhuraṃ** **nikkhittamatteti** visibbanadivasato pañca divase atikkāmetvā dhuraṃ nikkhittamatte. Antopañcāhe pana dhuranikkhepepi anāpatti eva “aññatra catūhapañcāhā”ti

vuttatā. Upasampannāya cīvaram sibbanatthāya visibbetvā pañcahātikkamo, ananuññātakāraṇā dhuranikkhepoti dve aṅgāni.

900. Catutthe pañcannaṃ cīvarānaṃ aparivattanaṃ, ananuññātakāraṇā pañcahātikkamoti dve aṅgāni.

903. Pañcamaṃ uttānameva.

909. Chaṭṭhe vikappanupagassa saṃghe pariṇatatā, vinā ānisaṃsadassanena antarāyakaraṇanti dve aṅgāni.

911. Sattamaṃ uttānameva.

916. Aṭṭhame **kumbhathūṇaṃ** nāma kumbhasaddo, tena kīlantīti **kumbhathūṇikā**. Tenāha “**ghaṭakena kīlanakā**”ti. **Dīghanikāyatthakathāyaṃ** pana “caturassa-ambaṇakatāḷaṃ”ti<sup>1</sup> vuttaṃ. Tañhi rukkhasārādimayaṃ antochiddaṃ catūsu passesu cammonaddhaṃ vāditabhaṇḍaṃ, yaṃ “bimbisakan”tipi vuccati, taṃ vādentāpi kumbhathūṇikā. Tenāha “**bimbisakavāditakātipi vadanti**”ti.

918. Pāḷiyaṃ **kappakatanti** kappakataṃ nivāsanapārūpanūpagam. Samaṇacīvaratā, ananuññātānaṃ dānanti dve aṅgāni.

921-931. Navamadasamāni uttānāneva.

Niṭṭhito naggavaggo tatiyo.

#### 4. Tuvattavagga

### 10. Dasamasikkhāpadavaṇṇanā

976. Tuvattavaggassa dasame cārikāya apakkamanaṃ paṇṇattivajjameva. Paṇṇattivijānana-cittena sacittakataṃ sandhāya panettha “**lokavajjan**”ti daṭṭhabbaṃ. Sesam sabbattha uttānameva.

Niṭṭhito tuvattavaggo catuttho.

---

1. Dī-Ṭṭha 1. 81 piṭṭhe.



## 5. Cittāgāravagga

### 1. Paṭhamādisikkhāpadavaṇṇanā

978. Cittāgāravaggassa paṭhame **pāṭekkā āpattiyoti** gīvāya parivattanappayogagaṇanāya.

1015. Navame hatthi-ādīsu **sippa**-saddo paccekam yojetabbo, tathā āthabbaṇādīsu<sup>1</sup> **manta**-saddo. Tatha **āthabbaṇamanto** nāma āthabbaṇavedavihito parūpaghātakaro manto. **Khīlanamanto** nāma verimāraṇatthāya sārādārumayaṃ khīlaṃ mantetvā pathaviyaṃ ākoṭanamanto. **Agadappayogo** visappayojanaṃ. **Nāgamaṇḍalanti** sappānaṃ pavesanivāraṇattham maṇḍalabandhamanto. Sesam sabbattha uttānameva.

Niṭṭhito cittāgāravaggo pañcama.

1025-1116. Ārāmavagge, gabbhinivagge ca sabbaṃ uttānameva.

## 8. Kumāribhūtavagga

### 1. Paṭhamādisikkhāpadavaṇṇanā

1119. Aṭṭhamavaggassa paṭhame **sabbapaṭhamā dve mahāsikkhamānāti** gabbhinivagge<sup>2</sup> sabbapaṭhamam vuttā dve. **Sikkhamānā icceva vattabbāti** sammutikammādīsu aññathā vutte kammaṃ kuppātīti adhippāyo.

1167. Ekādasame **pārivāsiyena chandadānenāti** parivutthena navikappavutthena vagatena chandadānenāti attho, chandavissajjanamattena vā.

1168. “**Vuṭṭhitāyā**”ti etena “idāni kammaṃ na karissamā”ti dhuraṃ nikkhipitvā kāyena avuṭṭhahitvā nisinnāyapi parisāya kammaṃ kātuṃ na vaṭṭatīti<sup>3</sup> dasseti. Tenāha “**chandaṃ avissajjetvā avuṭṭhitāyā**”ti. Pāḷiyam pana “anāpatti avuṭṭhitāya parisāyā”ti sāmāññato

1. Athabbaṇādīsu (Ka)

2. Vi 2. 416 piṭṭhe.

3. Vaṭṭatīti (Sī, Ka)

vuttattā, **uposathakkhandhake** ca “na bhikkhave pārivāsikapārisuddhidānena uposatho kātabbo aññatra avuṭṭhitāya parisāyā”<sup>1</sup> vuttattā, **tadaṭṭhakathāyampi** “pārivāsiyapārisuddhidānaṃ nāma parisāya vuṭṭhitakālato paṭṭhāya na vaṭṭati, avuṭṭhitāya pana vaṭṭatī”<sup>2</sup> vuttattā ca “kammaṃ na karissāmi”<sup>3</sup> ti dhuraṃ nikkhipitvā nisinnāyapi kammaṃ kātuṃ vaṭṭatī<sup>3</sup> gahetabbaṃ. Sesāṃ uttānameva.

Niṭṭhito kumāribhūtavaggo aṭṭhamo.

1181. Chattavaggo uttāno eva.

Khuddakavaṇṇanāyāyo Niṭṭhito.

---

1. Vi 3. 190 piṭṭhe.

2. Vi-Ṭṭha 3. 348 piṭṭhe.

3. Na vaṭṭatīti (Sī, Ka)

## 5. Pāṭidesanīyakaṇḍa

### Pāṭidesanīyasikkhāpadavaṇṇanā

1228. Pāṭidesanīyādīsu **pāḷivinimuttakesūti** pāḷiyam anāgatesu sappi-  
ādīsu.

**Sattādhikaraṇavhayāti** sattādhikaraṇasamathanāmakā. Tam  
atthavinicchayam tādisaṃyeva yasmā vidū vadantīti attho. Yathā niṭṭhitāti  
sambandho. **Sabbāsavapahanti** sabbāsavavighātakam arahattamaggam.  
**Passantu nibbutinti** maggañāṇena nibbānam sacchikarontu, pappontūti vā  
pāṭho. Tattha **nibbutinti** khandhaparinnibbānam gahetabbam.

Iti samantapāsādikāya vinayaṭṭhakathāya vimativinodaniyam

Bhikkhunīvibhaṅgavaṇṇanāyā Niṭṭhito.

**Ubhatovibhaṅgaṭṭhakathāvaṇṇanā niṭṭhitā.**



# Mahāvaggavaṇṇanā

Namo tassa Bhagavato Arahato Sammāsambuddhassa.

## 1. Mahākhandhaka

### Bodhikathāvaṇṇanā

Mahāvagge **ubhinnaṃ pātimokkhānanti** ubhinnaṃ pātimokkhavibhaṅgānaṃ. Yaṃ khandhakaṃ saṅgāyimsūti sambandho. Khandhānaṃ samūho, khandhānaṃ vā pakāsanato **khandhako**. **Khandhāti** cettha pabbajjādicārittavārittasikkhāpadapaññattisamūho adhippeto. Padabhājanīye yesaṃ padānaṃ atthā yehi aṭṭhakathānāyehi pakāsitāti yojanā. Atha vā ye atthāti yojetabbaṃ. **Hi**-saddo cettha padapūraṇe daṭṭhabbo.

1. **Visesakāraṇanti** “yena samayena āyasmato sārīputtattherassa sikkhāpadapaññattiyācanahetubhūto parivitaṅko udapādi, tena samayenā”ti-ādinā vuttakāraṇaṃ viya visesakāraṇaṃ bhumavacananivattanakakāraṇanti attho. **Etassāti** abhisambodhito paṭṭhāya satthu cariyāvibhāvanassa vinayapaññattiyāṃ kiṃ payojanaṃ? Yadi visesakāraṇaṃ natthīti adhippāyo. Nidānadassanaṃ payojananti yojanā. **Nidānanti** cettha sikkhāpadapaññattihetubhūtaṃ vatthupuggalādikāraṇaṃ adhippetāṃ, na paññattiṭṭhānameva. Tenāha “**yā hī**”ti-ādi.

**Uruvelāyanti** ettha **uru**-saddo mahantavācī, **velā**-saddo tīrapariyāyo. Unnatattādinā velā viya velā, uru mahantī velā uruvelā, tassaṃ. Tenāha “**mahāvelāyan**”ti-ādi. **Mariyādāti** silādiguṇasīmā. **Pattapuṭenāti** tālādīnaṃ paṇṇapuṭena.

“Paṭhamābhisambuddho”ti anunāsikalopenāyaṃ niddesoti āha “**paṭhamāṃ abhisambuddho**”ti. **Paṭhamanti** ca bhāvanapuṃsakaniddeso. Tasmā

abhisambuddho hutvā sabbapaṭhamam bodhirukkhamūle viharatīti yojanā datṭhabbā.

Pāḷiyam **atha khoti** ettha **athā**ti etasmim samayeti attho anekatthattā nipātānam. **Sattāhanti** accantasamyoge etam upayogavacanam. **Atha khoti** adhikārantaradassane nipāto. Tena vimuttisukhapaṭisaṃvedanam pahāya paṭiccasamuppādamanasikāre adhikatabhāvam dasseti. **Paṭiccā**ti paṭimukham gantvā, aññamaññam apekkhitvāti attho. Etena kāraṇabahutā dassitā. **Sahiteti** kāriyabahutā. **Anulomanti** bhāvanapuṃsakaniddeso. **Svevā**ti so eva paccayākāro. **Purimanayena vā vuttoti** “avijjāpaccayā saṅkhārā”ti-ādinā nayena vutto paccayākāro. **Pavattiyā**ti saṃsārappavattiyā.

Pāḷiyam “**avijjāpaccayā**”ti-ādīsu dukkhādīsu aññānam **avijjā**. Lokiyakusalākusalacetanā **saṅkhārā**. Lokiyavipākameva **viññānam**. Lokiyavedanādikkhandhattayam **nāmam**, bhūtopādāyabhedam **rūpam**. Pasādaviññānabhedam **saḷāyatanam**. Vipākabhūto sabbopphasso, **vedanā** ca. Rāgo **taṇhā**. Balavarāgo, tividhā ca diṭṭhi **upādānam**. **Bhavo** pana duvidho kammabhavo, upapattibhavo ca. Tattha **kammabhavo** sāsavakusalākusalacetanāva, **upapattibhavo** upādinnakakkhandhā. Tesam upapatti **jāti**. Pāko **jarā**. Bhedo **marānam**. Te eva nissāya socanam **soko**. Kandanam **paridevo**. **Dukkham** kāyikam. **Domanassam** cetasikam. Ativiya soko **Upāyāso**.

Paccekañca **sambhavati**-saddo yojetabbo. Tenāha “**iminā nayenā**”ti-ādi. “**Dukkharāsissā**”ti iminā na sattassa, nāpi subhasukhādīnanti dasseti.

**Haveti** byattanti imasmim atthe nipāto. “**Anulomapaccayākārapaṭivedhasādhakā bodhipakkhiyadhammā**”ti idam paṭhamavāre kiñcāpi “avijjāyatveva asesavirāganirodhā”ti-ādinā paṭilomapaccayākāropi āgato, tathāpi “yato pajānāti sahetudhamman”ti anulomapaccayākārapaṭivedhasseva kāraṇattena vuttanti. Yathā cettha, evam dutiyavārepi “yato khayam paccayānam avedī”ti gāthāya vuttattā “paccayānam

khayasaṅkhātan”ti-ādi vuttanti veditabbaṃ. **No kallo pañhoti** ayutto na byākātabbo, avijjamānaṃ attānaṃ siddhaṃ katvā “ko phusatī”ti tassa kiriyāya puṭṭhattā “ko vañjhāvutto phusatī”ti-ādi<sup>1</sup> viyāti adhippāyo. **Soḷasa kaṅkhāti** “ahosiṃ nu kho aham atītamaddhānaṃ, nanu kho ahosiṃ, kiṃ nu kho ahosiṃ, kathaṃ nu kho ahosiṃ kiṃ hutvā kiṃ ahosiṃ nu kho ahamatītamaddhānaṃ bhavissāmi nu kho aham anāgatamaddhānaṃ, nanu kho bhavissāmi, kiṃ nu kho bhavissāmi, kathaṃ nu kho bhavissāmi, kiṃ hutvā kiṃ bhavissāmi nu kho aham anāgatamaddhānaṃ, aham nu khosmi, no nu khosmi, kiṃ nu khosmi, kathaṃ nu khosmi, ayaṃ nu kho satto kuto āgato, so kuhiṃ gāmi bhavissatī”ti<sup>2</sup> evaṃ āgatā atīte pañca, anāgate pañca, paccuppanne chāti soḷasavidhā kaṅkhā.

Tattha **kiṃ nu khoti** manussadevādīsu, khattiyādīsu vā aññataraṃ nissāya kaṅkhati. **Kathaṃ nu khoti** pana saṅghānākārādīsu issārādijanakaṃ, kāraṇaṃ vā nissāya. **Kiṃ hutvā kiṃ ahosinti** ca manussādīsu paṭhamaṃ kiṃ hutvā pacchā kiṃ ahosintikaṅkhati. **Aham nu khosmīti**-ādi idāni attano vijjamānāvijjamānataṃ, sarūpapakārādikaṅka kaṅkhati. **Vapayantīti** vi-apayanti byapagacchanti. Tenāha “**apagacchanti nirujjhantī**”ti.

3. **Tassa vasenāti** tassa paccayākārapajānanassa, paccayakkhayādhigamassa ca vasena. **Ekekameva koṭṭhāsanti** anulomapaṭilomato ekekameva koṭṭhāsaṃ. **Pāṭipadarattiyā evaṃ manasākāsīti** rattiyā tīsupi yāmesu evaṃ idha khandhakapāḷiyā āgatanayena anulomapaṭilomaṃyeva manasākāsi.

### Ajapālakathāvaṇṇanā

4. Tassa **sattāhassa accayenāti** pallaṅkasattāhassa apagamanena. **Tamhā samādhimhāti** arahattaphalasaṃpattisamādhimhā. Antarantarā eva hi paccayākāramanasikāro. Avasesakālaṃ pana sabbam bhagavā phalasaṃpattiyāpi vītināmesi. Tam sandhāya “**tamhā samādhimhā**”ti vuttaṃ.

1. Ko bujjhāsu ko phusatīti-ādi (Sī, Ka)

2. Ma 1. 10; Saṃ 1. 265; Khu 7. 324 piṭṭhādīsu.

**Ratanacaṅkameti** bhagavato ciraṃ ṭhitassa caṅkamanādhippāyaṃ ñatvā devatāhi māpīte ratanacaṅkame. **Ratanagharanti** bhagavato nisīdanādhippāyaṃ ñatvā devatāhi māpitaṃ ratanamayaṃ gehaṃ.

**Tatrāpīti** na kevalaṃ ratanaghareyeva, tatrāpi ajapālanigrodhamūlepi abhidhammaṃ vicinanto eva antarantarā vimuttisukhaṃ paṭisaṃvedentoti attho. Tatthāpi hi anantanayasamantapaṭṭhānaṃ sammasato sammāsambuddhassa pītisamuṭṭhitā chabbaṇṇā buddharasmiyo ratanaghare viya nicchariṃsu eva. “**Huṃhun**”ti **karontoti** “sabbe hīnajātikā maṃ mā upagacchantū”ti mānavasena, samīpaṃ upagatesu kodhavasena ca “apethā”ti adhippāyanicchāritaṃ huṃhūmkāraṃ karonto.

**Brahmaññanti** brāhmaṇattaṃ. **Antanti** nibbānaṃ. **Vedānaṃ vā antanti** maggañāṇaṃ vā antabhūtaṃ arahattaphalaṃ.

### Mucalindakathāvaṇṇanā

5. **Mucalindamūleti** ettha ca **mucalindo** vuccati nīparukkho, yo “niculo”tipi vuccati. **Uppanameghoti** sakalacakkavāḷagabbhaṃ pūretvā uppanno mahāmegho. **Vaddalikāti** vuṭṭhiyā eva itthilingavasena nāmaṃ. Yā ca sattāhaṃ pavattattā sattāhavaddalikāti vuttāti āha “**sattāhaṃ avicchinnavuṭṭhikā ahoṣī**”ti. Sītavātena dūsitaṃ dinametissā vaddalikāyāti sītavātaduddinīti āha “**udakaphusitasammissenā**”ti-ādi. Ubbiddhatā nāma dūrabhāvena upaṭṭhānanti āha “**meghavigamena dūrībhūtan**”ti. Indanīlamaṇi viya dibbati jotetīti **devo**, ākāso.

**Etamatthaṃ viditvāti** vivekassa sukhabhāvaṃ viditvā. Sabbaso asantuṭṭhisamucchedakattā maggañāṇaṃ “**catumaggañāṇasantosenā**”ti vuttaṃ. **Akupanabhāvoti** akujjhanasabhāvo.

### Rājāyatanakathāvaṇṇanā

6. **Paccaggheti** abhinave. Ayameva attho pasattho, na purimo. Na hi buddhā mahagghaṃ pattāṃ paribhuñjanti.



### Brahmayācanakathāvaṇṇanā

7. Ālīyanti sevīyantīti ālayā, pañca kāmaguṇāti āha “**sattā -pavuccantī**”ti. **Suṭṭhu muditāti** ativiya pamuditā. **Ṭhānam sandhāyāti ṭhāna-**saddam apekkhivā. **Imesanti** saṅkhārādīnam phalānam. Pāliyaṃ **sabbasaṅkhārasamatho**ti-ādīni nibbānavevacanāni. **Apissūti** sampiṇḍanatthe nipāto. Na kevalam etadahosi, imāpi gāthā paṭibhamsūti attho.

**Kicchena me adhigatanti** pāramipūraṇam sandhāya vuttam, na dukkhāpaṭipadam. Buddhānañhi cattāro maggā sukhāpaṭipadāva honti. **Ha-**iti byattam, ekamsanti dvīsu atthesu nipāto, byattam, ekamsena vā alanti viyojenti. **Halanti** vā eko nipāto.

8. Pāliyaṃ **sahampatissāti** so kira kassapassa bhagavato sāsane **sahako** nāma thero paṭhamajjhānabhūmiyaṃ brahmapati hutvā nibbato, tena nam “sahampati”ti sañjānimsu. **Assavanatāti** assavanatāya, assavanenāti attho. Savanameva hi savanatā yathā devatāti.

**Dhammo asuddhoti** micchādiṭṭhidhammo. **Samalehīti** pūraṇakassapādīhi chahi satthārehi. **Apāpurāti**<sup>1</sup> desanāhatthenavivara. **Dvāranti** ariyamaggam sandhāya vadati.

**Seleti** ghanasilāmaye. **Tathūpamanti** ettha **tathā**-saddo tam-saddatthe daṭṭhabbo. Tena so selapabbato upamā yassa, tam tathūpamanti attho. Tena vā pabbatādīnā pakārena upamā assātipi attho. **Dhammamayanti** lokuttaradhamabhūtam. **Uṭṭhāhīti** dhammadesanattāyā cārikacaraṇattham imamhā āsanā kāyena, appossukkabhāvato vā cittena uṭṭhehi, ayameva vā pātho. Teneva “vicara, desassū”ti duvidhepi kāyacittapayoge niyojesi. **Vīrāti**-ādi cattāri thutivasena sambodhanāni.

9. **Buddhacakkhunāti** indriyaparopariyattañāṇena, āsayānusayañāṇena ca. Imesañhi dvinnam “buddhacakkhū”ti nāmam. **Svākārāti** saddhindriyādayova

---

1. Avāpurāti (Sī)

ākārā sundarā yesaṃ, te svākārā, suviññāpayā, paralokañca vajjañca bhayato dassanasilā cāti daṭṭhabbaṃ. Uppalāni ettha santīti **uppalinīti** gacchalatāpi pokkharaṇīpi vuccati. Idha pana pokkharaṇī. Evamitaresupi.

**Udakānuggatānīti** udakato anuggatāni. Anto nimuggāneva hutvā pusanti vadḍhanti, tāni **antonimuggaposīni**. **Accuggammāti** udakaṃ atikkamanavasena uggantvā.

**Apārutāti** vivaṭā. **Tesanti** sa-upanissayānaṃ sattānaṃ. **Dvārāti** ariyamaggadvārāni. Idañca attano sayambhuññaṇena sa-upanissayānaṃ tesam magguppattidiṭṭhataṃ sandhāya vadati. **Vihimsasasaññīti**-ādīsu evamattho daṭṭhabbo—“ahañhi attano paguṇaṃ suppavattitampi imaṃ paṇītaṃ dhammaṃ ajānantesu manujesu desanāya vihimsā kāyavācākīlamatho hotī”ti evaṃ vihimsasasaññī hutvā **na bhāsiraṃ** bhāsitaṃ na icchīṃ. Idāni pana hetusampannā attano saddhābhājanaṃ vivarantu, pūressāmi **nesaṃ** saṅkappanti.

### Pañcavaggiyakathāvaṇṇanā

10. **Ālāroti** nāmaṃ. **Kālāmoti** gottaṃ. **Bhagavatopi kho ñāṇaṃ udapādīti** kiṃ idāneva udapādi, nanu bodhimūle tekālikā, kālavinimuttā ca sabbe dhammā sabbākārato diṭṭhāti? Saccam diṭṭhā, tathāpi nāmādivasena avikappitā ekacittakkhaṇikattā sabbaññūtaññāṇassa. Na hi ekena<sup>1</sup> cittaṇa sabbadhammānaṃ nāmajāti-ādikaṃ paccekaṃ anantaṃ vibhāgaṃ<sup>2</sup> vikappetaṃ sakkā vikappānaṃ viruddhānaṃ sahānuppattito, sabbavikappārahadhammadassanameva panānena sakkā kātuṃ. Yathā diṭṭhesu pana yathicchitākāraṃ ārabha vikappo uppajjati cakkhuviññāṇena diṭṭhe cittaṇe viya. Idhāpi ālāraṃ nissāya āvajjanānantameva sabbākāraññaṇaṃ udapādi. Na kevalaṅca taṃ, atha kho pañcavaggiyā eva paṭhamaṃ dhammaṃ jānissanti, tappamukhā ca devatā, ālāro kālaṃ katvā ākiñcaññāyatane, udako ca nevasaññānāsaññāyatane nibbattoti evamādikaṃ sabbampi nissāya ñāṇaṃ uppajjati eva. Taṃ pana khaṇasampattiyā dullabhabhāvaṃ dassetaṃ kamena oloketaṃ devatāya vutte ñāṇaṃ viya

1. Kenaci (Sī)

2. Paccekaṃ paccekaṃ anantadhammā sabbākārato diṭṭhāti vibhāgaṃ (Sī)

katvā vuttaṃ. Saddagatiyā hi bandhattā<sup>1</sup> ekena ñāṇena ñātampi vuccamānaṃ kamena ñātaṃ viya paṭibhāti, devatāpi ca bhagavatā ñātamevatthaṃ ārocesi. Teneva “bhagavatopi kho ñāṇaṃ udapādi”ti vuttanti daṭṭhabbaṃ. Evamaññatthāpi idisesu “lokaṃ volokento asukaṃ addasa, tattha mayi gate kiṃ bhavissati”ti evamādinā satthu hitesitāsandassanavasappavattesu. Sabbattha vacanagatiyaṃ kamavuttite paññāyamānepi ekeneva ñāṇena sakalāvabodho veditabbo. **Bahukārā kho me pañcavaggiyāti** upakārassāpi vijjamānataṃ sandhāya vuttaṃ, na pana dhammadesanāya kāraṇatena anupakārānampi desanato.

11. **Antarā ca gayāṃ antarā ca bodhinti** gayāya, bodhissa ca antare tigāvute ṭhāne.

**Sabbābhibhūti** sabbāṃ tebhūmakadhammaṃ abhibhavivā ṭhito. **Anūpalittoti** kilesalepena alitto. Tato eva **sabbañjaho. Taṇhakkhaye vimuttoti** taṇhakkhaye nibbāne ārammaṇakaraṇavasena vimutto. Evaṃ sayāṃ sabbadhamme attanāva jānitvā. **Kamuddiseyyanti** kaṃ aññaṃ “ayaṃ me ācariyo”ti uddiseyyaṃ.

**Kāsināṃ puranti** bārāṇasim. **Āhañchanti** āhanissāmi. Amatādhigamāya ugghosanato **amatadundubhinti** satthu dhammadesanā vuttā, “amatabherim paharissāmi”ti gacchāmi attho.

**Arahasi anantajinoti** anantajinopi bhavituṃ yuttoti attho. Anantaññatāya ananto jino ca, anantena vā ñāṇena, anantaṃ vā dosaṃ jītavā, uppādavayantarāhitāya vā anantaṃ nibbānaṃ ajini kilesārayo madditvā gaṇhītipi **anantajino**.

**Hupeyyāpīti** evampi bhaveyya, evaṃvidhe rūpakāyaratane idisena ñāṇena bhavitabbanti adhippāyo. Evaṃ nāma kathanañhissa upanissayasampannassa aparakāle dukkhappattassa bhagavantaṃ upagamma pabbajitvā maggaphalapaṭivedhāya paccayo jāto. Tathāhesa bhagavā tena samāgamatthaṃ padasāva maggaṃ paṭipajji.

---

1. Gandhattā (Sī), gantatthā (Ka)

12. **Bāhullikoti** paccayabāhulliko. **Padhānavibbhantoti** padhānato dukkaracaraṇato parihīno. Natthi ettha agāriyaṃ, agārassa hitaṃ kasigorakkhādikammanti anagāriyā, pabbajjā, taṃ **anagāriyaṃ**. **Pabbajantīti** upagacchanti. **Tadanuttaranti** taṃ anuttaraṃ. **Brahmacariyapariyosānanti** maggabrahmacariyassa pariyosānaṃ, arahattaphalanti attho. Tassa hi atthāya kulaputtā pabbajanti. **Diṭṭheva dhammeti** imasmiṃ paccakkhe attabhāve. **Sayanti** aparappaccayā. **Abhiññā sacchikatvāti** attanova ñāṇena paccakkhaṃ katvā, **upasampajjāti** pāpuṇivā.

**Iriyāyāti** dukkara-iriyāya. **Uttarimanussadhammāti**-ādīsu manussadhammato lokiyañāṇato upari ariyaṃ kātuṃ alaṃ samattho **alamariyo**. **Ñāṇadassanavisesoti** sabbaññutaññāṇassa pubbabhāgaṃ adhippetam. **Noti nu**. **Bhāsitametanti** evarūpametam vākyabhedanti attho. Te ca “yadi esa padhānakāle ‘aham arahā’ti vadeyya, mayaṅca saddahāma, na cānena tadā vuttaṃ. Idāni pana vijjamānameva guṇam vadatī”ti ekapadena satim labhitvā “buddho jāto”ti uppannagāravā āvusovādam pahāya “no hetam bhante”ti āhamsu. **Aññā cittanti** aññāya arahattappattiyā cittaṃ.

13. **Antāti** koṭṭhāsā dve bhāgā. **Kāmesu kāmasukhallikānuyogoti** vatthukāmesu kilesakāmasukhassa anubhavo. Kilesakāmā eva vā āmisasukhena allīyanato kāmasukhallikāti vuttāti daṭṭhabbā. **Gammoti** gāmvāsīnaṃ santako. **Attakilamathānuyogoti** attano kilamathassa kaṇṭakaseyyādidukkhassa anuyogo. **Ubho anteti** yathāvutte lobho vā sassato vā eko anto, doso vā ucchedo vā ekoti veditabbo.

**Cakkhukaraṇīti**-ādīsu attanā sampayuttañāṇacakkhuṃ karotīti cakkhukaraṇī. Dutiyaṃ tasseva vevacanaṃ. **Upasamoti** kilesupasamo. **Abhiññā, sambodho** ca catusaccapaṭivedhova. **Nibbānaṃ** asaṅkhatadhātu. Etesampi atthāya saṃvattatīti paṭipadaṃ thometi. **Sammādiṭṭhīti** ñāṇaṃ. **Sammāsaṅkappoti** vitakko. Sesam dhammato suviññeyyameva.

14. Evaṃ cattāropi magge ekato dassetvā idāni tehi maggehi paṭivijjhitabbāni cattāri ariyasaccāni dassetuṃ “**idaṃ kho pana bhikkhave**”ti-ādimāha. **Jātipi dukkhāti**-ādīsu tattha tattha bhave nibbattamānānaṃ sattānaṃ sabbapaṭhamānaṃ rūpārūpadhammappavatti idha **jāti** nāma, sā ca tattha tattha bhavesu upalabbhamānānaṃ dukkhādīnaṃ vatthubhāvato **dukkhā**, evaṃ jarādīsu dukkhavatthukatāya dukkhatā veditabbā. Pañcupādānakkhandhā pana dukkhadukkhavipariṇāmadukkhassaṅkhāradukkhavasena dukkhā eva. **Ponobhavikāti** punabbhavakaraṇaṃ punabbhavo uttarapadalopena, punabbhavo sīlametissāti ponobhavikā. **Nandirāgasahagatāti** ettha rūpādīsu nandati piyāyatīti nandī, sā eva rāgoti nandirāgoti bhāvappadhānoyaṃ niddeso, nandirāgattanti attho, tena sahatatāni nandirāgasahagatā. **Tatra tatrāti** tasmim tasmim bhave. Rūpādīsu chasu ārammaṇesu kāmassādanavasena pavattā **kāmatanḥā** nāma. Sassataditṭhiyā saha pavattā **bhavatanḥā**. Uccchedaditṭhiyā saha pavattā **vibhavatanḥā**. **Asesavirāganirodhoti**-ādinā nibbānameva vuccati. Tattha virajjanaṃ vigamanaṃ **virāgo**. Nirujjanaṃ **nirodho**. Ubhayenāpi suṭṭhu vigamova vuccati. Asesāyapi taṇhāya virāgo, nirodho ca yena hoti, so **asesavirāganirodho**, nibbānameva. Yasmā ca taṃ āgamma taṇhaṃ, vaṭṭaṅca cajanti paṭinissajjanti vimuccanti na alliyanti, tasmā **cāgo paṭinissaggo mutti anālayoti** vuccati.

15. **Cakkhunti**-ādīni ñāṇavevacanāneva.

16. **Yāvakiṇācāti** yattakaṃ kalam. **Tiparivaṭṭanti** saccañāṇa, kiccañāṇa, katañāṇasaṅkhātānaṃ tiṇṇaṃ parivaṭṭānaṃ vasena tiparivaṭṭaṃ ñāṇadassanaṃ. Ettha ca “idaṃ dukkhaṃ ariyasaccaṃ, idaṃ dukkhasamudayaṃ”ti evaṃ catūsu saccesu yathābhūtañāṇaṃ **saccañāṇaṃ** nāma. Tesu eva “pariññeyyaṃ pahātappaṃ sacchikātabbaṃ bhāvetabbaṃ”ti evaṃ kattabbakiccajānanañāṇaṃ **kiccañāṇaṃ** nāma. “Pariññātaṃ pahīnaṃ sacchikataṃ bhāvitaṃ”ti tassa kiccassa katabhāvajānanañāṇaṃ **katañāṇaṃ** nāma. **Dvādasākāraṇti** tesameva ekekasmim sacce tiṇṇaṃ tiṇṇaṃ ākāraṇaṃ vasena dvādasākāraṇaṃ.

**Abhisambuddhoti paccaññāsinti** abhisambuddho arahattaṃ pattoti evaṃ na paṭijānīm. **Yato ca khoti** yato bodhimūle nisinnakālato

paṭṭhāya. **Athāhanti** tato param aham. **Ñāṇaṇca pana meti** paccavekkhaṇañāṇam sandhāya vadati. **Akuppā meti**-ādi tassa pavatti-ākāradassanam. Tattha **akuppā me vimuttīti** arahattaphalam tassa maggasaṅkhātākāraṇato ca ārammaṇato ca akuppatā veditabbā.

**Imasmim pana veyyākaraṇasminti** niggāthasutte. **Bhaññamāneti** bhaṇiyamāne. **Dhammacakkhanti** ida catusaccadhammesu cakkhukiccakaraṇato sotāpattimaggo adhippeto. **Yam kiñcīti**-ādi nibbānārammaṇattepi kiccavasena asammoḥato pavattidassanattham vuttam.

17. **Dhammacakkanti** paṭivedhaññadhammañceva desanāññadhammañca pavattanaṭṭhena cakkanti dhammacakkaṁ. **Obhāsoti** sabbaññutaññānubhāvena pavatto cittaṭṭhāna-utusamuṭṭhāno dasasahassilokadhātum pharivā ṭhito obhāso.

18. Diṭṭho ariyasaccadhammo etenāti **diṭṭhadhammo**. Esa nayo sesesupi. Attano paccakkhato adhigatattā na param pacceti, parassa saddhāya ettha na pavattatīti aparappaccayo. **Ehi bhikkhūti** ettake vuttamate pabbajjā, upasampadā ca sijjhati, teneva tattha **iti**-saddena paricchedo dassitoti vadanti. Keci pana “sammā dukkhassa antakiriyaṇi vacanapariyosāne eva upasampadā sijjhati, aṭṭhakathāyaṁ pana ‘ehi bhikkhūti bhagavato vacanenā’ti idam ehibhikkhusaddopalakkhitavacanam ehibhikkhuvacananti-ādipadavasena vuttam musāvādavaggoti-ādīsu viyā”ti vadanti, tadetaṁ **paṭhamapārājikaṭṭhakathāyaṁ** “Bhagavā hi -pa- ‘ehi bhikkhu, cara brahmacariyaṁ sammā dukkhassa antakiriyaṇi”<sup>1</sup> iminā vacanena sameti. Yattakañhi bhagavatā niyamena vuccati, tattakaṁ sabbampi aṅgameva. Sekkhaputhujjanānañhi etaṁ paripuṇṇam vuccati, asekkhānaṁ pana “cara brahmacariyaṁ”ti pariyosānanti daṭṭhabbaṁ sikkhattayasamiddhito. Lokiyasampadāhi uparibhūtā seṭṭhabhūtā sampadāti **upasampadā**.

19-21. **Nīhārabhattoti** bhikkhūhi gāmato nīharivā dinnabhatto. **Kallam nūti** vuttam nu. **Etam mamāti**-ādi yathākkamaṁ taṇhāmānadiṭṭhigāhānam dassanam.

---

1. Vi-Ṭṭha 1. 205 piṭṭhe.

22-23. **Tasmā tihāti** ettha **tihāti** nipātamattam, tasmāti attho. **Nibbindatīti** vuṭṭhānagāminivipassanāvasena ukkaṇṭhati. **Virajjatīti** catunnam maggānam vasena na rajjati. **Vimuccatīti** phalavasena vimuccati. **Vimuttasminti**-ādi paccavekkhaṇāñāḍadassanam. **Brahmacariyanti** maggabrahmacariyam. **Karaṇīyam** catūsu saccesu catūhi maggehi paccekam kattabham pariññādivasena soḷasavidham kiccam. **Nāparam itthattāyāti** itthabhāvāya soḷasakiccabhāvāya, kilesakkhayāya vā aparam puna maggabhāvanākiccam me natthīti pajānāti. Atha vā **itthattāyāti** itthabhāvato vattamānakkhandhasantānato aparam khandhasantānam mayham na bhavissatīti attho.

### Pabbajjākathāvaṇṇanā

25. **Ālambaranti** paṇavam. **Vikesikanti** vippakiṇṇakesam. **Vikkheḷikanti** vissandamānalālam. **Susānam maññeti** susānam viya addasa sakam parijananti sambandho. **Udānam udānesīti** samvegavasappavattam vacanam nicchāresi. **Upassatṭhanti** dukkhena sammissam, dukkhotiṇṇam sabbasattakāyājātanti attho.

26. **Idam kho yasāti** bhagavā nibbānam sandhāyāha. **Anupubbim kathanti** anupaṭipāṭikatham. **Ādīnavanti** dosam. **Okāranti** nihīnatā nihīnajanasevitattā. **Samkilesanti** tehi sattānam samkilesanam, samkilesavisayanti vā attho. **Kallacittanti** arogacittam. Sāmam attanāva ukkamso ukkhipanam etissanti **sāmukkamsikā**, saccadesanā. Tassā sarūpadassanam “**dukkhan**”ti-ādi.

27. **Assadūtetī** assa-ārulhe dūte. **Iddhābhisankhāranti** iddhikiriyam. **Abhisankhāresi** akāsi.

28. **Yathādiṭṭhanti** paṭhamamaggena diṭṭham catussaccabhūmim sesamaggattayena paccavekkhantassa, passantassāti attho. **Mātu no jīvanti** ettha **noti** nipātamattam, mātu jīvanti<sup>1</sup> attho. Yasassa khīṇāsavattā “ehi bhikkhu, svākkhāto dhammo, cara brahmacariyan”ti ettakeneva bhagavā upasampadam adāsi. Khīṇāsavānañhi ettakeneva upasampadā anuññatā pubbeva dukkhassa parikkhīṇattā. **Cara brahmacariyanti** sāsana brahmacariyasaṅkhātam sikkhāpadapūraṇam sandhāya vuttam, na maggabrahmacariyam.

---

1. Mātu te jīvanti (Ka)

30. **Seṭṭhānuseṭṭhīnanti** seṭṭhino ca anuseṭṭhino ca pavenīvasena āgatā yesaṃ kulānaṃ santi, tesaṃ seṭṭhānuseṭṭhīnaṃ kulānaṃ. **Orakoti** lāmakō.

32-33. **Mā ekena dveti** ekena maggena dve bhikkhū mā agamittha. Visuddhe satte, guṇe vā māretīti **māro**. Pāpe niyutto **pāpimā**.

**Sabbapāsehi**ti sabbakilesapāsehi. **Ye dībbā ye ca mānusāti** ye dībbakāmaguṇanissitā, mānusakakāmaguṇanissitā ca kilesapāsā nāma atthi, sabbehi tehi. “Tvam buddho”ti devamanussehi kariyamānasakkārasampañcchanaṃ sandhāya vadati.

Antalikkhe carante pañcābhiññepi bandhatīti **antalikkhacaro**, rāgapāso. Māro pana pāsampi antalikkhacaraṃ maññati. **Mānasoti** manosampayutto.

**Jānāti manti** so kira “mahānubhāvo añño devaputto nivāretīti bhīto nivattissati nu kho”tisaññāya vatvā “nihato tvamasi antakā”ti vutte “jānāti man”ti dummano palāyi.

34. **Parivitakko udapādīti** yasmā ehibhikkhubhāvāya upanissayarahitānampi pabbajitukāmatā uppajjissati, buddhā ca te na pabbājenti, tasmā tesampi pabbajjāvidhim dassento evaṃ parivitakkesīti daṭṭhabbaṃ. Upanissayasampannā pana bhagavantam upasaṅkamitvā ehibhikkhubhāveneva pabbajanti. Ye paṭikkhittapuggalāti sambandho. **Sayaṃ pabbājetabboti** ettha “kesamassuṃ ohāretvā”ti-ādivacanato kesacchedanakāsāyacchādanasaraṇadānāni pabbajjā nāma, tesu pacchimadvayaṃ bhikkhūhi eva kātabbaṃ, kāretabbaṃ vā. **“Pabbājehī”**ti indaṃ tividhampi sandhāya vuttaṃ. **Khaṇḍasīmaṃ netvāti** bhaṇḍukammārocanapariharaṇatthaṃ. Bhikkhūnañhi anārocetvā ekasīmāya “etassa kese chindā”ti aññaṃ āṇāpetumpi na vaṭṭati. **Pabbājetvāti** kesādicchedanameva sandhāya vuttaṃ “kāsāyāni acchādetvā”ti visuṃ vuttatā. **Pabbājetuṃ na labhatīti** saraṇadānaṃ sandhāya vuttaṃ, anupasampanna bhikkhu-āṇattiyā dinnampi saraṇaṃ na ruhati.

**Yasassīti** parivārasampanno. **Nijjīvanissattabhāvanti** “kesā nāma imasmim sarīre pāṭiyekko koṭṭhāso acetano abyākato



suñño nissatto thaddho pathavīdhātū”ti-ādinayaṃ saṅgaṇhāti, sabbaṃ **visuddhimagge**<sup>1</sup> āgatanayena gahetabbaṃ. **Pubbeti** pubbabuddhuppādesu. **Madditasaṅkhāroti** vipassanāvasena vuttaṃ. **Bhāvitabhāvanoti** samathavasenāpi.

**Kāsāyāni tikkhattuṃ vā -pa- paṭiggāhāpetabboti** ettha “sabbadukkha-nissaraṇatthāya imaṃ kāsāvaṃ gahetvā”ti vā “taṃ kāsāvaṃ datvā”ti vā vatvā “pabbājetha maṃ bhante anukampaṃ upādāyā”ti evaṃ yācanapubbakamā cīvaraṃ paṭicchāpeti. **Athāpīti**-ādi tikkhattuṃ paṭiggāhāpanato paraṃ kattabbavidhidassanaṃ. **Athāpīti** tato parampīti attho. Keci pana “cīvaraṃ appaṭiggāhāpetvā pabbajanappakārabhedadassanatthaṃ “athāpī”ti vuttaṃ, **athāpīti** ca atha vāti attho”ti vadanti. **“Adinnaṃ na vaṭṭati”**ti iminā pabbajjā na ruhatīti dasseti.

**Pāde vandāpetvāti** pādābhimukhaṃ namāpetvā. Dūre vandantopi hi pāde vandatīti vuccati. **Upajjhāyena vāti** ettha yassa santike upajjhaṃ gaṇhāti, ayaṃ upajjhāyo. Ābhisamācārikesu vinayanatthaṃ yaṃ ācariyaṃ katvā niyyātentī, ayaṃ ācariyo. Sace pana upajjhāyo sayameva sabbaṃ sikkhāpeti, aññasmiṃ na niyyātetī, upajjhāyovassa ācariyopi hoti, yathā upasampadākāle sayameva kammavācaṃ vācento upajjhāyova kammavācācariyopi hoti.

Anunāsikantaṃ katvā dānakāle antarā vicchedo na kātabboti āha **“ekasambandhāni”**ti.

**“Ābhisamācārikesu vinetabbo”**ti iminā sekhiyavattakhandhakavattesu, aññesu ca sukkavissatṭhi-ādilokavajjasikkhāpadesu sāmaṇerehi vattitabbaṃ, tattha avattamāno alajjī, daṇḍakammāraho ca hotīti dasseti.

Pabbajjākathāvaṇṇanā niṭṭhitā.

---

1. Visuddhi 1. 348 piṭṭhe.

### Dutiyamāarakathāvaṇṇanā

35. Pāḷiyam **anuttaram vimuttim anupāpuṇāthā**ti “khīṇāsavā mayam, kim amhākam padhānenā”ti vāsanādosena vosānam anāpajjitvā pantsu senāsanesu phalasamāpattiyāva vītināmanattham, tam disvā aññesampi diṭṭhānugatisamāpajjanatthañca ovadatīti veditabbam.

Dutiyamāarakathāvaṇṇanā niṭṭhitā.

---

### Bhaddavaggiyakathāvaṇṇanā

36. **Iddam nesam pubbakamanti** tesam timsajanānam ekato abhisamayassa pubbakammaṃ. Aññampi tesam paccekam pubbabuddhuppādesu saddhammassavanasaraṇagamanadānasīlasamādhivipassanāsamāyogavasena bahum vivaṭṭūpanissayam kusalam atthevāti gahetabbam. Itarathā hi tadaheva paṭivedho, ehibhikkhubhāvādiviseso ca na sampajjeyya.

Bhaddavaggiyakathāvaṇṇanā niṭṭhitā.

---

### Uruvelapāṭihāriyakathāvaṇṇanā

37-38. Pāḷiyam **agarūti bhāriyam** na siyāti attho. **Ubhinnam sajotibhūtānanti** ubhosu sajotibhūtesu. **Patte pakkhipīti** tam nāgam nihatatejam dhammadesanāya santappetvā saraṇasīlāni datvā sakalarattim bhagavantam payirupāsivā ṭhitam jaṭilānam dassanattham patte pakkhipi, na ahituṇḍiko viya balakkārenāti veditabbam. **Yatra hi nāmāti** yo nāma.

39. **Ajjaṇhoti** ajja ekadivasam. **Aggisālamhīti** agyāgāre. Sumanānam buddhānam manasā sadiso mano assāti **sumanamaso**. **Adhicittoti** mahākaruṇādīhi adhicitto. **udicchareti** ullokesum, parivāresunti attho. **Anekavaṇṇā acciyoti** chabbaṇṇaramsiyo vuttā. Aham te dhuvabhattena paṭimānanam karissāmīti seso.

40. **Abhikkantāya rattiyāti** parikkhīṇāya rattiyā, majjharattisamayeti attho. **Abhikkantavaṇṇāti** abhirūpacchavivaṇṇā. **Kevalakappanti** ettha **kevala**-saddassa anavasesatto, **kappa**-saddassa samantabhāvo, tasmā anavasesaṃ samantato vanasaṇḍanti attho. **Catuddisāti** catūsu disāsu. **Yatra hi nāmāti** yaṃ nāma.

43. **Aṅgamagadhāti** aṅgamagadharaṭṭhavāsino. **Iddhipāṭihāriyanti** abhiññiddhiyeva paṭipakkhānaṃ titthiyānaṃ, veneyyasattagatadosānañca haraṇato apanayanato pāṭihāriyaṃ, taṃ taṃ vā sattahitaṃ paṭicca haritabbaṃ pavattetabbanti pāṭihāriyaṃ, tadeva pāṭihāriyaṃ, iddhi eva pāṭihāriyaṃ iddhipāṭihāriyaṃ.

44. **Paṃsukūlaṃ uppamaṃ hotīti** puṇṇāya dāsiyā sarīraṃ parikkhipitvā chaḍḍitaṃ sāṇamayaṃ kimikulākulaṃ pariyesanavasena uppamaṃ hoti, yaṃ bhagavā bhūmiṃ kampaṇto pārupitvā pacchā **mahākassapattherassa**<sup>1</sup> adāsi, taṃ sandhāyetaṃ vuttanti vadanti. **Kattha nu khoti**-ādi-parivitaṅko jaṭilānaṃ vividhapāṭihāriyadassanattaṃ kato. Pāṇinā khaṇanto viya iddhiyā mattikaṃ apanetvā dinnattā vuttaṃ “**pāṇinā pokkharāṇiṃ khaṇitvā**”ti.

46. **Phāliyanu kassapa kaṭṭhānīti** uruvelakassapena nivedite evamavocāti daṭṭhabbaṃ. Evaṃ sesesupi.

49. **Antaraṭṭhakāsu himapātasamayeti** ettha māghamāsassa avasāne catasso, phagguṇamāsassa ādimhi catassoti evaṃ ubhinnaṃ māsānaṃ antare aṭṭharattiyo antaraṭṭhakā nāma, tāsu antaraṭṭhakāsu rattīsu himapātakāle. **Ummujjananimujjanampi** sahasā tadubhayakaraṇavasena vuttaṃ.

50. **Udakavāhakoti** udakogho. **Reṇuhatāyāti** rajokiṇṇāya, atintāyāti attho. **Nāvāyāti** kullena. **Idaṃ nu tvaṃ mahāsamaṇāti** idha nu tvaṃ. **Dha-kārassa da-kāraṃ**, anusārañca katvā “idaṃ nū”ti vuttaṃ “ekamidāhan”ti-ādīsu<sup>2</sup> viya. “Imasmim padese tvaṃ nu kho ṭhitosī”ti pucchi. **Ayamahasmīti** ayamahaṃ idha ṭhitosmīti attho.

1. Vitthāravatthu, Saṃ 1. 420; Aṃ-Ṭṭha 1. 126; Theragāthā-Ṭṭha 2. 429;

Apadāna-Ṭṭha 2. 282 piṭṭhādīsu.

2. Dī 1. 48, 86 piṭṭhādīsu.

51. **Cirapatikā**ti cirakā lato paṭṭhāya. Kesamissaṃ sabbaṃ parikkhāraṃ udake pavāhetvātipi yojetabbaṃ. Araṇikamaṇḍalu-ādika tāpasaparikkhārā **khārī** nāma, tamharaṇakakājaṃ **khārikājaṃ** nāma. **Aggihutamissanti** aggipūjopakaraṇasahitaṃ.

52-3. **Upasaggoti** upaddavo. “**Aḍḍhuḍḍhāni pāṭihāriyasahassāni**”ti idaṃ nāgadamanādīni pannarasa pāṭihāriyāni vajjetvā vuttaṃ appakamadhikaṃ gaṇanūpagamā na hotīti.

54. **Gayāyanti** gayānāmikāya nadiyā adūrabhavattā gāmo itthilingavasena gayā nāma jāto, tassaṃ. **Gayāsīseti** evaṃnāmake piṭṭhipāsāṇe.

“**Yamidaṃ cakkhusamphassapaccayā -pa- sukhaṃ vā**”ti-ādinā cakkhuviññānavīthiccittesu somanassadomanassa-upekkhāvedanāmukhena sesārūpakkhandhānampi ādittataṃ dasseti. Esa nayo sesesupi. **Manoti** bhavaṅgacittaṃ manodvārassa adhippetattā. **Manoviññānanti** manodvāravīthipariyāpannameva gahitaṃ.

Uruvelapāṭihāriyakathāvaṇṇanā niṭṭhitā.

### Bimbisārasamāgamakathāvaṇṇanā

55. **Yaññā abhivadantī**ti yāgahetu ijjhantīti vadanti. **Upadhīsūti** ettha dukkhasukhādīnaṃ adhiṭṭhānaṭṭhena cattāro upadhī kāmakhanda-kilesa-abhisāṅkhārūpadhīnaṃ vasena. Tesu khandhūpadhī idhādhippetoti āha “**khāndhūpadhīsu malanti ñatvā**”ti. **Yaññāti** yaññahetu. **Yiṭṭheti** mahāyāge. **Huteti** divase divase kattabbe aggiparicaraṇe. **Kiṃ vakkhāmīti** kathaṃ vakkhāmi.

57-8. **Āsīsanāti**<sup>1</sup> manorathā. **Siṅgīsuvaṇṇanikkhenāti** siṅgīsuvaṇṇassa rāsīnā. Suvaṇṇesu hi yuttikataṃ hīnaṃ, tato rasaviddhaṃ seṭṭhaṃ, tato ākaruppanaṃ seṭṭhaṃ, tato yaṃkiñci dibbasuvaṇṇaṃ

1. Āsīsanāti (Sī)

seṭṭham, tatrāpi cāmīkaram, tato sātakumbham, tato jambunadam, tatopi siṅgīsuvanṇam seṭṭham. Tassa nikkham nāma pañcasuvanṇaparimāṇam, aṭṭhasuvanṇādibhedam anekavidhampi vadanti. **Dasasu ariyavāsesūti**—

“Idha bhikkhave bhikkhu pañcaṅgavippahīno hoti  
 chaḷaṅgasamannāgato ekārakkho caturāpasseno paṇunnapaccekasacco  
 samavayasatṭhesano anāvilasaṅkappo passaddhakāyasaṅkhāro  
 suvimuttacitto suvimuttapañño”<sup>1</sup>—

evamāgatesu dasasu ariyavāsesu. Tattha **pañcaṅgavippahīnoti** pañcanīvaraṇehi vippayuttatā vuttā. **Chaḷaṅgasamannāgatoti** iṭṭhādīsu chasu ārammaṇesu somanassitādipaṭipakkhā chaḷaṅgupekkhā vuttā. **Ekārakkhoti** upaṭṭhitasatitā. Saṅkhāyasevanā adhivāsanā parivajjanāvinodanāsaṅkhātāni cattāri apassenā nissayā etassāti **caturāpasseno**, ete na ca te nissayā dassitā. Paṇunnāni apanītāni diṭṭhigatikehi paccekam gahitāni diṭṭhisaccāni yassa, so **paṇunnapaccekasacco**, tena lokiyañāṇena diṭṭhippahānam vuttam. Kāmesanā bhavesanā brahmacariyesanāsaṅkhātā esanā sammadeva avayā anūnā satṭhā nisaṭṭhā anenāti **samavayasatṭhesano**, etena tiṇṇam esanānam abhāvo vutto. **“Anāvilasaṅkappo”**ti iminākāma vitakkādīhi anāvilacittatā. **“Passaddhakāyasaṅkhāro”**ti iminā catutthajjhānasamāyogena vigatadarathatā vuttā. **“Suvimuttacitto”**ti iminā maggo. **“Suvimuttapañño”**ti iminā paccavekkhaṇañāṇamukhena phalañāṇam vuttam. Ete hi ariyā vasanti etthāti **ariyavāsāti** vuccanti. Te pana vāsā vutthā vasitā sampādītā yena, so **vutthavāso**, bhagavā. **Dasabaloti** dasahi kāyabalehi, ñāṇabalehi ca upeto. Yāni hetāni—

“Kā]āvakañca gaṅgeyyam, paṇḍaram tambapiṅgalam.  
 Gandhamaṅgalahemañca, uposathachaddantime dasā”<sup>2</sup>—

1. Dī 3. 224, 257; Am 3. 279 piṭṭhesu.

2. Ma-Ṭṭha 1. 331; Saṃ-Ṭṭha 2. 41; Am-Ṭṭha 3. 293; Dī-Ṭṭha 2. 164; Abhi-Ṭṭha 2. 380; Udāna-Ṭṭha 364; Buddhavaṃsa-Ṭṭha 61; Cūlaniddesa-Ṭṭha 49; Paṭisaṃ-Ṭṭha 2. 230 piṭṭhādīsu.

evaṃ vuttāni dasahatthikulāni purimapurimato dasabalaguṇopetāni, tesu sabbajetṭhānaṃ dasannaṃ chaddantānaṃ balāni bhagavato kālassa dasabalāni nāma. Tañca kāḷāvakaśāṅkhātānaṃ pakatihatthīnaṃ koṭisahassassa, majjhimapurisānaṃ pana dasannaṃ koṭisahassānañca balaṃ hoti, taṃ “nārāyanasaṅghātabalan”tipi vuccati.

Yāni panetāni **pāliyaṃ** “idha sārīputta tathāgato ṭhānañca ṭhānato aṭṭhānañca aṭṭhānato yathābhūtaṃ pajānātī”ti-ādinā<sup>1</sup> vuttāni ṭhānāṭṭhānañāṇabalaṃ, kammavipākañāṇabalaṃ, sabbatthagāminipaṭipadāñāṇabalaṃ, anekadhātunādhātulokañāṇabalaṃ, sattānaṃ nānādhimuttikatāñāṇabalaṃ, indriyaparopariyattañāṇabalaṃ, jhānavimokkhasamādhisamāpattīnaṃ saṃkilesavodānavuṭṭhānañāṇabalaṃ, pubbenivāsañāṇabalaṃ, dibbacakkhuñāṇabalaṃ, āsavakkhayañāṇabalanti dasabalañāṇāni, imāni bhagavato dasabalāni nāma. **Dasahi asekkhehi aṅgehī**ti arahattaphalasampayuttehi **pāliyaṃ** “asekkhā sammādiṭṭhi -pa-asekkho sammāsamādhī, asekkhaṃ sammāñāṇaṃ, asekkhā sammāvīmuttī”ti<sup>2</sup> evaṃ vuttehi dasahi asekkhadhammehi samannāgato. Ettha ca dassanaṭṭhena vuttā **sammādiṭṭhi** eva jānanaṭṭhena **sammāñāṇanti**tipi vuttā, vuttāvasesā pana phalacittasampayuttā sabbe phassādidhammā **sammāvīmuttī**ti vuttāti daṭṭhabbaṃ.

Bimbisārasamāgamakathāvaṇṇanā niṭṭhitā.

### Sārīputtamoggallānapabbajjākathāvaṇṇanā

60. Sārībrāhmaṇiyā putto **sārīputto**. Moggalībrāhmaṇiyā<sup>3</sup> putto **moggallāno**. **Channaparibbājakassā**ti setavatthena hirikopīnaṃ chādetvā vicaraṇakaparibbājakassa, tena “nāyaṃ naggaparibbājako”ti dasseti. “Upaṇṇātan”ti imassa vivaraṇaṃ **ñāto cevāti**<sup>4</sup>. “Maggan”ti imassa vivaraṇaṃ **upagato ca maggoti**. Tena ca **upaṇṇātanti** ettha **ñāta**-saddo ñāṇapariyāyo. **Magganti** liṅgavipallāsenā maggova vutto. Upasaddo ca upagamanattho maggasaddenapi sambandhitabboti dasseti. Idaṃ vuttam hoti—

1. Ma 1. 99; Am 3. 283; Abhi 2. 328; Khu 9. 356 piṭṭhesu. 2. Dī 3. 225, 260 piṭṭhesu.  
3. Moggalībrāhmaṇiyā (Sārattha-Ṭī 3. 224 piṭṭhe.) 4. Ñātañcevāti (Sī)

yasmā piṭṭhito piṭṭhito anubandhanam nāma atthikehi upaññātam upagataññañceva hoti, tehi upagato paṭipanno maggoca, tasmā yannūnāham anubandheyyanti. **Upaññātam nibbānanti** upapattiyā<sup>1</sup> anumānena ñātam nibbānam. “Maggan”ti imassa vivaraṇam **maggantoti**, anumānena ñātam paccakkhato dassanattāya gavesantoti attho.

Nirodho ca nirodhūpāyo ca ekasesena nirodhoti vuttoti dassento “**atha vā**”ti-ādimāha. **Paṭipādentoti** nigamento.

**Ito uttarīti** ito mayā laddhasotāpattito uttari itaramaggattayam yadipi natthi, tathāpi eso eva mayā gavesito nibbānadhammoti attho.

62-3. **Tadārammaṇāyāti** nibbānārammaṇāya sotāpattiphalavimuttiyā. **Tesam āyasmantānanti** saporisānam tesam dvinnam parisānam tasmiṃ yeva khaṇe bhagavato dhammam sutvā arahattam pāpuṇi, aggasāvaka pana attano ñāṇakiccassa mahantatāya katipāhaccayena. Tenāha “**evan**”ti-ādi. Usūyanakiriyāya kammabhāvam sandhāya “**upayogatthevā**”ti vuttam.

Sāriputtamoggallānapabbajjākathāvaṇṇanā niṭṭhitā.

### Upajjhāyavattakathāvaṇṇanā

64. **Vajjāvajjanti** khuddakam, mahantaṇca vajjam. **Uttiṭṭhapattanti** ettha uttiṭṭham nāma piṇḍāya caraṇam vuccati “**uttiṭṭhe nappamajjeyyā**”ti-ādīsu<sup>2</sup> viya. Uttiṭṭhatthāya gahitam pattam uttiṭṭhapattam, tenāha “**piṇḍāya caraṇakapattan**”ti. Tassa upanāme ko dosoti āha “**tasmim hī**”ti-ādi. **Tasmāti** yasmā manussā etasmimyeva ete bhuñjantīti uttiṭṭhapatte ucchiṭṭhasaññino, tasmā uttiṭṭhapattanti vuttam uttiṭṭha-saddeneva manussānam saññāya ucchiṭṭhatāpi gammatīti. Keci pana “ucchiṭṭhasaddena samānattho uttiṭṭhasaddo”ti vadanti. “**Uttiṭṭhā**”ti tvāpaccayantopi hotīti āha “**uṭṭhahitvā**”ti. **Upajjhāyam gahetunti**

1. Uppattiyā (Sī)

2. Khu 1. 38 piṭṭhe Dhammapade.

upajjhāyattaṃ manasā gahetuṃ, yācanavacanena tassa anumatiṃ gahetunti vā attho.

65. Patissayanaṃ patisso, garuṃ nissāya vattanabhāvo, yaṃkiñci gāravanti attho. Saha patissena **sappatisso**, paraṃ jeṭṭhaṃ katvā tassovāde vattanatāti attho. Tenāha “**jeṭṭhakabhāvañca upatṭhapetvā**”ti. **Sāhūti** sādhu sundaraṃ. **Lahūti** agaru, subharatāti attho. **Opāyikanti** upāyapaṭisaṃyuttaṃ, evaṃ paṭipajjanaṃ nittharaṇūpāyoti attho. **Patirūpanti** sāmīcikkammamidanti attho. **Pāsādikenāti** pasādāvahena kāyavacīpayogena sampādehīti attho. **Kāyenāti** etadatthaviññāpakaraṃ hatthamuddādiṃ dassento kāyena viññāpeti. **Sādhūti sampatṭicchanaṃ sandhāyāti** upajjhāyena “sāhū”ti-ādīsu vuttasu saddhivihārikassa “sādhū”ti sampatṭicchanaṃ vacanaṃ sandhāya “kāyena viññāpeti”ti-ādi vuttanti adhippāyo. **Āyācanadānamattenāti** saddhivihārikassa paṭhamaṃ āyācanamattena, tato upajjhāyassa ca “sāhū”ti-ādīnā vacanamattenāti attho.

66. **Assāti** saddhivihārikassa. **Dve cīvarānīti** uttarāsaṅgaṃ, saṅghāṭiñca sandhāya vadati. **Ito paṭṭhāyāti** “na upajjhāyassa bhaṇamānassā”ti ettha na-kārato paṭṭhāya, tena “nātidūre”ti-ādīsu na-kārapaṭisiddhesu āpatti natthīti dasseti. **Sabbattha dukkaṭāpattīti** āpadā-ummattakhittacittavedanaṭṭatādīhi vinā paṇṇattiṃ ajānitvāpi vadantassa gilānassapi dukkaṭameva. Āpadāsu hi antarantarā kathā vattuṃ vaṭṭati. Evamaññesupi na-kārapaṭisiddhesu idīsesu, itaresu pana gilānopi na muccati. Pāḷiyaṃ “**hetṭhāpīṭhaṃ vā parāmasitvā**”ti idaṃ pubbe tattha ṭhapitapattādinā asaṅghaṭṭanathāya vuttaṃ, cakkhunā oloketvāpi aññesaṃ abhāvaṃ ṇatvāpīṭhapetuṃ vaṭṭati eva. **Āpattiyā āsannanti** āpattikaraṇameva.

**Gāmeti** antogāme tādise maṇḍapādimhi. **Antaraghareti** antogehe. **Paṭikkamaneti** āsanasālāyaṃ. **Dhotavālikāyāti** udakena gataṭṭhāne nirajāya parisuddhavālikāya. **Niddhūmeti** jantāghare jaliyamāna-aggidhūmarahite. Jantāgharañhi nāma himapātabahulesu desesu



tappaccayarogapīḷādinivāraṇattham sarīrasedāpanaṭṭhānam. Tattha kira andhakārapaṭicchannatāya bahūpi ekato pavisitvā cīvaram nikkhipitvā aggitāpaparihārāya mattikāya mukham limpitvā sarīram yāvadattham sedetvā cuṇṇādīhi ubbaṭṭetvā nahāyanti. Teneva pāḷiyam “**cuṇṇam sannetabban**”-ti-ādi vuttam. **Ullokanti** uddham olokanatṭhānam, uparibhāganti attho.

**Aññattha netabboti** yattha viharato sāsane anabhirati uppanā, tato aññattha kalyāṇamittādisampattiyuttaṭṭhāne netabbo. **Visabhāgapuggalānanti** lajjino vā alajjino vā upajjhāyassa avaḍḍhikāme sandhāya vuttam. Sace pana upajjhāyo alajjī ovādampi na gaṇhāti, lajjino ca etassa visabhāgā honti, tattha upajjhāyam vihāya lajjīheva saddhim āmisādi-paribhogo kātabbo. Upajjhāyādibhāvo hettha na pamāṇanti daṭṭhabbam. **Pariveṇam gantvāti** upajjhāyassa pariveṇam gantvā. “**Na susānan**”-ti idam upalakkhaṇam, upacārasīmato bahi gantukāmena anāpucchā gantum na vaṭṭati.

Upajjhāyavattakathāvaṇṇanā niṭṭhitā.

### Saddhivihārikavattakathāvaṇṇanā

67. Saddhivihārikavattakathāyam **saṅghetabbo anuggahetabboti**-ādīsu anādariyam paṭicca dhammāmisehi asaṅgaṇhantānam ācariyupajjhāyānam dukkaṭam vattabhedattā. Teneva **parivārepi** “nadento āpajjati”-ti<sup>1</sup> vuttam. Sesam suviññeyyameva.

Saddhivihārikavattakathāvaṇṇanā niṭṭhitā.

### Nasammāvattanādikathāvaṇṇanā

68. Nasammāvattanādikathāyam **vattam na pūreyyāti** “vattakaraṇakālo”-ti vatthuvijānavasena ñatvā mānakosajjādivasena vā

---

1. Vi 5. 213 piṭṭhe.

upajjhāyādīsu anādarena vā “akātuṃ na vaṭṭatī”ti ajānanatāya vā na kareyya, dukkaṭameva. Asañcicca asatiyāti-ādīhi ca akarontassa pana anāpatti. Sabbāni hi vattāni sekhiyāneva, tasmā sekhiyesu vuttanayenevettha sabbopi vinicchayo veditabbo. **Gehassitapemanti** mettāpemaṃ.

**Sādiyanam vā asādiyanam vā na jānātī**ti “mayi sādiyante akarontānam āpatti hoti, paṭikkhipitvā asādiyante āpatti na hotī”ti evaṃ na jānātīti attho. “Tesu eko vattasampanno bhikkhu -pa- tesam anāpattī”ti vacanato sace koci “tumhākaṃ saddhivihārike, antevāsike vā gilāne upaṭṭhahissāmi, ovādānusāsani-ādikaṃ sabbam kattaḅbam karissāmi”ti vadati, te vā saddhivihārikādayo “apposukkā hothā”ti vadanti, vattam vā na sādiyanti, ācariyupajjhāyānampi anāpatti.

Nasammāvattanādikathāvaṇṇanā niṭṭhitā.

### Rādhabrāhmaṇavatthukathāvaṇṇanā

69. Rādhabrāhmaṇavatthusmiṃ pāliyaṃ **uppaṇḍuppaṇḍukajātoti** sakalasarīre sañjātaṇḍuvaṇṇo. Paṇḍuvaṇṇassa sakalasarīre byāpitabhāvadassanattañhi vicchāvacaṇam kataṃ. **Adhikāraṇti** upakāraṃ. **Katavedinoti** attano kataṃ upakāraṃ paṭikiriyaṃ nāpakā. Upasampadākammavācāya yaṃ vattaḅbam, taṃ pariyosāne vakkhāma. **Parimaṇḍalehīti** paripuṇṇehi.

71-73. **Paṇṇattivītikkaṇti** sikkhāpadavītikkaṇam. Pāliyaṃ **piṇḍiyālopabhojananti** jaṅghapiṇḍimaṃsabalena caritvā ālopālopavasena pariyaṭṭhabhojanam. **Atirekalābhoti** bhikkhāhārato adhikalābho. Saṃghabhattādīnam vibhāgo **senāsanakkhandhake**<sup>1</sup> āvi bhavissati. **Vihāroti** tiṇakuṭikādisahito pākāraparicchinnō sakalo saṃghārāmo. **Adḍhayogoti** ekasālo dīghapāsādo. Hatthipiṭṭhigarūlasaṅṭhāno dīghapāsādotipi vadanti. **Pāsādoti** caturasso

1. Vi 4. 329 piṭṭhe.

ucco anekabhūmakapāsādo. **Hammiyanti** muṇḍacchadano candikaṅgaṇayutto nāti-ucco pāsādo. **Guhāti** pabbataguhā. **Pūtimuttanti** gomuttam.

Rādhabrahmaṇavattthukathāvaṇṇanā niṭṭhitā.

### Ācariyavattakathāvaṇṇanā

76. **Sahadhammikaṃ vuccamānoti** “evaṃ nivāsetabban”ti-ādinā sikkhāpadena ovadiyamāno. **Vādaṃ āropetvāti** “olambitvā nivāsanādīsu ko doso? Yadi doso bhaveyya, parimaṇḍalanivāsanādīsipi doso siyā”ti-ādinā niggahaṃ āropetvā. **Tamyeva titthāyatananti** diṭṭhisankhātatiṭṭhameva āyatanam dukkhuppattiṭṭhānanti titthāyatanam. **Āyasmato nissāya vacchāmīti** āyasmantam nissāya vasissāmīti attho.

Ācariyavattakathāvaṇṇanā niṭṭhitā.

### Paṇāmanākhamāpanākathāvaṇṇanā

80. Yam pubbe lakkhaṇam vuttam, teneva lakkhaṇena nissayantevāsikassa āpatti na veditabbāti sambandhayanā daṭṭhabbā. Potthakesu pana “na teneva lakkhaṇenā”ti ettha na-kāram chaḍḍetvā “teneva lakkhaṇena nissayantevāsikassa āpatti veditabbā”ti likhanti, tam pamādalikhitam. Tathā hi teneva lakkhaṇena āpattibhāve gayhamāne nissayamuttakassāpi amuttakassāpi āpatti evāti vuttalakkhaṇena āpattim āpajjeyya. Tathā ca “nissayantevāsikena hi yāva ācariyam nissāya vasati, tāva sabbam ācariyavattam kātabban”ti iminā anantaravacanena virodho siyā. **Visuddhimaggepi** ca—

“Nissayācariya, uddesācariya, nissayantevāsika, uddesantevāsika, samānācariyakā pana yāva nissaya-uddesā anupacchinnā, tāva paṭijaggitabbā”ti<sup>1</sup>—

1. Visuddhi 1. 91 piṭṭhe.

vuttaṃ. Tasmā vuttanayena idha parigalitaṃ na-kāraṃ ānetvā teneva saddhivihārikassa vutteneva lakkhaṇena nissayantevāsikassa āpatti na veditabbāti evamattho gahetabbo.

Paṇāmanākhamāpanākathāvaṇṇanā niṭṭhitā.

### Nissayapaṭippassaddhikathāvaṇṇanā

83. Nissayapaṭippassaddhikathāyaṃ “yo vā ekasambhogaparibhogo, tassa santike nissayo gahetabbo”ti iminā lajjīsu eva nissayaggahaṇaṃ niyojete alajjīsu paṭikkhittatā. Ettha ca paribhogasaddena ekakammādiko saṃvāso gahito paccayaparibhogassa sambhoga-saddena gahitattā, etena ca sambhogasaṃvāsānaṃ alajjīhi saddhiṃ na kattabbataṃ dasseki. **Parihāro natthī**ti āpattiparihāro natthi. **Tādisoti** yattha nissayo gahitapubbo, yo ca ekasambhogaparibhogo, tādiso. **Tathā vuttanti** “lahuṃ āgamissāmī”ti vuttañceti attho. “**Cattāri pañca divasānī**”ti idaṃ upalakkhaṇamattaṃ. Yadi ekāhadvīhena sabhāgatā paññāyati, ñātadivasena gahetabbova. Athāpi catupañcāhenāpi na paññāyati, yattakehi divasehi paññāyati, tattakāni atikkametabbāni. Sabhāgataṃ olokemīti pana loso na kātabbo.

**Daharā suṇantī**ti ettha asutvāpi āgamissati, kenaci antarāyena cirāyatīti saññāya sati labbhateva parihāro. Tenāha “**idhevāhaṃ vasissāmīti paṇṇati, parihāro natthī**”ti.

**Ekadivasampi parihāro natthī**ti gamane nirussāhaṃ sandhāya vuttaṃ. Sa-ussāhassa pana senāsanapaṭisāmanādivasena katipāhe gatepi na doso.

**Tatreva vasitabbanti** tatra sabhāgaṭṭhāne eva nissayaṃ gahetvā vasitabbam. “**Taṃyeva vihāraṃ -pa- vasitum vaṭṭatī**”ti iminā upajjhāye saṅgaṇhanteveva taṃsamodhāne nissayapaṭippassaddhi vuttā, tasmim̐ pana

kodhena vā gaṇanirapekkhatāya vā asaṅgaṇhante aññesu gahito nissayo na paṭippassambhatīti dasseti.

Ācariyamhā nissayapaṭippassaddhiyaṃ vutto “koci ācariyo”ti-ādiko nayo upajjhāyapakkamanādīsupi netvā tattha ca vutto idhāpi netvā yathārahaṃ yojetabbo.

**Dve leḍḍupāte atikkamma aññasmim vihare vasantīti** upacārasīmato bahi aññasmim vihare antevāsikānaṃ vasanaṭṭhānato dve leḍḍupāte atikkamma vasanti. Tena bahi-upacārepi antevāsikādīnaṃ vasanaṭṭhānato dvinnaṃ leḍḍupātānaṃ antare āsannapadese vasati, nissayo na paṭippassambhatīti dasseti. Anto-upacārasīmāyaṃ pana dve leḍḍupāte atikkamitvā vasato nissayo na paṭippassambhateva.

Nissayapaṭippassaddhikathāvaṇṇanā niṭṭhitā.

### Upasampādetabbapañcakakathāvaṇṇanā

84. Upajjhācariyalakkhaṇakathāyaṃ **na sāmaṇero upaṭṭhāpetabboti** upajjhāyena hutvā na pabbājetabbo. Asekkhassa ayanti **asekkho**, lokiyalokuttaro sīlakkhandho.

**Antaggāhikāyāti** sassatucchedakoṭṭhāsaggāhikāya. **Pacchimāni dveti** appassuto hoti, duppañño hotīti imāni dve aṅgāni. **Pacchimāni tīṇīti** na paṭibalo uppannaṃ kukkuccaṃ dhammato vinodetuṃ, āpattim na jānāti, āpattiyā vuṭṭhānaṃ na jānātīti imāni tīṇi. Kukkuccassa hi pāli-aṭṭhakathānayasāṅkhātadhammato vinodetuṃ apaṭibalatā nāma abyattatā eva hotīti sāpi āpatti-aṅgameva vuttā.

Abhivisiṭṭho uttamo samācāro ābhisamācāro, vattapaṭivattasīlaṃ. Taṃ ārabha paññattā khandhakasikkhāpadasaṅkhātā sikkhā **ābhisamācārikā**. Sikkhāpadampi hi taṃ tattha paṭipūraṇatthikehi uggahaṇādivasena sikkhitabbato “sikkhā”ti vuccati. Maggabrahmacariyassa ādibhūtā kāraṇabhūtāti **ādibrahmacariyakā** sikkhā, ubhatovibhaṅgapariyāpannasikkhāpadaṃ.

Teneva **visuddhimaggepi** “ubhatovibhaṅgapariyāpannasikkhāpadam ādibrahmacariyakam, khandhakavattapariyāpannam ābhisamācārikan”<sup>1</sup>ti vuttam. Tasmā **sekkhapaṇṇattiyān**”ti ettha sikkhitabbato sekkhā, bhagavatā paññattattā paṇṇatti. Sabbāpi ubhatovibhaṅgapariyāpannā sikkhāpadapaṇṇatti “sekkhapaṇṇattī”ti vuttāti gahetabbā.

**Nāmarūpaparicchedeti** ettha kusalattikādīhi vuttam jātibhūmipuggalasampayogavatthārammaṇakammadvāralakkhaṇarasādibhed ehi vedanākkhandhādicatubbidham sanibbānam nāmam, bhūtipādāyabhedam rūpaṅca paricchinditvā jānanapaññā, tappakāsako ca gantho nāmarūpaparicchedo nāma. Iminā abhidhammatthakusalena bhavitabbanti dasseti. **Sikkhāpetunti** uggaṇhāpetum.

Upasampādetabbapañcakakathāvaṇṇanā niṭṭhitā.

### Aññatitthiyapubbavatthukathāvaṇṇanā

86. Titthiyaparivāsakathāyam **ājīvakassa vāti**-ādīsu akiriyavādī ājīvako nāma, kiriyavādino pana nigaṇṭhāpi aññepi naggatitthikā acelakapade saṅgahitā. Sabbathā naggasseva titthiyaparivāso vihito. So ca teneva naggavesena bhikkhūnam santikam āgatassa, na paṭicchadetvā āgatassāti dassetum “**sace sopī**”<sup>2</sup>ti-ādi vuttam. Tattha **sopī**ti ājīvako.

**Āmisakiñcikkhasampadānam** nāma appamattakassa deyyadhammassa anuppadānam. **Rūpūpajīvikā**ti attano rūpameva nissāya jīvantiyo. Vesiyā gocharo bahulam pavattiṭṭhānam assāti **vesiyāgocharo**. Esa nayo sabbattha. **Yobbannātītāti**<sup>2</sup> anividdhā eva mahallikabhāvam pattā thullakumārī evāti vuttam. **Ādāyassāti** ādānassa gahaṇassa.

Aññatitthiyapubbavatthukathāvaṇṇanā niṭṭhitā.

1. Visuddhi 1. 12 piṭṭhe.

2. Yobbannātītāti (Sī, Ka)

### Pañcābādhavattukathāvaṇṇanā

88-9. Pañcābādhādivatthūsu pāḷiyam **somhi arogo, vibbhamissāmīti** so aham arogo, vibbhamissāmīti attho. **Nakhapiṭṭhippamāṇanti** kaniṭṭhaṅgulinakhapiṭṭhi adhippetā. “Paṭicchanne ṭhāne nakhapiṭṭhippamāṇam avadḍhanakapakkhe ṭhitaṃ hoti, vaṭṭatī”ti vuttattā appaṭicchannaṭṭhāne tādisampi na vaṭṭatī, paṭicchannaṭṭhānepi ca vadḍhanakapakkhe ṭhitopi na vaṭṭatīti siddhameva hoti. Pākaṭṭhānepi pana nakhapiṭṭhippamāṇato ūnataram avadḍhanakam vaṭṭatīti ye gaṇheyyum, tesam taṃ gahaṇam paṭisedhetum “**mukhe panā**”ti-ādi vuttam.

**Kolaṭṭhimattakopīti** badaraṭṭhippamāṇopi. **Avadḍhanakapakkhe ṭhitopi na vaṭṭatīti** ettha **pi**-saddena kolaṭṭhimattato khuddakataropi gaṇḍo na vaṭṭatīti dasseti. Tenāha “**sacchavim kāretvā**”ti, vijjamānacchavim katvāti attho. “Sañchavin”ti vā pāḷho, sañjātacchavinti attho. Gaṇḍādīsu vūpasantesupi gaṇḍānam vivaṇṇampi hoti, taṃ vaṭṭatī.

### Padumapuṇḍarīkapattavaṇṇanti

rattapadumasetapadumapupphadalavaṇṇam. **Kuṭṭhe vuttanayenevāti** paṭicchannaṭṭhāne avadḍhanakam vaṭṭatī, aññattha na kiñcipi vaṭṭatīti vuttanayam dasseti. **Sosabyādhīti** khayarogo. **Yakkhummāroti** kadāci kadāci āgantvā bhūmiyam pātetvā hatthamukhādīkam avayavam bhūmiyam ghaṃsanako yakkhova rogo.

Pañcābādhavattukathāvaṇṇanā niṭṭhitā.

### Rājabhaṭavattukathāvaṇṇanā

90. **Na dānāham devassa bhaṭoti āpucchatīti** raññā eva dinnatṭhānantaram sandhāya vuttam. Yo pana rājakammikehi amaccādīhi ṭhapito, amaccādīnam eva vā bhaṭo hoti, tena taṃ taṃ amaccādīmpī āpucchitum vaṭṭatī.

Rājabhaṭavattukathāvaṇṇanā niṭṭhitā.

### Coravatthukathāvaṇṇanā

91. **Tasmāti** bhagavā sayam yasmā dhammassāmī, tasmā aṅgulimālam ehibhikkhubhāvena pabbājesi, bhikkhūnam pana sikkhāpadam paññapento eva mähāti adhippāyo. **Evam jānantīti** silavā jātoti jānanti.

92. **Upamanti** viramanti. **Bhinditvāti** andubandhanam bhinditvā. **Chinditvāti** saṅkhalikam chinditvā. **Muñcitvāti** rajjabandhanam muñcitvā. **Vivaritvāti** gāma-bandhanādīsu gāmadvārādīnam vivaritvā. **Apassamānānanti** purisaguttiyaṃ gopakānam apassantānam.

95. **Purimanayenevāti** “kasāhato katadaṇḍakammo”ti ettha vuttanayeneva.

Coravatthukathāvaṇṇanā niṭṭhitā.

### Ṇāyikavatthukathāvaṇṇanā

96. **Palātopīti** iṇasāmikānam āgamanam ñatvā bhayena palāto. **Gīvā hotīti** iṇāyikabhāvam ñatvā anādarena iṇamuttake bhikkhubhāve pavesitattā. **Upaḍḍhupaḍḍhanti** thokathokam. **Dātabbamevāti** iṇāyikena dhanam sampaṭicchatu vā mā vā, dāne sa-ussāheneva bhavitabbam. Aññehi ca bhikkhūhi “mā dhuram nikkhipāhi”ti vatvā sahāyakehi bhavitabbanti dasseti. Dhuranikkhepena hissa bhaṇḍagghena kāretabbatā siyāti.

Ṇāyikavatthukathāvaṇṇanā niṭṭhitā.

### Dāsavatthukathāvaṇṇanā

97. “**Dāsacārittam āropetvā kīto**”ti iminā dāsabhāvaparimocanathāya kītatam nivatteti. Tādiso hi dhanakkītopi adāso eva. **Tattha tattha cārittavasenāti** tasmim tasmim janapade



dāsapaṇṇajjhāpanādinā adāsakaraṇaniyāmena. Abhisekādīsū sabbabandhanāni mocāpentī, taṃ sandhāya “**sabbasādhāraṇenā**”ti vuttaṃ.

**Sayameva paṇṇaṃ āropenti, na vaṭṭatī** tā bhujissitthiyo “mayampi vaṇṇadāsiyo homā”ti attano rakkhaṇatthāya sayameva rājūnaṃ dāsipaṇṇe attano nāmaṃ likhāpentī, tāsāṃ puttāpi rājadāsāva hontī, tasmā te pabbājetuṃ na vaṭṭatī. **Tehi adinnā na pabbājetabbā**ti yattakā tesāṃ sāmīno, tesu ekena adinnepi na pabbājetabbā.

**Bhujisse pana katvā pabbājetuṃ vaṭṭatī** yassa vihārassa te ārāmikā dinnā, tasmīṃ vihāre saṃghaṃ ṇāpetvā phātikammaṇa dhanāni datvā bhujisse katvā pabbājetuṃ vaṭṭatī. **Takkaṃ sīse āsittakasadisāva hontī** kesuci janapadesu adāse karontā takkaṃ sīse āsīṅcanti, tena kira te adāsā hontī, evamidampi ārāmikavacanena dānampīti adhippāyo. Tathā dinnepi saṃghassa ārāmikadāso evāti “**neva pabbājetabbo**”ti vuttaṃ. “**Tāvakāliko nāma**”ti vuttattā kālaparicchedaṃ katvā vā pacchāpi gahetukāmatāya vā dinnāṃ sabbaṃ tāvakālikamevāti gahetabbaṃ. **Nissāmikadāso** nāma yassa sāmikulāṃ aññātikaṃ maraṇena parikkhīṇaṃ, na koci tassa dāyādo, so pana samānajātikehi vā nivāsagāmaṃvāsīhi vā issarehi vā bhujisso katova pabbājetabbo. Devadāsāpi dāsā eva. Te hi katthaci dese rājadāsā hontī, katthaci vihāradāsā, tasmā pabbājetuṃ na vaṭṭatī. Dāsampi pabbājetvā sāmīke disvā paṭicchādanatthaṃ apanento padavārena adinnādānāpattiyā kāretabbo, dāsassa pana palāyato anāpatti.

Dāsavattukathāvaṇṇanā niṭṭhitā.

### Kammārabhaṇḍuvattthādīkathāvaṇṇanā

98. Bhaṇḍukammāpucchānādīkathāyaṃ **kammārabhaṇḍū**ti daharatāya amoḷibandho muṇḍikasīso kammāradārako eva vutto. **Tulādhāramuṇḍakoti** ettha **tulādhārā**ti tambasuvaṇṇādīnaṃ tulaṃ hatthena

dhāretīti kammārā “tulādhārā”ti vuttā, tesu eko muṇḍikasīso daharoti attho. Tenāha “**pañcasikho taruṇadārako**”ti. Ekāva sikhā pañca veṇiyo katvā bandhanena pañcasikhāti vuccati, sā etassa atthīti **pañcasikho**, tassa sikhāṃ chindantā kañci bhikkhuṃ ajānāpetvāva pabbājesuṃ. Tena bhaṇḍukammāpalokanaṃ anuññātam. **Sīmāpariyāpanneti** baddhasīmāya sati tadantogadhe, asati upacārasīmantogadheti attho. Ettha ca kiñcāpi “anujānāmi bhikkhave saṅghaṃ apaloketuṃ bhaṇḍukammāya”ti ettakameva vuttaṃ, na pana anapalokentassa āpatti vuttā, tathāpi aṭṭhakathāyaṃ “sabbe āpucchitā amhehīhisaññino -pa- pabbājentassapi anāpattī”ti vuttattā sañcicca anāpucchā kese ohārentassa dukkaṭamevāti daṭṭhabbaṃ. Kesoropanampi samaṇapabbajanavohāraṃ labhatīti āha “**imassa samaṇakaraṇaṃ**”ti-ādi. **Ekasikhāmattadharoti** ettha ekena kesena sikhā ekasikhāti vadanti, appakesāva sikhā evaṃ vuttāti gahetabbā. Ekakesampi pana anāpucchā chindituṃ na vaṭṭatiyeva.

100. **Vāmahatthenāti** dakkhiṇahatthena bhuñjanato vuttaṃ.

103-4. Nissayamuccanakassa vattesu pañcakachakkesu pana “ubhayāni kho panassa pātimokkhāni -pa- anubyañjanaso”ti ettha sabbopi cāyaṃ pabhedo mātikāṭṭhakathāyaṃ ñātāyaṃ ñāto hoti. “**Āpattim jānāti, anāpattim jānāti**”ti idañca attanā ñātaṭṭhānesu āpattādim sandhāya vuttanti na gahetabbāṃ.

Kammārabhaṇḍuvatthādikathāvaṇṇanā niṭṭhitā.

### Rāhulavattukathāvaṇṇanā

105. **Pokkharavassanti** pokkhare padumagacche viya atemitukāmānaṃ sarīrato pavaṭṭanakavassaṃ. Tasmim kira vassante temitukāmāva tementi, na itare. “**Bhikkhaṃ gaṇhathā**”ti vatvā gato **nāma natthīti** attano santake rajje sabbampi sāpateyyaṃ sayameva paribhuñjissatīti

gāravena suddhodanamahārājāpi na nimantesi, gantvā pana gehe sakalarattim mahādānañceva buddhappamukhassa saṅghassa āsanapaññattiṭṭhānālankārañca saṃvidahantova vītināmesi.

**Nakoci -pa- pattam vā aggahesīti** bhagavā attano pitu nivesanameva gamissatīti saññāya naggahesi. **Kulanagareti** ñātikulantake nagare. **Piṇḍacāriyavattanti** attano ñātigāmesupi sapaḍānacārikavattam. Bhikkhāya cāro caraṇam etassāti **bhikkhācāro**, khattiyo.

**Uttiṭṭheti** uttiṭṭhitvā paresam gharadvāre uddissa ṭhatvā gahetabbapiṇḍe. **Nappamajjeyyāti** nimantanādivasena labbhamānapanāṭibhojanam paṭikkhipitvā piṇḍāya caraṇavasena tattha nappamajjeyya. **Dhammanti** anesanam pahāya sapaḍānam caranto tameva bhikkhācariyadhammam sucaritam careyya. **Sukham setīti** catūhi iriyāpathehi sukham viharatīti attho.

Dutiya-gāthāyam **na nam duccharitanti** vesiyādibhede agocare caraṇavasena tam yathāvuttam dhammam duccharitam na ca care. Sesam vuttanayameva. **Imam pana gātham sutvāti** nivesane nisinnena bhagavato ñātisamāgame attano piṇḍāya caraṇam nissāya pavattāya gāthāya vuttam imam dutiya-gātham sutvā.

**Dhammapālajātakanti**-ādīsu pana tato parakālesupi rañño pavatti parinibbānam pāpetvā yathāpasaṅgavasena dassetuṃ vuttā. Tenāha “**sotāpattiphalam sacchikatvā**”ti-ādi. **Sirigabbham gantvāti** ettha yadi hi bhagavā tadaheva **gantvā** na passeyya, sā hadayena phalitena mareyyāti agamāsīti daṭṭhabbam.

**Tam divasamevāti** tasmim rāhulamātudassanadivaseyyeva. **Dhammapadaṭṭhakathāyam** pana “satthā kapilapuram gantvā tatiyadivase nandam pabbājesī”ti<sup>1</sup> vuttam. **Kesavissajjananti** rājamolībandhanattham kumārakāle bandhitasikhāveṇimocanam, tam kira karontā maṅgalam karonti. **Sāratthadīpaniyam** pana “kesavissajjananti kulamariyādasena kesoropanan”ti<sup>2</sup> vuttam. **Paṭṭabandhoti** “asukarājā”ti naḷāṭe suvaṇṇapaṭṭabandhanam. Abhinavapāsādappavesamaṅgalam **gharamaṅgalam**. Chattussāpane maṅgalam **chattamaṅgalam**.

1. Dhammapada-Ṭṭha 1. 74 piṭṭhe.

2. Sārattha-Ṭṭi 3. 248 piṭṭhe.

**Janapadakalyāṇī**ti janapadamhi kalyāṇī parehi asādhāraṇehi pañcakalyāṇādīhi sahitattā sā evaṃ vuttā. **Tuvaṭanti** sīghaṃ.

**Anicchamānanti** manasā arocentaṃ, vācāya pana bhagavatā “pabbajissasi nandā”ti vutte gāravena paṭikkhipitum avisahanto “āmā”ti avoca. Bhagavā ca etena lesena pabbājesi.

**Brahmarūpavaṇṇanti** brahmarūpasamānarūpaṃ. **Tyassāti** te assa.

**Nivattetuṃ na visahīti** “mā nam nivattayitthā”ti bhagavatā vuttattā nāsakkhi. **Sattavidhaṃ ariyadhaṇanti**—

“Saddhādhanam sīladhanam, hiri-ottappiyam dhanam.

Sutadhanañca cāgo ca, paññā ve sattamaṃ dhanam”ti<sup>1</sup>—

evaṃ vuttaṃ sattavidhaṃ ariyadhaṇam. **Adhimattaṃ rāhuleti** rāhule pabbajite nandapabbajjāya uppannadukkhato adhikataṃ dukkhaṃ ahoṣīti attho. **Ito pacchāti** ito vuttasokuppattito aparadivasesu anāgāmīnaṃ nāṭisinehapaṭighacittuppādābhāvā. pāliyaṃ **puttapemanti**-ādi raññā puttasiñhassa tibbabhāvaṃ dassetuṃ vuttaṃ. Puttasineho hi attanā sahaṇāpāṭivegasamuṭṭhitānaṃ rūpadhammānaṃ sakalasarīraṃ khobhetvā pavattanavasena “**chavim -pa- aṭṭhimiñjam āhacca tiṭṭhati**”ti vutto. **Attano piyatarāti** bhagavantaṃ sandhāya vadati. **Putteti** rāhulam. **Saddahantenāti** tassa vacanena avematikenāti attho. Vimatiyā sati āpatti eva.

Rāhulavattukathāvaṇṇanā niṭṭhitā.

### Sikkhāpadadaṇḍakammavattukathāvaṇṇanā

106. Sāmaṇerasikkhāpadādīsū pāliyaṃ **sikkhāpadānīti** sikkhākoṭṭhāsā, adhisīlasikkhānaṃ vā adhigamūpāyā. **Pānoti** paramatthato jīvitindriyaṃ. Tassa atipātaṃ pabandhasena pavattitum adatvā satthādīhi atikkamma abhibhavitvā pātaṃ paṇātipāto, paṇavadhoti attho.

1. Am 2. 398, 399 piṭṭhesu.

So pana atthato pāṇo pāṇasaññino jīvitindriyupacchedaka-upakkamasamuṭṭhāpikā vadhakacetanāva. Tasmā pāṇātipātā veramaṇi, verahetutāya verasaṅkhātāṃ pāṇātipātādīpāpadhammaṃ maṇati nīharatīti virati “**veramaṇī**”ti vuccati, vīramati etāyāti vā “**viramaṇī**”ti vattabbe niruttinayena “**veramaṇī**”ti samādānavirati vuttā. Esa nayo sesesupi.

Adinnassa ādānaṃ **adinnādānaṃ**, theyyacetanāva. **Abrahmacariyanti** aṣeṭṭhacariyaṃ, maggena maggapaṭipattisamuṭṭhāpikā methunacetanā. **Musāti** abhūtavatthu, tassa vādo abhūtataṃ ñatvāva bhūtato viññāpanacetanā **musāvādo**. Piṭṭhapūvādinibbattasurā ceva pupphāsavādibhedāṃ merayañca **surāmerayaṃ**. Tadeva madaniyaṭṭhena majjañceva pamādakāraṇaṭṭhena pamādaṭṭhānañca, taṃ yāya cetanāya pivati, tassa etaṃ adhivacanaṃ.

Aruṇuggamanato paṭhāya yāva majjhanhikā ayaṃ ariyānaṃ bhojanassa kālo nāma, tadañño **vikālo**. Bhuñjitabbaṭṭhena **bhojananti** idha sabbaṃ yāvakālikaṃ vuccati, tassa ajjhoharaṇaṃ idha uttarapadalopena “bhojanan”ti adhippetāṃ. Vikāle bhojanaṃ ajjhoharaṇaṃ **vikālabhojanaṃ**, vikāle vā yāvakālikassa bhojanaṃ ajjhoharaṇaṃ vikālabhojanantipi attho gahetabbo, atthato vikāle yāvakālika-ajjhoharaṇacetanāva.

Sāsanassa ananulomattā visūkaṃ paṭāṇībhūtaṃ dassanaṃ **visūkadassanaṃ**, naccagītādidassanasavanānañceva vaṭṭakayuddhajūtakīlādisabbakīlānañca nāmaṃ. **Dassananti** cettha pañcannampi viññāṇānaṃ yathāsakaṃ visayassa ālocanasabhāvatāya **dassana**-saddena saṅghetabbattā savanampi saṅghitaṃ. **Naccagītavādita**-saddehi cettha attano naccanagāyanādīnipi saṅghitānīti daṭṭhabbaṃ.

**Mālāti** baddhamabaddhaṃ vā antamaso suttādimayampi alaṅkāratthāya piḷandhiyamānaṃ “mālā”tveva vuccati. **Gandhanti** vāsacuṇṇādivilepanato aññaṃ yaṃ kiñci gandhajātaṃ. **Vilepananti** pīsitvā gahitaṃ chavirāgakaṇaṇaṃceva gandhajātañca. **Dhāraṇaṃ** nāma piḷandhanaṃ. **Maṇḍanaṃ** nāma ūnaṭṭhānapūraṇaṃ. Gandhavasena, chavirāgavasena ca sādiyaṃ **vibhūsaṇaṃ** nāma. Mālādīsu vā dhāraṇādīni

yathākkamaṃ yojetabbāni. Tesam dhāraṇādīnaṃ ṭhānaṃ kāraṇaṃ vītikkamacetanā.

**Uccāti** ucca-saddena samānattho nipāto, **uccāsayanam** vuccati pamāṇātikantaṃ āsandādi. **Mahāsayanam** akappiyattharaṇehi atthataṃ, salohitavitānaṅca. Etesu hi āsanaṃ, sayanaṅca uccāsayanamahāsayana-saddehi gahitāni uttarapadalopena. **Jātarūparajatapaṭiggahaṇāti** ettha **rajata-saddena** dārumāsakādi sabbaṃ rūpiyaṃ saṅgahitaṃ, muttāmaṇi-ādayopettha dhaññakhattavattthādayo ca saṅgahitāti daṭṭhabbā. **Paṭiggahaṇa-saddena** paṭiggāhāpanasādiyanāni saṅgahitāni. **Nāsanavattthūti** pārājikaṭṭhānatāya liṅganāsanaṅca tāraṇaṃ.

107. Pāḷiyaṃ **sabbaṃ saṅghārāmaṃ āvaraṇaṃ karontīti** sabbasamghārāme pavesanivāraṇaṃ karonti. **Samghārāmo āvaraṇaṃ kātabboti** samghārāmo āvaraṇo kātabbo, samghārāme vā āvaraṇaṃ kātabbanti attho. Teneva “**tattha āvaraṇaṃ kātun**”ti bhummavasena vuttaṃ. **Āhāraṃ āvaraṇanti**-ādīsupi eseva nayo. “**Yattha vā vasatī**”ti iminā sāmaṇerassa vassaggena laddhaṃ vā sakasantakameva vā nibaddhavasanaṅkāsaṇaṃ vuttaṃ. **Yattha vā paṭikkamatīti** ācariyupajjhāyānaṃ vasaṇaṭṭhānaṃ vuttaṃ. Tenāha “**attano**”ti-ādi. **Attanoti** hi sayam, ācariyassa, upajjhāyassa vāti attho. Daṇḍenti vinenti etenāti daṇḍo, so eva kattabbattā kammanti **daṇḍakammaṃ**, āvaraṇādi. **Udakaṃ vā pavesetunti** pokkharāṇi-ādi-udake pavesetun.

Sikkhāpadadaṇḍakammavattthukathāvaṇṇanā niṭṭhitā.

### Anāpucchāvaraṇavattthu-ādikathāvaṇṇanā

108. **Saddhivihārika-antevāsikānampīti** upasampanne sandhāya vuttaṃ. Tesupi hi ācariyupajjhāyesu yathā oramanti, tathā tesam niggahaṃ akarontesu aññehi āvaraṇādiniggahakammaṃ kātabbameva. **Saṅgaṇhantīti** “paraparīsato bhinditvā gaṇhissāmī”ti dānādicatūhi **saṅgahavattthūhi**<sup>1</sup>

1. Dī 3. 125, 156; Am 1. 341, 571 piṭṭhādīsu.

upalālanavasena saṅgaṅhanti. So bhijjatu vā mā vā, saṅgaṅhantassa payoge āpatti eva. **Bhindivā gaṅhitum na vaṭṭatī** bhinditumpi na vaṭṭati, gaṅhitumpi na vaṭṭatī attho. **Ādīnavam pana vattum vaṭṭatī** sāsanagāravena vā parānuddayatāya vā vattum vaṭṭati, na parisalolatāya.

“**Senāsanaggāho ca paṭippassambhatī**”ti iminā vassacchedam dasseti. Upasampannānampi pārājikasamāpattiyā saraṅagamanādisāmaṇerabhāvassāpi vinassanato senāsanaggāho ca paṭippassambhati, saṅghalābhampi te na labhantīti veditabbam. **Purimikāya puna saraṅāni gahitānī**ti saraṅaggahaṇena saha tadahevassa vassūpagamanampi dasseti. **Pacchimikāya vassāvāsikanti** vassāvāsikalābhaggahaṇadassanamattamevetam, tato purepi, pacchāpi vā vassāvāsikaṅca cīvaramāsesu saṅghe uppannam kālacīvaraṅca purimikāya upagantvā avipannasīlo sāmaṇero labhati eva. **Sace pacchimikāya gahitānī**ti pacchimikāya vassūpagamanaṅca chinnavassataṅca dasseti. Tassa hi kālacīvare bhāgo na pāpuṇāti. Tasmā “**apaloketvā lābho dātabbo**”ti vuttam.

Vassāvāsikalābho pana yadi senāsanasāmikā dāyakā senāsanaguttatthāya pacchimikāya upagantvā vuttam katvā attano senāsane vasantassapi vassāvāsikam dātabbanti vadanti, anapaloketvāpi dātabbova. Yam pana **sāratthadīpaniyam** “pacchimikāya vassāvāsikam lacchatīti pacchimikāya puna vassam upagattā lacchatī”ti<sup>1</sup> vuttam, tampi vassāvāsike dāyakānam imam adhippāyam nissāya vuttaṅce, sundaram. Saṅghikam, kālacīvarampi sandhāya vuttaṅce, na yujjati veditabbam.

**Na ajānitvāti** “surā”ti ajānitvā pivato pāṇātipātaveramaṇi-ādisabbasīlabhedam, saraṅabhedaṅca na āpajjati, akusalam pana surāpānaveramaṇisīlabhedo ca hoti mālādihāraṇādīsu viyāti daṭṭhabbam. **Itarānī**ti vikālabhojanaveramaṇi-ādīni. Tānīpi hi saṅcicca vītikkamantassa tam tam bhijjati eva, itarītaresam pana abhijjamānena nāsanaṅgāni na honti. Teneva “**tesu bhinnesū**”ti bhedavacanam vuttam.

---

1. Sārattha-Ṭī 3. 256 piṭṭhe.

**Accayaṃ desāpetabboti** “accayo maṃ bhante accagamā”ti-ādinā saṃghamajjhe desāpetvā saraṇasīlam dātabbanti adhippāyo pārājikattā tesam. Tenāha “**liṅganāsanāya nāsetabbo**”ti. **Ayameva hi nāsanā idha adhippetāti** liṅganāsanākāraṇehi pāṇātipātādīhi avaṇṇabhāsanādīnam saha patitattā<sup>1</sup> vuttam.

Nanu ca kaṇṭakasāmaṇeropī micchādīṭṭhiko eva, tassa ca heṭṭhā daṇḍakammanāsanāya vuttā. Idha pana micchādīṭṭhikassa liṅganāsanā vuccati, ko imesaṃ bhedoti codanam manasi nidhāyāha “**sassatu cchedānañhi aññataradīṭṭhiko**”ti. Ettha cāyamadhippāyo—yo hi “attā issaro vā nicco dhuvo”ti-ādinā vā “attā ucchijjissati vinassissati”ti-ādinā vā tiṭṭhiyaparikkappitam yaṃ kiñci sassatucchedadīṭṭhim daḷham gahetvā voharati, tassa sā pārājikatṭhānam hoti, so ca liṅganāsanāya nāsetabbo. Yo pana īdisaṃ dīṭṭhim aggahetvā sāsānikova hutvā kevalam buddhavacanādhippāyam viparītato gahetvā bhikkhūhi ovadiyamānopi appaṭinissajjitvā voharati, tassa sā dīṭṭhi pārājikam na hoti, so pana kaṇṭakanāsanāya eva nāsetabboti.

Anāpucchāvaraṇavatthu-ādīkathāvaṇṇanā niṭṭhitā.

### **Paṇḍakavatthukathāvaṇṇanā**

109. Paṇḍakavatthusmim āsitta-usūyapakkhapaṇḍakā tayopi purisabhāvaliṅgādiyuttā ahetukaṭṭhisandhikā, te ca kilesapariyuṭṭhānassa balavatāya napuṃsakapaṇḍakasadisattā “paṇḍakā”ti vuttā. Tesu āsitta-usūyapaṇḍakānam dvinnam kilesapariyuṭṭhānam yonisomanasikārādīhi vīṭikkamato nivāretumpi sakkā, tena te pabbājetabbā vuttā. Pakkhapaṇḍakassa pana kāḷapakkhesu ummādo viya kilesapariḷāho avattharanto āgacchati, vīṭikkamaṃ patvā eva ca nivattati. Tasmā so tasmim pakkhe na pabbājetabboti vutto. Tadetam vibhāgam dassetum “**yassa paresan**”ti-ādi vuttham. Tattha **āsittassā**timukhe āsittassa attanopi

1. Saha Paṭṭhitattā (Ka)



asucimuccanena pariḷāho vūpasammati. **Usūyāya uppannāyāti** usūyāya vasena attano sevetukāmatārāge uppanne asucimuttiyā pariḷāho vūpasammati.

“**Bījāni apanītāni**”ti vuttattā bījesu ṭhitesu nimittamatte apanīte paṇḍako na hoti. Bhikkhunopi anābādhapaccayā tadapanayane thullaccayameva, na pana paṇḍakattaṃ, bījesu pana apanītesu aṅgajātampi rāgena kammaniyam na hoti, pumabhāvo vigacchati, massu-ādīpurisaliṅgampi upasampadāpi vigacchati, kilesapariḷāhopi dunnivāravītikkamo hoti napuṃsakapaṇḍakassa viya. Tasmā īdiso upasampannopi nāsetabboti vadanti. Yadi evaṃ kasmā bījuddharaṇe pārājikaṃ na paññattanti? Ettha tāva keci vadanti “paññattamevaṃ bhagavatā ‘paṇḍako bhikkhave anupasampanno na upasampādetabbo, upasampanno nāsetabbo’ti vuttattā”ti. Keci pana “yasmā bījuddharaṇakkhaṇe paṇḍako na hoti, tasmā tasmim̃ khaṇe pārājikaṃ na paññattaṃ. Yasmā pana so uddhaṭabījo bhikkhu aparena samayena vuttanayena paṇḍakattaṃ āpajjati, abhāvako hoti, upasampadāya avatthu, tato eva cassa upasampadā vigacchati, tasmā esa paṇḍakattupagamanakālato paṭṭhāya jātiyā napuṃsakapaṇḍakena saddhim̃ yojetvā ‘upasampanno nāsetabbo’ti abhabboti vutto, na tato pubbe. Ayañca kiñcāpi sahetuko, bhāvakkhayena panassa ahetukasadisatāya maggopi na uppajjati”ti vadanti. Apare pana “pabbajjato pubbe upakkamena paṇḍakabhāvamāpannaṃ sandhāya ‘upasampanno nāsetabbo’ti vuttaṃ, upasampannassa pana pacchā upakkamena upasampadāpi na vigacchati”ti, taṃ na yuttaṃ. Yadaggena hi pabbajjato pubbe upakkamena abhabbo hoti, tadaggena pacchāpi hotīti vīmaṃsitvā gahetabbaṃ.

Itthattādi bhāvo natthi etassāti **abhāvako. Pabbajjā na vāritāti** ettha pabbajjāgahaṇeneva upasampadāpi gahitā. Tenāha “**yassa cettha pabbajjā vāritā**”ti-ādi. **Tasmim̃ yevassa pakkhe pabbajjā vāritāti** ettha pana apaṇḍakapakkehpi pabbajjāmattameva labhati, upasampadā pana tadāpi na vaṭṭati, paṇḍakapakke pana āgate liṅganāsanāya nāsetabboti veditabbaṃ.

Paṇḍakavatthukathāvaṇṇanā niṭṭhitā.

### Theyyasaṁvāsakavatthukathāvaṇṇanā

110. Theyyasaṁvāsakavatthumhi **kolaññāti** kule jātā, tattha vā viditā ñātā pasiddhā, taṁ vā jānanti kolaññāti ñātakānaṁ nāmaṁ. Theyyāya liṅgaggahaṇamattampi idha saṁvāso evāti āha “**tayo theyyasaṁvāsakā**”ti. **Na yathāvuḍḍhaṁ vandananti** bhikkhūnaṁ, sāmaṇerānaṁ vā vandanāṁ na sādīyati.

**Yathāvuḍḍhaṁ vandananti** attanā musāvādena dassitavassakkamena bhikkhūnaṁ vandanāṁ sādīyati, daharasāmaṇero pana vuḍḍhasāmaṇerānaṁ, daharabhikkhu ca vuḍḍhānaṁ vandanāṁ sādīyantopi theyyasaṁvāsako na hoti. **Imasmim attheti** saṁvāsathenakatthe.

“**Bhikkhuvassānī**”ti idaṁ saṁvāsathenake vuttapāṭhavasena vuttaṁ, sayameva pana pabbajitvā sāmaṇeravassāni gaṇentopi ubhayatthenako eva. Na kevalaṅca purisova, itthīpi bhikkhunīsu evaṁ paṭipajjati, theyyasaṁvāsikāva. Ādikammikāpi cetthana muccanti, upasampannesu eva paññattāpattim paṭicca ādikammikā vuttā, tenevettha ādikammikopi na mutto.

**Rāja -pa- bhayenāti** ettha **bhaya-**saddo paccekaṁ yojetabbo. **Yāva so suddhamānasoti** “iminā liṅgena bhikkhū vañcetvā tehi saṁvasissāmī”ti asuddhacittābhāvena suddhacitto. Tena hi asuddhacittena liṅge gahitamatte pacchā bhikkhūhi saha saṁvasatu vā mā vā, liṅgatthenako hoti. Pacchā saṁvasantopi abhabbo hutvā saṁvasati. Tasmā ubhayatthenakopi liṅgatthenake eva pavisatīti veditabbaṁ. Yo pana rājādibhayena suddhacittova liṅgaṁ gahetvā vicaranto pacchā “bhikkhuvassāni gaṇetvā jīvissāmī”ti asuddhacittaṁ uppādeti, so cittuppādamattena theyyasaṁvāsakopi na hoti suddhacittena gahitaliṅgattā. Sace pana so bhikkhūnaṁ santikaṁ gantvā sāmaṇeravassagaṇanādiṁ karoti, tadā saṁvāsathenako, ubhayatthenako vā hotīti daṭṭhabbaṁ. Yaṁ pana parato saha dhuranikkhepena “ayampi theyyasaṁvāsako, vā”ti vuttaṁ, taṁ bhikkhūhi saṅgama saṁvāsādhivāsanavasena dhuranikkhepaṁ sandhāya vuttaṁ. Tena vuttaṁ “**saṁvāsāṁ nādhivāseti yāvā**”ti. Tassa tāva theyyasaṁvāsako nāma na vuccatīti sambandho daṭṭhabbo. Ettha ca

corādibhayam vināpi kīlādhīppāyena liṅgam gahetvā bhikkhūnam santike pabbajitālayam dassetvā vandanādim asādiyantopi “sobhati nu kho me pabbajitaliṅgam”ti-ādinā suddhacittena gaṇhantopi theyyasamvāsako na hotīti daṭṭhabbam.

**Sabbapāsaṇḍiyabhattānī**ti sabbasāmayikānam sādharmaṇam katvā paññattabhattāni, idaṅca bhikkhūnaññeva niyamitabhattagaṇe samvāsopi sambhaveyyāti sabbasādhāraṇabhattam vuttam. Samvāsam pana asādiyitvā abhikkhukavīhārādīsu vīhārabhattādīni bhujjantopi theyyasamvāsako na hoti eva. **Kammantānuṭṭhānenā**ti kasi-ādikammakaraṇena. **Pattacīvaram ādāyāti** bhikkhuliṅgavesena sarīrena dhāretvā.

“**Yo evam pabbajati, so theyyasamvāsako nāma hotī**”ti idam nidassanamattam, “theyyasamvāsako”ti pana nāmam ajānantopi “evam kātum na vaṭṭatī”ti vā “evam karonto samaṇo nāma na hotī”ti vā “yadi āroccasāmi, chaḍḍessanti man”ti vā “yena kenaci pabbajjā me na ruhatī”ti jānāti, theyyasamvāsako hoti. Yo pana paṭhamam “pabbajjā evam me gahitā”tisaññī kevalam antarā attano setavatthanivāsānādivippakāram pakāsetum lajjanto na katheti, so theyyasamvāsako na hoti.

**Anupasampannakāleyevāti** ettha avadhāraṇena upasampannakāle theyyasamvāsakalakkhaṇam ñatvāvañcanāyapī nāroceti, theyyasamvāsako na hotītidīpeti. So parisuddhacittena gahitaliṅgattā liṅgatthenako na hoti, laddhūpasam padattā tadanuṅgaṇasseva samvāsassa sādītattā samvāsatthenakopi na hoti. Anupasampanno pana liṅgatthenako hoti, samvāsārahassa liṅgassa gahitattā samvāsassādiyanamattena samvāsatthenako hoti.

**Salīṅge ṭhitoti** salīṅgabhāve ṭhito. **Theyyasamvāsako na hotīti** bhikkhūhi dinnaliṅgassa apariccattattā liṅgatthenako na hoti, bhikkhupaṭiññāya apariccattattā samvāsatthenako na hotīti. Yam pana **mātikāṭṭhakathāyam** “liṅganurūpassa samvāsassa sādītattā na samvāsatthenako”ti<sup>1</sup> kāraṇam vuttam, tampi idameva kāraṇam sandhāya vuttam.

Itarathā sāmaṇerassapi bhikkhuvassagaṇanādīsu liṅgānurūpasamvāso eva sādītōti samvāsattthenakatā na siyā bhikkhūhi dinnaliṅgassa ubhinnampi sādihāraṇattā. Yathā cettha bhikkhu, evaṃ sāmaṇeropi pārājikaṃ samāpanno sāmaṇerapaṭiññāya apariccattattā samvāsattthenako na hotīti veditabbo. **Sobhatīti sampaṭicchitvā**ti kāsāvadhāraṇe dhuraṃ nikkhipitvā gihbhāvaṃ sampaṭicchitvā.

**Yo koci vaḍḍhapabbajitōti** sāmaṇeraṃ sandhāya vuttaṃ. **Mahāpeḷādīsūti** vilīvādīmayesu gharadvāresu ṭhapitabhattabhājanavisesesu, etena vihāre bhikkhūhi saddhīṃ vassagaṇanādīnaṃ akaraṇaṃ dasseti.

Theyyasamvāsakavatthukathāvaṇṇanā niṭṭhitā.

### Titthiyapakkantakakathāvaṇṇanā

Titthiyapakkantakādīkathāsu **tesaṃ liṅge ādinnamatteti** vīmaṃsādi-adhippāyaṃ vinā “titthiyo bhavissāmi”ti sannīṭṭhānavasena liṅge kāyena dhāritamatte. **Sayamevāti** titthiyānaṃ santikaṃ agantvā sayameva saṃghārāmepe kusacīrādīni nivāseti. **Ājīvako bhavissāmi -pa- gacchatīti** ājīvakanāṃ santike tesaṃ pabbajanavidhinā “ājīvako bhavissāmi”ti gacchati. Tassa hi titthiyabhāvūpagamaṇaṃ pati sannīṭṭhāne vijjamaṇepe “gantvā bhavissāmi”ti parikappitattā padavāre dukkaṭameva vuttaṃ. **Dukkaṭanti** pāḷiyā avuttepe methunādīsu vuttapubbapayogadukkaṭānulomato vuttaṃ. Etena ca sannīṭṭhānavasena liṅge sampaṭicchite pārājikaṃ, tato purimāpayoge thullaccayaṇca vattabbameva, thullaccayakkhaṇe nivattantopi āpattīṃ desāpetvā muccati evāti daṭṭhabbaṃ. Yathā cettha, evaṃ saṃghabhedepi lohituppādepe bhikkhūnaṃ pubbapayogādīsu dukkaṭathullaccayapārājikāhi muccanasīmā ca veditabbā. Sāsanaviruddhatāyetta ādikammikānampi anāpattī na vuttā. Pabbajjāyapi abhabbatādassanattamaṃ panete, aññe ca pārājikakaṇḍe visuṃ sikkhāpadena pārājikādīṃ adassetvā idha abhabbesu eva vuttāti veditabbaṃ.

**Tam laddhinti** titthiyavese seṭṭhabhāvaggahaṇameva sandhāya vuttam. Tesañhititthiyānam sassatādiggāham gaṇhantopi liṅge asampaṭicchite titthiyapakkantako na hoti, tam laddhim aggahetvāpi “etesam vatacariyā sundarā”ti liṅgam sampāṭicchanto titthiyapakkantako hoti eva. **Laddhiyā abhāvenā**ti bhikkhubhāve sālayatāya titthiyabhāvūpagamanaladdhiyā abhāvena, etena ca āpadāsu kusacīrādim pārupantassāpi naggassa viya anāpattim dasseti.

**Upasampannabhikkhunā kathitoti** ettha saṁghabhedakopi upasampannabhikkhunāva kathito, mātughātakādayo pana anupasampannenāpīti daṭṭhabbam.

Titthiyapakkantakakathāvaṇṇanā niṭṭhitā.

---

### Tiracchānavatthukathāvaṇṇanā

111. Udakasañcārikam maṇḍūkabhakkham nāgasarīranti sambandhitabbam. **Vissarabhayenā**ti nāgassa sarīram disvā bhikkhuno viravanabhayena. Kapimiddhādīsu nāgasarīram nuppajjatīti taduppattisīmam dassento āha “**vissaṭṭho**”ti-ādi.

Tiracchānavatthukathāvaṇṇanā niṭṭhitā.

---

### Mātughātakādikathāvaṇṇanā

112. **Apavāhananti** sodhanam. Tiracchānādi-amanussajātito manussajātikānaññeva puttesu mettādayopi tikkhavisadā honti lokuttaraguṇā viyāti āha “**manussitthibhūtā janikā mātā**”ti. Yathā manussānaññeva kusalappavatti tikkhavisadā, evam akusalappavattipīti āha “**sayampi manussajātikenevā**”ti-ādi. **Ānantariyenā**ti ettha cuti-anantaram niraye paṭisandhiphalam anantaram nāma, tasmim anantare janakattena niyuttam ānantariyam, tena. **Vesiyāputthoti** upalakkhaṇamattam, kulitthiyā aticāriniyā puttapi attano pitaram ajānitvā ghātento pitughātakova hoti.

114. **Avasesanti** anāgāmi-ādikaṃ. Yaṃ panettha vattabbaṃ, taṃ manussaviggahapārājike vuttameva.

115. **Ayaṃ saṅghabhedakoti** pakatattaṃ bhikkhuṃ sandhāya vuttaṃ. Pubbe eva pārājikaṃ samāpanno vā vatthādidosena vipannopasampado vā saṅghaṃ bhindantopi anantariyaṃ na phusati, saṅgho pana bhinnova hoti, pabbajjā cassa na vāritāti daṭṭhabbaṃ.

“Duṭṭhacittena”ti vuttamevatthaṃ vibhāveti “**vadhakacittena**”ti. **Lohitaṃ uppādeti**ti tathāgatassa verīhi abhejjakāyatāya kenaci balakkārena cammādicchedaṃ katvā bahi lohitaṃ paggharāpetuṃ na sakkā, āvudhādipahārena pana lohitaṃ ṭhānato calitvā kuppamānaṃ ekattha sañcitaṃ hoti, ettakena pana pahāradāyako lohittuppādako nāma hoti devadatto viya. Cetiyaṃ pana bodhiṃ vā paṭimādiṃ vā bhindato ānantariyaṃ na hoti, ānantariyasadisāṃ mahāsāvajjaṃ hoti. Bodhirukkhasa pana ojharaṇasākhā ceva sadhātukaṃ cetiyaṃ bādhayamānā ca chinditabbā, puññamevettha hoti.

Mātughātakādikathāvaṇṇanā niṭṭhitā.

### Ubhatobyañjanakavattukathāvaṇṇanā

116. **Itthi-ubhatobyañjanakoti** itthindriyayutto, itaro pana purisindriyayutto. Ekassa hi bhāvadvayaṃ saha nuppajjati **yamake**<sup>1</sup> paṭikkhittattā. Dutiya byañjanaṃ pana kamma sahāyena akusalacitteneva bhāvavirahitaṃ uppajjati. Pakatitthipurisānampi kammameva byañjanaliṅgānaṃ kāraṇaṃ, na bhāvo tassa kenaci paccayena paccayattassa paṭṭhāne avuttattā. Kevalaṃ bhāvasahitānaṃyeva byañjanaliṅgānaṃ pavattidassanatthaṃ **aṭṭhakathāsu** “itthindriyaṃ paṭicca itthiliṅgādīnī”ti-ādīnā<sup>2</sup> indriyaṃ byañjanakāraṇattena vuttaṃ, idha pana akusalabalena indriyaṃ vināpi byañjanaṃ uppajjati vuttaṃ. Ubhinnaṃpi cesaṃ ubhatobyañjanakānaṃ yadā itthiyā rāgo uppajjati, tadā purisabyañjanaṃ pākaṭaṃ hoti, itaraṃ paṭicchannaṃ. Yadā purise rāgo uppajjati, tadā

1. Abhi 7. 117 piṭṭhe.

2. Abhi-Ṭṭha 1. 358 piṭṭhe.

itthibyañjanam pākaṭam hoti, itaram paṭicchannam. **Tattha vicāraṇakkamoti** paṭisandhikkhaṇe eva itthipurisalingānampi pātubhāvappakāsake **kurundi** vacane ayuttatāpakāsanattham atthavicāraṇakkamo. **Aṭṭhasālīniyañhi** “itthilingādīni pana itthindriyam paṭicca pavatte samuṭṭhitāni”<sup>1</sup> ti-ādi<sup>1</sup> vuttam. Nevassa pabbajjā atthīti yojanā. Yo ca paṭikkhitte abhabbe, bhabbe ca puggale ñatvā pabbājeti, upasampādeti vā, dukkaṭam. Ajānantassa sabbattha anāpatṭīti veditabbam.

Ubhatobyañjanakavatthukathāvaṇṇanā niṭṭhitā.

### Anupajjhāyakādivatthukathāvaṇṇanā

117. Anupajjhāyādivatthūsu **sikkhāpadam apaññattanti** “na bhikkhave anupajjhāyako upasampādetabbo”<sup>1</sup> ti idheva paññāpiyamānasikkhāpadam sandhāya vuttam. **“Kammaṃ pana na kuppati”**<sup>1</sup> ti idam upajjhāyābhāvepi “itthannāmassa upasampadāpekkho, itthannāmena upajjhāyenā”<sup>1</sup> ti matassa vā vibbhamantassa vā purāṇa-upajjhāyassa, aññassa vā yassa kassaci aviḍḍhamānassāpi nāmena sabbattha upajjhāyakittanassa katattā vuttam. Yadi hi upajjhāyakittanam na kareyya, “puggalam na parāmasati”<sup>1</sup> ti vuttakammavipatti eva siyā. Teneva pāḷiyam “anupajjhāyakan”<sup>1</sup> ti vuttam. **Aṭṭhakathāyampissa** “upajjhāyam akittetvā”<sup>1</sup> ti avatvā “upajjhāyam agāhāpetvā sabbena sabbam upajjhāyavirahitam”<sup>1</sup> icceva atthoti vutto. Pāḷiyam **saṃghena upajjhāyenāti** “ayam itthannāmo saṃghassa upasampadāpekkho, itthannāmo saṃgham upasampadam yācati saṃghena upajjhāyenā”<sup>1</sup> ti evam kammavācāya saṃghameva upajjhāyam kittetvāti attho. Evam **gaṇena upajjhāyenāti** etthāpi “ayam itthannāmo gaṇassa upasampadāpekkho”<sup>1</sup> ti-ādinā yojanā veditabbā, evam vuttepi kammaṃ na kuppati eva dukkatasseva vuttattā. Aññathā “so ca puggalo anupasampanno”<sup>1</sup> ti vadeyya. Tenāha **“saṃghenā”**<sup>1</sup> ti-ādi. Tattha paṇḍakādīhi upajjhāyehi kariyamānesu kammesu paṇḍakādīke vināva yadi pañcavaggādigaṇo pūrati, kammaṃ na kuppati, itarathā kuppattīti veditabbam.

Anupajjhāyakādivatthukathāvaṇṇanā niṭṭhitā.

1. Abhi-Ṭṭha 1. 358 piṭṭhe.

### Apattakādivatthukathāvaṇṇanā

118. Apattacīvaravatthūsupi pattacīvarānaṃ abhāvepi “paripuṇṇassa pattacīvaran”ti kammavācāya sāvitattā kammakopaṃ avatvā dukkaṭameva vuttaṃ, itarathā sāvanāya hāpanato kammakopo eva siyā. Keci pana “paṭhamam anuññātakammavācāya upasampannā viya idānipi ‘paripuṇṇassa pattacīvaran’ti avatvā kammavācāya upasampannāpi sūpasampannā evā”ti vadanti, taṃ na yuttaṃ. Anuññātakālo paṭṭhāya hi aparāmasanaṃ sāvanāya hāpanavipatti eva hoti “itthannāmo saṃghaṃ upasampadaṃ yācatī”ti padassa hāpane viya. Tampi hi pacchā anuññātaṃ, “saṃghaṃ bhante upasampadaṃ yācāmi”ti-ādivākyena ayācetvā tampi upasampādentō “ayaṃ itthannāmo saṃghaṃ upasampadaṃ yācatī”ti vatvāya yadi kammavācaṃ karoti, kammaṃ sukatameva hoti, no ce vipannaṃ. Sabbapacchā hi anuññātakammavācato kiñcīpi pariḥāpetuṃ na vaṭṭati, sāvanāya hāpanameva hoti. Aññe vā bhikkhū dātukāmā hontīti sambandho.

**Anāmatṭhapiṇḍapātanti** bhikkhūhi laddhabhikkhato aggahitaggam piṇḍapātam. **Sāmaṇerabhāgasamakoti** ettha kiñcāpi sāmaṇerānampi āmisabhāgassa samakameva diyyamānattā visuṃ sāmaṇerabhāgo nāma natthi, pattacīvaraparikammamattapaṭibaddhapabbajjātāya pana sāmaṇerasadisā ete paṇḍupalāsāti dassanattam evaṃ vuttanti daṭṭhabbāṃ. Niyatāsannapabbajjasseva cāyaṃ bhāgo diyati. Teneva “yāva patto paccatī”ti-ādi vuttaṃ. **Āmisabhāgoti** vihāre dinnam saṃghabhattam, tatrūpādañca sandhāya vuttaṃ, na dāyakānaṃ gehesu tehi diyyamānaṃ. Teneva salākabhattādi paṭikkhattam, dāyakā vippaṭisārino hontīti. **Bhesajjanti-ādinā** panagihīnaṃ bhesajjakaraṇādidoso ettha na hotīti dasseti.

Apattakādivatthukathāvaṇṇanā niṭṭhitā.



### Hatthacchinnādivatthukathāvaṇṇanā

119. Hatthacchinnādivatthūsu **kaṇṇamūleti** sakalassa kaṇṇassa chedaṃ sandhāya vuttaṃ. **Kaṇṇasakkhalikāyāti** kaṇṇacūlikāya. **Yassa pana kaṇṇāviddheti**<sup>1</sup> heṭṭhā kuṇḍalādiṭṭhapanacchiddaṃ sandhāya vuttaṃ. Tañhi saṅghaṭṭanakkhamaṃ. **Ajapadake**ti ajapadanāsikaṭṭhikoṭṭiyāṃ. Tato hi uddhaṃ na vicchindati. **Sakkā hoti sandhetunti** avirūpasaṅṭhānaṃ sandhāya vuttaṃ, virūpaṃ pana parisadūsakataṃ āpādeti.

**Khujjasarīro**ti vaṅkasarīro. Brahmuno viya ujukaṃ gattaṃ sarīraṃ yassa, so **brahmujjuggatto**, bhagavā.

**Parivaṭumoti** samantato vaṭṭakāyo, etena evarūpā eva vāmanakā na vaṭṭantīti dasseti.

**Kūṭakūṭasīsoti** anekesu ṭhānesu piṇḍikamaṃsataṃ dassetuṃ āmeḍitaṃ kataṃ. Tenāha “**tālaphalapiṇḍisadisena**”ti, tālaphalānaṃ mañjarī **piṇḍi** nāma. **Anupubbatanukena sisenāti** cetiyathūpikā viya kamena kisenā sisenā, thūlaveḷupabbaṃ viya ādito paṭṭhāya yāvapariyosānaṃ samathūlena uccena sisenā samannāgato **nālisīso** nāma. **Kappasīsoti** gajamatthakaṃ viya dvidhā bhinnasīso. “**Kaṇṇikakeso vā**”ti imassa vivaraṇaṃ “**pāṇakehi**”ti-ādi. Makkaṭasseva naḷāṭepi kesānaṃ uṭṭhitabhāvaṃ sandhāyāha “**sīsalomehi**”ti-ādi.

**Makkaṭabhamukoti** naḷāṭalomehi avibhattalomabhamuko. **Akkhicakkalehīti** kaṇhamaṇḍalehi. **Kekaroti** tiriyaṃ passanako. **Udakatārakāti** oloketānaṃ udake paṭibimbicacchāyā, udakapubbuḷanti keci. **Akkhitārakāti** abhimukhe ṭhitānaṃ chāyā, akkhigaṇḍakātipi vadanti. **Atipiṅgalakkhīti** majjārakkhi. **Madhupiṅgalanti** madhuvaṇṇapīṅgalaṃ. **Nippakhumakkhīti** ettha **pakhuma**-saddo akkhidalalomesu nirūḷho, tadabhāvā nippakhumakkhi. **Akkipākenāti** akkhidala<sup>2</sup> pariyantesu pūtibhāvāpajjanarogena.

1. Kaṇṇābaddheti (Ka)

2. Akkhitala... (Ka)

**Ciṭṭanāsikoti** anunnatanāsiko. **Paṭaṅgamaṇḍūko** nāma mahāmukhamaṇḍūko. **Bhinnamukhoti** upakkamukhpariyosāno, sabbadā vivaṭamukho vā. **Vaṅkamukhoti** ekapasse apakkamma ṭhitahetṭhimahanukaṭṭhiko. **Oṭṭhacchinnakoti** ubhosu oṭṭhesu yattha katthaci jātiyā vā pacchā vā satthādinā apanītamamsena oṭṭhena samannāgato. **Eḷamukhoti** niccapaggharitalālāmukho.

**Bhinnagaloti** avanatagato. **Bhinna-uroti** atininna-uramajjho. Evaṃ **bhinna piṭṭhipi**. **Sabbañcetanī** “kacchugatto”ti-ādiṃ sandhāya vuttaṃ. Ettha ca vinicchayokuṭṭhādīsu vutto evāti āha “**vinicchayo**”ti-ādi.

**Vātaṇḍikoti** aṇḍavātarogena uddhuta<sup>1</sup> bijaṇḍakosena samannāgato, yassa nivāsanena paṭicchannampi unnataṃ pakāsati, sova na pabbājetabbo. **Vikaṭoti** tiriyaṅgamanapādo, yassa caṅkamato jāṇukā bahi nigacchanti. **Paṇhoti**<sup>2</sup> pacchato parivattanapakādo, yassa caṅkamato jāṇukā anto pavisanti. **Mahājāṅghoti** thūlajaṅgho. **Mahāpādoti** mahantena pādatalena yutto. **Pādavemajjheti** piṭṭhipādavemajjhe, etena aggapādo ca paṇhi ca sadisoti dasseti.

**Majjhe saṅkuṭṭitapādattāti** kuṇḍapādatāya kāraṇavibhāvanāṃ. **Agge saṅkuṭṭitapādattāti** kuṇḍapādatāya sakuṇapādasseva<sup>3</sup> gamanavibhāvanāṃ. **Piṭṭhipādaggena caṅkamantoti** “pādassa bāhirantenāti ca abbhantarantenā”ti ca idaṃ pādatalassa ubhohi pariyantehi caṅkamanāṃ sandhāya vuttaṃ.

**Mammananti** ṭhānakaraṇavisuddhiyā abhāvena ayuttakkharavacanāṃ. Vacanānukaraṇena hi so mammano vutto. Yo ca karaṇasampannopi ekamevakkharaṃ hikkārabahuso vadati, sopi idheva saṅgayhati. Yo vā pana hikkaṃ niggaḥetvāpi anāmeditakkhameva siliṭṭhavacanāṃ vattuṃ samattho, so pabbājetabbo.

**Āpattito na muccatīti** ñatvā karontova na muccati. Jīvitantarāyādi-āpadāsu aruciya kāyasāmaggiṃ dentassa anāpatti. **Appatto osāraṇanti** osāraṇāya anarahoti attho.

Hatthacchinnādivatthukathāvaṇṇanā niṭṭhitā.

1. Uddhaṭa (Sī, Ka) 2. Saṅghāṭoti (Sī, Ka), saṇḍoti (Syā) 3. Sakuṇapādasseva (Sī)

### Alajjinissayavattukathāvaṇṇanā

120. Nissayaapaṭisaṃyuttavattūsu bhikkhūhi samāno bhāgo dīṭṭhisilādiguṇakoṭṭhāso assāti bhikkhusabhāgo, tassa bhāvo **bhikkhusabhāgatā**.

Alajjinissayavattukathāvaṇṇanā niṭṭhitā.

### Gamikādinissayavattukathāvaṇṇanā

121. **Nissayakaraṇīyoti** ettha nissayaggahaṇaṃ nissayo, so karaṇīyo yassāti visesanassa paranipāto daṭṭhabbo. **Vissamento vā -pa- anāpattīti** gamanasa-ussāhatāya tathā vasantopi addhiko eva, tattha nissayadāyake asati anāpattīti adhippāyo. Etena ca parissamādi-abhāve senāsanādisampadaṃ paṭicca vasato āpattīti dasseti. Tañca agamanapaccayā divase divase āpajjati vadanti. Cīvararajanādikiccatthāya garūhi pesitassāpi kiccapariyosānameva vasitabbaṃ, na tato paraṃ. Garūhipi tāvakālikiccatthameva pesaladaharā pesitabbā, na niccakālikiccatthanti daṭṭhabbaṃ. “**Nāvāya gacchantassa -pa- anāpattī**”ti vuttatā evarūpaṃ avidheyyataṃ vinā nissayadāyakarahaṇatṭhāne vassaṃ upagantaṃ na vaṭṭatīti daṭṭhabbaṃ.

**Tassa nissāyāti** taṃ nissāya. **Asāḷimāse -pa- tattha gantabbanti** ettha pana sacepi “asuko thero ettha āgamissati āgamissati”ti āgamentasseva vassūpanāyikadivaso hoti<sup>1</sup>. Hotu, vasitaṭṭhāne vassaṃ anupagamma yattha nissayo labbhati, dūrepi tattha gantvā pacchimikāya upagantabbam.

122. **Gottenapīti** “āyasmato pippalissa upasampadāpekkho”ti evaṃ nāmaṃ avatvā gottanāmenapīti attho, tena “konāmo te upajjhāyo”ti puṭṭhena gottanāmena “āyasmā kassapo”ti vattabbanti siddhaṃ hoti. Tasmā aññampi kiñci tassa nāmaṃ pasiddhaṃ, tasmim vā khaṇe sukhaḅbhaṇatthaṃ nāmaṃ paññāpitaṃ, taṃ sabbaṃ gahetvāpi anussāvanā kātabbā.

---

1. Seso hoti (Sī)

Yathā upajjhāyassa, evaṃ upasampadāpekkhassapi gottādināmena, taṅkhaṇikanāmena ca anussāvanaṃ kātuṃ vaṭṭati. Tasmimpi khaṇe “ayaṃ tisso”ti vā “nāgo”ti vā nāmaṃ karonteḥi anusāsakasammutito paṭhemameva kātabbaṃ, evaṃ katvāpi antarāyikadhammānusāsana-pucchanakālesu “kinnāmosi, ahaṃ bhante nāgo nāma, konāmo te upajjhāyo, upajjhāyo me bhante tisso nāmā”ti-ādinā viññāpentena ubhinnampi citte “mamedam nāman”ti yathā saññā uppajjati, evaṃ viññāpetabbaṃ. Sace pana tasmim khaṇe pakatināmena vatvā pacchā tissanāmādi-apubbanāmena anussāveti, na vaṭṭati.

Tattha ca kiñcāpi upajjhāyasseva nāmaṃ aggahetvā yena kenaci nāmena “tissassa upasampadāpekkho”ti-ādināpi puggale parāmaṭṭhe kammaṃ sukata meva hoti anupajjhāyakādīnaṃ upasampadākammaṃ viya upajjhāyassa abhāvepi abhabbattepi kammavācāya puggale parāmaṭṭhe kammaṃ sijjhanato. Upasampadāpekkhassa pana yathāsakaṃ nāmaṃ vinā aññena nāmena anussāvite kammā kuppatti, so anupasampanno va hoti. Tattha ṭhito añño anupasampanno viya gahitanāmassa vatthu, puggalassa tattha abhāvā, etassa ca nāmassa anussāvanāya avuttattā. Tasmā upasampadāpekkhassa pakatināmaṃ parivattetvā anupubbena nāgādināmena anussāvetukāmena paṭikacceva “tvaṃ nāgo”ti-ādinā viññāpetvā anusāsana-antarāyikadhammapucchanakkhaṇesupi tassa ca saṅghassa ca yathā pākaṭaṃ hoti, tathā pakāsetvā nāgādināmena anussāvetabbaṃ. Ekassa bahūni nāmāni honti, tesu ekaṃ gahetuṃ vaṭṭati.

Yaṃ pana upasampadāpekkha-upajjhāyānaṃ ekattha gahitaṃ nāmaṃ, tadeva ñattiyā, sabbattha anussāvanāsu ca gahetabbaṃ. Gahitato hi aññasmim gahite byañjanaṃ bhinnaṃ nāma hoti, kammaṃ vipajjati. Atthato, hi byañjanato ca abhinnā eva ñatti, anussāvanā ca vaṭṭanti, upajjhāyanāmassa pana purato “āyasmato tissassā”ti-ādinā **āyasmanta-**padam sabbattha yojetvāpi anussāveti, tathā ayojitepi doso natthi.

Pāliyaṃ pana kiñcāpi “itthannāmassa āyasmato”ti pacchato “āyasmato”ti padam vuttam, tathāpi “āyasmā sārīputto

atthakusalo”ti-ādinā nāmassa purato āyasmanta-padayogassa dassanato puratova payogo yuttataro. Tañca ekattha yojetvā aññattha ayojitepi ekattha purato yojetvā aññattha pacchato yojanepi sāvanāya hāpanam nāma na hoti nāmassa ahāpitattā. Teneva pāḷiyampi “itthannāmassa āyasmato”ti ekattha yojetvā “itthannāmena upajjhāyena”ti-ādīsu “āyasmato”ti na yojitanti vadanti. Tañca kiñcāpi evam, tathāpi sabbaṭṭhānepi ekeneva pakārena yojetvā eva vā ayojetvā vā anussāvanam pasatthataranti gahetabban.

Gamikādinissayavattukathāvaṇṇanā niṭṭhitā.

### Dve upasampadāpekkhādivattukathāvaṇṇanā

123. Ekato saheva ekasmiṃ khaṇe anussāvanam etesanti **ekānussāvanā**, upasampadāpekkhā, ete ekānussāvane kātum. Tenāha “**ekānussāvane kātun**”ti, idañca ekam padaṃ vibhatti-alopena daṭṭhabban. **Ekena vāti** dvinnampi ekasmiṃ khaṇe ekāya eva kammavācāya anussāvane ekenācariyenāti attho. “Ayaṃ buddharakkhito ca ayaṃ dhammarakkhito ca āyasmato saṃgharakkhitassa upasampadāpekkho”ti-ādinā nayena ekena ācariyena dvinnam ekasmiṃ khaṇe anussāvananayo daṭṭhabbo. Imināva nayena tiṇṇampi ekena ācariyena ekakkhaṇe anussāvanam daṭṭhabban.

**Purimanayeneva ekato anussāvane kātunti** “ekena ekassa, aññena itarassā”ti-ādinā pubbe vuttanayena dvinnam dvīhi vā, tiṇṇam tīhi vā ācariyehi, ekakena vā ācariyena tayopi ekato anussāvane kātunti attho, tañca kho ekena upajjhāyena. “**Na tvevanānupajjhāyena**”ti idam ekena ācariyena dvīhi vā tīhi vā upajjhāyehi dve vā tayo vā upasampadāpekkhe ekakkhaṇe ekāya anussāvanāya ekānussāvane kātum na vaṭṭatīti paṭikkhepapadam. Na pana nānācariyehi nānupajjhāyehi tayo ekānussāvane kātum na vaṭṭatīti āha “**sace pana nānācariyā nānupajjhāyā -pa- vaṭṭatī**”ti.

Yañceththa “tissatthero sumanattherassa saddhivihārikaṃ, sumanatthero tissattherassa saddhivihārikan”ti evaṃ upajjhāyehi aññamaññaṃ saddhivihārikānaṃ anussāvanakaraṇaṃ vuttaṃ, taṃ upalakkhaṇamattaṃ. Tasmā sace tissatthero sumanattherassa saddhivihārikaṃ, sumanatthero nandattherassa saddhivihārikaṃ anussāveti, aññamaññaṃ gaṇapūrakā honti, vaṭṭati eva. Sace pana upajjhāyo sayameva attano saddhivihārikaṃ anussāvetīti ettha vattabbameva natthi, kammaṃ sukata meva hoti. Anupajjhāyakassapi yena kenaci anussāvite upasampadā hoti, kimaṅgaṃpana sa-upajjhāyakassa upajjhāyeneva anussāvaneti daṭṭhabbaṃ. Teneva navatṭanapakkaṃ dassetuṃ “**sace panā**”ti-ādimāha.

Dve upasampadāpekkhādivatthukathāvaṇṇanā niṭṭhitā.

### Upasampadāvidhikathāvaṇṇanā

126. **Upajjhāti** upajjhāya-saddasamānattho ākāranto upajjhā-saddoti dasseti. Upajjhāya-saddo eva vā upajjhā upayogapaccattavacanesu ya-kāralopaṃ katvā evaṃ vutto karaṇavacanādīsu upajjhāsaddassa payogābhāvāti daṭṭhabbaṃ. Pāliyaṃ **attanāva attānaṃ sammannitabbanti** attanāva kattubhūtena karaṇabhūtena attānameva kammabhūtaṃ pati sammananakiccaṃ kātabbaṃ. **Attānanti** vā paccatte upayogavacanaṃ, attanāva attā sammannitabboti attho. Na kevalaṃ ettheva, aññatrāpi terasasammuti-ādīsu imināva lakkhaṇena attanāva attā sammannitabbova. Apica sayāṃ kammārahattā attānaṃ muñcitvā catuvaggādiko gaṇo sabbattha icchitabbo.

**Saccakāloti** “nigūhissāmī”ti vañcanaṃ pahāya saccasseva te icchitabbakālo. **Bhūtakāloti** vañcanāya abhāvepi manussattādivatthuno bhūtatāya avassaṃ icchitabbakālo, itarathā kammakopādi-antarāyo hotīti adhippāyo. **Maṅkūti** adhomukho. **Uddharatūti** anupasampannabhāvato upasampattiyāṃ patiṭṭhapetūti attho.

Sabbakammavācāsu atthakosallatthaṃ panettha upasampadākammavācāya evamattho daṭṭhabbo—**suṇātūti** savanāṇattiyāṃ paṭhamapurisekavacanaṃ.

Tañca kiñcāpi yo saṅgho savanakiriyāya niyojīyati, tassa sammukhattā “suṇāhī”ti majjhimapurisekavacanena vattabbaṃ, tathāpi yasmā saṅgha-saddasannidhāne paṭhamapurisapayogova saddavidūhi samāciṅṇo bhagavanta-āyasmantādisaddasannidhānesu viya “adhivāsetu me bhavaṃ gotamo<sup>1</sup>. Etassa sugata kālo, yaṃ bhagavā sāvakānaṃ sikkhāpadaṃ paññapeyya<sup>2</sup>. Pakkamatāyasmā<sup>3</sup>. Suṇantu me āyasmanto”ti-ādīsu<sup>4</sup> viya. Tasmā idha paṭhamapurisapayogo kato. Atha vā gāravavasenevetāṃ vuttaṃ. Garuṭṭhānīyesu hi gāravavasena majjhimapurisapayoguppattiyampi paṭhamapurisapayogaṃ payujjanti “desetu sugato dhamman”ti-ādīsu<sup>5</sup> viyāti daṭṭhabbaṃ. Keci pana “bhante, āvusoti sadde apekkhitvā idha paṭhamapurisapayogo”ti vadanti, taṃ na yuttaṃ “ācariyo me bhante hohi<sup>6</sup>, iṅghāvuso upāli imaṃ pabbajitaṃ anuyuñjāhī”ti-ādīsu<sup>7</sup> tappayogepi majjhimapurisapayogasseva dassanato.

**Meti** yo sāveti, tassa attaniddese sāmivacanaṃ. **Bhanteti** ālapanatthe vuḍḍhesu sagāravavacanaṃ. “Āvuso”ti padaṃ pana navakesu. Tadubhayampi nipāto “tumhe bhante, tumhe āvuso”ti bahūsupi samānarūpattā. **Samṅhoti** avisesato catuvaggādike pakatattapuggalasaṃmūhe vattati. Idha pana paccantimesu janapadesu pañcavaggato paṭṭhāya, majjhimesu janapadesu dasavaggato paṭṭhāya saṅghoti gahetabbo. Tatrāyaṃ piṇḍattho—bhante saṅgho mama vacanaṃ suṇātūti. Idañca navakatarena vattabbavacanaṃ. Sace pana anussāvako sabbehi bhikkhūhi vuḍḍhataro hoti, “suṇātu me āvuso saṅgho”ti vattabbaṃ. Sopi ce “bhante”ti vadeyya, navakataro vā “āvuso”ti, kammakopo natthi. Keci pana “ekattha ‘āvuso’ti vatvā aññattha ‘bhante’ti vuttepi natthi doso ubhayenāpi ālapanassa sijjhanato”ti vadanti.

Idāni yamatthaṃ nāpetukāmo “suṇātū”ti saṅghaṃ savane niyojeti, taṃ nāpento “**ayaṃ itthannāmo**”ti-ādīmāha. Tattha

---

1. Vi 1. 12 piṭṭhe.    2. Vi 1. 10 piṭṭhe.    3. Vi 1. 280 piṭṭhe.    4. Vi 3. 167 piṭṭhe.  
 5. Dī 2. 32; Ma 2. 292; Saṃ 1. 139; Vi 3. 6, 7, 9 piṭṭhesu.  
 6. Vi 3. 76 piṭṭhe.    7. Vi 1. 313 piṭṭhe.

**ayan**ti upasampadāpekkhassa hatthapāse sannihitabhāvadassanaṃ. Tena ca hatthapāse ṭhitasseva upasampadā ruhatīti sijjhati hatthapāsato bahi ṭhitassa “ayan”ti na vattabbo. Teneva anusāsakasammutiyaṃ so hatthapāsato bahi ṭhitattā “ayan”ti na vutto. Tasmā upasampadāpekkho anupasampanno hatthapāse ṭhabetabbo. **Ayaṃ itthannāmoti ayaṃ**-saddo ca avassaṃ payujjitabbo. So ca imasmim paṭhamanāmapayoge evāti gahetabbaṃ. **“Itthannāmo”**ti idaṃ aniyamato tassa nāmadassanaṃ. Ubhayenapi ayaṃ buddharakkhitoti-ādināmaṃ dasseti. “Upasampadāpekkho”ti bhinnādhikaraṇavisaye bahubbhisamāso, upasampadaṃ me saṅgho apekkhamānoti attho. Tassa ca upajjhāyataṃ samaṅgibhāvena dassetuṃ “itthannamassa āyasmato”ti vuttaṃ. Etena “ayaṃ buddharakkhito āyasmato dhammarakkhitassa saddhivihārikabhūto upasampadāpekkho”ti evamādinā nayena nāmayojanāya saha attho dassitoti. Ettha ca “āyasmato”ti padaṃ avatvāpi “ayaṃ buddharakkhito dhammarakkhitassa upasampadāpekkho”ti vuttuṃ vaṭṭati. Teneva pāliyaṃ “itthannāmena upajjhāyena”ti ettha “āyasmato”ti padaṃ na vuttaṃ. Yañcetha vattabbaṃ, taṃ heṭṭhā vuttameva.

Nanu cetha upajjhāyopi upasampadāpekkho viya hatthapāse ṭhito eva icchitabbo, atha kasmā “ayaṃ itthannāmo imassa itthannāmassa upasampadāpekkho”ti evaṃ upajjhāyaparāmasanepi ima-saddassa payogo na katoti? Nāyaṃ virodho upajjhāyassa abhāvepi kammakopābhāvato. Kevalaṅhi kammanipphattiyā santapadavasena avijjamānassapi upajjhāyassa nāmakittanaṃ anupajjhāyassa upasampadādīsupi kariyati. Tasmā upajjhāyassa asannihitatāyapi tapparāmasanamatteneva kammasiddhito “imassā”ti niddisituṃ na vaṭṭati.

**Parisuddho antarāyikehi dhammehīti** abhabbatādikehi upasampadāya avatthukarehi ceva pañcābādhahatthacchinnādīhi ca āpattimattakarehi antarāyikehi sabhāvehi parimutto. **Evam** vutto eva ca āpattimattakarehi pañcābādhādīhi aparimuttassapi upasampadā ruhati, nāññāthā. **Paripuṇṇassa pattacīvaranti** paripuṇṇamassa upasampadāpekkhassa pattacīvaraṃ. Evam vutte eva apattacīvarassāpi upasampadā ruhati, nāññāthā. **Upasampadaṃ**



**yācatī**ti “saṅghaṃ bhante upasampadaṃ yācāmi”ti-ādinā<sup>1</sup> yācitabhāvaṃ sandhāya vuttaṃ. Evaṃ tena saṅghe ayācitepi “itthannāmo saṅghaṃ upasampadaṃ yācatī”ti vutte eva kammaṃ avipannaṃ hoti, nāññathā. **Upajjhāyenāti** upajjhāyena karaṇabhūtena itthānnāmaṃ upajjhāyaṃ katvā kammabhūtaṃ upasampadaṃ dātuṃ nipphādetuṃ kattubhūtaṃ saṅghaṃ yācatīti attho. Yāca-dhātuno pana dvikammakattā “saṅghaṃ, upasampadan”ti dve kammaṃpadāni vuttāni.

**Yadi saṅghassa pattakallanti** ettha patto kālo imassāti pattakālaṃ, apalokaṇādicatubbidhasaṅghakammaṃ, tadeva sakatthe ya-paccayena “pattakallan”ti vuccati. Idha pana ñatticatuttha-upasampadākammaṃ adhippetam, taṃ kātuṃ saṅghassa pattakallaṃ jātaṃ. **Yadīti** anumati-gaṇavasena kammaṃsa pattakallataṃ ñāpeti. Yo hi koci tattha apattakallataṃ maññissati, so vakkhati. Imameva hi atthaṃ sandhāya anussāvanāsu “yassāyasmato khamati -pa- so bhāseyyā”ti<sup>2</sup> vuttaṃ. Taṃ panetaṃ pattakallaṃ vatthusampadā, antarāyikehi dhammehi cassa parisuddhatā, sīmāsampadā, parisasampadā, pubbakiccaṇiṭṭhāpananti imehi pañcahi aṅgehi saṅghitaṃ.

Tattha **vatthusampadā** nāma yathāvuttehi ekādasahi abhabbapuggalehi ceva antimavatthu-ajjhāpannehi ca añño paripuṇṇavāsativasso anupasampannabhūto manussapuriso, etasmim̐ puggale sati eva idaṃ saṅghassa upasampadākammaṃ pattakallaṃ nāma hoti, nāsati. Katañca kuppameva hoti.

**Antarāyikehi dhammehi cassa parisuddhatā** nāma yathāvuttasseva upasampadāvathubhūtassa puggalassa ye ime bhagavatā paṭikkhittā pañcābādhaphuṭṭhatādayo mātāpitūhi ananuññātāpariyosānā ceva hatthacchinnatādayo ca dosadhammā kāraṇasaṅghassa āpattādi-antarāyahetutāya “antarāyikā”ti vuccanti tehi antarāyikehi dosadhammehi parimuttatā, imissā ca sati eva idaṃ kammaṃ pattakallaṃ nāma hoti, nāsati. Kataṃ pana kammaṃ sukatameva hoti ṭhapetvā ūnavāsativassapuggalaṃ.

1. Vi 3. 72, 131 piṭṭhe.

2. Vi 3. 132 piṭṭhe.

**Sīmāsampadā** pana uposathakkhandhake<sup>1</sup> vakkhamānanayena sabbadosavirahitāya baddhābaddhavasena duvidhāya sīmāya vaseneva veditabbā. Tādisāya hi sīmāya sati eva idaṃ kammaṃ pattakallaṃ nāma hoti, nāsati. Katañca kammaṃ vipajjati.

**Parisasampadā** pana ye ime upasampadākammaṃ sabbantimena paricchena kammappattā dasahi vā pañcahi vā anūnā pārājikaṃ anāpannā, anukkhittā ca samānasamvāsakā bhikkhū, tesam ekasīmāyaṃ hatthapāsāṃ avijahitvā ṭhānaṃ, chandārahānañca chandassa ānāyanaṃ, sammukhībhūtānañca appaṭikkosanaṃ, upasampadāpekkharahitānaṃ uposathakkhandhake paṭikkhittānaṃ gahaṭṭhādi-anupasampannānañceva pārājikukkhittakanānāsāṃvāsakabhikkhunīnañca vajjanīyapuggalānaṃ saṃghassa hatthapāse abhāvo cāti imehi catūhi aṅgehi saṅgahitā. Evarūpāya ca parisasampadāya sati eva idaṃ pattakallaṃ nāma hoti, nāsati. Tattha purimānaṃ tiṇṇaṃ aṅgānaṃ aññatarassapi abhāve kataṃ kammaṃ vipajjati, na pacchimassa.

**Pubbakiccaniṭṭhāpanaṃ** nāma yānimāni “paṭhamāṃ upajjham gāhāpetabbo”ti-ādinā pāḷiyaṃ vuttāni “upajjham gāhāpanaṃ, pattacīvarācikkhanaṃ, tato taṃ hatthapāsato bahi ṭhapetvā anusāsakasammutikammakaraṇaṃ, sammatena ca gantvā anusāsaṃ, tena ca paṭhamataraṃ āgantvā saṃghassa nāpetvā upasampadāpekkhaṃ ‘āgacchāhi’ti hatthapāse eva abbhānaṃ, tena ca bhikkhūnaṃ pāde vandāpetvā upasampadāyācāpanaṃ, tato antarāyikadhammapucchakasammutikaraṇaṃ, sammatena ca pucchanaṃ”ti imāni aṭṭha pubbakiccāni, tesam sabbesaṃ yāthāvato karaṇena niṭṭhāpanaṃ. Etasmiñca pubbakammaniṭṭhāpane sati eva idaṃ saṃghassa upasampadākammaṃ pattakallaṃ nāma hoti, nāsati. Etesu pana pubbakammesu akatesupi kataṃ kammaṃ yathāvuttavattusampatti-ādīsu vijjamānesu akuppameva hoti. Tadevamevha pattakallaṃ imehi pañcahi aṅgehi saṅgahitanti veditabbaṃ. Imināva nayena heṭṭhā vuttesu, vakkhamānesu ca sabbesu kammesu pattakallatā yathārahaṃ yojetvā nātabbā.

---

1. Vi 3. 150 piṭṭhādīsu.

**Itthannāmaṃ upasampādeyyāti** upasampadānipphādanena taṃsamaṅgiṃ kareyya karotūti patthanāyaṃ, vidhimhi vā idaṃ daṭṭhabbaṃ. Yathā hi “devadattaṃ sukhāpeyyā”ti vutte sukhamassa nipphādetvā taṃ sukhamaṅginaṃ kareyyāti attho hoti, evamidhāpi upasampadamassa nipphādetvā taṃ upasampadāsamaṅginaṃ kareyyāti attho. Payojakabyāpāre cetāṃ yathā sukhayantaṃ kañci suddhakattāraṃ koci hetukattā sukhahetunipphādanena sukhāpeyyāti vuccati, evamidhāpi upasampajjantaṃ suddhakattāraṃ puggalaṃ hetukattubhūto saṃgho upasampadāhetunipphādanena upasampādeyyāti vutto. Etena ca sukhaṃ viya sukhadāyakena saṃghena puggalassa diyyamānā tathāpavattaparamatthadhamme upādāya ariyajanapaññattā upasampadā nāma sammutisaccatā atthīti samatthitaṃ hoti. Ettha ca “itthannāmo saṃghaṃ upasampadaṃ yācatī”ti vuttattā parivāsādīsu viya yācanānuguṇaṃ “itthannāmassa upasampadaṃ dadeyyā”ti avatvā “itthannāmaṃ upasampādeyyā”ti vuttattā idaṃ upasampadākammaṃ dāne asaṅgahetvā kammalakkhaṇe eva saṅgahitanti daṭṭhabbaṃ. Iminā nayena “itthannāmaṃ upasampādeti, upasampanno saṃghena”ti etthāpi attho vedītabbo. Kevalaṅhi tattha vattamānakāla-atītakālavasena, idha pana anāmaṭṭhakālavasenāti ettakameva viśeso.

**Esā ñattīti** “saṃgho ñāpetabbo”ti vuttañāpanā esā. Idañca anussāvanānampi sabbhāvasūcanatthaṃ vuccati. Avassañcetaṃ vattabbameva, ñattikamme eva taṃ na vattabbaṃ. Tattha pana yya-kāre vuttamate eva ñattikammaṃ niṭṭhitaṃ hotīti daṭṭhabbaṃ. **Khamatīti** ruccati. **Upasampadāti** saṃghena diyyamānā nipphādiyamānā upasampadā yassa khamati, so tuṇhassāti yojanā. **Tuṇhīti** ca akathanatthe nipāto, akathanako assa bhavēyyāti attho. Khamati saṃghassa itthannāmassa upasampadāti pakatena sambandho. Tattha kāraṇamāha “**tasmā tuṇhī**”ti. Tattha “**āsī**”ti seso. Yasmā “yassa nakkhamati, so bhāseyyā”ti tikkhattuṃ vuccamānopi saṃgho tuṇhī niravo ahoṣi, tasmā khamati saṃghassāti attho. **Evanti** iminā pakārena. Tuṇhībhāvenevetaṃ saṃghassa rucanabhāvaṃ **dhārayāmi** bujjhāmi pajānāmīti attho. **Iti**-saddo parisamāpanatthe kato, so ca kammavācāya anaṅgaṃ. Tasmā anussāvakena “**dhārayāmi**”ti ettha

mi-kārapariyosānameva vatvā niṭṭhāpetabbaṃ, iti-saddo na payujjitabboti daṭṭhabbaṃ. Iminā nayena sabbattha kammavācānamattho vedītabbo.

Upasampadāvidhikathāvaṇṇanā niṭṭhitā.

### Cattāronissayādīkathāvaṇṇanā

128. **Ekaporisā** vāti-ādi sattānaṃ sarīracchāyaṃ pādehi minivā jānanappakāradassanaṃ. Chasattapadaparamatā hi chāyā “porisā”ti vuccati. Idañca utuppanāñācikkhanādi ca āgantukehi saddhim vīmaṃsitvā vuḍḍhanavabhāvaṃ nātva vandanavandāpanādīkaraṇattham vuttaṃ. Eti āgacchati, gacchati cāti utu, sova pamiyate anena saṃvaccharanti pamāṇanti āha “**utuyeva utuppanāṇan**”ti. **Aparipuṇṇā**ti upasampadādivasena aparipuṇṇā. Yadi utuvemajjhe upasampādito, tadātasmiṃ utumhi avasiṭṭhadivasācikkhanaṃ “divasabhāgācikkhanan”ti dasseti. Tenāha “**yattakehi divasehi yassa yo utu aparipuṇṇo, te divase**”ti. Tattha yassa taṃ khaṇaṃ laddhūpasampadassa puggalassa sambandhī yo utu yattakehi divasehi aparipuṇṇo, te divaseti yojanā.

Chāyādīkameva sabbam saṅgahetvā gāyitabbato kathetabbato saṅgītīti āha “**idamevā**”ti-ādi. Tattha ekato katvā ācikkhitabbaṃ. **Tvaṃ kiṃ labhasī**ti tvaṃ upasampādanakāle kataravassam, katara-utuñca labhasi, katarasmim te upasampadā laddhāti attho. **Vassanti** vassāna-utu. Idañca saṃvaccharācikkhanaṃ vinā vuttampi na nāyatīti iminā utu-ācikkhaneneva sāsana-vassesu vā kaliyugavassādīsu vā sahasime vā satime vā asukaṃ utum labhāmīti dassitanti daṭṭhabbaṃ. “**Chāyā**”ti idaṃ pāliyaṃ āgatapaṭipāṭim sandhāya vuttaṃ. Vattabbakamato pana kaliyugavassādīsu sabbadesapasiddhesu asukavasse asuka-utumhi asukamāse asuke kaṇhe vā sukke vā pakkhe asukatithivāravisesayutte nakkhatte pubbaṇhādīdivasabhāge ettake chāyāpamāṇe, nāḍikāpamāṇe<sup>1</sup>vā mayā upasampadā laddhāti vadeyyāsīti evaṃ ācikkhitabbaṃ. “Idaṃ suṭṭhu uggahetvā

1. Kālappamāṇe (Sī)

āgantukehi vuḍḍhapaṭipāṭim̄ ñatvā paṭipajjāhī”ti vattabbaṃ. Pāliyaṃ **kissa tvanti** kiṃ tvaṃ ettakaṃ kālaṃ akāsīti attho.

130. **Upasampadaṃ yācīti** pabbajjañca upasampadañca yācīti attho. **Passissāmīti** ettha vadatīti seso, evaṃ uparipi. “**Osāretabbo**”ti iminā purimo ukkhittabhāvo vibbhamitvā puna laddhūpasampadampi na muñcati. Tena ca sambhuñjanādīsupi bhikkhūnaṃ pācittiyamevāti dasseti. **Anāpatti sambhoge samvāseti** ettha sahaseyyāpi saṅgahitāti daṭṭhabbaṃ. Ettha cāyamadhippāyo—yasmā ayaṃ osāritattā pakatatto, tasmā ukkhittasambhogādīpaccayena pācittiyenettha anāpattīti. Yo pana āpattiṭṭhāne anāpattidīṭṭhitāya āpattim̄ na passati, teneva paṭikammampi na karoti, so yasmā ettāvataṃ alajjī nāma na hoti. Paṇṇattim̄ ñatvā vītikkaṃaṃ karonto eva hi alajjī nāma hoti. “Sañcicca āpattim̄ āpajjati”ti-ādi<sup>1</sup> hi vuttaṃ. Tasmā ettha alajjisambhogādīpaccayā dukkaṭāpattiniyamo natthi. Tena sāpettha āpatti na vuttāti daṭṭhabbaṃ. Yo panettha imaṃ adhippāyaṃ asallakkhenta kenaci “anāpatti sambhoge samvāse”ti iminā pācittiyena anāpatti vuttā, alajjisambhogapaccayā dukkaṭaṃ pana āpajjati evāti āpattiniyamo vutto, so alajjitte sati eva vutto, nāsatīti daṭṭhabbaṃ.

131. **Vinayamhīti-ādigāthāsu niggahānanti** niggahakaraṇesu. **Pāpiccheti** pāpapuggalānaṃ niggahakaraṇesu, lajjīnaṃ paggahesu ca pesalānaṃ sukhāvahe mahante vinayamhi yathā atthakārī atthānuguṇaṃ karontova yasmā yoniso paṭipajjati nāma hoti, tasmā uddānaṃ pavakkhāmīti sambandhayanā daṭṭhabbā. Sesāṃ sabbattha suviññeyameva.

Cattāronissayādīkathāvaṇṇanā niṭṭhitā.

Iti samantapāsādīkāya vinayaṭṭhakathāya vimativinodaniyaṃ

Mahākhandhakavaṇṇanāyā niṭṭhito.

## 2. Uposathakkhandhaka

### Sannipātānujānanādikathāvaṇṇanā

132. Uposathakkhandhake taranti otaranti etthāti **tittham**, laddhi. **Itoti** sāsana-laddhito.

135. **Āpajjitvā vā vuṭṭhitoti** ettha desanārocanānampi saṅgaho. Teneva **mātikāṭṭhakathāyam** “vuṭṭhitā vā desitā vā ārocitā vā āpatti -pa- asantī nāma hotī”<sup>1</sup>ti<sup>1</sup> vuttam.

**Manujenāti** āsannena saha. **Pareti** dūraṭṭhepi parapuggale sandhāya giram no ca bhaṇeyyāti yojanā.

“Āvikatā hissa phāsu hotī”<sup>2</sup>ti<sup>2</sup> vuttattā garukāpattipi āvikaraṇamattena vuṭṭhātīti keci vadanti, tam tesam matimattam parivāsādividhānasuttehi virujjanato. Ayaṃ panettha adhippāyo—yathābhūtañhi attānamāvikarontam pesalā bhikkhū “akāmā parivatthabban”<sup>3</sup>ti-ādivacanam nissāya anicchamānampi nam upāyena parivāsādīni datvā<sup>3</sup> avassam suddhante patiṭṭhāpessanti, tato tassa avipparisārādīnam vasena phāsu hoti. **Paṭhamam pātimokkhuddesanti** nidānuddesam dasseti, pubbe avijjamānam paññāpesīti. Na kevalaṅca etaṃ, pubbe paññāttampi pana pārājikādisikkhāpadaṃ sabbam bhagavā “tatrime cattāro pārājikā dhammā uddesam āgacchantī”<sup>4</sup>ti-ādinā<sup>4</sup> pārājikuddesādivasena vinayamātikam katvā nidānuddesena saha sayameva, saṅgahetvā “pātimokkhan”<sup>5</sup>ti paññāpesīti daṭṭhabbam. Tadevaṃ sabbampi sandhāya “anujānāmi bhikkhave pātimokkham uddisitun”<sup>5</sup>ti<sup>5</sup> vuttam.

136. **Etam veditabbanti** yasmim tasmim cātuddase vā pannarase vāti evam atthajātam.

Sannipātānujānanādikathāvaṇṇanā niṭṭhitā.

---

1. Kaṅkhā-Ṭṭha 101 piṭṭhe.

2. Vi 3. 141 piṭṭhe.

3. Parivāsādi dāpetvā (Sī, Ka)

4. Pātimokkha 2 piṭṭhe.

5. Vi 3. 140 piṭṭhe.

### Sīmānujānanakathāvaṇṇanā

138. “**Puratthimāyadisāyā**”ti idaṃnidassanamattam. Tassaṃ pana disāyaṃ nimitte asati yattha atthi, tato paṭṭhāya paṭṭhamam “puratthimāya anudisāya, dakkhiṇāya disāyā”ti-ādinā samantā vijjamānaṭṭhānesu nimittāni kittetvā puna “puratthimāya anudisāyā”ti paṭṭhamakittitam kittetum vaṭṭati, tīhi nimittehi siṅghātakasaṅghānāyapi sīmāya sammannitabbato. **Tikkhattum sīmāmaṇḍalam sambandhantenāti** vinayadharena sayam ekasmiṃ yeva ṭhāne ṭhatvā kevalam nimittakittanavacaneneva sīmāmaṇḍalam samantā nimittena nimittam bandhantenāti attho. Tam tam nimittaṭṭhānam agantvāpi hi kittetum vaṭṭati. Tiyojanaparamāya sīmāya samantato tikkhattum anuparigamanassa ekadivasena dukkarattā vinayadharena sayam adiṭṭhampi pubbe bhikkhūhi yathāvavattthitam nimittam “pāsāṇo bhante”ti-ādinā kenaci vuttānusārena sallakkhetvā “eso pāsāṇo nimittan”ti-ādinā kittetumpi vaṭṭati eva.

**Suddhapamsupabbatotī** na kenaci kato sayamjātova vutto. Tathā sesāpi. **Itaropī**ti suddhapamsupabbatādīkopi pabbato. **Hatthippamānatotī** ettha bhūmito uggatappadesena hatthippamānam gahetabbam. **Catūhi vā tīhi vāti** sīmābhūmiyam catūsu, tīsu vā disāsu ṭhitehi. Ekissā eva pana disāya ṭhitehi tato bahūhipi sammannitum na vaṭṭati. Dvīhi pana dvīsu disāsu ṭhitehipi na vaṭṭati. **Tasmāti** yasmā ekena na vaṭṭati, tasmā. **Tam bahiddhā katvāti** kittitanimittassa asīmatā antosīmāya karaṇam ayuttanti vuttam. Tenāha “**sace**”ti-ādi. (1)

Dvattim sapalagulaṇḍappamānatā saṅghānato gahetabbā, na tulagaṇanāvasena, bhārato palaparimāṇaṇca magadhatulāya gahetabbam. Sā ca lokiyatulāya dviguṇāti vadanti. **Atimahantopī**ti bhūmito hatthippamānam anuggantvā heṭṭhābhūmiyam otiṇṇaghanato anekayojanappamāṇopi. Sace hi tato hatthippamānam kūṭam uggacchati, pabbatasaṅkhyameva gacchati. (2)

**Antosārānanti** tasmim khaṇe taruṇatāya sāre avijjamānepi pariṇāmena bhavissamānasārepi sandhāya vuttam. Tādisānāhi sūcidaṇḍakappamāṇapariṇāhānam catupañcamattampi vanam vaṭṭati. **Antosāramissakānanti**

antosārehi rukkhehi sammissānaṃ. Etena ca sāraruḅkhamissampi vanam vaṭṭatīti dasseti. **Catupañcaruḅkhamattampī**ti sāraruḅkhe sandhāya vuttam. **Vanamajjhe vihāram karontī**ti rukkhaḅhaṭāya antare rukkhe acchindivā vati-ādīhi vihāraparicchedam katvāva antoruḅkhantaresu eva pariveṇapaṇṇasālādīnam karaṇavasena yathā antovihārampi vanameva hoti, evam vihāram karontīti attho. Yadi hi sabbam rukkham chindivā vihāram kareyyum, vihārassa avanattā tam parikkhipivā ṭhitam vanam ekattha kittetabbam siyā. Idha pana antopi vanattā “vanam na kittetabban”ti vuttam. Sace hi tam kittenti, “nimittassa upari vihāro hoti”ti-ādīnā anantare vutta dosam āpajjati. **Ekadesanti** vanekadesam, rukkhavirahitaṭṭhāne katavihārassa ekapasse ṭhitavanassa ekadesanti attho. (3)

**Sūcidaṇḍakappamāṇoti** vamsadaṇḍappamāṇo. Lekhanidaṇḍappamāṇoti keci. **Mātikāṭṭhakathāyam** pana avebhaṅgiyavinicchaye “yo koci aṭṭhaṅgulasūcidaṇḍakamattopi veḷu -pa- garubhaṇḍan”ti<sup>1</sup> vuttattā tanutaro veḷudaṇḍoti ca sūcidaṇḍoti ca sūcidaṇḍoti ca gahetabbam. **Vamsanaḷakasarāvādīsūti** veḷupabbe vā naḷapabbe vā kapallakādimmattikabhājanesu vāti attho. **Taṅkhaṇampī**ti taruṇapotake amilāyivā viruhanajātike sandhāya vuttam. Ye pana pariṇatā samūlam uddharivā ropitāpi chinnaśākhā viya milāyivā cirena navamūlanuruppattiyā jīvanti, mīyantiyeva vā, tādise kittetum na vaṭṭati. **Etanti** navamūlasākhāniggamanam. (4)

**Majjheti** sīmāya mahādisānam<sup>2</sup> anto. **koṇanti** sīmāya catūsu koṇesu dvinnam dvinnam maggānam sambandhaṭṭhānam. **Parabhāge kittetum vaṭṭatī**ti tesam catunnam koṇānam bahi nikkhamivā ṭhitesu maggesu ekissā disāya ekam, aññissā disāya cāparanti evam cattāropi maggā catūsu disāsu kittetum vaṭṭatīti adhippāyo. Evam pana kittitamattena katham ekābaddhatā vigacchatīti viññāyatīti. Parato gataṭṭhānēpi ete eva te cattāro maggā. “Catūsu disāsu gacchantī”ti hi vuttam. Tasmā ettha kāraṇam vicinitabbam. (5)

“**Uttarantiyā bhikkhuniyā**”ti idaṅca **pāḷiyam**<sup>3</sup> bhikkhunīnam nadīpāragamane nadilakkhaṇassa āgatattā vuttam. Bhikkhūnam antaravāsakatemanamattampi vaṭṭati

1. Kaṅkhā-Ṭṭha 263 piṭṭhe.

2. Bahidīsānam (St)

3. Vi 2. 296 piṭṭhe.



eva. “**Nadicatukkepi eseva nayo**”ti iminā ekattha kittetvā aññāttha parato gataṭṭhānepi kittetum na vaṭṭatīti dasseti. Teneva ca “assammissanadiyo catassopi kittetum vaṭṭatī”ti asammissa-ggahaṇam katam. **Mūleti** ādikāle. **Nadim bhinditvā**ti yathā udakam anicchantehi kassakehi mahoghe nivattetum na sakkā, evam nadikulam bhinditvā. (7)

**Ukkhepimanti** dīgharajjunā kuṭena ussiñcanīyam. (8)

**Asammissehī**ti sabbadisāsu ṭhitapabbatehi eva, pāsāṇādīsu aññatarehi vā nimittantarābyavahitehi. **Sammissehī**ti ekattha pabbato, aññāttha pāsāṇoti evam ṭhitehi aṭṭhahipi. “**Nimittānam satenāpī**”ti iminā ekissāya eva disāya bahunimittāni “puratthimāya disāya kim nimittam? Pabbato bhante. Puna puratthimāya disāya kim nimittam? Pāsāṇo bhante”ti-ādinā kittetum vaṭṭatīti dasseti. **Siṅghātakasaṅghānā**ti tikoṇā. **Caturassā**ti samacaturassā. Mudiṅgasaṅghānā pana āyatacaturassā, ekakoṭiyam saṅkocitā, tadaññāya vitthiṅṇā vā hotīti. **Sīmāya upacāram ṭhapetvā**ti āyatim bandhitabbāya sīmāya nesam vihārānam paricchedato bahi sīmantarikappahonakam upacāram ṭhapetvā. Baddhā sīmā yesu vihāresu, te **baddhasīmā. Pāṭekkanti** paccekam. **Baddhasīmāsadisānī**ti yathā baddhasīmāsu ṭhitā aññamaññam chandādim anapekkhitvā paccekam kammam kātuṃ labhanti, evam gāmasīmāsu ṭhitāpīti dasseti. **Āgantabbanti** sāmīcimattavasena vuttam. Tenāha “**āgamanampī**”ti-ādi.

**Pabbajjūpasampadādinanti** ettha bhaṅḍukammāpucchanam sandhāya pabbajjāgahaṇam. **Ekavīsati bhikkhū**ti nisinne sandhāya vuttam. Idañca kammārahena saha abbhānakārakānampi pahonakattham vuttam. “**Nimittupagā pāsāṇā ṭhapetabbā**”ti idam yathārucitaṭṭhāne rukkhanimittādīnam dullabhatāya vaḍḍhitvā ubhinnaṃ baddhasīmānam saṅkarakaraṇato ca pāsāṇanimittassa ca tadabhāvato yattha katthaci ānetvā ṭhapetum sukaratāya ca vuttam. Tathā **sīmantarikapāsāṇā ṭhapetabbā**ti etthāpi. **Caturaṅgulappamañāpī**ti yathā khandhasīmāparicchedato bahi nimittapāsāṇānam caturaṅgulamattaṭṭhānam samantā nigacchati, avasesam ṭhānam antokhandhasīmāya hotiyeva, evam tesupi ṭhapitesu caturaṅgulamattā sīmantarikā hotīti daṭṭhabbam.

**Sīmantarikapāsāṇā**ti sīmantarikāya ṭhapitanimittapāsāṇā. Te pana kittentena padakkhiṇato anupariyāyanteneva kittetabbā. Kathaṃ? Khaṇḍasīmato hi pacchimāya disāya puratthābhimukhena ṭhatvā “puratthimāya disāya kiṃnimittan”ti tattha sabbāni nimittāni anukkamena kittetvā tathā uttarāya disāya dakkhiṇābhimukhena ṭhatvā “dakkhiṇāya disāya kiṃ nimittan”ti anukkamena kittetvā tathā puratthimāya disāya pacchimābhimukhena ṭhatvā “pacchimāya disāya kiṃ nimittan”ti anukkamena kittetvā tathā dakkhiṇāya disāya uttarabhimukhena ṭhatvā “uttarāya disāya kiṃ nimittan”ti tattha sabbāni nimittāni anukkamena kittetvā puna pacchimāya disāya puratthābhimukhena ṭhatvā purimakittitaṃ vuttanayena puna kittetabbāṃ. Evaṃ bahūnampi khaṇḍasīmānaṃ sīmantarikapāsāṇā paccekaṃ kittetabbā. **Tatoti** pacchā. **Avasesanimittānī**ti mahāsīmāya bāhiraṇṭhesu avasesanimittāni. **Ubhinnaṃpi na kopentī**ti ubhinnaṃpi kammaṃ na kopenti.

**Kuṭigeheti** bhūmiyaṃ katatiṇakuṭiyaṃ. **Udukkhalanti** udukkhalāvāṭa sadisakhuddakāvāṭaṃ. **Nimittāṃ na kātabbanti** taṃ rājiṃ vā udukkhalaṃ vā nimittāṃ na kātabbāṃ. Idañca yathāvuttessu nimittesu anāgatattena na vaṭṭatīti siddhampi avinassakasaññāya koci mohena nimittāṃ kareyyāti dūratopi vipattiparihāratthaṃ vuttaṃ. Evaṃ upari “bhittim akittetvā”ti-ādīsupi siddhamevatthaṃ punappunaṃ kathane kāraṇaṃ veditabbāṃ. Sīmāvipatti hi upasampadādisabbakammavipattimūlanti tassā sabbaṃ dvāraṃ sabbathā pidahanavasena vattabbāṃ. Sabbaṃ vatvāva idha ācariyā vinicchayaṃ ṭhapesunti daṭṭhabbāṃ.

**Bhittinti** iṭṭhakadārumattikāmayāṃ. Silāmayāya pana bhittiyā nimittupagaṃ ekaṃ pāsāṇaṃ taṃtaṃdisāya kittetuṃ vaṭṭati. Anekaśilāhi cinitaṃ sakalabhittim kittetuṃ na vaṭṭati “eso pāsāṇo nimittan”ti ekavacanena vattabbato. **Antokuṭṭamevā**ti ettha antokuṭṭepi nimittānaṃ ṭhitokāsato anto eva sīmāti gahetabbāṃ. **Pamukhe nimittapāsāṇe ṭhapetvā**ti gabbhābhimukhepi bahipamukhe gabbhavitthārappamāṇe ṭhāne pāsāṇe ṭhapetvā sammannitabbā. Evañhi gabbhapamukhānaṃ antare ṭhitakuṭṭampi upādāya anto ca bahi ca caturassasaṅṭhānāva sīmā hoti. **Bahī**ti sakalassa kuṭigehassa samantato bahi.

**Anto ca bahi ca sīmā hotī**ti majjhe ṭhitabhittiyā saha caturassasīmā hoti.

“**Uparipāsādeyeva hotī**”ti iminā gabbhassa ca pamukhassa ca antarā ṭhitabhittiyā ekattā tattha ca ekavīsatiyā bhikkhūnaṃ okāsābhāvena heṭṭhā na otarati, uparibhitti pana sīmaṭṭhāva hotīti dasseti. **Heṭṭhimatale kuṭṭoti** heṭṭhimatale catūsu disāsu ṭhitakuṭṭo. Sace hi dvīsu, tīsu vā disāsu eva kuṭṭo tiṭṭheyya, heṭṭhā na otarati. **Heṭṭhāpi otaratī**ti catunnampi bhittīnaṃ anto bhittīhi saha ekavīsatiyā bhikkhūnaṃ pahonakattā vuttaṃ. Otaramānā ca uparisīmappamāṇena otarati. Catunnaṃ pana bhittīnaṃ bāhirantara-paricchede heṭṭhābhūmibhāge udakapariyantaṃ katvā otarati, na pana bhittīnaṃ bahi kesaggamattampi ṭhānaṃ. **Pāsādabhittitoti** uparitale bhittito. **Otaraṇānotaraṇaṃ vuttanayeneva veditabbanti** uparisīmappamāṇassa antogadhānaṃ heṭṭhimatale catūsu disāsu kuṭṭānaṃ tulārukkhehi ekasambandhataṃ tadanto pacchimasīmappamāṇatādiṅca sandhāya vuttaṃ. Kiñcāpettha niyyūhakādayo nimittānaṃ ṭhitokāsātāya bajjhamānakkhaṇe sīmā na honti, baddhāya pana sīmāya sīmaṭṭhāva hontīti daṭṭhabbā. **Pariyantasambhānanti** nimittagatapāsāṇatthambhe sandhāya vuttaṃ. “**Uparimatalena sambaddho hotī**”ti idaṃ kuṭṭānaṃ antarā sīmaṭṭhānaṃ thambhānaṃ abhāvato vuttaṃ. Yadi hi bhaveyyuṃ, kuṭṭe uparimatalena asambandhepi sīmaṭṭhatthambhānaṃ upari ṭhito pāsādo sīmaṭṭhova hoti.

Sace pana bahūnaṃ thambhapantīnaṃ upari katapāsādassa heṭṭhā pathaviyaṃ sabbabāhirāya thambhapantiyā anto nimittapāsāṇe ṭhapetvā sīmā baddhā hoti, ettha kathanti? Etthāpi yaṃ tāva sīmaṭṭhatthambheheva dhāriyamānānaṃ tulānaṃ uparimatalaṃ, sabbaṃ taṃ sīmaṭṭhameva, ettha vivādo natthi. Yaṃ pana sīmaṭṭhatthambhapantiyā, asīmaṭṭhāya bāhiratthambhapantiyā ca samadhuraṃ dhāriyamānānaṃ tulānaṃ uparimatalaṃ, tattha upaḍḍhaṃ sīmāti keci vadanti. Sakalampi gāmasīmāti apare. Baddhasīmā evāti aññe. Tasmā kammaṃ karontehe garuke nirāsaṅkaṭṭhāne ṭhatvā sabbaṃ taṃ āsaṅkaṭṭhānaṃ sodhetvāva kammaṃ kātabbaṃ, sannitṭhānakāraṇaṃ vā gavesitvā tadanuḡaṇaṃ kātabbaṃ.

**Tālamūlakapabbateti** tālakkhandhamūlasadise heṭṭhā thūlo hutvā kamena kiso hutvā uggato hi tālasadiso nāma hoti. **Vitānasañṭhānoti** ahicchattakasañṭhāno. **Paṇavasañṭhānoti** majjhe tanuko heṭṭhā ca upari ca vitthiṇṇo. **Heṭṭhā vā majjhe vāti** mudiṅgasañṭhānassa heṭṭhā, paṇavasañṭhānassa majjhe.

**Sappaphaṇasadiso pabbatoti** sappaphaṇo viya khujjo, mūlaṭṭhānato aññattha avanatasīsoti attho. **Ākāsapabbhāranti** bhittiyā aparikkhittapabbhāram. **Sīmappamānoti** anto-ākāsena saddhim pacchimasīmappamāno. “**So ca pāsāṇo sīmaṭṭho**”ti iminā idisehi susirapāsāṇalenakuṭṭādīhi paricchinne bhūmibhāge eva sīmā patiṭṭhāti, na aparicchinne. Te pana sīmaṭṭhattā sīmā honti, na sarūpena sīmaṭṭhamañcādi viyāti dasseti. Sace pana so susirapāsāṇo bhūmim anāhacca ākāsatova olambati, sīmā na otarati. Susirapāsāṇā pana sayam sīmāpaṭibaddhattā sīmā honti. Katham pana pacchimappamāṇarahitehi etehi susirapāsāṇādīhi sīmā na otaratīti idam saddhātabbanti? Aṭṭhakathāpamāṇato.

Apicettha susirapāsāṇabhitti-anusārena mūsikādīnam viya sīmāya heṭṭhimatale otaraṇakiccaṃ natthi. Heṭṭhā pana pacchimasīmappamāṇe ākāse dvaṅgulamattabahalehi pāsāṇabhitti-ādīhipi uparimatalaṃ āhacca ṭhitehi sabbaso, yebhuyyena vā paricchinne sati upari bajjhamānā sīmā tehi pāsāṇādīhi antaritāya tapparicchinnāya heṭṭhābhūmiyāpi uparimatalena saddhim ekakkhaṇe patiṭṭhāti nadipārasīmā viya nadi-antaritesu ubhosu tīresu, leṇādīsu apanītesupi heṭṭhā otiṇṇā sīmā yāvasāsanantaradhānā navigacchati. Paṭhamam pana upari sīmāya baddhāya pacchā leṇādīsu katesupi heṭṭhābhūmiyam sīmā otarati eva. Keci tam na icchanti. Evam ubhayattha patiṭṭhitā ca sā sīmā ekāva hoti gottādi jāti viya byattibhede sūti gahetabbaṃ. Sabbā eva hi baddhasīmā, abaddhasīmā ca attano attano pakatinissayabhūte gāmāraññanadi-ādike khette yathāparicchedam sabbattha sākalyena ekasmiṃ khaṇe byāpinī paramatthato avijjamānāpi te te nissayabhūte paramatthadhamme, tam tam kiriyāvisesampi vā upādāya lokiyehi,

sāsanikehi ca yathārahaṃ ekattena paññattatāya nissayekarūpā eva. Tathā hi eko gāmo araññaṃ nadī jātassaro samuddoti evaṃ loke,

“Sammatā sā sīmā saṃghena<sup>1</sup>. Agāmake ce bhikkhave araññe samantā sattabbhantarā, ayaṃ tattha samānasamvāsā ekūposathā.

Samantā udakukkhepā, ayaṃ tattha samānasamvāsā ekūposathā”ti<sup>2</sup>—

ādinā sāsane ca ekavohāro dissati. Na hi paramatthato ekassa anekadhammesu byāpanamatthi. kasiṇekadesādivikappāsamanātāya ekattahānitoti ayaṃ no mati.

Assa **heṭṭhā**ti sappaphaṇapabbatassa heṭṭhā ākāsapabbhāre. **Leṇassā**ti leṇaṅce kataṃ, tassa leṇassāti attho. Tameva puna leṇaṃ pañcahi pakārehi vikappetvā otaraṇānotaraṇavinicchayaṃ dassetuṃ āha “**sace pana heṭṭhā**”ti-ādi. Tattha “heṭṭhā”ti imassa “leṇaṃ hotī”ti iminā sambandho. Heṭṭhā leṇaṅca ekasmiṃ padeseti āha “**anto**”ti, pabbatassa anto, pabbatamūleti attho. Tameva antosaddaṃ sīmāparicchedena visesetuṃ “**uparimassa sīmāparicchedassa pārato**”ti vuttaṃ. Pabbatapādaṃ pana apekkhitvā “orato”ti vattabbepi sīmānissayaṃ pabbataggaṃ sandhāya “pārato”ti vuttanti daṭṭhabbaṃ. Teneva “bahileṇaṃ”ti ettha bahi-saddaṃ visesento “**uparimassa sīmāparicchedassa orato**”ti āha. **Bahi sīmā na otaratī**ti ettha **bahī**ti pabbatapāde leṇaṃ sandhāya vuttaṃ, leṇassa bahibhūte uparisīmāparicchedassa heṭṭhābhāge sīmā na otaratīti attho. **Anto sīmā**ti leṇassa ca pabbatapādassa ca anto attano otaraṇārahaṭṭhāne na otaratīti attho. “Bahi sīmā na otarati, anto sīmā na otaratī”ti cettha attano otaraṇārahaṭṭhāne leṇābhāvena sīmāya sabbathā anotaraṇameva dassitanti gahetabbaṃ. Tatthāpi anotarantī upari eva hotīti. “**Bahi patitaṃ asīmā**”ti-ādinā uparipāsādādāsu athiranissayesu ṭhitā sīmāpi tesam vināsena vinassatīti dassitanti daṭṭhabbaṃ.

1. Vi 3. 148 piṭṭhe.

2. Vi 3. 150 piṭṭhe.

**Pokkharāṇim khaṇanti, sīmāyevā**ti ettha sace heṭṭhā umaṅganadisīmappamāṇato anūnā paṭhamameva ca pavattā hoti. Sīmā ca pacchā baddhā nadito upari eva hoti, nadim āhacca pokkharāṇiyā ca khatāya sīmā vinassatīti daṭṭhabbam. **Heṭṭhāpathavitaleti** antarā bhūmivivare.

**Sīmāmālaketi** khaṇḍasīmaṅgaṇe. “**Vaṭarukkho**”ti idaṃ pārohopatthambhena atidūrampi gantum samatthasākhāsamaṅgitāya vuttam. Sabbarukkhalatādīnampi sambandho na vaṭṭati eva. Teneva nāvārajjusetusambandhopi paṭikkhitto. **Tatoti** sākhato. **Mahāsīmāya pathavitalanti** ettha āsannatarampi gāmasīmaṃ aggahetvā baddhasīmāya eva gahitattā gāmasīmābaddhasīmānaṃ aññamaññaṃ rukkhādisambandhepi sambhedadoso natthi aññamaññaṃ nissayanissitabhāvena pavattitoti gahetabbam. Yadi hi tāsampi sambandhadoso bhaveyya, katham gāmasīmāya baddhasīmā sammannitabbā siyā? Yassā hi sīmāya saddhim sambandhe doso bhaveyya, sā tatha bandhitumeva na vaṭṭati, baddhasīmā-udakukkhepasīmāsu baddhasīmā viya, attano nissayabhūtagāmasīmādīsu udakukkhepasīmā viya ca. Teneva “sace pana rukkhasa sākāhā vā tato nikkhantapāroho vā bahinaditīre vihārasīmāya vā gāmasīmāya vā patiṭṭhito”ti-ādinā<sup>1</sup> udakukkhepasīmāya attano anissayabhūtagāmasīmādīhi eva sambandhadoso dassito, na nadisīmāyaṃ. Evamidhāpīti daṭṭhabbam. Ayañcattho upari pākaṭo bhavissati. **Āhaccāti** phusitvā.

**Mahāsīmaṃ vā sodhetvāti** mahāsīmāgatānaṃ sabbesaṃ bhikkhūnaṃ hatthapāsānayanabahikaraṇādivasena<sup>2</sup> sakalaṃ mahāsīmaṃ sodhetvā. Etena sabbavipattiyo mocetvā pubbe suḷu baddhānampi dvinnaṃ baddhasīmānaṃ pacchā rukkhādisambandhena uppajjanako īdiso pāḷimuttako sambhedadoso atthīti dasseti. So ca “na bhikkhave sīmāya sīmā sambhinditabbā”ti-ādinā<sup>3</sup> baddhasīmānaṃ aññamaññaṃ sambhedajjhottharaṇaṃ paṭikkhipitvā “anujānāmi bhikkhave sīmaṃ sammannantena sīmantarikaṃ ṭhapetvā sīmaṃ sammannitun”ti<sup>3</sup> ubhinnaṃ baddhasīmānamantarā sīmantarikaṃ ṭhapetvāva bandhitum anujānantena sambhedajjhottharaṇaṃ viya tāsāṃ aññamaññaṃ phusitvā tiṭṭhanavasena bandhanampi na vaṭṭatīti siddhattā baddhānampi tāsāṃ pacchā aññamaññaṃ

1. Vi-Ṭṭha 3. 335 piṭṭhe.    2. Chandāharaṇādivasena (Sī, Ka)    3. Vi 3. 150 piṭṭhe.

Ekarukkhādīhi phusitvā ṭhānampi na vaṭṭatīti bhagavato adhippāyaññūhi saṅgītikārakehi niddhārito. Bandhanakāle paṭikkhittassa sambandhadossassa anulomena akappiyānulomattā.

Ayaṃ pana sambandhadoso—pubbe suḷu baddhānaṃ pacchā sañjātattā bajjhamānakkhaṇe viya asīmattaṃ kātuṃ na sakkoti. Tasmā rukkhādisambandhe apanītamatte tā sīmā pākatikā honti. Yathā cāyaṃ pacchā na vaṭṭati, evaṃ bajjhamānakkhaṇepi tāsāṃ rukkhādisambandhe sati tā bandhituṃ na vaṭṭatīti daṭṭhabbaṃ.

Keci pana “mahāsīmaṃ vā sodhetvāti ettha mahāsīmāgatā bhikkhū yathā taṃ sākhaṃ vā pārohaṃ vā kāyapaṭibaddhehi na phusanti, evaṃ sodhanaṃveva idhādhippetāṃ, na sakalasīmāsodhanaṃ”ti vadanti, taṃ na yuttaṃ aṭṭhakathāya vurujjhanato. Tathā hi “mahāsīmāya pathavitalaṃ vā tatthajātarukkhādīni vā āhacca tiṭṭhatī”ti evaṃ sākḥāpārohaṇaṃ mahāsīmaṃ phusitvā ṭhānameva sambandhadose kāraṇattena<sup>1</sup> vuttaṃ, na pana tattha ṭhitabhikkhūhi sākḥādīnaṃ phusaṇaṃ. Yadi hi bhikkhūnaṃ sākḥādi phusitvā ṭhānameva kāraṇaṃ siyā. Tassa sākhaṃ vā tato niggatapārohaṃ vā mahāsīmāya pavīṭṭhaṃ tatratṭho koci bhikkhu phusitvā tiṭṭhatīti bhikkhuphusanaṃveva vattabbaṃ siyā. Yañhi tattha mahāsīmāsodhane kāraṇaṃ, tadeva tasmīṃ vākye padhānato dassetabbaṃ. Na hi āhacca ṭhitameva sākḥādīnaṃ phusitvā ṭhito bhikkhu sodhetabbo ākāsaṭṭhasākḥādīnaṃ phusitvā ṭhitassāpi sodhetabbato, kiṃ niratthakena āhaccaṭṭhānavacanena. Ākāsaṭṭhasākḥāsu ca bhikkhuno phusanaṃveva kāraṇattena vuttaṃ, sodhanañca tasseva bhikkhussa hatthapāsānayanādivasena sodhanaṃ vuttaṃ. Idha pana “mahāsīmaṃ sodhetvā”ti sakalasīmāsādhāraṇavacanena sodhanaṃ vuttaṃ.

Apica sākḥādīnaṃ phusitvā ṭhitabhikkhumattasodhane abhimate “mahāsīmāya pathavitalaṃ”ti visesasīmopādānaṃ niratthakaṃsiyā yattha katthaci-antamaso ākāsepi ṭhatvā sākḥādīnaṃ phusitvā ṭhitassa visodhetabbato.

---

1. Kāraṇamattena (Sī)

**Chinditvā bahiṭṭhakā kātabbā**ti tattha paṭiṭṭhitabhāvaviyojanavacanato ca visabhāgasīmānaṃ phusaneneva sakalasīmāsodhanahetuko aṭṭhakathāsiddhoyaṃ eko sambandhadoso atthevāti gahetabbo. Teneva **udakukkhepasīmākathāyampi**<sup>1</sup> “vihārasīmāya vā gāmasīmāya vā paṭiṭṭhito”ti ca “nadiṭṭire pana khāṇukaṃ koṭṭetvā tattha baddhanāvāya na vaṭṭatī”ti ca “sace pana setu vā setupādā vā bahiṭṭire paṭiṭṭhitā, kammaṃ kātuṃ na vaṭṭatī”ti ca evaṃ visabhāgāsu gāmasīmāsu sākḥādīnaṃ phusanameva saṅkaradosakāraṇattena vuttaṃ, na bhikkhuphusanaṃ. Tathā hi “antonadiyaṃ jātarukkhe bandhitvā kammaṃ kātabban”ti nadiyaṃ nāvā bandhanaṃ anuññātaṃ udakukkhepanissayattena nadisīmāya sabhāgatā. Yadi hi bhikkhūnaṃ phusanameva paṭicca sabbattha sambandhadoso vutto siyā, nadiyampi bandhanaṃ paṭikkhipitabbaṃ bhaveyya. Tatthāpi hi bhikkhuphusanaṃ kammakopakāraṇaṃ hoti, tasmā sabhāgasīmāsu pavisitvā bhūmi-ādiṃ phusitvā vā aphasitvā vā sākḥādīmi ṭhite taṃ sākḥādīmi phusantova bhikkhu sodhetabbo. Visabhāgasīmāsu pana sākḥādīmi phusitvā ṭhite taṃ sākḥādīmi ahusantāpi sabbe bhikkhū sodhetabbā. Aphasitvā ṭhite pana taṃ sākḥādīmi phusantova bhikkhu sodhetabboti niṭṭhamettha gantabbaṃ.

Yaṃ panettha keci “baddhasīmānaṃ dvinnaṃ aññamaññaṃ viya baddhasīmāgāmasīmānampi tadaññāsampi sabbāsaṃ samānasaṃvāsakasīmānaṃ aññamaññaṃ rukkhādisambandhe sati tadubhayampi ekasīmaṃ viya sodhetvā ekattheva kammaṃ kātabbaṃ, aññattha kataṃ kammaṃ vipajjati, natthettha sabhāgavisabhāgabhedo”ti vadanti, taṃ tesāṃ matimattaṃ, sabhāgasīmānaṃ aññamaññaṃ sambhedadosābhāvassa visabhāgasīmānameva tabbhāvassa suttasuttānulomādivinayanayehi siddhattā. Tathā hi “anujānāmi bhikkhave sīmaṃ sammannitun”ti gāmasīmāyameva baddhasīmaṃ sammannitun anuññātaṃ. Tāsaṃ nissayanissitabhāvena sabhāgatā,<sup>2</sup> sambhedajjhottharaṇādidosābhāvo ca suttatova siddho. Baddhanakāle pana anuññātassa sambandhassa anulomato pacchā sañjātarukkhādisambandhopi tāsaṃ vaṭṭati eva. “Yaṃ bhikkhave -pa- kappiyaṃ anulometi akappiyaṃ paṭibāhati, taṃ vo kappatī”ti<sup>3</sup> vuttatā. Evaṃ tāva baddhasīmāgāmasīmānaṃ aññamaññaṃ sabhāgatā<sup>2</sup>, sambhedādidosābhāvo

1. Vi-Ṭṭha 3. 335 piṭṭhe.

2. Saṅkaratā (Sī)

3. Vi 3. 348 piṭṭhe.



ca suttasuttānulomato siddho. Iminā eva nayena araṇṇasīmāsattabbhantarasīmānaṃ, nadi-ādi-udakukkhepasīmānaṃca suttasuttānulomato aññamaññaṃ sabhāgatā, sambhedādidosābhāvo ca siddhoti vedītabbo.

Baddhasīmāya pana aññāya baddhasīmāya, nadi-ādisīmāsu ca bandhituṃ paṭikkhepasiddhito ceva udakukkhepasattabbhantarasīmānaṃ nadi-ādisu eva kātuṃ niyamanasuttasāmatthiyena baddhasīmāgāmasīmādīsu karaṇapaṭikkhepasiddhito ca tāsāṃ aññamaññaṃ visabhāgatā, uppattikkhaṇe, pacchā ca rukkhādīhi sambhedādidosasambhavo ca vuttanayena suttasuttānulomato ca sijjhanti. Teneva **aṭṭhakathāyaṃ**<sup>1</sup> visabhāgasīmānameva vaṭarukkhādivacanehi sambandhadosaṃ dassetvā sabhāgānaṃ baddhasīmāgāmasīmādīnaṃ sambandhadoso na dassito, na kevalaṃca na dassito, atha khotāsaṃ sabhāgasīmānaṃ rukkhādisambandhepi dosābhāvo pāḷi-aṭṭhakathāsu nāpito eva. Tathā hi pāḷiyaṃ “pābbatanimittaṃ pāsāṇanimittaṃ vananimittaṃ rukkhanimittaṃ”ti-ādinā vaḍḍhanakanimittāni anuññātāni. Tena nesaṃ rukkhādīnaṃ nimittānaṃ vaḍḍhanepi baddhasīmāgāmasīmānaṃ saṅkaradosābhāvo nāpītova hoti. Dvinnāṃ pana baddhasīmānaṃ īdiso sambandho na vaṭṭati. Vuttañhi “eka rukkhopi ca dvinnāṃ sīmānaṃ nimittaṃ hoti, so pana vaḍḍhanto sīmāsaṅkaraṃ karoti, tasmā na kātabbo”ti<sup>1</sup> “anujānāmi bhikkhave tiyojana paramaṃ sīmaṃ sammannitun”ti vacanatopi cāyaṃ nāpito. Tiyojanaparamāya hi sīmāya samantā pariyantesu rukkhalaṭāgumbādīhi baddhasīmāgāmasīmānaṃ niyamena aññamaññaṃ sambandhassa sambhavato “īdisaṃ sambandhanaṃ vināsetvāva sīmā sammannitabbā”ti aṭṭhakathāyampi na vuttaṃ.

Yadi cettha rukkhādisambandhena kammavipatti bhavyeaya, avassameva vattabbaṃ siyā. Vipattiparihāratthañhi ācariyā nirāsaṅkaṭṭhānesupi “bhittim akittetvā”ti-ādinā siddhamevatthaṃ punappunaṃ avocum. Idha pana “vanamajjhe vihāraṃ karonti, vanaṃ na kittetabban”ti-ādirukkhalaṭādīhi nirantare vanamajjhepi sīmābandhanaṃ eva avocum. Tathā thambhānaṃ upari katapāsādādīsu heṭṭhā thambhādīhi ekābaddhesu uparimatalādīsu sīmābandhanaṃ bahudhā vuttaṃ. Tasmā baddhasīmāgāmasīmānaṃ rukkhādisambandho tehi mukhatova vihito. Apica gāmasīmānampi pāṭekkaṃ baddhasīmāsadisatāya ekissā gāmasīmāya

---

1. Vi-Ṭṭha 3. 337 piṭṭhe.

kammaṃ karontehi dabbatiṇamattenāpi sambandhā gāmantaraparamparā araṇṇanadisamuddā ca sodhetabbāti sakaladīpaṃ sodhetvāva kātabbaṃ siyā. Evaṃ pana asodhetvā paṭhamamahāsaṅgītikālato pabhuti katānaṃ upasampadādikammānaṃ, sīmāsammutīnaṃca vipajjanato sabbesampi bhikkhūnaṃ anupasampannasaṅkāpasaṅgo ca dunnivāro hoti. Na cetam yuttaṃ. Tasmā vuttanayeneva visabhāgasīmānameva rukkhādīhi sambandhadoso, na baddhasīmāgāmasīmādīnaṃ sabhāgasīmānanti gahetabbaṃ.

Mahāsīmāsoḍhanassa dukkaratāya khaṇḍasīmāyameva yebhuyyena saṅghakammakaraṇanti āha “**sīmāmālake**”ti-ādi. Mahāsaṅghasannipāte pana khaṇḍasīmāya appahonakatāya mahāsīmāya kamme kariyamānepi ayam nayo gahetabbova.

“**Ukkipāpetvā**”ti iminā kāyapaṭibaddhenapi sīmaṃ phusanto sīmaṭṭhova hotīti dasseti. **Purimanayepī**ti khaṇḍasīmāto mahāsīmāṃ pavīṭṭhasākhānāyepi. Sīmaṭṭharukhasākhāya nisinno sīmaṭṭhova hotīti āha “**hatthapāsameva ānetabbo**”ti. Ettha ca rukhasākhādīhi aññamaññaṃ sambandhāsu etāsu khandhasīmāyaṃ tayo bhikkhū, mahāsīmāyaṃ dveti evaṃ dvīsu sīmāsu sīmantarikaṃ aphasitvā, hatthapāsaṅga avijahitvā ṭhitehi pañcahi bhikkhūhi upasampadādikammaṃ kātum vaṭṭatīti keci vadanti, taṃ na yuttaṃ “nānāsīmāya ṭhitacattuttho kammaṃ kareyya, akammaṃ, na ca karaṇīyaṃ”ti-ādi<sup>1</sup> vacanato. Tenevetthāpi mahāsīmāṃ sodhetvā mālakasīmāyameva kammakaraṇaṃ vihitam. Aññathā bhinnasīmaṭṭhatāya tatraṭṭhassa gaṇapūrakattābhāvā kammakopova hotīti.

Yadi evaṃ kathaṃ chandapārisuddhi-āharaṇavasena mahāsīmāsoḍhananti? Tampi vinayaññū na icchanti, hatthapāsānayanabhisīmākaraṇavaseneva panettha sodhanaṃ icchanti, dinnassāpi chandassa anāgamanena mahāsīmaṭṭho kammaṃ kopetīti. Yadi cassa chandādi nāgacchati, kathaṃ so kammaṃ kopessa tīti? Dvinnam visabhāgasīmānaṃ sambandhadosato. So ca sambandhadoso aṭṭhakathāvacanappamāṇato. Na hi vinaye sabbattha yutti sakkā ñātum buddhagocarattāti veditabbaṃ. Keci pana “sace dvepi sīmāyo pūretvā

---

1. Vi 3. 440 piṭṭhe.

nirantaram ṭhitesu bhikkhūsu kammaṃ karontesu ekissā eva sīmāya gaṇo ca upasampadāpekkho ca anussāvako ca ekato tiṭṭhati, kammaṃ sukatameva hoti. Sace pana kammāraho vā anussāvako vā sīmantaraṭṭho hoti, kammaṃ vipajjati”ti vadanti, tañca baddhasīmāgāmasīmādisabhāgasīmāsu eva yujjati, yāsu aññamaññaṃ rukkḥādisambandhesupi doso natthi. Yāsu pana atthi, na tāsu visabhāgasīmāsu rukkḥādisambandhe sati ekattha ṭhito itaraṭṭhānaṃ kammaṃ kopeti eva aṭṭhakathāyaṃ sāmāññato sodhanassa vuttattāti amhākaṃ khanti. Vīmaṃsitvā gahetabbaṃ.

**Na otaratīti** paṇavaṣaṇṭhānapabbatādīsu heṭṭhā pamāṇarahitaṭṭhānaṃ na otarati. Kiñcāpi panettha bajjhamānakkhaṇe uddhampi pamāṇarahitaṃ pabbatādīni nārohati, tathāpi taṃ pacchā sīmaṭṭhatāya sīmā hoti. Heṭṭhā paṇavaṣaṇṭhānādi pana upari baddhāyapi sīmāya sīmāsaṅkhyāṃ na gacchati, tassa vasena na otaratīti vuttaṃ, itarathā oroḥaṇāroḥaṇānaṃ sādḥāraṇavasena “na otaratī”ti-ādīnā vattabbato. **Yaṃ kiñcīti** niṭṭhitasīmāya upari jātaṃ vijjamānaṃ pubbe ṭhitaṃ, pacchā sañjātaṃ, pavitṭhañca yaṃ kiñci saviññāṇakāviññāṇakaṃ sabbampīti attho. Antosīmāya hi hatthikkhandhādisaviññāṇakesu nisinnopi bhikkhu sīmaṭṭhova hoti. **“Baddhasīmāyā”**ti idañca pakaraṇavasena upalakkhaṇato vuttaṃ. Abaddhasīmāsupi sabbāsu ṭhitaṃ taṃ sīmāsaṅkhyameva gacchati.

**Ekasambaddhena gatanti** rukkhalatādītrajātameva sandhāya vuttaṃ. Tādi sampi “ito gatan”ti vattabbataṃ arahati. Yaṃ pana “ito gatan”ti vā “tato āgatan”ti vā vattum asakkuṇeyyaṃ ubhosu baddhasīmāgāmasīmāsu, udakukkhepanadi-ādīsu ca tiriyaṃ patitarajjudāṇḍādi, tattha kiṃ kātabbanti? Ettha pana baddhasīmāya patiṭṭhitabhāgo baddhasīmā, abaddhagāmasīmāya patiṭṭhitabhāgo gāmasīmā tadubhayasīmaṭṭhapabbatādi viya. Baddha sīmato uṭṭhitavaṭarukkḥassa pārōhe, gāmasīmāya gāmasīmato uṭṭhitavaṭarukkḥassa pārōhe ca baddhasīmāya patiṭṭhitepi eseva nayo. Mūla<sup>1</sup>patiṭṭhitakālato hi paṭṭhāya “ito gataṃ, tato āgatan”ti vattum asakkuṇeyyato so bhāgo<sup>2</sup> yathāpavitṭhasīmāsaṅkhyameva gacchati, tesaṃ rukkḥapārōhānaṃ antarā pana ākāsaṭṭhasākhā bhūmiyaṃ

1. Mūle..(Sī, Ka)

2. Asakkuṇeyyato. Yo yo bhāgo (Sī, Ka)

sīmāparicchedappamāṇena tadubhayasīmā hotīti keci vadanti. Yasmā panassa sākāya pāroho pavitṭhasīmāya pathaviyaṃ mūlehi patiṭṭhahitvāpi yāva sākhaṃ vinā ṭhātuṃ na sakkoti, tāva mūlasimaṭṭhataṃ na vijahati. Yadā pana vinā ṭhātuṃ sakkoti, tadāpi pārohamattameva pavitṭhasīmaṭṭhataṃ samupeti. Tasmā sabbopi ākāsaṭṭhasākābhāgo purimasīmaṭṭhataṃ na vijahati, tato āgatabhāgassa avijahitattāti amhākaṃ khanti. Udakukkhepanadi-ādīsupi eseva nayo. Tattha ca visabhāgasīmāya evaṃ pavitṭhe sakalasīmāsodhanaṃ, sabhāgāya pavitṭhe phusitvā ṭhitamattabhikkhusodhanaṃca sabbam pubbe vuttanayameva.

140. **Pārayatīti** ajjhottharati, nadiyā ubhosu tīresu patiṭṭhamānā sīmā nadi-ajjhottharā nāma hotīti āha “**nadim ajjottharamānan**”ti. Antonadiyañhi sīmā na otarati. Nadilakkhaṇe pana asati otarati, sā ca tadā nadipārasīmā na hotīti āha “**nadiyā lakkhaṇaṃ nadinimutte vuttanayamevā**”ti. **Assāti** bhavēyya. Avassaṃ labbhanēyyā pana dhuvanāvāva hotīti sambandho. “**Na nāvāyā**”ti iminā nāvaṃ vināpi sīmā baddhā subaddhā eva hoti, āpattiparihāratthā nāvāti dasseti.

**Rukkhasaṅghāṭamayoti** anekarukkhe ekato ghaṭetvā katasetu. Rukkhaṃ chinditvā katoti pāṭhaseso. “**Sabbanimittānaṃ anto ṭhite bhikkhū hatthapāsagate katvā**”ti idaṃ ubhinnaṃ tīrānaṃ ekagāmakhettabhāvaṃ sandhāya vuttaṃ. **Pabbatasañṭhānāti** ekato uggatadīpasikharattā vuttaṃ.

Sīmānujānanakathāvaṇṇanā niṭṭhitā.

### Uposathāgārādikathāvaṇṇanā

141. **Samūhanitvāti** vināsetvā, uddharitvāti attho. Idañca āpattiparihārattham vuttaṃ.

142. **Yāni kānicīti** idha nimittānaṃ sīmāya pāḷiyaṃ sarūpato avuttattā vuttaṃ.

Uposathāgārādikathāvaṇṇanā niṭṭhitā.

### Avippavāsasīmānujānanakathāvaṇṇanā

143. **Aṭṭhārasā**ti andhakavindavihārampi upādāya vuccati. **Nesam** sīmāti tesu mahāvihāresu. “Manan”ti imassa vivaraṇaṃ **īsakanti**, īsakam vulḥoti attho. Imamevatthaṃ dassetuṃ “**appattavulḥabhāvo ahoṣī**”ti vuttaṃ. **Amanasikarontoti** iddhiyā anatikkamassa kāraṇaṃ vuttaṃ.

144. **Soti** bhikkhunisaṅgho. **Dvepī**ti dve samānasaṃvāsa-avippavāsāyo. **Avippavāsasīmā**ti mahāsīmaṃ sandhāya vadati. Tattheva yebhuyyena avippavāsāti.

“**Avippavāsaṃ ajānantāpī**”ti idaṃ mahāsīmāya vijjānānavijjānattaṃ, tassā bāhiraparicchedaṇṇa ajānantānaṃ vasena vuttaṃ. Evaṃ ajānantehipi antosīmāya ṭhatvā kammavācāya katāya sā sīmā samūhatāva hotīti āha “**samūhanituṇceva bandhituṇca sakkhissanti**”ti. **Nirāsaṅkaṭṭhāneti** khaṇḍasīmārahitaṭṭhāne. Idaṇca mahāsīmāya vijjānānāyapi kammakaraṇasukhatthaṃ khaṇḍasīmā icchitāti taṃ cetiyaṅgaṇāḍibahusannipātaṭṭhāne na bandhatīti vuttaṃ. Tatthāpi sā baddhā subaddhā eva mahāsīmā viya. “**Paṭibandhituṃ pana na sakkhissantevā**”ti idaṃ khaṇḍasīmāya asamūhatattā, tassā avijjānānattassa ajānānato ca mahāsīmābandhanaṃ sandhāya vuttaṃ. Khaṇḍasīmaṃ pana nirāsaṅkaṭṭhāne bandhituṃ sakkhissanteva. **Sīmāsambhedam katvā**ti khaṇḍasīmāya vijjānānapakkhe sīmāya sīmaṃ ajjhottharaṇasambhedam katvā avijjānānapakkhepi sambhedasaṅkāya anivattanena sambhedasaṅkaṃ katvā. **Avihāraṃ kareyyunti** saṅghakammānārahaṃ kareyyuṃ. Pubbe hi cetiyaṅgaṇāḍinirāsaṅkaṭṭhāne kammaṃ kātuṃ sakkā, idāni tampi vināsītanti adhippāyo. **Na samūhanitabbā**ti khaṇḍasīmaṃ ajānantehi na samūhanitabbā. **Ubhopi na jānantīti** ubhinnaṃ padesaniyamam vā tāsam dvinnampi vā aññatarāya vā vijjānānataṃ vā avijjānānataṃ vā na jānanti sabbattha saṅkā eva hoti. “**Neva samūhanituṃ, na bandhituṃ sakkhissanti**”ti idaṃ nirāsaṅkaṭṭhāne ṭhatvā samūhanituṃ sakkontopi mahāsīmaṃ paṭibandhituṃ na sakkontīti imamatthaṃ sandhāya vuttaṃ. “**Na ca sake -pa- kammavācam kātun**”ti idaṃ sīmābandhanakammavācam sandhāya vuttaṃ. **Tasmāti** yasmā bandhituṃ na sakkā, tasmā na samūhanitabbāti attho.

Keci pana “īdisesu vihāresu chapañcamatte bhikkhū gahetvā vihāraakoṭito paṭṭhāya vihāraparikkhepassa anto ca bahi ca samantā leḍḍupāte sabbattha mañcappamāṇe okāse nirantaram ṭhatvā paṭhamam avippavāsasīmam, tato samānasamvāsakasīmañca samūhananavasena sīmāya samugghāte kate tasmim vihāre khaṇḍasīmāya, mahāsīmāyapi vā vijja mānatte sati avassam ekasmim mañcatṭhāne tāsam majjhagatā te bhikkhū tā samūhaneyyūm, tato gāmasīmā eva avasisseyya. Na hettha sīmāya, tapparicchedassa vā jānanam aṅgam. Sīmāya pana antoṭhānam, “samūhanissāmā”ti kammavācāya karaṇaṅcetha aṅgam. **Aṭṭhakathāyam** ‘khaṇḍasīmam pana jānantā avippavāsam ajānantāpi samūhanitum ceva bandhituñca sakkhissantī’ti evam mahāsīmāya paricchedassa ajānanepi samūhanassa vuttattā. Gāmasīmāya eva ca avasiṭṭhāya tattha yathārucci duvidhampi sīmam, bandhituñceva upasampadādikammaṃ kātuñca vaṭṭati”ti vadanti, tam yuttam viya dissati. Vīmaṃsitvā gahetabbam.

Avippavāsasīmānujānanakathāvaṇṇanā niṭṭhitā.

### Gāmasīmādīkathāvaṇṇanā

147. Pāḷiyam “asammatāya bhikkhave sīmāyā”ti-ādinā gāmasīmā eva baddhasīmāya khettaṃ, araṇṇanadi-ādayo viya sattabbhantara-udakukkhepādīnam. Sā ca gāmasīmā baddhasīmāviraḥitaṭṭhāne sayameva samānasamvāsā hotīti dasseti. **Yā tassa vā gāmassa gāmasīmāti** ettha gāmasīmāparicchedassa anto ca bahi ca khetvatthu-araṇṇapabbatādīkaṃ sabbaṃ gāmakhettaṃ sandhāya “gāmassā”ti vuttam, na antaraghārameva. Tasmā tassa sakalassa gāmakhettassa sambandhanīyā gāmasīmāti evamattho veditabbo. Yo hi so antaragharakhettādīsū anekesu bhūmibhāgesu “gāmo”ti ekattena lokajanehi paññatto gāmavohāro, sova idha “gāmasīmā”tipi vuccatīti adhippāyo, gāmo eva hi **gāmasīmā**. Imināva nayena upari araṇṇam nadi samuddo jātassaroti evam tesu bhūmippadesesu ekattena lokajanapaññattānameva araṇṇādīnam araṇṇasīmādībhāvo veditabbo. Loke pana gāmasīmādivohāro

gāmādīnaṃ mariyādāyameva vattuṃ vaṭṭati, na gāmakhettādīsu sabbattha. Sāsane pana te gāmādayo itaranivatti-atthēna sayameva attano mariyādāti katvā gāmo eva gāmasīmā, araññameva **araññasīmā -pa-** samuddo eva **samuddasīmāti** sīmāvohārena vuttāti veditabbā.

“**Nigamassa vā**”ti idaṃ gāmasīmappabhedam sabbam upalakkhaṇavasena dassetuṃ vuttaṃ. Tenāha “**nagarampi gahitamevā**”ti. “**Balim labhanti**”ti idaṃ yebhuyyavasena vuttaṃ, “ayaṃ gāmo ettako karīsabhāgo”ti-ādinā pana rājapaṇṇesu āropitesu bhūmibhāgesu yasmiṃ yasmiṃ taḷākamātikāsūsānapabbatādike padese balim na gaṇhanti, sopi gāmasīmā eva. Rājādīhi paricchinnabhūmibhāgo hi sabbova ṭhapetvā nadiloṇijātassare gāmasīmāti veditabbo. Tenāha “**paricchinditvā rājā kassaci deti**”ti. Sace pana tattha rājā kañci padesaṃ gāmantarena yojeti, so pavitṭhagāmasīmataṃ eva bhajati, nadijātassa resu vināsetvā taḷākādibhāvaṃ vā pūretvā khettādibhāvaṃ vā pāpitesupi eseva nayo.

Ye pana gāmā rājacorādibhayapīḷitehi manussehi chadditā cirampi nimmanussā tiṭṭhanti, samantā pana gāmā santi, tepi pāṭekkaṃ gāmasīmāva. Tesu hi rājāno samantagāmavāsīhi kasāpetvā vā yehi kehici kasitaṭṭhānaṃ likhitvā vā balim gaṇhanti, aññena vā gāmena ekībhāvaṃ vā upanenti. Ye pana gāmā rājūhipi pariccattā gāmakhettānantarikā mahāraññena ekībhūtā, te agāmakāraññasīmataṃ pāpuṇanti, purimā gāmasīmā vinassati. Rājāno pana ekasmiṃ araññādippadese mahantaṃ gāmaṃ katvā anekasahassāni kulāni vāsāpetvā tattha vāsīnaṃ bhogagāmāti samantā bhūtagāme<sup>1</sup> paricchinditvā denti, purāṇānaṃ, pana paricchedaṅca na vināsenti, tepi paccekaṃ gāmasīmā eva. Ettāvata purimagāmasīmattaṃ na vijahanti. **Sā ca itarā cāti**-ādi “samānasamvāsā ekūposathā”ti pāḷipadassa adhippāyavivaraṇaṃ. Tattha hi sā ca rājicchāvasena parivattitvā samuppannā abhinavā, itarā ca aparivattā pakatigāmasīmā, yathā baddhasīmāya sabbam saṅghakammaṃ kātuṃ vaṭṭati, evametāpi sabbakammārahatāsadisena baddhasīmāsadisā, sā samānasamvāsā

---

1. Bahū gāme (Sī)

ekūposathāti adhippāyo. Sāmaññato “baddhasīmāsadisā”ti vutte ticīvarāvippavāsasīmaṃ baddhasīmaṃ eva maññantīti taṃsadisatānivattanamukhena upari sattabbhantarāsīmāya taṃsadisatāpi atthīti dassananayassa idheva pasaṅgaṃ dassetuṃ “**kevalan**”ti-ādi vuttaṃ.

**Viñjhāṭavisadise araññeti** yattha “asukagāmassa idaṃ khettaṃ”ti gā mavohāro natthi, yattha ca na kasanti na vapanti, tādise araññe. Macchabandhānaṃ agamanapathā nimmanussāvāsā samuddantaradīpakāpi ettheva saṅgayhanti. Yaṃ yañhi agāmakhettabhūtaṃ nadisamuddajātassaravirahitaṃ padesaṃ, taṃ sabbaṃ araññasīmāti veditabbaṃ. Sā ca sattabbhantarāsīmā vināva sayameva samānasāmvāsā baddhasīmāsadisā. Nadi-ādisīmāsu viya sabbamettha saṅghakammaṃ kātuṃ vaṭṭati. Nadisamuddajātassarānaṃ tāva **aṭṭhakathāyaṃ** “attano sabhāveneva baddhasīmāsadisā”ti-ādinā vuttattā sīmatā siddhā. Araññassa pana sīmatā kathanti? Sattabbhantarāsīmānujānanasuttādisāmatthiyato. Yathā hi gāmasīmāya vaggakamma parihāratthaṃ bahū baddhasīmāyo anuññātā, tāsāṅca dvinnamantarā aññamaññaṃ asambhedatthaṃ sīmantarikā anuññātā, evamidhāraññepi sattabbhantarāsīmā. Tāsāṅca dvinnaṃ antarā sīmantarikāya pāli-aṭṭhakathāsupi vidhānasāmatthiyato araññassapi sabhāveneva nadi-ādinā viya sīmābhāvo tattha vaggakamma parihāratthameva sattabbhantarāsīmāya anuññātattāva siddhoti veditabbo. Tattha sīmāyameva hi ṭhitā sīmāṭṭhānaṃ vaggakammaṃ karonti, na asīmāyaṃ ākāse ṭhitā viya ākāsaṭṭhānaṃ. Evameva hi sāmattiyaṃ gahetvā “sabbā bhikkhave nadī asīmā”ti-ādinā paṭikkhattabaddhasīmānampi nadisamuddajātassarānaṃ attano sabhāveneva sīmābhāvo aṭṭhakathāyaṃ vuttoti gahetabbo.

**Athassa ṭhitokāsato**ti assa bhikkhussa ṭhitokāsato. Sacepi hi bhikkhusahassaṃ tiṭṭhati, tassa ṭhitokāsassa bāhiraṅgato paṭṭhāya bhikkhūnaṃ vaggakamma parihāratthaṃ sīmāpekkhāya uppannāya tāya saha sayameva sañjātā sattabbhantarāsīmā samānasāmvāsāti adhippāyo. Yattha pana khuddake araññe mahantehi bhikkhūhi paripuṇṇatāya vaggakammasaṅkabhāvena sattabbhantarāsīmāpekkhā natthi, tattha sattabbhantarāsīmā na uppajjati, kevalāraññasīmāyameva, tattha saṅghena kammaṃ kātabbaṃ. Nadi-ādīsupi eseva nayo. Vakkhati hi “sace nadī nātidīghā hoti,



pabhavato paṭṭhāya yāva mukhadvārā sabbattha saṅgho nisīdati, udakukkhepasīmākammanā natthī”ti-ādi<sup>1</sup>. Iminā eva ca vacanena vaggakammaparihārattham sīmāpekkhāya sati eva udakukkhepasattabbhantarāsīmā uppajjanti, nāsatīti daṭṭhabbam.

Keci pana “samantā abbhantaram minivā paricchadakaraṇeneva sīmā sañjāyati, na sayamevā”ti vadanti, tam na gahetabbam. Yadi hi abbhantaraparchcheda-karaṇappakārena sīmā uppajjeyya, abaddhasīmā ca na siyā bhikkhūnam kiriyāpakārasiddhito. Apica vaḍḍhakīhatthānam, pakatihatthānañca loke anekavidhattā, vinaye īdisam hatthappamāṇanti avuttattā ca yena kenaci minite ca bhagavatā anuññātena nu kho hatthena nimitam, na nu khoti sīmāya vipattisaṅkā bhaveyya. Minintehi ca aṇumattampi ūnamadhikam akatvā minituṃ asakkuṇeyyatāya vipatti eva siyā. Parisavasena cāyam vaḍḍhamānā tesam minanena vaḍḍhati vā hāyati vā. Saṅghe ca kamman katvā gate ayam bhikkhūnam payogena samuppannasīmā tesam payogena vigacchati na vigacchati ca. Katham baddhasīmā viya yāva sāsantaradhānā na tiṭṭheyya, ṭhitiyā ca purāṇavihāresu viya sakalepi araññe katham sīmāsambhedasaṅkā na bhaveyya. Tasmā sīmāpekkhāya eva samuppajjati, tabbigamena vigacchatīti gahetabbam. Yathā cettha, evam udakukkhepasīmāyampi nadi-ādīsupi.

Tathāpi hi majjhimapuriso na nāyati. Tathā sabbathāmena khipanam ubhayatthāpi ca yassam disāyam sattabbhantarassa, udakukkhepassa vā okāso na pahoti, tattha katham minanam, khipanam vā bhaveyya? Gāmakhattādīsū pavisanato akhette sīmā pavitṭhā nāmāti sīmā vipajjeyya<sup>2</sup>. Apekkhāya sīmuppattiyam pana yato pahoti, tattha sattabbhantara-udakukkhepasīmā sayameva paripuṇṇā jāyanti. Yato pana na pahoti, tattha attano khettappamāṇeneva jāyanti, na bahi. Yam panettha abbhantaraminanapamāṇassa, vālukādikhpanakammassa ca dassanam, tam sañjātasīmānam ṭhitaṭṭhānassa paricchedanattham katam gāmūpacāragharūpacārajānanattham leḍḍusuppādikhpanavidhānadassanam viya. Teneva **mātikāṭṭhakathāyam** “sīmam vā sammannati udakukkhepam vā paricchindati”ti<sup>3</sup> vuttam. Evam katepi tassa paricchedassa yāthāvato

1. Vi-Ṭṭha 3. 334 piṭṭhe. 2. Akhettasīmā pavitṭhā kim nāma sīmā na vipajjeyya (Sī)  
3. Kaṅkhā-Ṭṭha 247 piṭṭhe.

ñātuṃ asakkuṇeyyattena puthulato ñatvā anto tiṭṭhantehi nirāsaṅkaṭṭhāne ṭhātabbam, aññaṃ bahi karontehi atidūre nirāsaṅkaṭṭhāne pesetabbam.

Apare pana “sīmāpekkhāya kiccam natthi, maggagamanānānādi-atthehi ekabhikkhusmimpi araṅṅe vā nadi-ādīsu vā pavitthe taṃ parikkhipivā sattabbhantara-udakukkhepasīmā sayamega pabhā viya padīpassa samuppajjati, gāmakhattādīsu tasmim otiṇṇamatte vigacchati. Teneva cettha dvinnam saṅghānam visum kammaṃ karontānam sīmādvayassa antarā sīmantarikā aññaṃ sattabbhantaram, udakukkhepañca ṭhapetum anuññātā, sīmāpariyante hi kenaci kammaṃ pesitassa bhikkhuno samantā sañjātasīmā itaresam sīmāya phusitvā sīmāsambhedam kareyya, so mā hotūti, itarathā hatthacaturāṅgulamattāyapettha sīmantarikāya anujānitabbato. Apica sīmantarikāya ṭhitassāpi ubhayattha kammakopavacanatopi cetam sijjhati. Tampi parikkhipivā sayameva sañjātāya sīmāya ubhinnampi sīmānam, ekāya eva vā saṅkarato. Itarathā tassa kammakopavacanam na yujjeyya. Vuttañhi **mātikāṭṭhakathāyam** ‘paricchedabbhantare hatthapāsam vijahitvā ṭhitopi paricchedato bahi aññaṃ tattakāmyeva paricchedam anatikkamitvā ṭhitopi kammaṃ kopetī’<sup>1</sup>. Kiñca<sup>2</sup> agāmakāraṅṅe ṭhitassa kammakaraṅṅicchāviraḥitassāpi bhikkhuno sattabbhantaraparicchinne ajjhokāse cīvaravippavāso bhagavatā anuññāto, so ca paricchedo sīmā. Evaṃ apekkham vinā samuppannā. Tenevettha ‘ayam sīmā ticīvaravippavāsaparihārampi labhatī’<sup>3</sup> vuttam. Tasmā kammakaraṅṅiccham vināpi vuttanayenasamuppatti gahetabbā”<sup>4</sup>ti vadanti, taṃ na yuttam padīpassa pabhā viya sabbapuggalānampi paccekam sīmāsambhavena saṅghe, gaṇe vā kammaṃ karonte tatraṭṭhānam bhikkhūnam samantā paccekam samuppannānam anekasīmānam aññaṃaññaṃ saṅkaradosappasaṅgato. Parisavasena cassā vaḍḍhi, hāni ca sambhavati. Pacchā āgatānam abhinavasīmantaruppatti eva, gatānam samantā ṭhitasīmāpi vināso ca bhaveyya.

Pāḷiyam pana “samantā sattabbhantarā, ayam tattha samānasamvāsā”<sup>4</sup>ti-ādinā<sup>4</sup> ekā eva sattabbhantarā, udakukkhepā ca anuññātā, na cesā sīmā sabhāvena, kāraṇasāmatthiyena vā pabhā viya padīpassa uppajjati.

1. Kaṅkhā-Ṭṭha 91 piṭṭhe.

3. Vi-Ṭṭha 3. 333 piṭṭhe.

2. Kiñcāpi (Sī, Ka)

4. Vi 3. 150 piṭṭhe.

Kintu bhagavato anujānaneneva, bhagavā ca imāyo anujānanto bhikkhūnaṃ vaggakamma-parihāreṇa kammakaraṇasukhatthameva<sup>1</sup> anuññāsīti kathāṃ nahānādikkiccena pavīṭṭhānampi samantā tāsāṃ sīmānaṃ samuppatti payo-  
 janābhāvā? Payojane ca ekaṃ eva payo-  
 jananti kathāṃ paccekāṃ bhikkhugaṇanāya anekasīmāsamuppatti? “Eka-sīmāyaṃ hatthapāsaṃ avijahitvā ṭhitā”<sup>2</sup>ti<sup>2</sup> hi vuttam. Yaṃ pana dvinnāṃ sīmānaṃ antarā tattakaparicchedeneva sīmantarikaṭṭhapanavacanaṃ, tattha ṭhitānaṃ kammakopavacanaṃca, tampi imāsaṃ sīmānaṃ paricchedassa dubbodhatāya sīmāya sambhodasaṅkaṃ, kammakopasaṅkaṃca dūrato pariharitum vuttam.

Yo ca cīvarāvippavāsattam bhagavatā abbhokāse dassito sattabbhantaraparicchedo, so sīmā eva na hoti, khettaṭṭhākaḍḍiparicchedo viya ayamettha eko paricchedova. Tattha ca bahūsu bhikkhūsu ekato ṭhitesu tesāṃ viṣum viṣum attano ṭhitaṭṭhānato paṭṭhāya samantā sattabbhantaraparicchedabbhantare eva cīvaraṃṭhapetabbaṃ, na parisapariyantato paṭṭhāya. Parisapariyantato paṭṭhāya hi abbhantare gayhamāne abbhantarapariyosāne ṭhapitacīvaraṃ majjhe ṭhitassa abbhantarato bahi hotīti taṃ aruṇuggamane nissaggiyaṃ siyā. Sīmā pana parisapariyantatova gahetabbā. Cīvaravippavāsaparihāropettha abbhokāsaparicchedassa vijjamānattā vutto, na pana yāva sīmāparicchedaṃ labbhamānattā mahāsīmāya avippavāsasīmāvohāro viya. Mahāsīmāyampi hi gāmagāmūpacāresu cīvaraṃ nissaggiyaṃ hoti. Idhāpi majjhe ṭhitassa sīmāpariyante nissaggiyaṃ hoti. Tasmā yathāvuttasīmāpekkhavasenevetāsaṃ sattabbhantara-udakukkhepasīmānaṃ uppatti, tabbigamena vināso ca gahetabbāti amhākaṃ khanti. Vīmaṃsitvā gahetabbaṃ. Añño vā pakāro ito yuttataro gavesitabbo.

Idha pana “araññe samantā sattabbhantarā”<sup>2</sup>ti evaṃ pāḷiyaṃ viñjhāṭṭhavisadise araññe samantā sattabbhantarāti aṭṭhakathāyaṅca rukkhādinirantarepi araññe sattabbhantasīmāya vihitattā attano nissayabhūtāya araññasīmāya saha etassā rukkhādisambandhe dosābhāvo pageva agāmake rukkheti nissitepi padese cīvaravippavāsassa rukkhaparihāraṃ vināva abbhokāsaparihārova anumatoti siddhoti vedītabbo.

1. Kammakaraṇatthameva (Ka)

2. Kaṅkhā-Ṭṭha 87 piṭṭhe.

**Upacāratthāyā**ti sīmantarikatthāya sattabbhantarato adhikaṃ vaṭṭati. Ūnakaṃ pana na vaṭṭati eva sattabbhantaraparichedassa dubbhijānattā. Tasmā saṅghaṃ vinā ekenāpi bhikkhunā bahi tiṭṭhantena aññaṃ sattabbhantaram atikkamivā atidūre eva ṭhātabbaṃ, itarathā kammakopasaṅkato. Udukukkhepepi eseva nayo. Teneva vakkhati “ūnakaṃ pana na vaṭṭatī”<sup>1</sup>. Idañcetha sīmantarikavidhānaṃ dvinnāṃ baddhasīmānaṃ sīmantarikānujānanasuttānulomato siddhanti daṭṭhabbaṃ. Kiñcāpi hi bhagavatā nidānavasena ekagāmasīmānissitānaṃ, ekasabhāgānañca dvinnāṃ baddhasīmānameva aññamaññaṃ sambhedajjhottharaṇadosaparihārāya sīmantarikā anuññātā, tathāpi tadanulomato eka-araññasīmānadi-ādisīmañca nissitānaṃ ekasabhāgānaṃ dvinnāṃ sattabbhantarāsīmānampi udakukkhepasīmānampi aññamaññaṃ sambhedajjhottharaṇaṃ, sīmantarikaṃ vinā abyavadhānena ṭhānañca bhagavatā anabhimatamevātiñatvā **aṭṭhakathācariyā** idhāpi sīmantarikavidhānamakaṃsu. Visabhāgasīmānampi hi ekasīmānissitattaṃ, ekasabhāgattañcāti dvīhaṅgehi samannāgate sati ekaṃ sīmantarikaṃ vinā ṭhānaṃ sambhedāya hoti, nāsatīti daṭṭhabbaṃ. Sīmantarikavidhānasāmattihiyeneva cetāsaṃ rukkhādisambandhopi baddhasīmānaṃ viya aññamaññaṃ na vaṭṭatīti ayampi nayato dassito evāti gahetabbaṃ.

“**Sabhāvenevā**”ti iminā gāmasīmā viya abaddhasīmāti dasseti. **Sabbamettha saṅghakammaṃ kātuṃ vaṭṭatī**ti samānasaṃvāsā ekūposathāti dasseti. **Yena kenacī**ti antamaso sūkarādinā sattena. Mahoghena pana unnataṭṭhānato ninnaṭṭhāne patantena khato khuddako vā mahanto vā lakkhaṇayutto jātassarova. Etthāpi khuddake udakukkhepakiccaṃ natthi, samudde pana sabbathā udakukkhepasīmāyameva kammaṃ kātabbaṃ sodhetuṃ dukkarattā.

**Puna tatthāti** lokavohārasiddhāsu etāsu nadi-ādisu tīsu abaddhasīmāsu puna vaggakammaparihārattham sāsana-vohārasiddhāya abaddhasīmāya paricchedaṃ dassentoti adhippāyo. Pāliyaṃ **yam majjhimassa purisassāti-**ādisu udakaṃ ukkhipivā khipīyati etthāti udakukkhepo, udakassa patanokāso, tasmā **udakukkhepā**. Ayañhettha padasambandhavasena attho—parisapariyantato paṭṭhāya samantā yāva majjhimassa

---

1. Vi-Ṭṭha 3. 334 piṭṭhe.

purisassa udakukkhepo udakapatanaṭṭhānaṃ, tāva yaṃ taṃ  
paricchinnatṭhānaṃ, ayaṃ tattha nadi-ādīsu aparā samānasamvāsā  
udakukkhepasīmāti.

**Tassa antoti** tassa udakukkheparicchinnassa ṭhānassa anto. Na  
kevalaṅca tasseva anto, tato bahipi, ekassa udakukkhepassa anto ṭhātum na  
vaṭṭatīti vacanaṃ udakukkheparicchidassa dubbijānato kammakopasaṅkā  
hotīti. Teneva **mātikāṭṭhakathāyaṃ** “paricchidabbhantare hatthapāsāṃ  
vijahitvā ṭhitopi paricchidato bahi aññaṃ tattakāmyeva paricchidaṃ  
anutikkamitvā ṭhitopi kammaṃ kopeti idaṃ sabba-aṭṭhakathāsu  
sanniṭṭhānaṃ”<sup>1</sup>ti<sup>1</sup>vuttaṃ. Yaṃ panettha **sāratthadīpaniyaṃ** “tassa anto  
hatthapāsāṃ vijahitvā ṭhito kammaṃ kopetīti iminā bahiparicchidato yattha  
katthaci ṭhito kammaṃ na kopetī”<sup>2</sup>ti<sup>2</sup> vatvā mātikāṭṭhakathāvacanampi  
paṭikkhipitvā “neva pāḷiyaṃ na aṭṭhakathāyaṃ upalabbhati”<sup>3</sup>ti-ādi bahu  
papañcitaṃ, taṃ na suddaraṃ idha aṭṭhakathāvacanena  
mātikāṭṭhakathāvacanassa nayato saṃsandanato saṅghaṭṭanato. Tathā hi  
dvinnāṃ udakukkheparicchidānamantarā vidatthacaturāṅgulamattampi  
sīmantarikaṃ aṭṭhapetvā “añña udakukkhepo sīmantarikāya ṭhapetabbo, tato  
adhikaṃ vaṭṭati eva, ūnakaṃ pana na vaṭṭatī”<sup>4</sup>ti evaṃ idheva vuttena iminā  
aṭṭhakathāvacanena sīmantarikopacārena udakukkhepato ūnake ṭhapite  
sīmāya sīmāsambhedato kammako popi vutto eva. Yadaggena ca evaṃ  
vutto, tadaggena tattha ekabhikkhuno paveseṇi sati tassa sīmaṭṭhabhāvato  
kammakopo vutto eva hoti. Aṭṭhakathāyaṃ “ūnakaṃ pana na vaṭṭatī”<sup>5</sup>ti  
kathanañcetaṃ udakukkheparicchidassa dubbijānantenapi  
sīmāsambhedasaṅkāparihāratthaṃ vuttaṃ. Sattabbhantarasīmānamantarā  
tattakaparicchideneva sīmantarikavidhānavacanatopi etāsaṃ  
dubbijānaparicchidatā, tattha ca ṭhitānaṃ kammakopasaṅkā sijjhati.  
Kammakopasaṅkaṭṭhānampi ācariyā dūrato parihāratthaṃ  
kammakopaṭṭhānanti vatvāva ṭhapesunti gahetabbaṃ.

**Tanti sīmaṃ. “Sīghameva atikkāmetī”**ti iminā taṃ anatikkamitvā anto  
eva parivattamānāya kātum vaṭṭatīti dasseti. Etadatthameva hi vālukādīhi  
sīmāparicchindanaṃ, itarathā bahi parivattā nu kho, no vāti kammakopa  
saṅkā bhaveyyāti. **Aññissā anussāvanā**ti kevalāya nadisīmāya

1. Kaṅkhā-Ṭṭha 91 piṭṭhe.

2. Sārattha-Ṭṭi 3. 274 piṭṭhe.

anussāvanā. **Antonadiyaṃ jātarukkhe vā**ti udakukkheparicchedassa bahi ṭhite rukkhepi vā. Bahinaditīrameva hi visabhāgasimattā abandhitabbaṭṭhānam, na antonadī nissayattena sabhāgatā. Teneva “bahinaditīre vihārasīmāya vā”ti-ādinā tīrameva abandhitabbaṭṭhānattena dassitaṃ, na pana nadi. **“Rukkhepi ṭhitehi”**ti idaṃ anto-udakukkhepaṭṭhaṃ sandhāya vuttaṃ. Na hi bahi-udakukkhepe bhikkhūnaṃ ṭhātuṃ vaṭṭati.

**Rukkhasāti** tasseva anto udakukkhepaṭṭhassa rukkhasa. **Sīmaṃ vā sodhetvāti** yathāvuttaṃ vihāre baddhasīmaṃ, gāmasīmañca tattha ṭhitabhikkhūnaṃ hatthapāsānayanabahisīmākaraṇavaseneva sodhetvā. Yathā ca udakukkhepasīmāyaṃ kammaṃ karontehi, evaṃ baddhasīmāyaṃ, gāmasīmāyaṃ vā kammaṃ karontehipi udakukkhepasīmaṭṭhe sodhetvāva kātabbaṃ. Eteneva sattabbhantara-araññasīmāhipi udakukkhepasīmāya, imāya ca saddhiṃ tāsāṃ rukkhādisambandhadosaṃpi nayato dassitova hoti. Imināva nayena sattabbhantarasīmāya baddhasīmāgāmasīmāhipi saddhiṃ, etāsañca sattabbhantarasīmāya saddhiṃ sambandhadosaṃ nātabbo. Aṭṭhakathāyaṃ panetaṃ sabbaṃ vuttanayato sakkā nātunti aññamaññasamāsannānamevettha dassitaṃ.

Tatridaṃ suttānulomato nayaggahaṇamukhaṃ—yathā hi baddhasīmāyaṃ sammatā vipattisīmā hotīti tāsāṃ aññamaññaṃ rukkhādisambandho na vaṭṭati, evaṃ nadi-ādīsu sammatāpi baddhasīmā vipattisīmāva hotīti tāhipi saddhiṃ tassā rukkhādisambandho na vaṭṭatīti sījḥati. Iminā nayena sattabbhantarasīmāya gāmanadi-ādīhi saddhiṃ udakukkhepasīmāya ca araññādīhi saddhiṃ rukkhādisambandhassa na vaṭṭanakabhāvo nātabbo, evametā bhagavatā anuññātā baddhasīmā sattabbhantara-udakukkhepasīmā aññamaññañceva attano nissayavirahitāhi itaritarāsaṃ nissayasīmāhi ca rukkhādisambandhe sati sambhedadosamāpajjātīti suttānulomanayo nātabbova.

Attano attano pana nissayabhūtagāmādīhi saddhiṃ baddhasīmādīnaṃ tissannaṃ uppattikāle bhagavatā anuññātassa sambhedajjhottharaṇassa anulomato rukkhādisambandhopi anuññātova hotīti daṭṭhabbaṃ. Yadi evaṃ udakukkhepabaddhasīmādīnaṃ antarā kasmā sīmantarikā na vihitāti?

Nissayabhedasabhāvabhedehi sayameva bhinnattā. Ekanissaya-  
 ekasabhāvānameva hi sīmantarikāya vināsaṃ karotīti vuttovāyamattho.  
 Eteneva nadinimittāṃ katvā baddhāya sīmāya saṃghe kammaṃ karonte  
 nadiyampi yāva gāmakhettaṃ āhacca ṭhitāya udakukkhepasīmāya aññesaṃ  
 kammaṃ kātuṃ vaṭṭatīti siddhaṃ hoti. Yā panetā lokavohārasiddhā  
 gāmāraññanadisamuddajātassarasīmā pañca, tā  
 aññamaññarukkhādisambandhepi sambhedadosaṃ nāpajjati, tathā  
 lokavohārābhāvato. Na hi gāmādayo gāmantarādīhi, nadi-ādīhi ca  
 rukkhādisambandhamattena sambhinnāti loke voharanti.  
 Lokavohārasiddhānañca lokavohāratova sambhedo vā asambhedo vā  
 gahetabbo, nāññato. Teneva aṭṭhakathāyaṃ tāsāṃ aññamaññaṃ katthacipi  
 sambhedanayo na dassito, sāsānavohārasiddhoyeva dassitoti.

Ettha pana baddhasīmāya tāva “heṭṭhā pathavīsandhārakaṃ  
 udakapariyantaṃ katvā sīmāgatā hotī”ti-ādīnā<sup>1</sup> adhobhāgaparicchedo  
 aṭṭhakathāyaṃ sabbathā dassito. Gāmasīmādīnaṃ pana na dassito.  
 Kathamayāṃ jānitabboti? Keci tāvettha “gāmasīmādayopi baddhasīmā viya  
 pathavīsandhārakaṃ udakaṃ āhacca tiṭṭhatī”ti vadanti.

Keci pana taṃ paṭikkhipitvā “nadisamuddajātassarasīmā, tāva  
 tannissita-udakukkhepasīmā ca pathaviyā uparitale, heṭṭhā ca  
 udakajjhottharaṇappadese eva tiṭṭhanti, na tato heṭṭhā udakassa  
 ajjhottharaṇābhāvā. Sace pana udakoghādīnā yojanappamāṇampi  
 ninnaṭṭhānaṃ hoti, nadisīmādayova honti, na tato heṭṭhā. Tasmā nadi-  
 ādīnaṃ heṭṭhā bahitīramukhena umaṅgena iddhiyā vā pavīṭṭho bhikkhu  
 nadiyaṃ ṭhitānaṃ kammaṃ na kopeti. So pana āsannagāme bhikkhūnaṃ  
 kammaṃ kopeti. Sace pana so ubhinnaṃ tīragāmānaṃ majjhe nisinna hoti,  
 ubhayagāmaṭṭhānaṃ kammaṃ kopeti. Sace pana tīraṃ gāmakhettaṃ na hoti,  
 agāmakāraññaṃ eva. Tattha pana tīradvayepi sattabbhantarasīmāṃ vinā  
 kevalāya khuddakāraññasīmāya kammaṃ karontānaṃ kammaṃ kopeti. Sace  
 sattabbhantarasīmāyaṃ karonti, tadā yadi tesāṃ sattabbhantarasīmāya  
 paricchedo etassa nisinnokāsassa parato ekaṃ satabbhantaraṃ atikkamitvā  
 ṭhito na

---

1. Vi-Ṭṭha 3. 324 piṭṭhe.

kammakopo. No ce, kammakopo. Gāmasīmāyaṃ pana anto-umaṅge vā bile vā yattha pavisitum sakkā, yattha vā suvaṇṇamaṇi-ādiṃ khaṇitvā gaṇhanti, gahetum sakkāti vā sambhovanā hoti, tattakam heṭṭhāpi gāmasīmā, tattha iddhiyā anto nisinnopi kamman kopeti. Yattha pana pakatimanussānam pavesasambhāvanāpi natthi, tam sabbam yāva pathavisandhāraka-udakā araṇṇasīmāva, na gāmasīmā. Araṇṇasīmāyampi eseva nayo. Tatthapi hi yattake padese pavesasambhāvanā, tattakameva uparitale araṇṇasīmā pavattati. Tato pana heṭṭhā na araṇṇasīmā, tattha uparitalena saha ekāraṇṇavohārābhāvato. Na hi tattha pavitṭham araṇṇam pavitṭhoti voharanti. Tasmā tatraṭṭho upari araṇṇaṭṭhānam kamman na kopeti umaṅganadiyaṃ ṭhito viya uparinadiyaṃ ṭhitānam. Ekasmiṃhi cakkavāle gāmanadisamuddajātassare muñcivā tadavasesam amanussāvāsam devabrahmalokam upādāya sabbam araṇṇameva. ‘Gāmā vā araṇṇā vā’ ti vuttattā hi nadisamuddajātassarādipi araṇṇameva. Idha pana nadi-ādīnam visum sīmābhāvena gahitattā tadevasesameva araṇṇam gahetabbam. Tattha ca yattake padese ekaṃ ‘araṇṇan’ ti voharanti, ayamekāraṇṇasīmā. Indapuraṇhi sabbam ekāraṇṇasīmā. Tatthā asurayakkhapurādi. Ākāsaṭṭhadevabrahmavimānāni pana samantā ākāsaparicchinnāni paccekam araṇṇasīmā samuddamajjhe pabbatadīpakā viya. Tattha sabbattha sattabbhantarasiṃmāyaṃ, araṇṇasīmāyameva vāti kamman kātabbam. Tasmā idhāpi upari-araṇṇatalena saddhim heṭṭhāpathaviyā araṇṇavohārābhāvā visum araṇṇasīmāti gahetabbam. Tenevettha gāmanadi-ādisīmākathāya **aṭṭhakathāyaṃ** ‘iddhimā bhikkhu heṭṭhāpathavitale ṭhito kamman kopeti’ ti<sup>1</sup> baddhasīmāyaṃ dassitanayo na dassito’ ti vadanti.

Idañcetāsam gāmasīmādīnam heṭṭhāpamāṇadassanam sutṭādivirodhābhāvā yuttam viya dissati. Vīmaṃsitvā gahetabbam. Evaṃ gahaṇe ca gāmasīmāyaṃ sammatā baddhasīmā upari gāmasīmam, heṭṭhā udakapariyantam araṇṇasīmāñca avattharatīti tassā araṇṇasīmāpi khettanti sijjhati. Bhagavatā ca “sabbā bhikkhave nadī asīmā” ti-ādīnā<sup>2</sup> nadisamuddajātassarā baddhasīmāya akhettabhāvena vuttā, na pana araṇṇam. Tasmā

1. Vi-Ṭṭha 3. 327 piṭṭhe.

2. Vi 3. 150 piṭṭhe.



araññampi baddhasīmāya khattamevāti gahetabbaṃ. Yadi evaṃ kasmā tattha sā na bajjhatīti? Payojanābhāvā. Sīmāpekkhānantarameva sattabbhantarāsīmāya sambhavato. Tassā ca upari sammatāya baddhasīmāya sambhedajjhottharaṇanulomato vipattisīmā eva siyā. Gāmakhette pana ṭhatvā agāmakāraññekadesampi antokarivā sammatā kiñcāpi susammata, agāmakāraññe bhagavatā vihitāya sattabbhantarāsīmāpi anivattito. Tattha pana kammaṃ kātuṃ pavitṭhānampi tato bahi kevalāraññe karontānampi antarā tīṇi sattabbhantarāni ṭhapetabbāni, aññathā vipatti eva siyāti sabbathā niratthakameva agāmakāraññe baddhasīmākaraṇanti veditabbaṃ.

**Antonadiyaṃ pavitṭhasākhāyāti** nadiyā pathavitalaṃ āhacca ṭhitāya sākhāyapi, pageva anāhacca ṭhitāya. Pārohepi eseva nayo. Etena sabhāgaṃ nadisīmaṃ phusitvā ṭhitenapi visabhāgasīmāsambandhasākhādīnā udakukkhepasīmāya sambandho na vaṭṭatīti dasseti. Eteneva mahāsīmaṃ, gāmasīmañca phusitvā ṭhiteṇa sākhādīnā mālakasīmāya sambandho na vaṭṭatīti nāpitoti daṭṭhabbo.

**Antonadiyamyevāti** setupādānaṃ tīraṭṭhataṃ nivatteti. Tena udakukkheparicchedato bahi nadiyaṃ patiṭṭhitatṭepi sambhedābhāvam dasseti. Tenāha “bahitīre patiṭṭhitā”ti-ādi. Yadi hi udakukkhepato bahi antonadiyampi patiṭṭhitatte sambhedo bhaveyya, tampi paṭikkhipitabbaṃ bhaveyya kammakopassa samānattā, na ca paṭikkhittaṃ. Tasmā sabbattha attano nissayasīmāya sambhedadoso natthevāti gahetabbaṃ.

**Āvaraṇena vāti** dāru-ādiṃ nikhaṇitvā udakanivāraṇena.

**Koṭṭakabandhanena vāti** mattikādīhi pūretvā katasetubandhena. Ubhayenāpi āvaraṇameva dasseti. “Nadiṃ vināsetvā”ti vuttamevatthaṃ vibhāveti “**heṭṭhā pāli baddhā**”ti, heṭṭhā nadiṃ āvaritvā pāli baddhāti attho.

**Chaḍḍitamodakanti** atirittodakam. “**Nadiṃ ottharivā sandanaṭṭhānato**”ti iminā taḷākanadīnaṃ antarā pavattanaṭṭhāne na vaṭṭatīti dasseti. **Uppatitvāti** tīrādibhindaṇavasena vipulā hutvā. **Vihārasīmanti** baddhasīmaṃ.

**Agamanapatheti** tadaheva gantvā nivattitum asakkuṇeyye.  
**Araññasīmāsāṅkhyameva gacchatīti** lokavohārasiddham  
 agāmakāraññasīmaṃ sandhāya vadati. **Tatthāti** pakatiyā macchabandhānaṃ  
 gamanapathesu dīpakesu.

**Taṃ ṭhānanti** āvāṭadīnaṃ kataṭṭhānameva, na akatanti attho. **Loṇīti**  
 samuddodakassa uppattiveganinno mātikākārena pavattanako.

148. **Sambhindantīti** yattha catūhi bhikkhūhi nisīditum na sakkā,  
 tattakato paṭṭhāya yāva kesaggamattampi antosīmāya karonto sambhindati.  
 Catunnaṃ bhikkhūnaṃ pahonakato paṭṭhāya yāva sakalampi anto karonto  
 ajjhottharantīti veditabbaṃ. **Saṃsaṭṭhaviṭapāti** aññamaññaṃ sibbitvā  
 ṭhitamahāsākhānūlā, etena aññamaññaṃ accāsannataṃ dīpeti. Sākhāya  
 sākhāṃ phusantā hi dūraṭṭhāpi siyyum, tato ekaṃsato sambhedalakkhaṇaṃ  
 dassitaṃ na siyāti taṃ dassitum viṭapaggahaṇaṃ kataṃ. Evañhi  
 bhikkhūnaṃ nisīditum appahonakaṭṭhānaṃ attano sīmāya antosīmaṭṭhaṃ  
 karitvā purāṇavihāraṃ karonto sīmāya sīmaṃ sambhindati nāma, na tato  
 paranti dassitameva hoti. **Baddhā hotīti** porāṇakavihārasīmaṃ sandhāya  
 vuttaṃ. **Ambanti** aparena samayena purāṇavihāraparikkhepādīnaṃ  
 vinaṭṭhattā aṅānantānaṃ taṃ purāṇasīmāya nimittabhūtaṃ ambhaṃ. Attano  
 sīmāya antosīmaṭṭhaṃ karitvā purāṇavihārasīmaṭṭhaṃ jamburaṃ kittetvā  
 ambajambūnaṃ antare yaṃ ṭhānaṃ, taṃ attano sīmāya pavesetvā  
 bandhantīti attho. Ettha ca purāṇasīmāya nimittabhūtaṃ gāmaṭṭhassa  
 ambarukkhaṃsa antosīmaṭṭhāya jambuyā saha saṃsaṭṭhaviṭapattepi sīmāya  
 bandhanakāle vipatti vā pacchā gāmasīmāya saha sambhedo vā  
 kammavipatti vā na hotīti mukhatova vuttanti veditabbaṃ.

**Padesanti** saṃghassa nisīdanappahonakappadesaṃ. “**Sīmantarikaṃ**  
**ṭhapetvā**”ti-ādinā sambhedajjhottharaṇaṃ akatvā baddhasīmāhi  
 aññamaññaṃ phusāpetvā abyavadhānena baddhāpi sīmā asīmā evāti dasseti.  
 Tasmā ekadvaṅgulamattāpi sīmantarikā vaṭṭati eva. Sā pana dubbodhāti  
 aṭṭhakathāsu caturaṅgulādikā vuttāti daṭṭhabbaṃ. **Dvinnāṃ sīmānanti**  
 dvinnāṃ baddhasīmānaṃ. **Nimittaṃ hotīti** nimittassa sīmato bāhirattā  
 bandhanakāle tāva sambhedadoso natthīti adhippāyo. Na kevalaṅca  
 nimittakattā eva saṅkaraṃ

karoti, atha kho sīmantarikāya ṭhito aññopi rukkho karoti eva. Tasmā appamattikāya sīmantarikāya vaḍḍhanakā rukkhādayo na vaṭṭanti eva. Ettha ca upari dissamānakhandhasākhādipavese eva saṅkaradosassa sabbattha dassitattā adissamānānam mūlānam paveseṇi bhūmigatikattā doso natthīti sījhati. Sace pana mūlānīpi dissamānāneva pavisanti, saṅkarova. Pabbatapāsāṇā pana dissamānāpi bhūmigatikā eva. Yadi pana bandhanakāle eva eko thūlarukkho ubhayampi sīmaṃ āhacca tiṭṭhati, pacchā baddhā asīmā hotīti daṭṭhabbam.

**Sīmāsaṅkaranti** sīmāsambhedam. Yam pana **sāratthadīpaniyam** vuttam “sīmāsaṅkaram karotīti vaḍḍhitvā sīmappadesam pavīṭṭhe dvinnam sīmānam gataṭṭhānassa duviññeyyattā vuttan”<sup>1</sup>, tam na yuttam gāmasīmāyapi saha saṅkaram karotīti vattabbato. Tatthāpi hi nimitte vaḍḍhite gāmasīmābaddhasīmānam gataṭṭhānam dubbiññeyyameva hoti, tattha pana avatvā dvinnam bandhasīmānameva saṅkarassa vuttattā yathāvuttasambaddhadossova saṅkarasaddena vuttoti gahetabbam. Pāḷiyam pana nidānavasena “yesam bhikkhave sīmā pacchā sammata, tesam tam kammam adhammikan”<sup>2</sup>ti-ādinā<sup>2</sup> pacchā sammataya asīmatte vuttepi dvīsu gāmasīmāsu ṭhatvā dvīhi saṅghehi sambhedam vā ajjhottharaṇam vā katvā sīmantarikam aṭṭhapetvā vā rukkhapārohādisambandham aviyojetvā vā ekasmiṃ khaṇe kammavācāniṭṭhāpanavasena ekato sammataṇam dvinnam sīmānampi asīmatā pakāsītāti veditabbam.

Gāmasīmādīkathāvaṇṇanā niṭṭhitā.

### Uposathbedādīkathāvaṇṇanā

149. **Adhammena vagganti** ettha ekasīmāya catūsu bhikkhūsu vijjamānesu pātimokkhuddessoṇa anuññāto, tīsu, dvīsu ca pārisuddhi-uposathova. Idha pana tathā akatattā “adhammē”<sup>1</sup>ti vuttam. Yasmā pana chandapārisuddhi saṅghe eva āgacchati, na gaṇe, na puggale, tasmā “vaggan”<sup>2</sup>ti vuttanti.

1. Sārattha-Ṭī 3. 275 piṭṭhe.

2. Vi 3. 150 piṭṭhe.

Sace pana dve saṅghā ekasīmāya aññamaññaṃ chandaṃ āharitvā ekasmim̐ khaṇe visum̐ saṅghakammaṃ karonti, ettha kathanti? Keci panetaṃ vaṭṭatīti vadanti, taṃ na gahetabbaṃ vaggakammattā. Kammaṃ karontānañhi chandaṃ pārisuddhi aññattha na gacchati tathā vacanābhāvā, visum̐ visum̐ kammakaraṇatthameva sīmāya anuññātattā cāti gahetabbaṃ. Vihārasīmāyaṃ pana saṅghe vijjamānēpi kenaci paccayena khandhasīmāyaṃ tīsu, dvīsu vā pārisuddhi-uposathaṃ karontesu kammaṃ dhammena samaggameva bhinnasīmāṭṭhattāti daṭṭhabbaṃ.

Uposathabhedādikathāvaṇṇanā niṭṭhitā.

### Pātimokkhuddesakathāvaṇṇanā

150. **Evametaṃ dhārayāmīti. Sutā kho panāyasmantehīti** ettha “evametaṃ dhārayāmī”ti vatvā “uddiṭṭhaṃ kho āyasmanto nidānaṃ, sutā kho panāyasmantehi cattāro pārājikā dhammā”ti-ādinā vattabbaṃ. **Mātikāṭṭhakathāyampi**<sup>1</sup> evameva vuttaṃ. **Sutenāti** sutapadena.

**Savarabhayanti** vanacarakabhayaṃ. Tenāha “**aṭavimanussabhayan**”ti. Nidānuddese aniṭṭhite pātimokkhaṃ niddiṭṭhaṃ nāma na hotīti āha “**dutiyādīsu uddesesū**”ti-ādi. **Tīhi** **vidhihīti** osāraṇakathanasarabhaññehi. Ettha ca atthaṃ bhaṇitukāmatāya vā bhaṇāpetukāmatāya vā suttassa osāraṇaṃ **osāraṇaṃ** nāma. Tasseva atthappakāsanā **kathanaṃ** nāma. Kevalaṃ pāṭhasseva sarena bhaṇanaṃ **sarabhaññaṃ** nāma. **Sajjhāyaṃ adhiṭṭhahitvāti** “sajjhāyaṃ karomī”ti cittaṃ uppādetvā. **Osāretvā pana kathentenāti** sayameva pāṭhaṃ vatvā pacchā atthaṃ kathentena.

Pātimokkhuddesakathāvaṇṇanā niṭṭhitā.

### Adhammakammaṭṭikkosādikathāvaṇṇanā

155. **Navavidhanti** saṅghagaṇapuggalesu tayo, suttuddesapārisuddhi-adhiṭṭhānavasena tayo, cātuddasīpannaraśīsāmaggīvasena tayoti navavidhaṃ.

1. Kaṅkhā-Ṭṭha 84 piṭṭhe.

**catubbidhanti** adhammenavaggādi catubbidham. **Duvidhanti** bhikkhubhikkhunipātimokkhavasena duvidham pātimokkham. **Navavidhanti** bhikkhūnam pañca, bhikkhunīnam cattāroti navavidham pātimokkhuddesam.

Adhammakammaṭṭikkosanādikathāvaṇṇanā niṭṭhitā.

**Pakkhagaṇanādi-uggahaṇānujānanakathādivaṇṇanā**

156. **Katimīti** tithi-saddāpekkham itthiliṅgam daṭṭhabbam.

163. **Utuvasseyevāti** hemantagimhesuyeva.

164. **Viññāpetīti** ettha manasā cintetvā kāyavikāraṇameva viññāpananti daṭṭhabbam. Pāḷiyam **aññassa dātabbā pārisuddhīti** pārisuddhidāyakena puna aññassa bhikkhuno santike dātabbā. **“Bhūtaṃyeva vā sāmaṇerabhāvaṃ ārocetī”**ti vuttattā ūnavīsativassakāle upasampannassa, antimavatthu-ajjhāpannasikkhāpaccakkhātādīnam vā yāva bhikkhupaṭiññā vattati, tāva tehi āhaṭāpi chandapārisuddhi āgacchati. Yadā pana te attano sāmaṇerādibhāvaṃ paṭijānanti, tato paṭṭhāyeva nāgacchatīti dassitanti daṭṭhabbam. Pāḷiyampi hi “dinnāya pārisuddhiyā saṃghappatto vibbhamati -pa- paṇḍako paṭijānāti. Tiracchānagato paṭijānāti. Ubhatobyañjanako paṭijānāti, āhaṭā hoti pārisuddhī”ti vuttattā paṇḍakādīnampi bhikkhu paṭiññāya vattamānakālesu chandapārisuddhiyā āgamanam siddhameva. Tenāha **“esa nayo sabbatthā”**ti. Ummattakakhittacittavedanāṭṭānam pana pakatattā antarāmagge ummattakādibhāve paṭiññātepi tesam saṃghappattamatteneva chandādi āgacchatīti daṭṭhabbam.

**“Bhikkhūnam hatthapāsan”**ti iminā gaṇapuggalesu chandapārisuddhiyā anāgamanam dasseti. “Saṃghappatto”ti hi pāḷiyam vuttam.

**Biḷālasaṅkhalikapārisuddhīti** biḷālagīvāya bandhanasaṅkhalikasadisā pārisuddhi nāma, yathā saṅkhalikā biḷāle āgacchante eva āgacchati, na anāgacchante tappaṭibaddhattā, evamayam pārisuddhipīti attho. Atha vā yathā saṅkhalikāya paṭhamavalayam

dutiyavalayaṃ pāpuṇāti, na tatiyavalayaṃ, evamayampīti adhippāyo.  
Upalakkhaṇamattañcetta biḷālaggaṇaṃ daṭṭhabbā.

Pakkhagaṇanādi-uggahaṇānujānanakathādivaṇṇanā niṭṭhitā.

### Chandadānakathādivaṇṇanā

165. Pāḷiyaṃ “santi saṃghassa karaṇīyānī”ti vattabbe vacanavipallāsena  
“**karaṇīyan**”ti vuttam.

167. “**Tassa sammutidānakiccaṃ natthī**”ti idaṃ pāḷiyaṃ ekadā  
sarantasseva sammutidānassa vuttattā ekadā asarantassa sammuti-abhāvepi  
tassa anāgamaṇaṃ vaggakammāya na hotīti vuttam. Keci pana “sopi  
hatthapāseva ānetabbo”ti vadanti, taṃ na gahetabbā.

168. Saṃghasannipātato paṭhamam kātabbāṃ **pubbakaraṇam**.  
Saṃghasannipāte kātabbāṃ **pubbakiccanti** daṭṭhabbāṃ. Pāḷiyaṃ **no ce  
adhiṭṭhaheyya, āpatti dukkaṭassāti** ettha asaṅcicca asatiyā anāpatti. Yathā  
cetta, evaṃ uparipi. Yattha pana acittakāpatti atthi, tattha vakkhāma.

169. “**Paññattaṃ hotī**”ti iminā “na sāpattikena uposatho kātabbo”ti  
visuṃ paṭikkhepābhāvepi yathāvuttasuttasāmatthiyato paññattamevāti  
dasseti. Iminā eva nayena—

“Aṭṭhānametaṃ bhikkhave anavakāso yaṃ tathāgato aparisuddhāya  
parisāya uposatham kareyya, pātimokkham uddiseyyā”ti<sup>1</sup>—

ādisuttanayato ca alajjīhipi saddhim uposathakaraṇampi paṭikkhittameva  
alajjiniggahatthattā sabbasikkhāpadānanti daṭṭhabbāṃ.

“**Pārisuddhidānapaññāpanenā**”ti iminā sāpattikena pārisuddhipi na dātabbāti  
dīpitaṃ hoti. **Ubhopi dukkaṭanti** ettha sabhāgāpattibhāvaṃ ajānitvā kevalam  
āpattināmeneva desentassa paṭiggaṇhantassa acittakameva dukkaṭam hotīti

1. Vi 4. 424; Am 3. 45; Khu 1. 139 piṭṭhesu.

vadanti. Yathā saṅgho sabhāgāpattim āpanno ñattim ṭhapetvā uposatham kātum labhati, evaṃ tayopi “suṇantu me āyasmantā ime bhikkhū sabhāgam āpattim āpannā”ti-ādinā vuttanayānusārenea gaṇañattim ṭhapetvā dvīhi aññamaññam ārocetvā uposatham kātum vaṭṭati. Ekena pana sāpattikena dūram gantvāpi paṭikātumeva vaṭṭati, asampāpuṇantena “bhikkhum labhitvā paṭikarissāmī”ti uposatho kātabbo, paṭikarivā ca puna uposatho kattabbo.

Chandadānakathādivaṇṇanā niṭṭhitā.

### Anāpattipannarasakādikathāvaṇṇanā

172. **Kenaci karaṇīyena** gantvāti sīmāparicchedato bahibhūtam gāmaṃ vā araṇṇam vā gantvāti attho. Eteneva uposathañattiyā ṭhapanakāle samaggā eva te ñattim ṭhapesunti siddham. Teneva pāḷiyam “uddiṭṭham su-uddiṭṭhan”ti sabbapannarasakesupi vuttam. **Vaggā samaggasaññinoti**-ādi pana ñattiyā niṭṭhitāya “kim saṅghassa pubbakiccan”ti-ādīnam<sup>1</sup> vacanakkhaṇe bahigatānam bhikkhūnam sīmāya pavitṭhattā bhikkhū tasmim khaṇe vaggā hontīti vuttam. Tenāha “**tesam sīmam okkantattā vaggā**”ti-ādi, etena pārājikuddesādikkhaṇepi vaggasaññīnam uddisantānam āpatti eva, ñattiyā pana pubbe niṭṭhitattā kammakopo natthīti dassitameva hoti. Evaṃ uparipi sabbavāresu adhippāyo veditabbo.

Ettha ca pāḷiyam “sabbāya vuṭṭhitāya -pa- tesam santike pārisuddhi ārocetabbā”ti<sup>2</sup> vuttattā bahisīmāgatāya parisāya tesu yassa kassaci santike anadhiṭṭhitehi pārisuddhim ārocetum vaṭṭatīti vadanti.

Anāpattipannarasakādikathāvaṇṇanā niṭṭhitā.

1. Vi 3. 140 piṭṭhe.

2. Vi 3. 178 piṭṭhe.

### Liṅgādidassanakathādivaṇṇanā

179. Aññātakam nāma aditṭhapubbanti āha “**aññesam santakan**”ti. **Aññesanti** attanā aditṭhapubbānam. **Nānāsamvāsakabhāvanti** laddhinānāsamvāsakabhāvam.

180. Pāliyam **abhivitaranti** samānasamvāsakābhāvam nicchinanti.

181. **Uposathakārakāti** saṅghuposathakārakā. Teneva “**aññatra saṅghenā**”ti vuttam. Saṅghuposathaṭṭhānato hi gacchantena attacattteneva gantabam, tiṇṇam bhikkhūnam nisinnaṭṭhānato pana gacchantena ekena bhikkhunāpi saha gantumpi vaṭṭati. Pāliyam “**abhikkhuko āvāso**”ti idam nidassanamattam, saṅghuposathaṭṭhānato gaṇapuggalehi sabhikkhukopi āvāso na gantabbo “**aññatra saṅghenā**”ti vuttattāti vadanti. **Uposatham karontīti** saṅghuposatham vāgaṇuposatham vā. “**Tassa santikan**”ti idam gaṇuposathaṭṭhānato gacchantam sandhāya vuttam, aññathā “**sabbantimena paricchena attacattthena vā**”ti vacanena virujjhanato. **Āraññakenāti** ekacārinā. **Uposathantarāyoti** attano uposathantarāyo.

183. Pāliyam **bhikkhuniyā nisinnaparisāyāti**-ādīsu **bhikkhuniyāti**-ādi karaṇatthe sāmivacanam.

Liṅgādidassanakathādivaṇṇanā niṭṭhitā.

Uposathakkhandhakavaṇṇanānayo niṭṭhito.



### 3. Vassūpanāyikakkhandhaka

#### Vassūpanāyika-anujānanakathādivaṇṇanā

184. Vassūpanāyikakkhandhake **aparasmim divaseti** dutiye pāṭipadadivase.

185. **Aññattha aruṇam uṭṭhāpanena vāti** sāpekkhassa akaraṇīyena gantvā aññattha aruṇam uṭṭhāpanena vā. **Parihānīti** guṇaparihāni.

187. Pāliyam **sattāham sannivatto kātabboti** sakalam sattāham bahi eva avītināmetvā sattāhapariyosānabhūtam aruṇuṭṭhānakālam puna vihāreva sambandhavasena sattāham vihāre sannivattam kātabbam. Sattāhapariyosānakālo hi idha sattāhasaddena vutto, tadapekkhāya ca “sannivatto”ti pulliṅgena vuttam. **Tiṇi parihīnānīti** bhikkhunīnam vaccakuṭi-ādīnam paṭikkhittatā parihīnāni.

189. **Na palujjatīti** aññesam appaguṇattā, mama ca maraṇena na vinassati.

Vassūpanāyika-anujānanakathādivaṇṇanā niṭṭhitā.

#### Pahiteyeva-anujānanakathāvaṇṇanā

199. **Bhikkhūhi saddhim vasanakapurisoti** anaññagatikoti dasseti. **Gantabbanti** saṅghakaraṇīyena appahitepi gantabbam. Ettha ca anupāsakehipi sāsanaabhāvam ñātukāmehi pahite tesam pasādavaḍḍhim sampassantehipi sattāhakaraṇīyena gantum vaṭṭatīti gahetabbam.

**Ratticchedavinicchayoti** sattāhakaraṇīyena gantvā bahiddhā aruṇuṭṭhāpanasankhātassa ratticchedassa vinicchayo. **Gantum vaṭṭatīti** anto-upacārasīmāyam ṭhiteneva sattāhakaraṇīyanimittam sallakkhetvā iminā nimittena gantvā “antosattāhe āgacchissāmī”ti ābhogaṃ katvā gantum vaṭṭati. Purimakkaṇe ābhogaṃ katvā gamanakkhaṇe vissaritvā gatepi

doso natthi “sakaṇṇiyo pakkamatī”<sup>1</sup>ti vuttattā. Sabbathā pana ābhogaṃ akatvā gatassa vassacchedoti vadanti. Yo pana sattāhakaraṇiyanimittābhāvepi “sattāhabbhantare āgamissāmi”ti ābhogaṃ katvā gantvā sattāhabbhantare āgacchati, tassa āpattiyeva, vassacchedo natthi sattāhassa sannivattattāti vadanti. Vīmaṃsitvā gahetabbaṃ. **Bhaṇḍakanti** cīvarabhaṇḍaṃ. **Sampāpuṇitum na sakkoti, vaṭṭatīti** tadaheva āgamane sa-ussāhattā vassacchedo vā āpatti vā na hotīti adhippāyo. **Ācariyanti** agilānampi nissayācariyañca dhammācariyañca, pageva upasampadācariya-upajjhāyesu. **Vadati, vaṭṭatīti** sattāhātikkame āpatti-abhāvaṃ sandhāya vuttaṃ, vassacchedo pana hoti eva.

Pahiteyeva-anujānanakathāvaṇṇanā niṭṭhitā.

### Antarāye anāpattivassacchedakathāvaṇṇanā

200. Pāliyaṃ **gaṇhimsūti** gahetvā khādiṃsu. **Paripātimsūti** palāpesuṃ, anubandhimsūti attho.

201. **Sattāhavārena aruṇo uṭṭhāpetabboti** ettha chadivasāni bahiddhā vītināmetvā sattame divase purāruṇā eva anto-upacārasīmāya pavisitvā aruṇaṃ uṭṭhāpetvā punadivase sattāhaṃ adhiṭṭhāya gantabbanti adhippāyo. Keci pana “sattame divase āgantvā aruṇaṃ anuṭṭhāpetvā tadaheva divasabhāgepi gantum vaṭṭatī”ti vadanti, taṃ na gahetabbaṃ “aruṇo uṭṭhāpetabbo”ti vuttattā. Sattame divase tattha aruṇuṭṭhāpanameva hi sandhāya pāliyaṃpi “sattāhaṃ sannivatto kātabbo”ti vuttaṃ. Aruṇaṃ anuṭṭhāpetvā gacchanto anto appavisitvā bahiddhāva sattāhaṃ vītināmentena samucchinnavasso eva bhavissati aruṇassa bahi eva uṭṭhāpitattā. Itarathā “aruṇo uṭṭhāpetabbo”ti vacanaṃ niratthakaṃ siyā “sattāhavārena antovihāre pavisitvā aruṇaṃ anuṭṭhāpetvāpi gantabban”ti vattabbato. Aññesu ca ṭhānesu aruṇuṭṭhāpanameva vuccati. Vakkhati hi **cīvarakkhandhake** “ekasmim vihāre vasanto itarasmim sattāhavārena aruṇameva uṭṭhāpeti”<sup>2</sup>ti.

1. Vi 3. 214 piṭṭhe.

2. Vi-Ṭṭha 3. 413 piṭṭhe.

Athāpi yaṃ te vadeyyuṃ “sattame divase yadā kadāci pavīṭṭhena taṃdivasanissito atīta-arūṇo uṭṭhāpito nāma hotīti imamatthaṃ sandhāya **aṭṭhakathāyaṃ** vuttan”ti, taṃ saddagatiyāpi na sameti. Na hi uṭṭhite aruṇe pacchā pavīṭṭho tassa payojako uṭṭhāpako bhavitumarahati. Yadi bhaveyya, vassaṃ upagantvā panassa aruṇaṃ anuṭṭhāpetvā tadaheva sattāhakaraṇīyena pakkantassāpīti ettha “aruṇaṃ anuṭṭhāpetvā”ti vacanaṃ virujjheyya, tenapi taṃdivasasannissitassa aruṇassa uṭṭhāpitattā. Āraññakassāpi hi bhikkhuno sāyanhasamaye aṅgayuttaṃ araññāṭṭhānaṃ gantvā tadā eva nivattantassa aruṇo uṭṭhāpito dhutaṅgañca visodhitaṃ siyā, na cetāṃ yuttaṃ aruṇuggamanakāle eva aruṇuṭṭhāpanassa vuttattā. Vuttañhi “kālasseva pana nikkhamitvā aṅgayutte ṭhāne aruṇaṃ uṭṭhāpetabbaṃ. Sace aruṇuṭṭhānavelāyaṃ tesāṃ ābādho vadḍhati, tesāṃ eva kiccaṃ kātabbaṃ, na dhutaṅgavisuddhikena bhavitabban”ti<sup>1</sup>. Tathā pārivāsikādīnampi aruṇaṃ anuṭṭhāpetvā vattaṃ nikkhipantānaṃ ratticchedo vutto. “Uggate aruṇe nikkhipitabban”ti<sup>2</sup> hi vuttaṃ. Sahaseyyasikkhāpadehi anupasampannehi saha nivutthabhāvaparimocanattaṃ “purāruṇā nikkhamitvā”ti-ādi vuttaṃ. Evaṃ cīvaravippavāsādisu ca sabbattha rattipariyosāne āgāmi-arūṇavaseneva aruṇuṭṭhāpanaṃ dassitaṃ, na atītāruṇavasena. Tasmā vuttanayenevettha aruṇuṭṭhāpanaṃ veditabbaṃ aññathā vassacchedattā.

Yaṃ pana vassaṃ upagatassa tadaheva aruṇaṃ anuṭṭhāpetvā sakaraṇīyassa pakkamanavacanaṃ, taṃ vassaṃ upagatakālato paṭṭhāya yadā kadāci nimitte sati gamanassa anuññātattā yuttaṃ, na pana sattāhavārena gatassa aruṇaṃ anuṭṭhāpetvā tadaheva gamanaṃ “aruṇo uṭṭhāpetabbo”ti vuttattā eva. Yathā vā “sattāhaṃ anāgatāya pavāraṇāya sakaraṇīyo pakkamati, āgaccheyya vā so bhikkhave bhikkhu taṃ āvāsaṃ, na vā āgacchayyā”ti-ādinā<sup>3</sup> pacchimasattāhe anāgamane anuññātepi aññasattāhesu na vaṭṭati. Evaṃ paṭṭhamasattāhe aruṇaṃ anuṭṭhāpetvā gamane anuññātepi tato paresu sattāhesu āgatassa aruṇaṃ

---

1. Visuddhi 1. 70 piṭṭhe.

2. Vi-Ṭṭha 4. 17 piṭṭhe.

3. Vi 3. 216 piṭṭhe.

anuṭṭhāpetvā gamanaṃ na vaṭṭatīti niṭṭhamettha gantabbaṃ. **Idha āhaṭanti** vihārato bahi āgataṭṭhāne ānītaṃ.

Antarāye anāpattivassacchedakathāvaṇṇanā niṭṭhitā.

### Vajāḍīsu vassūpagamanakathāvaṇṇanā

203. **Upagantum na vaṭṭatīti** kuṭikādīnaṃ abhāvena “idha vassaṃ upemi”ti evaṃ vacībhedaṃ katvā upagantum na vaṭṭati.

204. Pāliyaṃ **pisācillikāti** pisācadārakā. **Pavisanadvāraṃ yojetvāti** sakavāṭadvāraṃ katvā. **Rukkhaṃ chinditvāti** susiraṭṭhānassa uparibhāgaṃ chinditvā. **Khāṇumatthaketi** susirakhāṇumatthake. **Ṭaṅkitamaṅco** nāma dīghe maṅcapāde vijjhivā aṭaniyo pavevetvā kato, so heṭṭhupariyavasena paññattopi purimasadisova hoti, taṃ susāne, devatāṭṭhāne ca ṭhapenti. Catunnaṃ pāsāṇānaṃ upari pāsāṇaphalake attharivā katagehampi “ṭaṅkitamaṅco”ti vuccati.

Vajāḍīsuvassūpagamanakathāvaṇṇanā niṭṭhitā.

### Adhammikakatikādīkathāvaṇṇanā

205. **Mahāvibhaṅgeti** catutthapārājikavaṇṇanāyaṃ<sup>1</sup>. Parato senāsanakkhandhakepi adhammikaṃ katikavattaṃ āvi bhavissati eva.

207. Yasmā nānāsīmāyaṃ dvīsu āvāsesu vassaṃ upagacchantassa “dutiye vasissāmi”ti upacārato nikkhantamatte paṭhamo senāsanaggāho paṭippassambhati. Tasmā pāliyaṃ “tassa bhikkhave bhikkhuno purimikā ca na paññāyati”ti paṭhamāṃ senāsanaggāhaṃ sandhāya vuttaṃ. Dutiye senāsanaggāhe pana purimikā paññāyateva, tattheva temāsaṃ vasanto

1. Vi-Ṭṭha 2. 95 piṭṭhe.

purimavassaṃvuttho eva hoti, tato vā pana dutiyadivasādīsu  
 “paṭhamasenāsane vasissāmī”ti upacārātikame purimikāpi na paññāyatīti  
 daṭṭhabbam.

208. Pāḷiyam “so sattāham anāgatāya pavāraṇāya sakaraṇīyo  
 pakkamatī”ti vuttattā pavāraṇādivasepi sattāhakarāṇīyam vinā gantum na  
 vaṭṭatīti veditabbam. **Komudiyā cātumāsiniyāti** pacchimakattikapuṇṇamāya.  
 Sā hi tasmim kāle kumudānam atthitāya **komudī**, catunnam vassikamāsānam  
 pariyośanattā **cātumāsini**ti ca vuccati.

Adhammikakatikādikathāvaṇṇanā niṭṭhitā.

Vassūpanāyikakkhandhakavaṇṇanānayo niṭṭhito.

## 4. Pavāraṇākkhandhaka

### Aphāsuvihāarakathādivaṇṇanā

209. Pavāraṇākkhandhake pāḷiyam **piṇḍāya paṭikkameyyā**ti piṇḍāya caritvā paṭikkameyya. **Avakkārapātinti** atireka piṇḍapātaṭhapanakam ekam bhājanam. **Avisayhanti** ukkhipitum asakkuṇeyyam. Vilaṅghanam ukkhipanam vilaṅgho, so eva vilaṅghako, hatthehi vilaṅghako hatthavilaṅghakoti āha “**hatthukkhepakenā**”ti. Atha vā vilaṅghakena ukkhepakena hatthanātipi attho, aññamaññam samsibbitahatthehīti vuttam hoti.

213. **Sace pana vuḍḍhataro hotīti** pavāraṇādāyako bhikkhu vuḍḍhataro hoti. **Evañhi tena tassatthāya pavāritam hotīti** ettha evam tena appavāritopi tassa saṅghapattimattena saṅghapavāraṇākammam samaggakammameva hotīti daṭṭhabbam. **Tena ca bhikkhunāti** pavāraṇādāyakena bhikkhunā.

234. **Bahūpi samānavassā ekato pavāretum labhantīti** ekasmim samvacchare laddhūpasampadatāya samānupasampannavassā sabbe ekato pavāretum labhantīti attho.

237. Pāḷiyam **micchādīṭṭhīti** “natthi dinnan”ti-ādi<sup>1</sup> nayappavattā. **Antaggāhikāti** sassatucchedasankhātassa antassa gāhikā. **Yam kho tvanti-ādīsu** yam pavāraṇam ṭhapesi, tam diṭṭhena ṭhapesīti tam-saddam ajjhāharitvā yojetabbam.

239. **Vatthum pakāsentoti** puggale parisankuppattiyā nimittabhūtam vatthumattamyeva sandhāya vuttam. Yam pana vatthum sandhāya “puggalo paññāyati, na vatthū”ti āha, na tam sandhāyetam vuttam. Yadi pana tassa bhikkhuno vasanaṭṭhāne pokkharanito macchaggahaṇādi disseyya, tadā “vatthu ca puggalo ca paññāyati”ti vattabbam bhaveyya. Tenāha “**purimanayeneva corehī**”ti-ādi. Bhikkhuno sarīre mālāgandhañca ariṭṭhagandhañca disvā evam “vatthu ca puggalo ca paññāyati”ti vuttanti vedītabbam.

Aphāsuvihāarakathādivaṇṇanā niṭṭhitā.

---

1. Dī 1. 51; Ma 1. 362; Ma 2. 63, 64, 182; Ma 3. 72, 99, 116; Saṃ 2. 169; Abhi 1. 241 piṭṭhādīsu.

### Bhaṇḍanakāarakavatthukathāvaṇṇanā

240. **Dve cā tuddasikā hontīti** tatiyapakkhe cātuddasiyā saddhim dve cātuddasikā honti. **“Bhaṇḍanakāarakānam terase vā cātuddase vā ime pannarasīpavāraṇam pavāressantī”**ti iminā yathāsakam uposathakaraṇadivasato paṭṭhāya bhikkhūnam cātuddasīpannarasīvohāro, na candagatisiddhiyā tithiyā vasenāti dasseti. Kiñcāpi evaṃ “**anujānāmi bhikkhave rājūnam anuvattitun**”<sup>1</sup>ti vacanato panettha lokiyānam tithim anuvattantehipi attano uposathakkamena cātuddasim pannarasim vā, pannarasim cātuddasim vā karonteheva anuvattitabbam, na pana soḷasamadivasam vā terasamadivasam vā uposathadivasam karontehi. Teneva pāḷiyampi “**dve tayo uposathe cātuddasike kātun**”ti vuttam. Aññathā dvādasiyam, terasiyam vā uposatho kātabboti vattabbato. “**Sakim pakkhassa cātuddase, pannarase vā**”ti-ādivacanampi upavutthakkameneva vuttam, na tithikkamenāti gahetabbam.

Bhaṇḍanakāarakavatthukathāvaṇṇanā niṭṭhitā.

### Pavāraṇāsaṅgahakathāvaṇṇanā

241. **“Pavāretvā pana antarāpi cārikam pakkamitum labhantī”**ti iminā pavāraṇāsaṅgahe kate antarā pakkamitukāmā saṅgham sannipātāpetvā pavāretum labhantīti dasseti.

Pavāraṇāsaṅgahakathāvaṇṇanā niṭṭhitā.

Pavāraṇākkhandhakavaṇṇanānayo niṭṭhito.

## 5. Cammakkhandhaka

### Soṇakoḷivisakathādivaṇṇanā

242. Cammakkhandhake **uṇṇapāvāraṇanti** ubhato lomāni uṭṭhāpetvā kataṃ uṇṇamayam pāvāraṇam, ubhato kappāsapicum uppāsapicum uṭṭhāpetvā vītapāvāropi atthi, tato nivattanattham “uṇṇapāvāraṇan”ti vuttam.

**Aḍḍhacandapāsāṇeti** sopānamūle upaḍḍham anto pavesetvā ṭhapite aḍḍhapāsāṇe. Pāḷiyam **vihārapacchāyāyanti** vihārapaccante chāyāya, vihārassa vaḍḍhamānacchāyāyantipi vadanti.

243. **Bhogāti** upayogathe paccattavacanam. **Accāyatāti** ati-āyatā kharamucchanā. **Saravatīti** madhurasarasamyuttā. **Atisithilā** mandamucchanā. **Vīriyasamathanti** vīriyasampayuttasamatham. **Tattha ca nimittam gaṇhāhīti** tasmīṇca samabhāve sati yaṃ ādāse mukhanimittam viya nimittam uppajjati, taṃ samathanimittam, vipassanānimittam, magganimittam, phalanimittāṇca gaṇhāhi nibbattehīti, evamassa arahattapariyosānam kammaṭṭhānam kathitam.

244. **Chaṭṭhānānīti** cha kāraṇāni. **Adhimuttoti** paṭivijjhivā ṭhito. **Nekkhammādhimuttoti**-ādi sabbam arahattavasena vuttam. Arahattañhi sabbakilesehi nikkhantattā **nekkhammam**, teheva ca pavivittattā **paviveko**, byāpajjābhāvato **abyāpajjam**, upādānassa khayante uppannattā **upādānakkhayo**, taṇhakkhayante uppannattā **taṇhakkhayo**, sammohābhāvato **asammohoti** ca vuccati.

**Kevalam saddhāmattakanti** kevalam paṭivedhapaññāya asammissam saddhāmattakam. **Paṭicayanti** punappunam karaṇena vaḍḍhim. **Vītarāgattāti** maggapaṭivedhena rāgassa vigatattā eva nekkhammasaṅkhātam arahattam paṭivijjhivā sacchikatvā ṭhito hoti. Sesapadesupi eseva nayo. **Pavivekādhimuttoti** “paviveke adhimutto ahan”ti eva arahattam byākarotīti attho.

**Sīlabbataparāmāsanti** sīlaṇca vataṇca parāmasitvā gahitaggahaṇamattam. **Sārato paccāgacchantoti** sārabhāvena jānanto. **Abyāvajjādhimuttoti** abyāpajjam arahattam byākaroti.



**Amissīkatanti** amissakatam. Kilesā hi ārammaṇena saddhim cittam missam karonti, tesam abhāvā amissīkatam. **Bhusā vātavuṭṭhīti** balavavātakhandho.

**Upādānakkhayassa cāti** upayogathe sāmivacanam. **Disvā āyatanuppādanti** cakkhādi-āyatanānam uppādañca vayañca disvā. **Cittam vimuccatīti** imāya vipassanāpaṭipattiyā phalasangāpattivasena cittam vimuccati.

Soṇakoḷivisaṅkathādivaṇṇanā niṭṭhitā.

### Diguṇādi-upāhanapaṭikkhepakathāvaṇṇanā

245. **Sakaṭavāheti** dvīhi sakaṭehi paricchinne vāhe. “**Vāhe**”ti bahuvacanassa hiraññavisesanattepi sāmāññāpekkhāya “hiraññan”ti ekavacanam katam.

246. **Addāriṭṭhati** allāriṭṭhaphalavaṇṇā, tintakākapakkhavaṇṇātipi vadanti. **Rajananti** upalittam nīlādivaṇṇam sandhāya vuttam. Tenāha “**colakena puñchivā**”ti. Tañhi tathā puñchite vigacchati. Yam pana cammassa duggandhāpanayanattham kāḷarattādirajanehi rañjitattā kāḷarattādivaṇṇam hoti, tam colādīhi apānetum na sakkā cammagatikameva, tasmā tam vaṭṭatīti daṭṭhabbam.

**Khallakanti** sabbapaṇhipidhānacammaṃ, aparigaḷanattham paṇhi-uparibhāge apidhāya āropanabandhanamattam vaṭṭati. **Vicitrāti** saṅghānato vicitrapaṭā<sup>1</sup> adhippetā, na vaṇṇato sabbaso apānetabbesu khallakādīsu pavīṭṭhattā. Biḷālasadisamukhattā mahā-ulūkā “**pakkhibiḷālā**”ti vuccati, tesam cammam nāma pakkhalomameva.

Diguṇādi-upāhanapaṭikkhepakathāvaṇṇanā niṭṭhitā.

---

1. Vicitrabaddhā (Ka)

### Ajjhārāme upāhanapaṭikkhepakathādivaṇṇanā

251. **Uṇṇāhi katapādukā**ti ettha uṇṇāmayakambalehi katā pādukā saṅgayhanti.

253. **Gaṅgāmahakīlikāyā**ti gaṅgāmahe kīlikāya. Tattha hi itthipurisā yānehi udakakīlaṃ gacchanti. **Piṭhakasivikanti** phalakādīnā kataṃ piṭhakayānaṃ. **Paṭapotalikam** andolikā<sup>1</sup>. Sabbampi yānaṃ upāhanenapi gantum asamatthassa gilānassa anuññātaṃ.

254. **Vālarūpānī**ti āharimāni vālarūpāni. **Caturaṅgulādhikānī**ti uddalomī-ekantalomīhi visesadassanaṃ. Caturaṅgulato hi ūnāni kira uddalomī-ādīsu pavisanti. **Vānacitro uṇṇāmayattharaṇoti** nānāvaṇṇehi uṇṇāmayasuttehi bhitticchedādivasena vāyitvā katacittattharaṇo. **Ghanapupphakoti** bahalarāgo. **Pakatitūlikā**ti tūlapuṇṇā bhiṣi. **Vikatikā**ti sīharūpādivasena vānacitrāva<sup>2</sup> gayhati. **Uddalomī**ti “ubhatodasaṃ uṇṇāmayattharaṇaṃ”ti<sup>3</sup> **dīghanikāyaṭṭhakathāyaṃ** vuttaṃ. **Koseyyakaṭṭissamayanti** kosiyasuttānaṃ antarā suvaṇṇamayassuttāni pavesetvā vitāṃ. Suvaṇṇasuttam kira “kaṭṭissaṃ, kasaṭaṃ”ti ca vuccati. Teneva “koseyyakasaṭamayaṃ”ti **ācariyadhammapālattherena** vuttanti vadanti. **Ratanaparisibbitanti** suvaṇṇalittaṃ. **Suddhakoseyyanti** ratanaparisibbanarahaṭṭitaṃ.

Ajinamigacammānaṃ atisukhumattā dupaṭṭatipaṭṭāni katvā sibbantīti vuttaṃ “**ajinappaveṇī**”ti. **Rattavitānenā**ti sabbarattena vitānena. Yaṃ pana nānāvaṇṇaṃ vānacittaṃ vā lepacittaṃ vā, taṃ vaṭṭati. **Ubhatolohitakūpadhānepi** eseva nayo. “**Citraṃvā**”ti idaṃ pana sabbathā kappiyattā vuttaṃ, na pana ubhato upadhānesu akappiyattā. Na hi lohita-kasaddo citte vattati, paṭaliggahaṇeneva cittakassapi attharaṇassa saṅgahetabbappasaṅgato, kāsāvaṃ pana lohita-kavohāraṃ na gacchati. Tasmā vitānepi ubhato-upadhānepi vaṭṭati. **Sace pamāṇayuttanti**-ādi aññappamāṇātikantassa bibbohanassa paṭikkhittabhāvadassanatthaṃ vuttaṃ, na pana uccāsayanamahāsayanabhāvadassanatthaṃ tathā avuttattā. Taṃ pana upadhānaṃ

1. Antolikā (katthaci), anolikā (Ka) 2. Vā ratanacitrāva (Ka)3. Dī-Ṭṭha 1. 83 piṭṭhe.

uposathikānaṃ gahaṭṭhānaṃ vaṭṭati. Uccāsayanamahāsayanameva hi tadā tesam na vaṭṭati. **Dīghanikāyaṭṭhakathā**disu<sup>1</sup> kiñcāpi “ṭhapetvā tūlikam sabbāneva gonakādīni ratanaparisisbbitāni vaṭṭantī”<sup>2</sup>ti-ādi<sup>2</sup> vuttam, vinayaṭṭhakathāyeva kappiyākappiyabhāve pamāṇanti gahetabbaṃ.

Ajjhārāme upāhanapaṭikkhepakathādivaṇṇanā niṭṭhitā.

### Gihivikatānuññātādikathāvaṇṇanā

256. **Abhinissāyāti** apassāya. **Visukāyikavipphanditānanti** paṭipakkhabhūtānaṃ diṭṭhicittavipphanditānanti attho.

257. **Yatindriyanti** manindriyavasena saññatindriyaṃ.

258. Pāḷiyam **aṭṭhakavaggikānīti** **suttanipāte**<sup>3</sup> aṭṭhakavaggabhūtāni soḷasa suttāni. **Evam ciraṃ akāsīti** evam cirakālam pabbajjam anupagantvā agāramajjhe kena kāraṇena vāsamakāsīti attho. So kira majjhimavaye pabbajito, tena bhagavā evamāha. **Etamatthaṃ viditvāti** kāmesu diṭṭhādīnavā cirāyitvāpi gharāvāsena pakkhandantīti etamatthaṃ sabbākārato viditvā.

**Ādīnavam loketi** saṅkhāraloke aniccatādi-ādīnavam. **Nirupadhinti** nibbānaṃ. “Ariyo na ramatī pāpe”<sup>2</sup>ti imassa hetumāha “**pāpe na ramatī sūci**”<sup>2</sup>ti. Tattha **sucīti** visuddhapuggalo.

259. **Kālasīhoti** kālamukhavānaraajāti. **Cammaṃ na vaṭṭatīti** nisīdanattharaṇam kātuṃ na vaṭṭati, bhūmattharaṇādivasena senāsanaparibhogo vaṭṭateva.

Gihivikatānuññātādikathāvaṇṇanā niṭṭhitā.

Cammakkhandhakavaṇṇanānayo niṭṭhito.

1. Dī-Ṭṭha 1. 83 piṭṭhe.

2. Na vaṭṭantīti-ādi (Sī), Vajira-Ṭī 477 piṭṭhe passitabbaṃ.

3. Khu 1. 399 piṭṭhe.

## 6. Bhesajjakkhandhaka

### Pañcabhesajjādīkathāvaṇṇanā

260. Bhesajjakkhandhake **pittam koṭṭhabbhantaragataṃ hotīti** bahisarīre byāpetvā ṭhitam abaddhapittam koṭṭhabbhantaragataṃ hoti, tena pittaṃ kupitam hotīti adhippāyo.

261-2. Pāḷiyam **nacchādentīti** rucim na uppādentī. **Susukāti** samudde ekā macchajāti, kumbhilātipi vadanti. **Samsatṭhanti** parissāvitaṃ.

263. **Piṭṭhehīti** pisitehi. **Kasāvehīti** tacādīni udae tāpetvā gahita-ūsarehi. **Ubbhidanti** ūsarapaṃsumayaṃ<sup>1</sup>. **Loṇabilanti** loṇaviseso.

264-5. **Chakaṇanti** gomayaṃ. **pākatikacuṇṇanti** apakkakasāvacuṇṇam, gandhacuṇṇam pana na vaṭṭati. Pāḷiyam **cunṇacālininti** udukkhale koṭṭitacuṇṇaparisāvaniṃ. **Suvaṇṇagerukoti** suvaṇṇatutthādi. Pāḷiyam **añjanūpapisananti** añjane upanetuṃ pisitabbabhesajjam.

267-9. **Kabalīkāti** upanāhabhesajjam. **Gharadinnakābādho** nāma gharañiyā dinnavasīkaraṇabhesajjasamuṭṭhita-ābādho. **Tāya chārikāya paggharitam khārodakanti** parissāvane tacchārikaṃ pakkhipitvā udae abhisīñcite tato chārikato hetṭhā paggharitam khārodakam. Pāḷiyam **akaṭayūsenāti** anabhisāṅkhātena muggayūsenā. **Kaṭākaṭenāti** mugge pacitvā acāletvā parissāvitenā muggayūsenāti vadanti.

Pañcabhesajjādīkathāvaṇṇanā niṭṭhitā.

---

1. Usadapaṃsumayaṃ (Sī)

### Guḷādi-anujānanakathāvaṇṇanā

272-4. **Guḷakaraṇanti** ucchusālaṃ. **Avissatthāti**<sup>1</sup> sāsāṅkā.

276. **Appamattakepi vārentīti** appamattake dinne dāyakānaṃ pīḷāti paṭikkhipanti. **Paṭisaṅkhāpīti** ettakenapi yāpetuṃ sakkā, “avasesaṃ aññesaṃ hotū”ti sallakkhetvāpi paṭikkhipanti.

279. **Vatthipīlananti** yathā vatthigatatelādi antosarīre ārohanti, evaṃ hatthena vatthimaddanaṃ. Sambādhe sathakammavatthikammānameva paṭikkhittatā dahanakammaṃ vaṭṭati eva.

Guḷādi-anujānanakathāvaṇṇanā niṭṭhitā.

### Yāgumadhugoḷakādikathāvaṇṇanā

282-3. Pāḷiyaṃ **dasassa ṭhānānīti** assa paṭiggāhakassa dasa ṭhānāni kāraṇāni dhammenāti attho. **Anuppavecchatīti** deti. Vātañca byapanetīti sambandho, vātañca anulometīti attho. **Saggā te āraddhāti** tayā devalokā ārādhitā.

Yāgumadhugoḷakādikathāvaṇṇanā niṭṭhitā.

### Pāṭaligāmaavatthukathāvaṇṇanā

286. **Pāṭaligāme nagaraṃ māpentīti** pāṭaligāmassa samīpe tasseva gāmakhettabhūte mahante araṇṇappadesa pāṭaliputtam nāma nagaraṃ māpenti. **Yāvata ariyaṃ āyatananti** yattakaṃ ariyamanussānaṃ osaraṇaṭṭhānaṃ. **Yāvata vaṇippathoti** yattakaṃ vāṇijānaṃ bhaṇḍavikkīṇanaṭṭhānaṃ, vasaṇaṭṭhānaṃ vā, idaṃ tesaṃ sabbesaṃ agganagaraṃ bhavissatīti attho. **Puṭabhedananti** sakaṭādihi nānādesato āhaṭānaṃ bhaṇḍapuṭānaṃ vikkīṇanaṭṭhāya mocanaṭṭhānaṃ. **Saranti** taḷākādisupi vattati,

---

1. Avisatṭhāti (Ka)

tannivattanattham “**saranti idha nadi adhippetā**”ti vuttam sarati sandatīti katvā. **Vinā eva kullena tiṇṇāti** idam appamattaka-udakampi aphasitvā vinā kullena pārappattā.

Pāṭaligāmaavatthukathāvaṇṇanā niṭṭhitā.

### Koṭigāmesaccakathāvaṇṇanā

287. Pāḷiyam **sandhāvīti** bhavato bhavam paṭisandhiggahaṇavasena sandhāvanam katam. **Samsarīti** tasseva vevacanam. **Mamañceva tumhākañcāti** mayā ca tumehi ca, sāmivaseneva vā mama ca tumhākañca sandhāvanam ahoṣīti attho gahetabbo. **Samsarīti** samsari. Bhavataṇhā eva bhavato bhavam netīti **bhavanetthīti** vuttā.

289. “Nīlā hontī”ti vuttamevattham vivaritam “**nīlavaṇṇā**”ti-ādi vuttam. **Nīlavaṇṇāti** nīlavilepanā. Esa nayo sabbattha. **Paṭivaṭṭesīti**<sup>1</sup> pahari. **Ambakāyāti** ambāya. Upacāravacanañhetam, mātugāmenāti attho. **Upasamharathāti** upanetha, “īdisā tāvatimsā”ti parikappethāti attho. Idañca bhikkhūnam samvegajananattham vuttam, na nimittaggāhattham. Licchavirājāno hi sabbe na cirasseva ajātasatthunā vināsam pāpuṇissanti.

Koṭigāmesaccakathāvaṇṇanā niṭṭhitā.

### Sīhasenāpativatthu-ādikathāvaṇṇanā

290. **Sandhāgāreti** rājakiccassa sandhāraṇatthāya nicchiddam katvā vicāraṇatthāya katamahāsabhāya. **Gamikā bhisankhāroti** gamanevāyāmo. **Dhammassa ca anudhammanti** tumhehi vuttassa kāraṇassa anukāraṇam, tumhehi vuttassa atthassa anurūpamevāti adhippāyo. **Sahadhammiko vādānuvādoti** parehi vuttakāraṇena sakāraṇo hutvā tumhākam vādo

1. Paṭivatteti (Ka)

vā ito param tassa anuvādo vā. **Koci** appamattakopi **gārayham ṭhānam na āgacchatī**ti kim tava vāde gārayhakāraṇam natthīti vuttam hoti.

293. **Anuviccakāranti** anuviditākāram. Ratanattayassa saraṇagamanādikiriyaṃ karoti, sahasā katvā mā pacchā vippaṭṭisārī ahoṣīti attho. **Paṭākam parihareyyunti** dhajapaṭākam ukkhipitvā “īdiso amhākam saraṇam gato sāvako jāto”ti nagare ghosentā āhiṇḍanti.

294. **Nimittakamassāti** maṃsakhādananimittena uppannapāṇātipātakammaṣṣa.

Sihasenāpativatthu-ādikathāvaṇṇanā niṭṭhitā.

### Kappiyabhūmi-anujānanakathāvaṇṇanā

295. **Anuppage evāti** pāṭova. **Oravasaddanti** mahāsaddam. **Tam pana avatvāpīti pi-**saddena tathāvacanampi anujānāti. **Aṭṭhakathāsūti** andhakaṭṭhakathāviraḥitāsu sesaṭṭhakathāsu. **Sādhāraṇalakkhaṇanti** andhakaṭṭhakathāya saha sabbaṭṭhakathānam samānam.

**Cayanti** adhiṭṭhāna-uccavatthum. **Yato paṭṭhāyāti** yato iṭṭhakādito paṭṭhāya, yaṃ ādim katvā bhittim uṭṭhāpetukāmāti attho. “**Thambhā pana upari uggacchanti, tasmim vaṭṭanti**”ti etena iṭṭhakaṭṭhāyā heṭṭhā patiṭṭhāpitāpi yadi cayato, bhūmito vā ekaṅgulamattampi uggatā tiṭṭhanti, vaṭṭintīti siddham hoti.

**Ārāmoti** upacārasīmāparicchinno sakalo vihāro. **Senāsanānīti** vihārassa anto tiṇakuṭi-ādikāni saṃghassa nivāsagehāni. **Vihāragonisādikā nāmāti** senāsanagonisādikā. Senāsanāni hi sayam parikkhittānīpi ārāmaparikkhepābhāvena “gonisādikānī”ti vuttāni. “**Upaḍḍhaparikkhittopī**”ti iminā tato ūnaparikkhitto yebhuyyena aparikkhitto nāma, tasmā aparikkhittasankhyameva gacchatīti dasseti. **Etthāti** upaḍḍhādiparikkhite. **Kappiyakuṭim laddhum vaṭṭatīti**

gonisādiyā abhāvena sesakappiyakuṭisu tīsu yā kāci kappiyakuṭi kātabbāti attho.

**Tesam gehānī**ti ettha bhikkhūnaṃ vāsathāya katampi yāva na denti, tāva tesam santakāmyeva bhavissatīti daṭṭhabbam. **Vihāram ṭhapetvāti** upasampannānaṃ vāsathāya katageham ṭhapetvāti attho. **Gehanti** nivāsageham, tadaññaṃ pana uposathāgārādi sabbam anivāsageham catukappiyabhūmivimuttā pañcamī kappiyabhūmi. Saṃghasantakepi hi etādise gehe suṭṭhu parikkhittārāmattepi abbhokāse viya antovutthādidoso natthi. Yena kenaci channe, paricchanne ca sahaseyyappahonake bhikkhusaṃghassa nivāsagehe antovutthādidoso, na aññattha. Tenāha “**yaṃ panā**”ti-ādi. Tattha “**saṃghikaṃ vā puggalikaṃ vā**”ti idaṃ kiñcāpi bhikkhunīnaṃ sāmāññato vuttaṃ, bhikkhūnaṃ pana saṃghikaṃ puggalikañca bhikkhunīnaṃ, tāsam saṃghikaṃ puggalikañca bhikkhūnaṃ gihisantakattāhāne tiṭṭhatīti veditabbam.

**Mukhasannidhī**ti antosannihitadoso hi mukhappavesananimittam āpattim karoti, nāññathā. Tasmā “mukhasannidhī”ti vutto.

**Tattha tattha khaṇḍā hontī**ti upaḍḍhato adhikaṃ khaṇḍā honti. **Sabbasmim chadane vinaṭṭheti** tiṇapaṇṇādivassaparittāyake chadane vinaṭṭhe. Gopānasīnaṃ pana upari vallīhi baddhadaṇḍesu ṭhitesupi jahitavatthukā honti eva. **Pakkhapāsakamaṇḍalanti** ekasmim passe tiṇṇam gopānasīnaṃ upari ṭhitatiṇapaṇṇādicchadanaṃ vuccati.

**Anupasampannassa dātabbo assāti-ādinā** akappiyakuṭiyaṃ vutthampi anupasampannassa dinne kappiyaṃ hoti, sāpekkhadānañcetta vaṭṭati, paṭiggahaṇam viya na hotīti dasseti.

299. Pāḷiyaṃ **kantāre sambhāvesī**ti appabhakkhakantāre sampāpuṇi.

Kappiyabhūmi-anujānanakathāvaṇṇanā niṭṭhitā.



### Keṇiyajaṭilavatthukathāvaṇṇanā

300. **Jaṭiloti** āharimajaṭādharo tāpasavesadhārako yaññāyutto lokapūjito brāhmaṇo. **Pavattāro** pāvacaṇavasena vattāro. Yesaṃ santakamidaṃ, yehi vā idaṃ gītanti attho. **Gītaṃ pavuttaṃ samihitanti** aññamaññassa pariyāyavacaṇaṃ vuttanti attho. **Tadanugāyantī**ti taṃ tehi pubbe gītaṃ anugāyanti. Evaṃ sesesu ca.

**Yāvakālikapakkānanti** pakke sandhāya vuttaṃ, āmāni pana anupasampannehi sītudake madditvā parissāvetvā dinnapānaṃ pacchābhattampi kappabhi eva. Ayañca attho mahā-aṭṭhakathāyaṃ sarūpato avuttoki āha “**kurundiyaṃ panā**”ti-ādi. “**Ucchuraso nikaṣaṭo**”ti idaṃ pātabbasāmaññena yāmakālikakathāyaṃ vuttaṃ, taṃ pana sattāhakālikamevāti gahetabbaṃ. **Ime cattāro rasāti** phalapattapuppha-ucchurasā cattāro.

Pāḷiyaṃ **aggihuttamukhāti** aggijuhanapubbakā. **Chandasoti** vedassa. **Sāvittī mukhaṃ** paṭhamāṃ sajjhāyitabbāti attho. **Tapatanti** vijotantānaṃ.

Keṇiyajaṭilavatthukathāvaṇṇanā niṭṭhitā.

### Rojamallādivatthukathāvaṇṇanā

301. **Bahukato buddhe vāti** buddhe katabahumānoti attho. So kho ahaṃ bhante ānanda ñātīnaṃ daṇḍabhayatajjito ahosinti seso. Evañhi sati “evāhan”ti puna ahaṃ-gahaṇaṃ yujjati. **Vivarīti** “vivaratū”ti cintāmattena vivari, na uṭṭhāya hatthena.

303. **Aññataroti** subhaddo vuḍḍhapabbajito. **Dve dārakāti** sāmaṇerabhūmiyaṃ ṭhitā dve puttā. **Nāḷiyāvāpakenāti** nāḷiyā ceva thavikāya ca. **Samharatha** imehi bhājanehi taṇḍulādīni saṅkaḍḍhathāti attho. **Bhusāgāreti** palālamaye agāre, palālapuñjaṃ abbhantarato palālaṃ saṅkaḍḍhitvā agāraṃ kataṃ hoti, tathāti attho.

Rojamallādivatthukathāvaṇṇanā niṭṭhitā.

### Catumahāpadesakathāvaṇṇanā

305. **Parimaddantā**ti upaparikkhantā. **Dve paṭā desanāmeneva vuttā**ti tesaṃ sarūpadassanapadametaṃ, nāññanivattanapadaṃ pattuṇṇapaṭassāpi desanāmena vuttattā.

**Tumbā**ti bhājanāni. **Phalatumbo** nāma lābu-ādi. **Udakatumbo** udakaghaṭo. **Kilañjacchattanti** veḷuvilīvehi vāyitvā katachattam. **Sambhinnarasanti** missībhūtarasaṃ.

Catumahāpadesakathāvaṇṇanā niṭṭhitā.

Bhesajjakkhandhakavaṇṇanānayo niṭṭhito.

## 7. Kathinakkhandhaka

### Kathinānujānanakathāvaṇṇanā

306. Kathinakkhandhake **sīsavasenā**ti padhānavasena. **Kathinanti** pañcānisaṃse antokaraṇasamatthatāya thiranti attho. **So nesam bhavissatīti yujjati** “so tumhākan”ti avatvā “nesan”ti vacanam yujjati. **Ye atthatakathinā**ti na kevalam tumhākameva, ye aññepi atthatakathinā, tesam bhavissatīti attho. Atha vā **voti** tadā sammukhībhūtehi saddhim asamukhībhūte ca anāgate ca bhikkhū sabbe ekato sampiṇḍetvā vuttam, tumhākanti attho. **So nesanti** ettha so tesanti yojetabbam. Tenāha “atthatakathinānam vo bhikkhave imāni pañca kappissantī”ti. **Matakacīvaranti** matassa cīvaram. “Vuttavassavasenā”ti idam pacchimavassamvutthānampi sādharmaṇanti āha “**purimikāya vassam upagantvā paṭhamapavāraṇāya pavāritā labhanti**”ti. **Upagatā vā na labhanti**ti pacchamikāya vutthavassepī sandhāya vuttam.

**Khalimakkhitasāṭṭakoti** ahatavattham sandhāya vuttam. **Akātuṃ na labbhati**”ti iminā anādariye sati dukkaṇanti dīpeti.

“**Apaloketvā**”ti idam aññesam vassamvutthabhikkhūnam adatvā dātukāmehi kattabbavidhidassanam. Yadi evam kammavācāya eva dānam avuttanti āha “**kammavācā panā**”ti-ādi. Kathinacīvaram viya kammavācāya dātuṃ na vaṭṭatīti apaloketvāva dātabbanti adhippāyo.

308. **Mahābhūmikanti** mahāvisayam, catuvīsati-ākāravantatāya mahāvithhārikanti vuttam hoti. **Pañcakanti** pañcakaṇḍam. Eseva nayo sesesupi. **Paṭhamacimilikā**ti kathinavatthato aññā attano pakaticimilikā. **Kucchicimilikam katvā sibbitamattenā**ti thirajiṇṇanam cimilikānam ekato katvā sibbanassetam adhivacananti vadanti. Mahāpaccariyam, kurundiyañca vuttavacananti dassanam, byañjanato eva bhedo, na atthatoti dassanattham katantipi vadanti. **Piṭṭhi-anuvātāropanamattenā**ti dīghato anuvātassa āropanamattena. **Kucchi-anuvātāropanamattenā**ti puthulato anuvātassa āropanamattena. **Rattinissaggiyenā**ti ratti-atikkantena.

309. **Hatavattakasaṭakenā**ti atijjñāsāṭako. **Na hi tenā**ti-ādīsu tena parivārāgatapāṭhena idha ānetvā avuccamānena kathinatthārakassa jānitabbesu na kiñci parihāyati tasa sabbassa idheva vuttattāti adhīppāyo.

310. Mātā viyāti **mātikā**, ivatthe ka-paccayo daṭṭhabbo. Tena siddhamattham dassento āha “**mātikāti mātaro**”ti-ādi. **Assā**ti etissā mātikāya. Pakkamanantiko kathinubbhāro eva hi sayam attano uppajjati evamabhedūpacārena “mātikā”ti vutto ubbhārasseva pakkamanante samuppattito, tabbinimuttāya ca mātikāya abhāvā, tappakāsikāpi cettha pālī “mātikā”ti vuttam yujjati. Sāpi hi pakkamanantikubbhārappakāsanena “pakkamanantikā”ti vuttā. Eseva nayo sesubbhāresupi. **Pakkamananti** cettha upacārasīmātikkamanaṃ daṭṭhabbam.

Kathinānujānanakathāvaṇṇanā niṭṭhitā.

### Ādāyasattakakathāvaṇṇanā

311. “**Na puna āgamissan**”ti idam āvāsapalibodhupacchedakāraṇadassanaṃ. Pañcasu hi cīvaramāsesu yadā kadāci na paccessanti cittaena upacārasīmātikkamena āvāsapalibodho chijjati. Paccessanti bahi-upacāragatassa pana yattha katthaci na paccessanti citte uppannamatte chijjati. **Paṭhamam cīvarapalibodho chijjati**ti na paccessanti pakkamanato puretameva cīvarassa niṭṭhitattā vuttam. “Katacīvaramādāyā”ti hi vuttam. Atthatakathinassa hi bhikkhuno yāva “saṅghato vā dāyakakulādito vā cīvaram labhissāmī”ti cīvarāsā vā laddhavatthānam sahāyasampadādiyogaṃ labhitvā saṅghāṭi-ādibhāvena “chinditvā karissāmī”ti karaṇicchā vā pavattati, tāva cīvarapalibodho anupacchinno eva. Yadā pana yathāpatthitaṭṭhānato cīvarādīnam sabbathā alābhena vā cīvarāsā ceva laddhānam katvā niṭṭhānena vā naṭṭhavinatṭhādibhāvena vā cīvare nirapekkhatāya vā karaṇicchā ca vigacchati, tadā cīvarapalibodho upacchinno hoti.

So ca idha “katacīvaram ādāyā”ti vacanena pakāsito. Evam upari sabbattha pāḷivacanakkamaṃ nissāya nesam paṭhamam, pacchā ca upacchijjanam vuttanti daṭṭhabbam. Sabbathāpi ca imesam ubhinnam palibodhānam upacchedeneva kathinubbhāro, na ekassa. Tesañca pubbāpariyena, ekakkhaṇe ca upacchijjanam dasseturam imā aṭṭha mātikā ṭhapitāti veditabbā. **Antosīmāyanti** cīvaraniṭṭhānakkaṇeyeva chinnatā vuttam. **Nevimam cīvaram kāressanti** cīvare apekkhāya vigatattā karaṇapalibodhassāpi upacchinnatam dasseti. Yo pana appicchatāya vā anathikatāya vā sabbathā cīvaram na sampatiṇṇatī, tassa bahisīmāgatassa sabbathāpi cīvarapalibodhābhāvena na paccessanti sanniṭṭhānamattena **sanniṭṭhānantiko** kathinubbhāro veditabbo. **So panāti** palibodhupacchedo. **Ayam panāti** āsāvachedako kathinubbhāro visum vitthāretvā vutto, idha na vuttoti sambandho.

**Anāsāya labhatīti** “yasmim kule cīvaram labhissāmā”ti āsā anuppannapubbā, tattha cīvarāsāya anuppannaṭṭhāne yattha katthaci labhatīti attho. **Āsāya na labhatīti** āsīsitatṭhāne na labhatīti attho. **Idha na vuttoti** idha savanantikānantare na vutto. **Tatthāti** tasmim sīmātikantike. **Sīmātikantiko** nāma cīvaramāsānam pariyaṇṭadivasasaṅkhātāya sīmāya atikkamanato sañjāto. Keci “bahisīmāya kālātikamo sīmātikamo”ti maññanti, tesam anto-upacāre cīvarakālātikamepi<sup>1</sup> kathinubbhāro asammato nāma siyāti na cetam yuttam. Tasmā yattha katthaci kālātikamo sīmātikamoti veditabbo. Ettha ca pāḷiyam “katacīvaro”ti idam upalakkhaṇamattam, akatacīvarassapi kālātikamena sīmātikantiko hoti, dve ca palibodhā ekato chijjanti. Evam aññatthāpi yathāsambhavam taṃtamvisesanābhāvepi kathinubbhāratā, palibodhupacchedappakāro ca veditabbo “**sahubbāre dvepi palibodhā apubbam acarimam chijjanti**”ti idam akatacīvarassa paccessanti adhiṭṭhānasambhavapakkaṃ sandhāya vuttam, tesu aññatarābhāvepi sahubbhārova hoti.

312-325. Samādāyavāro ādāyavārasadisova. Upasaggamevettha viseso. Tenāha “**puna samādāyavārepi -pa- teyeva**

---

1. Cīvarakālātikamoti (Ka)

**dassitā**”ti. Vippakatacīvare pakkamanantikassa abhāvato **“yathāsambhavan”**ti vuttaṃ. Teneva vippakatacīvaravāre chaḷeva ubbhārā vuttā, cīvare hatthagate ca āsāvachedikassa asambhavā so etesu vāresu yattha katthaci na vutto, visuññeva vutto. Vippakatavāre cettha ādāyavārasamādāyavārasena dve chakkavārā vuttā.

Tato paraṃ niṭṭhānasanniṭṭhānanāsanantikānaṃ vasena tīṇi tikāni dassitāni. Tattha tatiyattike **anadhiṭṭhitenā**ti “paccessaṃ, na paccessaṃ”ti evaṃ anadhiṭṭhitena, na evaṃ manasikatvāti attho. Tatiyattikato pana paraṃ ekaṃ chakkaṃ dassitaṃ. Evaṃ tīṇi tikāni, ekaṃ chakkañcāti paṭhamamāṃ pannarasakaṃ vuttaṃ, iminā nayena dutiyapannarasakādīni veditabbāni.

Pāḷiyam āsādvādasake bahisīmāgatassa kathinuddhāresu tesampi cīvarāsādivasena cīvarapalibodho yāva cīvaraniṭṭhānā tiṭṭhatīti āha **“so bahisīmāgato suṇāti ‘ubbhataṃ kira tasmim āvāse kathinanti -pa-savanantiko kathinuddhāro’**ti”. Ettha ca savanakkhaṇe āvāsapalibodho paṭhamamāṃ chijjati, niṭṭhite cīvarapalibodhoti veditabbo.

Disaṃgamikanavake **disaṃgamiko pakkamatī**ti na paccessanti pakkamati, iminā āvāsapalibodhābhāvo dassito hoti. Teneva vassaṃvutthāvāse puna gantvā cīvaraniṭṭhāpitamatte niṭṭhānantiko kathinuddhāro vutto. **“Cīvarapaṭivisaṃ apavilāyamāno”**ti iminā cīvarapalibodhasamaṅgikattamassa dasseti, **apavilāyamānoti** ākaṅkhamāno. Sesamā suviññeyyameva.

Ādāyasattakakathāvaṇṇanā niṭṭhitā.

Kathinakkhandhakavaṇṇanānayo niṭṭhito.

## 8. Cīvarakkhandhaka

### Jīvakavatthukathādivaṇṇanā

329. Cīvarakkhandhake **kammavipākanti** kammappaccaya-utucittāhārasamuṭṭhitam appaṭibāhiyarogaṃ sandhāya vuttam kammajassa rogassa abhāvā.

330. Pāliyaṃ **saṃyamassāti** saṅghaṇassa<sup>1</sup>, avisajjanassāti<sup>2</sup> attho “yo saṃyamo so vināso”ti-ādīsū<sup>3</sup> viya. Etassa saṃyamassa phalaṃ upajānāmāti yojanā. Tameva phalaṃ dassenti āha “**varametaṃ -pa- āsittan**”ti. Keci pana “saṃyamassāti ānisamsassa, upayogathe cetam sāmivacanan”ti<sup>4</sup> attham vadanti.

336. Ussannadosoti sañjātapittādidoso. **Sabbatthāti** sakalasarīre.

337. **Mahāpiṭṭhiyakojavanti** hatthipiṭṭhiyaṃ attharitatthāyā “mahāpiṭṭhiyan”ti laddhasamaññaṃ uṇṇāmayattharaṇaṃ.

338-9. **Upaḍḍhakāsinaṃ khamamānanti** aḍḍhakāsi-agghanakaṃ. Pāliyaṃ **kiṃ nu khoti** katamaṃ nu kho.

340-342. **Upacāreti** susānassa āsanne padese. **Chaḍḍetvā gatāti** kiñci avatvā eva chaḍḍetvā gatā, etena “bhikkhū gaṇhantū”ti chaḍḍite eva akāmā bhāgadānaṃ vihitam, kevalam chaḍḍite pana katikāya asati ekato bahūsu pavitṭhesu yena gahitam, tena akāmabhāgo na dātabboti dasseti. Samānā disā puratthimādibhedā etesanti sadisāti āha “**ekadisāya vā okkamimsū**”ti. **Dhuravihāratṭhāneti** vihārassa sammukhaṭṭhāne.

Jīvakavatthukathādivaṇṇanā niṭṭhitā.

---

1. Saṅghaṇhantassa (Sī)

3. Khu 2. 151 piṭṭhe Petavatthumhi.

2. Avisajjanassa rogassāti (Sī)

4. Sārattha-Ṭī 3. 339 piṭṭhe.

### Bhaṇḍāgārasammuti-ādikathāvaṇṇanā

343. **Vihāramajjheti** sabbesaṃ jānanatthāya vuttam. **Vaṇṇāvaṇṇam katvāti** paṭivīsappahonakatājānanattham haliddiyādīhi khuddakamahantavaṇṇehi yutte same koṭṭhāse katvā. Tenāha “**same paṭivīse ṭhapetvā**”ti. **Idanti** sāmaṇerānaṃ upaḍḍhapaṭivīsadānaṃ. **Phāṭikammanti** pahonakakammaṃ. Yattakena vinayāgatena sammuñjanībandhanādihatthakammaena vihārassa ūnakatā na hoti, tattakam katvāti attho. **Sabbesanti** tatrappādavassāvāsikaṃ gaṇhantānaṃ sabbesaṃ bhikkhūnaṃ, sāmaṇerānaṃca. **Bhaṇḍāgārikacīvarepīti** akālacīvaraṃ sandhā vuttam. **etanti** ukkuṭṭhiyā katāya samabhāgadānaṃ. **Virajjhivā karontīti** kattabbakālesu akatvā yathārucitakkhaṇe karonti.

**Ettakena mama cīvaraṃ pahotīti** dvādasagghanakeneva mama cīvaraṃ paripuṇṇam hoti, na tato ūnenāti sabbam gahetukāmoti attho.

Bhaṇḍāgārasammuti-ādikathāvaṇṇanā niṭṭhitā.

### Cīvararajanakathādivaṇṇanā

344. **Evañhi kateti** vaṭṭādhārassa anto rajanodakam, bahi challikañca katvā viyojane kate. **Na uttaratīti** kevalam udakato pheṇuṭṭhānābhāvā na uttarati. **Rajanakuṇḍanti** pakkarajanaṭṭhapanakam mahāghaṭam.

345. **Anuvātādīnaṃ dīghapattānanti** āyāmato, vitthārato ca anuvātaṃ. **Ādi-saddena** dvinnam khandhānaṃ antarā mātikākārena ṭhapitapattañca “dīghapattan”ti daṭṭhabbam. **Āgantukapattanti** diguṇacīvarassa upari aññaṃ paṭṭam appenti, taṃ sandhāya vuttam. Taṃ kira idāni na karonti.

346. Pāḷiyam **nandimukhiyāti** tuṭṭhimukhiyā, pasannadisāmukhāyāti attho.

348. **Acchupeyyanti** paṭiṭṭhapeyyam. **Hatavatthakānanti** purāṇavatthānaṃ. **Anuddharitvāvāti** aggaḷe viya dubbalaṭṭhānaṃ anapanetvāva.



349-351. Visākhavatthumhi **kallakāyā**ti akilantakāyā. **Gatī**ti nānagati adhigamo. **Abhisamparāyoti** “sakideva imaṃ lokam āgantvā dukkhassantaṃ karotī”ti-ādinā<sup>1</sup> vutto nānābhisamparāyo, maggañāṇayuttehi gantabbagativisesoti attho. Tam bhagavā byākarissati. “**Dadāti dānan**”ti idaṃ annapānavirahitānaṃ selapaccayānaṃ dānavasena vuttaṃ. **Sovaggikanti** saggasaṃvattanikaṃ.

359. **Aṭṭhapadakacchannenāti**  
aṭṭhapadakasaṅkhātajūtaphalalakalekhāsaṅghānena.

362. Pāliyaṃ **nadīpāraṃ gantunti**<sup>2</sup> bhikkhuno nadīpāragamaṇaṃ hotīti attho. **Aggaḷaguttiyeva pamāṇanti** imehi catūhi nikkhepakāraṇehi ṭhapentenapi aggaḷaguttivihāre eva ṭhapetuṃ vaṭṭatīti adhippāyo. **Nissīmāgatanti** vassānasāṅkhātaṃ kālasīmaṃ atikkantaṃ, taṃ vassikasāṅgikacīvaraṃ na hotīti attho.

Cīvararajanakathādivaṇṇanā niṭṭhitā.

### Saṅghikacīvaruppādakathāvaṇṇanā

363. **Pañca māseti** accantasamyoge upayogavacanaṃ. **Vaḍḍhim payojetvā ṭhapita-upanikkhepatoti** vassāvāsikassatthāya dāyakehi vaḍḍhim payojetvā ṭhapita-upanikkhepatoti. “**Idha vassaṃ vutthasaṅghassa**”ti idaṃ abhilāpamattaṃ. Idha-saddaṃ pana vinā “vassaṃvutthasaṅghassa demā”ti vuttepi so eva nayo. **Anatthatakathinassāpi pañca māse pāpuṇātīti** vassāvāsikalābhavasena uppannattā anatthatakathinassāpi vutthavassassa pañca māse pāpuṇāti. Vakkhati hi “cīvaramāsato paṭṭhāya yāva hemantassa pacchimo divaso, tāva vassāvāsikaṃ demāti vutte kathinaṃ atthataṃ vā hotu anatthataṃ vā, atītavassaṃvutthānameva pāpuṇātī”ti<sup>3</sup>. **Tato paranti** pañcamāsato paraṃ, gimhānassa paṭṭhamadivasato paṭṭhāyāti attho. “**Kasmā? Piṭṭhisamaye uppannattā**”ti idaṃ “udāhu

1. Saṃ 3. 355, 356 piṭṭhesu. 2. Nadīpāragatanti (Sī, Ka) 3. Vi-Ṭṭha 3. 425 piṭṭhe.

anāgatavasse”ti imassānantaram daṭṭhabbam. Potthakesu pana “anattatakathinassāpi pañcamāse pāpuṇātī”ti imassānantaram “kasmā piṭṭhisamaye uppannattā”ti idam likhanti, tam pamādalikhitam piṭṭhisamaye uppannam sandhāya “anattatakathinassāpi”ti vattabbato. Vutthavasse hi sandhāya “anattatakathinassāpi”ti vuttam, na ca piṭṭhisamaye uppannam vutthavassasseva pāpuṇātīti sammukhībhūtānam sabbesampi pāpuṇanato. Teneva vakkhati “sace pana gimhānam paṭhamadivasato paṭṭhāya evam vadati, tatra sammukhībhūtānam sabbesam pāpuṇātī. **Kasmā?** Piṭṭhisamaye uppannattā”ti<sup>1</sup>.

**Duggahitānī**ti aggahitāni, saṅghikānevāti attho. **Itovāti** therānam dātabbatova, idānevāti vā attho.

Samghikacīvaruppādakathāvaṇṇanā niṭṭhitā.

### Upanandasakyaputtavattukathāvaṇṇanā

364. “**Sattāhavārena aruṇameva utṭhāpetī**”ti idam nānāsīmāvihāresu kattabbanayena ekasmimpi vihāre dvīsu senāsanesu nivutthabhāvadassanattam vuttam, aruṇuṭṭhāpaneneva tattha vuttho hoti, na pana vassachedaparihārāya. Anto-upacārasīmāyapi yattha katthaci aruṇam utṭhāpento attanā gahitasenāsanam appaviṭṭhopi vutthavasso eva hoti, gahitasenāsane pana nivuttho nāma na hoti, tattha ca aruṇuṭṭhāpane pana sati hoti. Tenāha “**purimasmiṃ bahutaram nivasati nāmā**”ti, etena ca itarasmim sattāhavārenāpi aruṇuṭṭhāpane sati eva appakataram nivasati nāma hoti, nāsātīti dīpitaṃ hoti. **Nānālābhehī**ti visum visum nibaddhavassāvāsikalābhehi. **Nānūpacārehī**ti nānāparikkhepanādvārehi. **Ekasīmāvihārehī**ti dvinnam vihārānam ekena pākārena parikkhattattā ekāya upacārasīmāya antogatehi dvīhi vihārehi. **Senāsanaggāho paṭippassambhatī**ti paṭhamam gahito paṭippassambhatī. **Tatthāti** yattha senāsanaggāho paṭippassaddho, tattha.

Upanandasakyaputtavattukathāvaṇṇanā niṭṭhitā.

### Gilānavatthukathāvaṇṇanā

365-6. **Bhūmiyaṃ paribhaṇḍaṃ akāsi**ti gilānena nipannabhūmiyaṃ kilīṭṭhaṭṭhānaṃ dhovivā haritūpalittaṃ kāresiṭi attho. **Bhesajjaṃ yojetuṃ asamatthoti** parehi vuttavidhimpī kātuṃ asamattho. Pāḷiyaṃ gilānupaṭṭhakānaṃ cīvaradāne sāmaṇerānaṃ ticīvarādhiṭṭhānābhāvā “cīvarañcapattañcā”ti-ādi sabbattha vuttaṃ. Sacepi sahasaṃ agghati, gilānupaṭṭhakānaññeva dātabbanti sambandho.

Gilānavatthukathāvaṇṇanā niṭṭhitā.

### Matasantakakathādivaṇṇanā

369. **Aññanti** cīvarapattato aññaṃ. **Appagghanti** atijjñādibhāvena nihīnaṃ. **Tatoti** avasesaparikkhārato. **Sabbanti** pattaṃ, ticīvarañca.

**Tattha tattha saṃghassevā**ti tasmim tasmim vihāre saṃghasseva. Pāḷiyaṃ **avissajjikaṃ avebhaṅgikaṃ** āgatānāgatassa cātuddisassa saṃghasseva santakaṃ hutvā kassaci avissajjikaṃ avebhaṅgikaṃ bhavituṃ anujānāmīti attho.

371-2. **Akkanālamayanti** akkadaṇḍamayam. **Akkadussānī**ti akkavākena katadussāni, potthakagatikāni dukkaṭavattukānīti attho.

**Dupaṭṭacīvarassa**<sup>1</sup>vā **majjheti** yaṃ niṭṭhite tipaṭṭacīvaram hoti, tassa majjhe paṭalam katvā dātabbānīti attho.

374. “**Sante patirūpe gāhake**”ti vuttattā gāhake asati adatvā bhājitepi subhājitamevāti daṭṭhabbāni.

376. **Dakkhiṇodakaṃ pamāṇanti** “ettakāni cīvarāni dassāmī”ti paṭhamam udakaṃ pātetvā pacchā denti. Tam yehi gahitam, te bhāginova

---

1. Tipaṭṭacīvarassa (Sī), dvipaṭṭacīvarassa (Syā)

hontīti adhippāyo. **Parasamuddeti** jambudīpe. Tambapaṇṇidīpañhi upādā yesa evaṃ vutto.

Matasantakakathādivaṇṇanā niṭṭhitā.

### **Aṭṭhacīvaramātikākathāvaṇṇanā**

379. **Puggalādhiṭṭhānanayena vuttanti** “sīmāya dānan”ti-ādinā vattabbe “sīmāya detī”ti-ādi puggalādhiṭṭhānena vuttaṃ. **“Apicā”**ti-ādinā paṭhamaleḍḍupātabhūtaparikkhepārahaṭṭhānato bahi dutiyaleḍḍupātopi upacārasīmā evāti dasseti. Dhuvasannipātaṭṭhānādikampi pariyante ṭhitameva gahetabbaṃ. Loke gāmasīmādayo viya lābhasīmā nāma visuṃ pasiddhā nāma natthi, kenāyaṃ anuññātāti āha **“neva sammāsambuddhenā”**ti-ādi. Etena nāyaṃ sāsanaṅghārasiddhā, lokavaṅghārasiddhā evāti dasseti. **“Janapadaparichedo”**ti idaṃ lokapasiddhasīmāsaddatthavasena vuttaṃ. Parichedabbhantaraṃ pana sabbaṃ janapadasīmāti gahetabbaṃ, janapado eva janapadasīmā. Evaṃ raṭṭhasīmādīsopi. Tenāha **“āṇāpavattiṭṭhānan”**ti-ādi.

**Pathavīvemajjhe gatassāti** yāva udakapariyantā khaṇḍasīmattā vuttaṃ, upacārasīmādīsū pana abaddhasīmāsu heṭṭhāpathaviyaṃ sabbattha ṭhitānaṃ na pāpuṇāti, kūpādipavesārahaṭṭhāne ṭhitānaññeva pāpuṇātīti heṭṭhā sīmākathāyaṃ vuttanayena taṃtaṃsīmāṭṭhabhāvo vedītabbo. Cakkavāḷasīmāya pana dinnāṃ pathavīsadhāraka-udakaṭṭhānepi ṭhitānaṃ pāpuṇāti sabbattha cakkavāḷavaṅghāratā.

**Buddhādhivutthoti** buddhena bhagavatā nivuttho. **Pākavattanti** nibaddhadānaṃ. **Vattatīti** pavattati. **Tehīti** yesaṃ sammukhe esa deti, tehi bhikkhūhi. **Dutiyaḥāge pana therāsaṇaṃ āruḷheti** yāva saṅghanaṅga ekavāraṃ sabbesaṃ bhāgaṃ datvā cīvare aparikkhīṇe puna sabbesaṃ dātuṃ dutiyaḥāge therassa dinneti attho. **Pāmsukūlikānampi vattatīti** ettha “tuyhaṃ demā”ti avuttattāti kāraṇaṃ vadanti. Yadi evaṃ “saṅghassa demā”ti

vuttepi vaṭṭeyya, “bhikkhūnaṃ dema, therānaṃ dema, saṃghassa demā”<sup>1</sup> vacanato bhedo na dissati. Vīmaṃsitabbamettha kāraṇaṃ.

**Pārupitum vaṭṭatī** paṃsukūlikānaṃ vaṭṭati. **Bhikkhusaṃghassa ca bhikkhunīnaṃca dammīti vutte pana na majjhe bhindivā dātabbanti** ettha yasmā bhikkhunipakkhe saṃghassa paccekāṃ aparāmaṭṭhattā bhikkhunīnaṃ gaṇanāya bhāgo dātabboti dāyakassa adhippāyoti sijjhati, tathā dānaṃca bhikkhūpi gaṇetvā dinne eva yujjati. Itarathā hi kittakāṃ bhikkhūnaṃ dātabbaṃ, kittakāṃ bhikkhunīnanti na viññāyati, tasmā “bhikkhusaṃghassa”<sup>2</sup>ti vuttavacanampi “bhikkhūnaṃ”<sup>2</sup>ti vuttavacanasadisamevāti āha “**bhikkhū ca bhikkhuniyo ca gaṇetvā dātabban**”<sup>2</sup>ti. Tenāha “**puggalo -pa- bhikkhusaṃghaggahaṇena aggahitattā**”<sup>2</sup>ti. Bhikkhusaṃgha-saddena bhikkhūnaṃñeva gahitattā, puggalassa pana “tuyhañcā”<sup>2</sup>ti visum gahitattā ca tathassa aggahitattā daṭṭhabbā, “bhikkhūnaṃca bhikkhunīnaṃca tuyhañcā”<sup>2</sup>ti vuttatṭhānasadisattāti adhippāyo. Puggalappadhāno hettha saṃgha-saddo daṭṭhabbo. Keci pana “bhikkhusaṃghaggahaṇena gahitattā”<sup>2</sup>ti<sup>2</sup> pāṭhaṃ likhanti, taṃ na sundaraṃ tassa visum lābhaggahaṇe kāraṇavacanattā. Tathā hi visum saṃghaggahaṇena gahitattāti visum puggalassapi bhāgaggahaṇe kāraṇaṃ vuttaṃ. Yathā cettha puggalassa aggahaṇaṃ, evaṃ upari “bhikkhusaṃghassa ca tuyhañcā”<sup>2</sup>ti-ādīsupi saṃghādi-saddehi puggalassa aggahaṇaṃ daṭṭhabbaṃ. Yadi hi gahaṇaṃ siyā, saṃghatopi, visumpīti bhāgadvayaṃ labheyya ubhayattha gahitattā.

**Pūjetabbanti-ādi gihikammaṃ na hotīti dassanatthaṃ vuttaṃ.** “**Bhikkhusaṃghassa harā**”<sup>2</sup>ti idaṃ piṇḍapātaharaṇaṃ sandhāya vuttaṃ. Tenāha “**bhuñjiturū vaṭṭatī**”<sup>2</sup>ti. “**Antohemante**”<sup>2</sup>ti iminā anattate kathine vassānaṃ pacchime māse dinnāṃ purimavassaṃvutthānaṃñeva pāpuṇāti, tato paraṃ hemante dinnāṃ pacchimavassaṃvutthānampi vutthavassattā pāpuṇāti. Hemantato pana paraṃ piṭṭhisamaye “vassaṃvutthasaṃghassa”<sup>2</sup>ti evaṃ vatvā dinnāṃ anantare vasso vā tato paresu vā yattha katthaci tasmim vutthavassānaṃ sabbosaṃ pāpuṇāti. Ye pana sabbathā avutthavassā, tesāṃ na pāpuṇātīti dasseti. **Sabbesampīti** hi tasmim bhikkhubhāve vutthavassānaṃ sabbesampīti

1. Vi-Ṭṭha 3. 422 piṭṭhe.

2. Sārattha-Tī 3. 345 piṭṭhe.

attho daṭṭhabbo. “**Vassamvutthasamghassā**”ti vuttattā **sammukhībhūtānaṃ sabbesanti** etthāpi eseva nayo. **Atītavassanti** anantarātītavassam.

**Uddesam gahetum āgatoti** uddese aggahitepi antevāsikovāti vuttam.  
**Gahetvā gacchantoti** pariniṭṭhita-uddeso hutvā gacchanto. “**Vattam katvā uddesaparipucchādīni gahetvā vicarantānaṃ**”ti idam “uddesantevāsikānaṃ”ti imasseva visesaṃ, tena uddesakāle āgantvā uddesam gahetvā gantvā aññattha nivasante anibaddhacārike nivatteti.

Aṭṭhacīvaramātikākathāvaṇṇanā niṭṭhitā.

Cīvarakkhandhakavaṇṇanānayo niṭṭhito.

## 9. Campeyyakkhandhaka

### Kassapagottabhikkhuvatthukathādivaṇṇanā

380. Campeyyakkhandhake **tantibaddhoti** tanti vuccati byāpāro, tattha baddho, ussukkaṃ āpannoti attho. Tenāha “**tasmim āvāse**”ti-ādi.

387-8. **Hāpanaṃ vā aññathā karaṇaṃ vā natthīti** ñattikammaṃ ñattiyā ekattā hāpanaṃ na sambhavati, tassā ekattā eva pacchā ñattiṭhapanavasena, dvikkhattuṃ ṭhapanavasena ca aññathā karaṇaṃ natthi. **Paratoti** parivāre. **Tanti** pabbājanīyakammaṃ, tassāti attho.

Kassapagottabhikkhuvatthukathādivaṇṇanā niṭṭhitā.

### Dvenissaraṇādikathāvaṇṇanā

395. **Esāti** “bālo”ti-ādinā niddiṭṭhapuggalo, appattoti sambandho. Tattha kāraṇamāha “**yasmā**”ti-ādi. Tattha **āveṇikena lakkhaṇenāti** pabbājanīyakammaṃ nimittabhāvena pāḷiyaṃ vuttattā asādhāraṇabhūtena kuladūsakabhāvena. Yadi hesa taṃ kammaṃ appatto, kathaṃ pana sunissāritoti āha “**yasmā panassa ākaṅkhamāno saṅgho pabbājanīyakammaṃ kareyyāti vuttaṃ, tasmā sunissārito**”ti. Tattha vuttanti kammakkhandhake<sup>1</sup> vuttaṃ.

Ettha pana kuladūsakammaṃ katvā pabbājanīyakammakatassa **terasakakaṇḍakaṭṭhakathāyaṃ** “yasmim vihare vasantena yasmim gāme kuladūsakammaṃ kataṃ hoti, tasmim vihare vā tasmim gāme vā na vasitabban”ti-ādinā<sup>2</sup> yā sammāvattanā vuttā, sā itarenāpi pūretabbā. Yaṃ pana paṭippassaddhakammaṃ kuladūsakassa tattheva **aṭṭhakathāyaṃ** “yesu kulesu kuladūsakammaṃ kataṃ, tato paccayā na gahetabbā”ti-ādi<sup>2</sup> vuttaṃ, taṃ na pūretabbanṃ kulasaṅgahassa akatattā. Evaṃ sesakammesupi. Yadi evaṃ

1. Vi 4. 31 piṭṭhe.

2. Vi-Ṭṭha 2. 208 piṭṭhe.

“tajjanīyakammārahassa niyasakammaṃ karoti -pa- evaṃ kho upāli adhammakammaṃ hotī”ti-ādi<sup>1</sup> vacanaṃ virujjhatī? Na virujjhati saṅghasanniṭṭhānavasena tajjanīyādikammārahattassa sijjhanato. Yassa hi saṅgho “tajjanīyakammaṃ karomā”ti sanniṭṭhānaṃ katvā kammavācaṃ sāvento pabbājanīyakammavācaṃ sāveti, tassa kammaṃ adhammakammaṃ hoti. Sace pana “tasseva pabbājanīyakammameva karomā”ti sanniṭṭhānaṃ katvā tadeva karoti, tassa taṃ kammaṃ dhammakammanti vedittabbaṃ.

Evamidha “nissāraṇaṃ”ti adhippetassa pabbājanīyakammassa vasena atthaṃ dassetvā idāni tadaññesaṃ tajjanīyādīnaṃ vasena nissāraṇe adhippete “appatto nissāraṇaṃ”ti imassa paṭipakkhavasena sampatto nissāraṇaṃ, “tañce saṅgho nissāreti, sunissārito”ti atthasambhavaṃ dassetuṃ puna “**tañce saṅgho nissāretīti sace saṅgho**”ti-ādi vuttaṃ. Tattha **tatthā**ti tajjanīyādikammavisaye, ekenāpi aṅgena nissāraṇā anuññātāti yojanā. Pāḷiyaṃ **appatto nissāraṇanti** ettha āpanno āveṇikavasena tajjanīyādisaṅkhātaṃ nissāraṇaṃ pattoti attho gahetabbo.

Dvenissaraṇādikathāvaṇṇanā niṭṭhitā.

Campeyyakkhandhakavaṇṇanāyaya niṭṭhito.

---

1. Vi 3. 450, 451 piṭṭhesu.



## 10. Kosambakakkhandhaka

### Kosambakavivādakathāvaṇṇanā

451. Kosambakakkhandhake **sace hoti, desessāmīti** vinayadharassa vacanena āpattidiṭṭhim paṭilabhitvā evamāha. Teneva pāḷiyam “so tassā āpattiyā anāpattidiṭṭhi hoti”ti vuttam. **Natthi āpattīti** udakassa ṭhapanabhāvaṃ ajānitvā vā ṭhapaṭam chaddetvā vissarivā vā gamane asaṅcicca asatiyā anāpattipakkhopi sambhavatīti vinayadharo tattha anāpattidiṭṭhim paṭilabhitvā evamāha. Teneva pāḷiyam “aṅṅe bhikkhū tassa āpattiyā anāpattidiṭṭhino hoti”ti vuttam. Parisāyapissa anāpattidiṭṭhiyā uppannattā “aṅṅe”ti bahuvacanaṃ kataṃ. **Anāpattidiṭṭhi ahoṣīti** suttantikatherassa vinaye apakataññutāya vinayadharassa vacanamattena so evamahosi, sā panassa āpatti eva udakāvasesassa ṭhapanabhāvaṃ ñatvā ṭhapitattā. Vatthumattajānane eva hi sekhiyā sacittakā, na paṇṇattivijānane. Teneva pāḷiyam ‘tassā āpattiyā anāpattidiṭṭhi hoti’ti sabbattha āpatti icceva vuttam. **“Āpattim āpajjamāno”**ti idaṃ vinayadharatthero “tayā idaṃ udakaṃ ṭhapitan”ti attanā puṭṭhena suttantikatherena “āmāvuso”ti vuttavacanaṃ sarivā paṇṇatti-akovidatāya saṅceccava akāsīti āpattidiṭṭhi hutvāva avoca. Teneva pāḷiyam “aṅṅe bhikkhū tassā āpattiyā āpattidiṭṭhino hoti”ti vuttam.

453. **“Na tāva bhinno”**ti idaṃ ukkhipanatadanuvattanamattena saṅgho bhinno nāma na hoti, taṃ nissāya pana ubhayapakkhikānaṃ pakkhaṃ pariyesivā aṅṅamaṅṅaṃ kodhavasena kāyavacīkalahavaḍḍhaneneva hotīti imamatthaṃ sandhāya vuccam. Tenāha **“so ca kho kalahavasenāti. Sambhama-atthavasenāti** turitatthavasena.

454. **Akārāṇeti-**ādi anukkipitvāva upāyena saṅṅāpetvā hitesitāya āpattito mocetuṃ yuttaṭṭhāne kodhacittavasena viheṭhanatthāya katabhāvaṃ sandhāya vuttam, na pana kammaṅgassa abhāvaṃ sandhāya.

teneva pāḷiyam “āpatti esā bhikkhave nesā anāpatti -pa- ukkhitto eso bhikkhū”ti-ādi vuttam.

455. “**Adhammavādīnaṃ pakkhe nisinno**”ti idam upalakkhaṇamattam, dhammavādīnaṃ pakkhe nisīditvā adhammavādīnaṃ laddhim gaṇhantopi dhammavādīnaṃ nānāsamvāsako hoti eva. **Kammaṃ kopetī**ti tam vinā gaṇassa apūraṇapakkaṃ sandhāya vuttam. **Yattha vā tattha vā**ti dhammavādīnaṃ pakkhe vā adhammavādīnaṃ pakkhe vāti attho. **Ime dhammavādīnoti gaṇhātī**ti tamtampakkhagate bhikkhū yāthāvato vā ayāthāvato vā “ime dhammavādīno”ti gaṇhāti, ayam tamtampakkhagatānaṃ attānaṃ samānasamvāsakaṃ karoti.

456. **Upadāmsentī**ti pavattenti. Pāḷiyam **ettāvatā**ti “ettakapadesam muñcitvā nisinnā mayam kodhacitte uppannepi aññamaññaṃ ananulomikaṃ kāyakammādim pavattetum na sakkhissāmā”ti sallakkhetvā dūre nisīditabbanti adhippāyo. Tenāha “**upacāram muñcitvā**”ti.

457. Pāḷiyam **bhaṇḍana-jātā**ti-ādīsu kalahassa pubbabhāgo **bhaṇḍanaṃ** nāma. Hatthaparāmāsādi **kalaho** nāma. Viruddhavādo **vivādo** nāma.

458. **Paripuṇṇakosakoṭṭhāgāro**ti ettha koso nāma suvaṇṇamaṇi-ādibhaṇḍāgārasāragabbho. **Koṭṭham** vuccati dhaññaṃ āvasanaṭṭhānaṃ koṭṭhabhūtaṃ agāraṃ koṭṭhāgāraṃ, dhaññaṃ saṅghaṭṭhānaṃ. **Abbhuyyāsī**ti yuddhāya abhimukho nikkhamīti attho. **Ekasaṅghātampī**ti ekayuddhampi. **Dhovananti** dhovanudakaṃ.

463. **Pariyādinnarūpā**ti kodhacittena pariggahitasabhāvā.

464. **taṃ na jānanti**ti tam kalaham na jānanti. **Ye upanayhanti**ti yathāvuttam kodhākāraṃ citte bandhanti. **Pākaṭaparissayeti** sihādike. **Paṭicchannaparissayeti** rāgādike. Pāḷiyam **natthi bāle sahāyatā**ti bālam nissāya sīlādiguṇasaṅkhātā sahāyatā<sup>1</sup> natthi, na sakkā laddhanti attho.

466. **Attakāmarūpā**ti attano hitakāmayamānasabhāvā. **Anuruddhā**ti ekasesanayena tiṇṇampi kulaputtānaṃ ālapanāṃ, teneva bahuvacananiddeso kato. **Khamanīyaṃ** sarīraṃ **yāpanīyaṃ** jīvitāṃ “kacci vo sarīrañca dhāretuṃ, jīvitañca yāpetuṃ sakkā”ti pucchati. **Tagghā**ti ekamsatthe nipāto, ekamsena mayāṃ bhanteti attho. **Yathā katanti** ettha **yathā**ti nipātamattaṃ, **yathākathanti** vā eko nipāto kāraṇapucchanattho, kena pakārenāti attho. **Ekañca pana maññe cittanti** ekassa cittavasena itaresampi pavattanato sabbesaṃ no ekaṃ viya cittanti attho. **Kacci pana vo anuruddhā**ti ettha **voti** nipātamattaṃ, paccattavacanaṃ vā, kacci tumheti attho. **Amhākanti** niddhāraṇe sāmivacanaṃ, amhesu tīsu yo paṭhamaṃ paṭikkamatīti attho.

Kosambakavivādakathāvaṇṇanā niṭṭhitā.

### Pāḷileyyakagamanakathāvaṇṇanā

467. **Yena pāḷileyyakanti**<sup>1</sup> paccatte upayogavacanaṃ, yattha pāḷileyyako gāmo, tattha avasarīti attho. **Daharapota**kehīti bhīnkacchāpehi. “Ogāhin”tipi pāṭho, nahānapokkharāṇinti attho.

Udānagāthāyaṃ pana—ratha-īsasadisadantassa nāgassa hatthino etaṃ vivekaninnaṃ cittaṃ nāgena buddhanāgassa vivekaninnacittena sameti. Kasmā? Yaṃ yasmā ekova ramati vane, tasmā evaṃ yojanā daṭṭhabbā.

Pāḷileyyakagamanakathāvaṇṇanā niṭṭhitā.

### Aṭṭhārasavatthukathāvaṇṇanā

468. **Yathā dhammo tathā tiṭṭhāhī**ti yathā dhammo ca vinayo ca ṭhito, tathā tiṭṭha,dhammavādīpakke tiṭṭhāti attho.

473. “**Yo paṭibāheyya, āpatti dukkaṭassā**”ti idaṃ sāmaggībhedassa akārake sandhāya vuttaṃ. Ye pana bheda-kārakā viruddhā

---

1. Pāḷileyyakanti (Sī, Ka)

alajjino, tesam paṭibāhitum vaṭṭati tesam santakassapi senāsanassa vināsanavacanato. “**Vivittam katvāpi dātabban**”ti vuttattā pana yathāvuddham varasenāsanam adatvā vuddhānampi asaṅṅatānam saṅṅatehi vivittam katvā dātabbanti daṭṭhabbam.

475. **Kammavācāya osāretvā**ti ettha ukkhittassa bhikkhuno āpattiyāpanabhāvaṃ paṭijānitvā sammāvattanena ukkhepakānam samuppanna-osāraṇacchandassa pageva nātattā paṭippassambhanakammavācāya ukkhittānuvattakā sayameva nam osāresunti daṭṭhabbam.

476. **Atthato apagatā**ti sāmaggī-atthavirahitā, tucchabyañjanāti attho.

477. **Appaṭicchannācāro**ti appaṭicchadetabbasundarācāro. **Anapagatanti** kāraṇato anapetaṃ. Ādātabbato gahetabbato ādāyanti ācariyavādo vuttoti āha “**ādāyam attano ācariyavādan**”ti.

**Aṭṭhahi dūtaṅgehī**ti “sotā ca hoti sāvetā ca uggahetā ca dhāretā ca viññātā ca viññāpetā ca kusalo ca sahitāsahitassa no ca kalahakārako”<sup>1</sup> evaṃ vuttehi aṭṭhahi dūtaṅgehi. Sesamettha, heṭṭhā ca sabbattha suviññeyyamevāti.

Aṭṭhārasavatthukathāvaṇṇanā niṭṭhitā.

Kosambakakkhandhakavaṇṇanānayo niṭṭhito.

Iti samantapāsādikāya vinayaṭṭhakathāya vimativinodaniyam

**Mahāvaggavaṇṇanānayo niṭṭhitā.**

# Cūlavaggavaṇṇanā

Namo tassa Bhagavato Arahato Sammāsambuddhassa.

## 1. Kammakkhandhaka

### Tajjanīyakammakathāvaṇṇanā

1. Cūlavaggassa<sup>1</sup> paṭhame kammakkhandhake tāva “balavābalavan”ti idaṃ ekapaḍaṃ, “balavabalavan”ti vattabbe ākāraṃ katvā “balavābalavan”ti vuttaṃ. Tañca “dukkhadukkhan”ti-ādīsu viya atisayatthe vattaṭṭi āha “suṭṭhu balavaṃ paṭivadathā”ti, ati viya balavaṃ katvā paṭivacanaṃ dethāti attho.

2. Pāḷiyam āpatti āropetabbāti ettha kiñcāpi “mā kho tumhe āyasmanto eso ajesī”ti-ādike bhaṇḍanādijanake vacane paññattā kāci āpatti nāma natthi musāpesuññādīsu etassa appaviṭṭhattā, tathāpi bhikkhūhi visuṃ, saṃghamajjhe ca “mā āvuso bhikkhū aññamaññaṃ payojetvā bhaṇḍanādīṃ akāsi, nedaṃ appicchatādīnaṃ atthāya vattaṭṭi”ti evaṃ apaññattena vuccamānassa bhikkhuno anādariyena anoramanapaccayā vā aññavādavihesādikaraṇapaccayā vā yā āpatti hoti, sā āpatti āropetabbā diṭṭhivipannassa viyāti evamattho daṭṭhabbo.

Yassa pana idaṃ vacanaṃ vināva kāyavācāhi āpannā lahuḍāpatti atthi, tassapi āropetabbāva. Yaṃ pana kammavācāya “attanā bhaṇḍanakāraḍā”ti attanā bhaṇḍanakāraḍā”ti attanā-saddaggaṇaṃ, “yepi caññe bhikkhū bhaṇḍanakāraḍā -pa- te upasaṅkamitvā”ti-ādivacanañca, taṃ vatthivasena gahitaṃ. Yo pana sayameva bhaṇḍanakāraḍā hoti, aññe pana bhaṇḍanakāraḍā upasaṅkamitvā “mā kho tumhe”ti-ādivacanaṃ na vadati, tassāpetam kammaṃ kātabbameva. Karontehi ca “suṇātu me bhante saṃgho, ayaṃ

---

1. Cullavaggassa (Syā)

itthannāmo bhikkhu bhaṇḍanakāraḱo -pa- saṅghe adhikaraṇakāraḱo. Yadi saṅghassa pattakallaṅ”ti-ādināva kammavācā kātabbā. Yo ca añṅepi bhikkhū kalahāya samādapeti, tassāpi evameva kammavācaṁ kātum vaṭṭati añṅesaṁ samādāpanassapi bhaṇḍanakāraḱatte eva pavisanato. Añṅesaṁ samādāpanākāraṁpi vatvāva, kammavācaṁ kātukāmenaṁ ca tehi vuttavacanathameva gahetvā tadanugūṇaṁ yojetvāva kātabbaṁ, na idhāgatavaseneva sabbesaṁpi idhāgatavaseneva vacanāsambhavā. Bhūtena vatthunā katameva hi avipannaṁ hoti, nāñṅanti gahetabbaṁ. Esa nayo niyassakammādisupi.

Tajjanīyakammakathāvaṇṇanā niṭṭhitā.

### Adhammakammadvādasakakathādivaṇṇanā

4. **Appaṭiṅṅāya katanti** vatthum vā āpattim vā asampiṭicchāpetvā kataṁ. Yo pana sabbesaṁ passantānaṁ eva vatthuvītikkaṁ katvā pacchā kammakaraṇabhayena “na karomī”ti musā vadati, tassa bhikkhūnaṁ sammukhe vītikkaṁ karaṇameva paṭiṅṅā. Tathato jānanaṭṭhameva paṭiṅṅāya karaṇaṁ anuñṅātaṁ. Yattha pana sandeho hoti, tattha sampaṭicchāpetvāva kattabbanti gahetabbaṁ.

“**Pārājikāpattiyā vā**”ti idaṁ liṅganāsananimittatāya pārājikassa kammena atikicchaniyato vuttaṁ. “**Saṁghādisesāpattiyā vā**”ti idaṁ pana parivāsādinissāraṇakammaṁ āveṇikassa vijjamaṇattā vuttaṁ. Yaṁ pana parato “adhisīle sīlavipanno hoti -pa- tajjanīyakammaṁ kareyyā”ti<sup>1</sup> vuttaṁ, taṁ “āyatim saṁvare ṭhatvā vuṭṭhānaṁ karohī”ti ovadiyamānassa anādariyādipaccayalahukāpattim sandhāya vuttaṁ. Sīlavipattimūlakaṅhi lahukāpattim āpanno idha abhedūpacārena “adhisīle sīlavipanno”ti vutto “atidiṭṭhiyā diṭṭhivipanno”ti<sup>1</sup> ettha viya.

Yathā ca diṭṭhim gahetvā voharantassa “ito diṭṭhito oramaṅhī”ti avatvā katakammaṁ kevalāya diṭṭhivipattiyā katattā **anāpattiyā kataṁ** nāma adhammakammaṁ hoti, evaṁ sīlavipattim āpajjitvā

1. Vi 4. 9 piṭṭhe.

lajjidhamme okkante yathādhammaṃ vuṭṭhāya saṃvare ṭhātukāmassa kataṃ tajjanīyādikammaṃ kevalāya sīlavipattiyā katattā **adesanāgāminiyā kataṃ** nāma adhammakammaṃ hoti. Teneva niyassakammepi “apissu bhikkhū pakatā parivāsaṃ dentā”ti-ādinā saṃvare aṭṭhānameva kammanimittabhāvena vuttaṃ. Adantaṃ damanattameva hi tajjanīyādikammāni anuññātānīti. Keci pana “adesanāgāminiyāti idaṃ pārājikāpattimyeva sandhāya vuttaṃ, na saṃghādisesan”ti<sup>1</sup> vadanti, taṃ sukkaṃpakke “desanāgāminiyā āpattiyā kataṃ hoti”ti iminā vacanena virujjhati. Saṃghādisesassāpi ca pariyāyato desanāgāminivohāre gayhamāne “āpattiyā kataṃ hoti”ti vuttavārato<sup>2</sup> imassa vārassa viseso na siyā, aṭṭhakathāyampettha visesabhāvo na dassito. Tasmā vuttanayenevettha adhippāyo gahetabbo.

6. **Sabbānipīti** tajjanīyaniyassapabbājanīyakammāni tīṇipi. **Aññakamma** **vatthunāti** tajjanīyato aññassa kamma **vatthunā** aññakammakaraṇaṃ nāma koci dosopi na hotīti adhippāyo. Kāraṇamāha “**kasmā**”ti-ādinā.

8. **Pannalomāti** patitamānalomā.

Adhammakammadvādasakakathādivaṇṇanā niṭṭhitā.

### Niyassakammakathādivaṇṇanā

11. Niyassakamme pāḷiyaṃ **apissūti** apicāti imasmiṃ atthe nipātasamudāyo. **Nissāya te vatthabbanti** ettha keci kalyāṇamittāyattavuttitaṃ sandhāya vuttanti vadanti, aññe pana nissayaggahaṇamevāti, ubhayenapissa serivihāro na vaṭṭatīti dīpanti daṭṭhabbāṃ.

21. Pabbājanīyakamme “**pabbājanīyakammaṃ paṭippassambhetū**”ti idaṃ pakkamanādiṃ akatvā sammāvattantānaṃ vasena vuttaṃ.

1. Sārattha-Ṭī 3. 366 piṭṭhe.

2. Vuttavādato (Sī, Ka)

33. Paṭisāraṇīyakamme **neva bhikkhuvacanaṃ, na gihivacananti** ettha pariyāyatopi bhikkhū parakhuṃsanam<sup>1</sup> na vadanti, gahaṭṭhā pana sarūpeneva akkosituṃ samatthāpi upakārīsu akāraṇam evarūpaṃ na vadanti, tvaṃ gihiguṇatopi parihīnoti adhippāyo.

39. “**Aṅgasamannāgamo purimehi asadiṣo**”ti iminā tajjanīyādīnam guttakāraṇamattena idaṃ kātuṃ na vaṭṭatīti dīpeti. Idha vuttena pana gihīnam alābhāya parisakkanādinā aṅgena tānipi kātuṃ vaṭṭatīti gahetabbaṃ. Ettha ca “saddhaṃ pasannaṃ dāyakaṃ kārakaṃ saṃghupaṭṭhākaṃ hīnena khūṃsetī”ti vuttattā tādisesu gihīsu khūṃsanādīhi gihipaṭisaṃyuttehi eva aṅgehi kammārahatā, na āramikaceṭakādīsu khūṃsanādīhi. Tatthāpi dāyakādīsu khamāpitesu kammārahatā natthi, āpatti ca yattha katthaci desetūṃ vaṭṭati. Yo ce tikkhattuṃ khamāpiyamānopi na khamati, akatakammenapi dassanūpacāre āpatti desetabbā. So ce kālakato hoti, desantaraṃ vā gato, gatadisā na ñāyati, antarāmagge vā jīvitantarāyo hoti, katakammenapi akatakammenapi saṃghamaṃjje yathābhūtaṃ viññāpetvā khamāpetvā āpatti desetabbāti vadanti. Dhammikaṭṭhāsaṃvassa asaccāpane pana tesam̐ santikaṃ gantvā “mayā asamavekkhitvā paṭissavaṃ katvā so na saccāpito, taṃ me khamathā”ti-ādinā khamāpane vacanakkamo ñāpetabbo.

41. Pāḷiyam̐ **maṅkubhūto nāsakkhi cittaṃ gahapatiṃ khamāpetunti** tiṃsayojanamaggaṃ puna gantvāpi mānathaddhatāya yathābhūtaṃ dosaṃ āvikatvā akhamāpanena “nāhaṃ khamāmī”ti tena paṭikkhitto maṅkubhūto khamāpetuṃ na sakkhi, so punadeva sāvattihīṃ paccāgantvāpi mānaniggahatthāyeva punapi satthārā pesito purimanayeneva khamāpetuṃ asakkonto punāgacchi. Athassa bhagavā “asantam̐ bhāvanamiccheyyā”ti-ādināva<sup>2</sup> dhammaṃ desetvā mānanimmathanam̐ katvā anudūtaḍānam̐ anuññāsīti daṭṭhabbaṃ.

42. “**No ce khamati -pa- āpattim̐ desāpetabbo**”ti vuttattā pageva gahaṭṭho khamati ce, dassanūpacāre āpattidesanākkiccam̐ natthīti gahetabbaṃ.

1. Paraṃ khūṃsanam̐ (Sī, Ka)

2. Khu 1. 23 piṭṭhe Dhammapade.



46. Ukkhepanīyakammesu tīsu ariṭṭhavatthusmim **āpattim āropetvā**ti visum saṅghamajjheva pāpikāya diṭṭhiyā appaṭinissajjanapaccayā dukkaṭam, samanubhāsanapariyosāne pācittiyam vā āpattim āropetvā. Etthāpi kammavācāya “tathāham bhagavatā”ti-ādi vatthivasena vuttam. Yena yena pakārena diṭṭhigatikā voharimsu, tena tena pakārena yojetvā kammavācā kātabbā. Gahaṇākāram pana vināpi “suṇātu me bhante saṅgho, itthannāmassa bhikkhuno pāpikam diṭṭhigatam uppannam, so tam diṭṭhim appaṭinissajjati, yadi saṅghassa pattakallan”ti evam sāmāññatopi kammavācam kātum vaṭṭati.

65. “**Yam diṭṭhim nissāya bhaṇḍanādīni karoti**”ti iminā diṭṭhim nissāya uppannāni eva bhaṇḍanādīni idha adhippetāni, na kevalānīti dasseti. Yo pana “bhaṇḍanādīnam karaṇe doso natthi”ti diṭṭhiko hutvā bhaṇḍanādīm karoti, sāpissa diṭṭhi eva hoti, tassapi appaṭinissagge kammam kātum vaṭṭati.

Niyassakammakathādivaṇṇanā niṭṭhitā.

Kammakkhandhakavaṇṇanānayo niṭṭhito.

## 2. Pārivāsikakkhandhaka

### Pārivāsikavattakathāvaṇṇanā

75. Pārivāsikakkhandhake **antamaso mūlāyapaṭikassanārahādīnampīti ādi**-saddena mānattārahamānattacārika-abbhānārahe saṅgaṇhāti. Te hi pārivāsikānaṃ, pārivāsikā ca tesāṃ pakatattaṭṭhāne eva tiṭṭhanti. **Adhotapādaṭṭhapanakanti** yattha ṭhatvā pāde dhovanti, tādisaṃ dāruphalakakhaṇḍādīṃ. **Pādaghamaṃsananti** sakkharakathalādīṃ. **“Vattaṃ karontī”**ti ettakamattasseva vuttattā saddhivihārikādīhipi abhivādanādīṃ kātum na vaṭṭati.

**“Pārisuddhi-uposathe kariyamāne”**ti idaṃ pavāraṇādivasesu saṅghe pavārente anupagatachinnavassādīhi kariyamāna pārisuddhi-uposathampi sandhāya vuttaṃ. **Attano pāliyaṭi** navakānaṃ purato.

**“Pārivāsikassevā”**ti idaṃ abbhānārahapariyosāne sabbe garukaṭṭhe sandhāya vuttaṃ. Tesampi paccekāṃ oṇoṇanassa anuññātattā tadavasesā pakatattā eva taṃ na labhanti.

**Catussālabhattanti** bhojanasālāya paṭipāṭiyā diyyamānabhattaṃ. **Hatthapāse ṭhitenā**ti dāyakassa hatthapāse paṭiggahaṇaruhanatṭhāneti adhippāyo. **Mahāpeḷabhattepī**ti mahantesu bhattapacchi-ādibhājanesu ṭhapetvā diyyamānabhattesupi.

76. **Pāpiṭṭhatarāti pārajikāpattī**ti ukkaṃsavasesa vuttaṃ. Sañcarittādīpaṇṇattivajjato pana sukkavissaṭṭhādīkā lokavajjāva, tatthāpi saṅghabhedādīkā pāpiṭṭhatarā eva.

**“Kammanti pārivāsikakammavācā”**ti etena kammabhūtā vācāti kammavācā-saddassa atthopi siddhoti veditabbo. **Savacanīyanti** ettha “sadosaṃ”ti<sup>1</sup> atthaṃ vadati. Attano vacane pavattanakammanti evamettha attho daṭṭhabbo, “mā pakkamāhi”ti vā “ehi vinayadharānaṃ sammukhībhāvan”ti

---

1. Sārattha-Ṭī 3. 369 piṭṭhe.

vā evaṃ attano āṇāya pavattanakakammaṃ na kātābanti adhippāyo. Evañhi kenacisavacanīye kate anādarena atikkamītuṃ na vaṭṭati, buddhassa saṃghassa āṇā atikkantā nāma hoti.

**Rajohatabhūmīti** paṇṇasālāvisesanaṃ. **Paccayanti** vassāvāsikacīvaram. **Senāsanam na labhatīti** vassaggena na labhati.

**Apaṇṇakapaṭipadāti** aviraddhapaṭipadā. **Sace vāyamantopīti** ettha avisayabhāvaṃ ña tvā avāyamantopi saṅgayhati.

81. **Avisesenāti** pārivāsikukkhittakānaṃ sāmaññena.

**Pañcavaṇṇacchadanabaddhaṭṭhānesūti** pañcappakāracchadanehi channaṭṭhānesu.

**Obaddhanti** uṭṭhānādibyāpārapaṭibaddham, pīḷitanti attho. **Mañce vā pīṭhe vāti** ettha **vā-saddo** samuccayattho, tena taṭṭikācammakhaṇḍādīsu dīghāsanesupi nisīdituṃ na vaṭṭatīti dīpitaṃ hoti.

**Na vattabhedadukkaṭanti** vuḍḍhatarassa jānantassāpi vattabhede dukkaṭam natthīti dasseti. **“Vattam nikkhipāpetvā”**ti idaṃ pārivāsādimeva sandhāya vuttaṃ.

Pārivāsikavattakathāvaṇṇanā niṭṭhitā.

Pārivāsikakkhandhakavaṇṇanāyā niṭṭhito.

### 3. Samuccayakkhandhaka

#### Sukkavissatthikathāvaṇṇanā

97. Samuccayakkhandhake **vedayāmahanti**<sup>1</sup> jānāpemi ahaṃ, ārocemīti-attho. Anubhavāmītipissa atthaṃ vadanti. Purimaṃ pana pasamsanti āropanavacanattā. **Ārocetvā nikkhipitabbanti** dukkaṭaparimocanattaṃ vuttaṃ. Keci pana “tadaheva puna vattaṃ samādiyitvā aruṇaṃ uṭṭhāpetukāmassa ratticchedaparihāratthampi”ti vadanti.

“**Sabhāgā bhikkhū vasanti**”ti vuttattā visabhāgānaṃ vasanaṭṭhāne vattaṃ asamādiyitvā bahi eva kātumpi vaṭṭatīti daṭṭhabbaṃ. “**Dve leḍḍupāte atikkamitvā**”ti idaṃ vihāre bhikkhūnaṃ sajjhāyādisaddasavanūpacāravijahanattaṃ vuttaṃ. “**Mahāmagгато okkammā**”ti idaṃ maggaṭipannānaṃ bhikkhūnaṃ upacārātikkanantaṃ vuttaṃ. **Gumbena vāti**-ādi dassanūpacāravijahanattaṃ.

“**Sopi kenaci kammena pure aruṇe eva gacchatī**”ti iminā ārocanāya katāya sabbesupi bhikkhūsu vihāragatesu ūne gaṇe caraṇadoso vā vipavāsadoso vā na hoti āroci tattā<sup>2</sup> sahaṃvāsassāti dasseti. Tenāha “**ayañcā**”ti-ādi. **Abbhānaṃ kātuṃ na vaṭṭatīti** katampi akatameva hotīti attho.

Sukkavissatthikathāvaṇṇanā niṭṭhitā.

#### Paṭicchannaparivāsakathāvaṇṇanā

102. **Suddhassāti** sabhāgasamghādisesaṃ anāpannaṃ, tato vuṭṭhitassavā. **Aññasminti** suddhantaparivāsavasena āpattivuṭṭhānato aññasmim āpattivuṭṭhāne. Pāḷiyam “paṭikassito samghena udāyi bhikkhu antarā ekissā āpattiyā -pa- mūlāyapaṭikassanā”ti idaṃ karaṇavasena vipariṇāmetvā mūlāyapaṭikassanāya paṭikassitoti yojetabbaṃ. Atha vā “mūlāya paṭikassanā khamati samghassā”ti uttarapadena saha paccattavaseneva yojetumpi vaṭṭati.

1. Vediyāmahanti (Sī, Syā)

2. Ārocanattā (Ka)

“Udāyīm bhikkhum antarā ekissā āpattiyā -pa- mūlāya paṭikassitvā”ti ettha antarā ekissā āpattiyā hetubhūtāya udāyīm bhikkhum mūlāya paṭikassitvā mūladivase ākaḍḍhitvā tassā antarāpattiyā samodhānaparivāsam detūti yojanā. **Āvikārāpetvā vissajjetabboti** tassa atekicchabhāvaṃ teneva saṃghassa pākaṭam kāretvā lajjigaṇato viyojanavasena vissajjetabbo.

**Satam āpattiyoti** kāyasaṃsaggādivasena ekadivase āpannā satam āpattiyō. **Dasasatanti** sahasā āpattiyō. Rattisatam chādayitvānāti yojetabbo. **Sabbaparivāsakammavācāvasāneti** heṭṭhā dassitānaṃ dvinnam suddhantaparivāsānaṃ, tiṇṇaṃ samodhānaparivāsānañcāti imesaṃ sabbesaṃ parivāsānaṃ kammavācāpariyosāne. **Purimanayenevāti** paṭicchannaparivāse vuttanayena.

**Vihārūpacāratopīti** bahigāme bhikkhūnaṃ vihārūpacāratopi. “**Dve leḍḍupātā atikkamitabbā**”ti idaṃ bhikkhūnaṃ savanūpacārātikkanamaṃ vuttaṃ. **Gāmassāti na vuttanti** gāmassa upacāraṃ muñcitum vaṭṭatīti na vuttaṃ. Tena gāmūpacāre ṭhitāpi<sup>1</sup> tatha dassanasavanūpacāre atikkamitvā ṭhitā bhikkhū ca bhikkhuniyo ca tassā ratticchedaṃ na karontīti dīpeti.

**Anikkhattavattabhikkhūnaṃ vuttanayenevāti** upacārasīmāya pavitṭhānaṃ vasena ratticchedaṃ sandhāya vuttaṃ. **Tasmim gāmeti** bhikkhunīnaṃ nivāsanaḡāme. **Attānaṃ dassetvāti** yathā ārocetum sakkā, tathā dassetvā. “**Sammannitvā dātabbā**”ti iminā sammatāya sahaavāsepi ratticchedo na hotīti dasseti.

**Mūlāyapaṭikassitassāti** mūlāyapaṭikassitassa puna parivutthaparivāsassāti attho. **Tissannanti** mūlāpattiyā saha dvinnam antarāpattīnaṃca.

108. **Sace paṭicchannāti** nikkhattavattenāpannāpattim sandhāya vuttaṃ. Pāliyaṃ pañcāhappaṭicchannavāre antarāpattikathāyaṃ “**evañca pana bhikkhave chārattaṃ mānattaṃ dātabban**”ti idaṃ mūlāyapaṭikassanākammavācānantarameva dātuṃ vuttaṃ na hoti. Mūlāyapaṭikassitassa pana pañcadivasāni parivasitvā

---

1. Ṭhitāyapi (Si)

yācitassa mānattacaraṇakāle āpannāya tatiyāya antarāpattiyā appaṭicchannāya mānattadānaṃ sandhāya vuttaṃ. Evañca dinnamānattassa ekena chārattena pubbe dinnamānattāhi tihi āpattīhi saha catassannampi āpattīnaṃ mānattaṃ ciṅṅameva hoti. Iminā pana nayena abbhānārahakāle āpannāya antarāpattiyā, pakkhappaṭicchannavāre antarāpattīsu ca paṭipajjanaṃ veditabbaṃ. “**Ekāhappaṭicchannādivasena pañcā**”ti idaṃ ekāhappaṭicchannādīnaṃ catunnaṃ paccekaparivāsadānamānattadāna-abbhānāni ekekaṃ katvā vuttaṃ. “**Antarāpattivasena catasso**”ti idampi mānattadāna-abbhānāni tasmim tasmim mūlāyapaṭīkassane ekattaṃ āropetvā vuttaṃ.

Paṭicchannaparivāsakathāvaṇṇanā niṭṭhitā.

### Samodhānaparivāsakathāvaṇṇanā

125. “**Yasmā paṭicchannā antarāpattī**”ti idaṃ samodhānaparivāsadānassa kāraṇavacanāṃ, na pana ciṅṅaparivutthadivasānaṃ makkhitabhāvassa, appaṭicchannāya antarāpattiyā mūlāyapaṭīkassane katepi tesāṃ makkhitabhāvasambhavato. Tasmā “mānattaciṅṅadivasāpi parivutthadivasāpi sabbe makkhitāva hontī”ti imassānantaraṃ “samodhānaparivāso cassa dātabbo”ti pāṭhaṃ ajjhāharitvā “kasmā? Yasmā paṭicchannā antarāpattī”ti evamettha yojanā kātabbā. Tenāha “**tenevā**”ti-ādi.

Samodhānaparivāsakathāvaṇṇanā niṭṭhitā.

### Agghasamodhānaparivāsakathāvaṇṇanā

134. “**Ekāpattimūlakañcā**”ti iminā “ekā āpatti ekāhappaṭicchannā, ekā āpatti dvīhappaṭicchannā”ti-ādinayaṃ dasseti. **Appaṭicchannabhāvaṃ**<sup>1</sup> **dassetunti** ajānanādinā paṭicchannāyapi āpattiyā mānattārahātāvacanena appaṭicchannabhāvaṃ dassetuṃ. “Ekassa āvuso māsassa bhikkhu

1. Āpannabhāvaṃ (Ka)

mānattāraho”ti<sup>1</sup> hi vuttaṃ. Ettha ekassa ajānanapaṭicchannamāsassa parivāsāraho na hoti, kevalaṃ āpattiyā appaṭicchannattā mānattāraho hotīti adhippāyo. Pāḷiyam **makkhadhammoti** madditukāmatā. Saṃghādisesānaṃ parivāsādānādisabbavinicchayassa samuccayattā panaesa samuccayakkhandhakoti vuttoti veditabbo.

Agghasamodhānapdarivāsakathāvaṇṇanā niṭṭhitā.

Samuccayakkhandhakavaṇṇanānayo niṭṭhito.

## 4. Samathakkhandhaka

### Sativinayakathādivaṇṇanā

195. Samathakkhandhake khīṇāsavassa vipulasatiṃ nissāya dātabbo vinayo codanādi-asāruppānaṃ vinayanupāyo **sativinayo**.

196. **Cittavipariyāsakatoti** katacittavipariyāso. **Gaggam bhikkhum -pacodentīti** ettha pana ummattakassa idaṃ **ummattakam**, ajjhāciṇṇaṃ. Tadeva cittavipariyāsenā katanti cittavipariyāsakataṃ. Tena ummattakena cittavipariyāsakatena ajjhāciṇṇena anācārena āpannāya āpattiyā gaggam bhikkhum codentīti evamattho daṭṭhabbo. Paṭhamaṃ mūlho hutvā pacchā amūlhabhāvaṃ upagatassa dātabbo vinayo **amūlhavenayo**.

202. Dhammavādīnaṃ yebhuyyabhāvasampādikā kiriyā **yebhuyyasikāti** imasmiṃ atthe sa-kārāgamasahito ika-paccayantoyaṃ saddoti dassetuṃ āha “**yassā**”ti-ādi. tattha **yassā kiriyāyāti** gūlḥakavivaṭṭakādīnā salākaggāhāpakakiriyāya. Yebhuyyabhāvaṃ nissitasamathakiriyā yebhuyyasikāti evaṃ yebhuyyasikāsaddassa attho gahetabbo. Evañhi ayaṃ adhikaraṇasamatho nāma hoti. Yathāvuttasalākaggāhena hi dhammavādīnaṃ yebhuyyabhāve siddhe pacchā taṃ yebhuyyabhāvaṃ nissāyeva adhikaraṇavūpasamo hoti, na dhammavādīnaṃ bahutarabhāvasādhakakiriyāmattena.

207. “**Sesamettha tajjanīyādīsu vuttanayamevā**”ti etena tajjanīyādīsattakammāni viya idampi tassapāpiyasikākammaṃ asucibhāvādidosayuttassa, saṃghassa ca vinicchaye atīṭṭhamānassa kattabbaṃ visuṃ ekaṃ niggahakammanti dasseti. Etasmiñhi niggahakamme kate so puggalo “**ahaṃ suddho**”ti attano suddhiyā sādhanatthaṃ saṃghamajjhaṃ otarituṃ, saṃgho cassa vinicchayaṃ dātuṃ na labhati, taṃ kammakaraṇamatteneva ca taṃ adhikaraṇaṃ vūpasantaṃ hoti.

Kathaṃ panetaṃ kammaṃ paṭippassambhatīti? Keci panettha “so tathā niggahito niggahitova hoti, osāraṇaṃ na labhati. Teneva



pāliyaṃ osāraṇā na vuttā”ti vadanti. Aññe pana “pāliyaṃ na upasampādetabbanti-ādinā sammāvattanassa vuttattā sammāvattitvā lajjidhamme okkantassa osāraṇā avuttāpi tajjanīyādīsu viya nayato kammavācam yojetvā osāraṇā kātabbā evā”ti vadanti, idaṃ yuttaṃ. Teneva aṭṭhakathāyaṃ vakkhati “sace sīlavā bhavissati, vattaṃ paripūretvā paṭippassaddhiṃ labhissati. No ce, tathā nāsitakova bhavissatī”ti<sup>1</sup>. **Tassapāpiyasikākammanti** ca aluttasamāsoyeva. Teneha “**idaṃ hī**”ti-ādi.

Sativinayakathādivaṇṇanā niṭṭhitā.

### Adhikaraṇakathāvaṇṇanā

215. Virūpato vipariṇāmaṭṭhena cittaṃ dukkhaṃ vipaccatīti āha “**cittadukkhatham vohāro**”ti-ādi. **Upavadanā**ti codanā. **Tatthevā**ti anuvadane.

**Ādito paṭṭhāya ca tassa kamma**ssa viññātattāti vitthārato āgatakammavaggassa ādito paṭṭhāya vaṇṇanāmukhena viññātattā vinicchayo bhavissatīti yojanā.

216. Pāliyaṃ **ajjhataṃ vā**ti attani vā attano parisāya vā. **Bahiddhā vā**ti parasmim vā parassa parisāya vā. **Anavassavāyā**ti anuppādāya.

220. “**Vivādādhikaraṇaṃ kusalaṃ akusalaṃ abyākatan**”ti idaṃ pucchāvacaṇaṃ. **Vivādādhikaraṇaṃ siyā kusalan**ti-ādi visajjanaṃ. Esa nayo sesesupi.

222. Sammutisabhāvāyapi āpattiyā kāraṇūpacārena akusalābyākatabhāvena vuccamāne kusalassāpi āpattikāraṇattā tadupacārena “**āpattādhikaraṇaṃ siyā kusalan**”ti vattabbaṃ bhaveyya,

1. Vi-Ṭṭha 4. 43 piṭṭhe.

tathā avatvā “natthi āpattādhikaraṇaṃ kusalan”ti evaṃvacanassa kāraṇaṃ dassetuṃ “**ettha sandhāyabhāsitavasena attho veditabbo**”ti vuttaṃ. Ettha cāyamadhippāyo—yadi hi āpatti nāma paramatthadhammasabhāvābhāveyya, tadā “āpattādhikaraṇaṃ siyā akusalan”ti-ādivacanaṃ yujjeyya. Yasmā duṭṭhadosasikkhāpadaṭṭhakathādīsu dassitadosappasaṅgato paramatthasabhāvatā na yuttā, ekantasammutisabhāvā eva sā hoti, tasmā “siyā akusalaṃ siyā abyākatan”tipi nibbariyāyato na vattabbā. Yadi pana akusala-abyākatadhammasamuṭṭhitattameva upādāya pariyāyato “siyā akusalaṃ siyā abyākatan”ti vuttaṃ. Tadā kusaladhammasamuṭṭhitattampi upādāya pariyāyato “āpattādhikaraṇaṃ siyā kusalan”tipi vattabbaṃ bhaveyya. Yato cetaṃ vacanaṃ āpattiyā akusalābyākatūpacārārahattasā kusalūpacārānarahattassa viṣuṃ kāraṇasabbhāvaṃ sandhāya bhāsitaṃ, tasmā yaṃ taṃ kāraṇavisesaṃ sandhāya idaṃ bhāsitaṃ, tassa vasenevettha attho veditabbo.

Idāni pana yo aṅgappahonakacittameva sandhāya āpattiyā akusalādivhāvo vutto, nāññaṃ visesakāraṇaṃ sandhāyāti gaṇheyya, tassa gāhe dosaṃ dassento “**yasmiṃ hī**”ti-ādimāha. Tattha **pathavīkhaṇanādiketi** pathavīkhaṇanādinimutte paṇṇattivajje. **Āpattādhikaraṇe kusalacittaṃ aṅganti** paṇṇattim ājānitvā kusalacittena cetiyaṅgaṇādīsu bhūmisodhanādivasena pathavībhūtagāmaṃvikopanādikāle kusalacittaṃ kāraṇaṃ hoti. **Tasmiṃ satī**ti tasmiṃ āpattādhikaraṇe vijjamāne kusalacittasamuṭṭhitattena kusalavohārārahāya āpattiyā vijjamānāyāti adhippāyo. **Sāratthadīpaniyam**<sup>1</sup>, pana “tasmiṃ satī”ti imassa “tasmiṃ kusalacitte āpattibhāvena gahite”ti attho vutto, taṃ na yujjati “yasmin”ti ya-saddena parāmaṭṭhasseva āpattādhikaraṇassa “tasmin”ti parāmasitabbato.

**Na sakkā vattunti** yadi sammutisabhāvāyapi āpattiyā akusalādisamuṭṭhitattena akusalādivohāro kariyati, tadā kusalavohāropi kattabboti “natthi āpattādhikaraṇaṃ kusalan”ti na sakkā vattum, aññathā akusalādivhāvopissa paṭikkhipitabboti adhippāyo.

---

1. Sārattha-Ṭī 3. 378 piṭṭhe.

**Tasmā** yasmā kusalādīnaṃ tiṇṇaṃ samānepi āpattiyā aṅgappahonakatte kusalavohārova āpattiyā paṭikkhitto, na akusalādivohāro, tasmā **nayidaṃ aṅgappahonakaṃ cittaṃ sandhāya vuttanti** “āpattādhikaraṇaṃ siyā akusalaṃ siyā abyākataṃ, natthi āpattādhikaraṇaṃ kusalan”ti idaṃ āpattiyā samuṭṭhāpakattena aṅgappahonakaṃ kāraṇabhūtaṃ cittamattaṃ sandhāya na vuttaṃ, aññathā “āpattādhikaraṇaṃ siyā kusalan”tipi vattabboti adhippāyo. Etena āpattiyā akusalādibhāvopi kenaci nimittena pariyāyatova vutto, na paramatthato dasseti. Yathāha “yaṃ kusalacittena āpajjati, taṃ kusalaṃ, itarehi itaran”ti.

**Idaṃ panāti**-ādīsu ayaṃ adhippāyo—“āpattādhikaraṇaṃ siyā akusalaṃ siyā abyākataṃ”ti idaṃhi yaṃ kiñci kadāci katthaci kāraṇaṃ bhavantaṃ aniyatakāraṇaṃ sandhāya vuttaṃ na hoti. Yaṃ pana sabbasikkhāpadesu āpattiyā kāraṇaṃ bhavitumarahati, idameva kāraṇaṃ sandhāya vuttaṃ. Akusalaṃhi paṇṇattim ṇatvā vītikkamantassa sabbāpattiyā kāraṇaṃ hoti, lokavajjāpattiyā pana paṇṇattim ajānantassapi kāraṇaṃ hoti. Kevalaṃ paṇṇattivajjāpattīsu kusalābyākatacittapavattikkhaṇe eva akusalaṃ na vattati, tadanñattha sayameva pavattati. Abyākataṃ pana kāyavacībhūtaṃ kusalākusalādīnaṃ pavattikkhaṇe nirodhasamāpannassa sahaseyyāpattiyanti sabbāpattiyā aṅgameva hoti channaṃ āpattisamuṭṭhānānaṃ kāyavācaṅgavirahitattābhāvā. Tasmā imesaṃ akusalābyākataṇaṃ sabbāpattimūlakattameva sandhāya idaṃ āpattiyā akusalattaṃ, abyākatattaṅca vuttaṃ. Yattha pana pathavīkhaṇanādīsu kusalampi āpattiyā kāraṇaṃ hoti, tatthāpi āpattiyā tadupacārena kusalattavohāro ayutto sāvajjānavajjānaṃ ekattavohārassa viruddhattā. Yadaggena aññamaññaṃ viruddhā, tadaggena kāraṇakāriyavohāropi nesaṃ ayutto. Tasmā tattha vijjamānampi kusalaṃ abbohārikaṃ, kāyavacīdvārameva āveṇikaṃ kāraṇanti.

Tattha **ekantato akusalamevāti** akusalacittena samuṭṭhahanato kāraṇūpacārato evaṃ vuttaṃ. **Tatthāti** lokavajje. **Vikappo natthīti** siyā saddassa vikappanattataṃ dasseti. **Akusalaṃ hotīti** akusalasamuṭṭhitāya kāraṇūpacārena akusalaṃ hoti. **Sahaseyyādivasena**

**āpajjanato abyākatam hotīti** itthiyādīhi saha piṭṭhipasāraṇavasappavatta-kāyadvārasaṅkhātarūpābyākatavaseneva āpajjitabbato kāraṇūpacāreneva āpatti abyākatam hoti. **Tatthā**ti tasmim paṇṇattivajjāpattādhikaraṇe.

**Sañciccāsañciccavasenā**ti paṇṇattim ñatvā, aññatvā ca āpajjanavasena **imaṃ vikappabhāvaṃ sandhāya** akusalatta-abyākatattasaṅkhātam yathāvuttam imam vikappasabhāvaṃ sandhāya idam vacanam vuttam.

Yadi evam asañciccāpajjanapakke kusalenāpi āpajjanato tampi vikappam sandhāya “āpattādhikaraṇam siyā kusalan”ti pi kasmā na vuttanti āha “**sace panā**”ti-ādi. “Acittakānan”ti vuttamevattham samuṭṭhānavasena vibhāvetum “**eḷakalomapadasodhammādisamuṭṭhānānampī**”ti vuttam. Acittakasamuṭṭhānānam “**kusalacittam āpajjeyyā**”ti etena sāvajjabhūtāya āpattiyā kāraṇūpacārenāpi anavajjabhūtakusalavohāro ayuttoti dasseti. “**Na ca tatthā**”ti-ādinā kusalassa āpattiyā kāraṇattam vijjamānampi tathā voharitum ayuttanti paṭikkhipivā kāyavācāsaṅkhātam abyākatasseva kāraṇattam dasseti. Tattha **calitappavattānanti** calitānam, pavattānañca. Calito hi kāyo, pavattā vācā. Ettha ca kāyavācānamaññatameva aṅgam. **Tañca -pa- abyākatanti** evam abyākatassa āpattikāraṇabhāveneva vuttatā. “Āpattādhikaraṇam siyā akusalam siyā abyākatan”ti idam kāraṇūpacārena pariyāyato vuttam, na nipariyāyatoti sijjhati.

Yam pana **sāratthadīpaniyam**<sup>1</sup> āpattiyā nipariyāyatova akusalādisabhāvataṃ samatthetum bahum papañcitam, tam na sārato paccetabbam duṭṭhadosaikkhāpadaṭṭhakathāyameva paṭikkhittatā. Tenevetthāpi “yam cittam āpattiyā aṅgam hotī”ti-ādinā akusalacittassāpi āpattiyā kāraṇattena bhinnatāva dassitā. Yam panettha vattabbam, tam heṭṭhā dassitamevāti idha na vitthārayimha. **Evam vītikkamoto yo vītikkamoti** ettha akusalacittena ñatvā vītikkamantassa kāyavacīvīttikamasamuṭṭhitā āpattivīttikamoti vutto. Esa nayo abyākatavārepi.

Adhikaraṇakathāvaṇṇanā niṭṭhitā.

1. Sārattha-Ṭī 3. 379 piṭṭhe.

### Adhikaraṇavūpasamanasamathakathādivaṇṇanā

228. Pāḷiyam **vivādādhikaraṇam ekaṁ samatham anāgammāti**-ādi pucchā. **Siyāti**-ādi vissajjanam. **Siyātissa vacanīyanti** eteneva vūpasamam siyāti vattabham bhaveyyāti attho. **Sammukhāvinayasminti** sammukhāvinasattasminti bhāvappadhāno niddeso daṭṭhabbo. Evaṁ sabbavāresu. **“Kārako ukkoṭeti”**ti idam upalakkhaṇamattam, yassa kassaci ukkoṭentassa pācittiyameva. Ubbāhikāya khīyanake pācittiyam na vuttam tattha chandadānassa natthitāya.

235. **Vaṇṇavaṇṇāyo katvāti** khuddakamahantehi saññānehi yuttāyo katvā. Tenāha **“nimittasaññam āropetvā”**ti.

242. **Kiccādhikaraṇam -pa- sammatīti** ettha sammukhāvinayena apalokanādikammam sampajjatīti attho daṭṭhabbo.

Adhikaraṇavūpasamanasamathakathādivaṇṇanā niṭṭhitā.

Samathakkhandhakavaṇṇanānayo niṭṭhito.

## 5. Khuddakavatthukkhandhaka

### Khuddakavatthukathāvaṇṇanā

243. Khuddakavatthukkhandhake **aṭṭhapadākārenā**ti jūtapalake aṭṭhagabbharāji-ākārena. **Mallakamūlasaṅṭhānenā**ti khelamallakamūlasaṅṭhānena. Idañca vaṭṭādhārakam sandhāya vuttaṃ, kaṇṭake uṭṭhāpetvā katavaṭṭakapālassetaṃ adhivacanaṃ.

244. **Puthupāṇikanti** muṭṭhim akatvā vikasitahattatalehi piṭṭhiparikammaṃ vuccati. Etameva sandhāya “**hatthaparikammaṃ**”ti vuttaṃ.

245. **Muttolambakādīnanti ādi**-saddena kuṇḍalādīm saṅgaṇhāti. **Palambakasuttanti** brāhmaṇānaṃ yaññopacitasuttādi-ākāraṃ vuccati. **Valayanti** hatthapādavalayaṃ.

246. **Dvaṅguleti** upayogabahuvacanaṃ, dvaṅgulappamaṇaṃ atikkāmetuṃ na vaṭṭatīti attho. Ettha ca dumāsassa vā dvaṅgulassa vā atikkantabhāvaṃ ajānantassāpi kesamassugaṇanāya acittakāpattiyo hontīti vadanti.

**Kocchenā**ti usīraṭṭhādīni bandhitvā samaṃ chinditvā gahitakocchena. **Cikkalenā** ti<sup>1</sup> silesayuttatelenā. **Uṇhābhitattarajasirānampī**ti uṇhābhitattānaṃ rajokiṇṇasirānaṃ. **Addahatthenā**ti allahatthena.

248-9. **Sādhugītanti** aniccatādipaṭisaññuttaṃ gītaṃ. **Caturassena vattenā**ti paripuṇṇena uccāraṇavattena. Taraṅgavattādīnaṃ sabbesampi sāmāññalakkhaṇaṃ dassetuṃ “**sabbesaṃ -pa- lakkhaṇaṃ**”ti vuttaṃ. Yatthakāhi mattāhi akkharaṃ paripuṇṇaṃ hoti, tatopi adhikamattāyuttaṃ katvā kathanam **vikāra**kathanam nāma, tathā akatvā kathanameva **lakkhaṇanti** attho. **Bāhiralominti** bhāvanapumsakaniddeso, yathā bahiddhā lomāni dissanti, evaṃ dhārentassa dukkaṭanti attho.

---

1. Cikkaṇṇenāti (Sī)

250. Pāḷiyam **taruṇaññeva ambanti** taruṇam asaṇjātabījam eva ambaphalam. **Pātāpetvāti** chindāpetvāva. **“Mattavaṇṇitā”**ti idam “pare nindanti”ti sāsanahitesitāya vuttam. **Na pariyaṇimsūti** nāsikkhimsu.

251. **Cattāri ahirājakulānīti** sabbesam ahibhedānam catūsu eva saṅgahato vuttam. **Attaparittam kātunti** attano parittānam kātum.

**Virūpakkhehi me mettanti** virūpakkhajātikehi nāgehi saha mayham mittabhāvo hotu, mettā hotūti attho, te sukhitā niddukkhā averā hontūti adhippāyo. Evañhi mettāpharaṇam hoti. Sesesupi eseva nayo. **Apādakehīti** ahikulehi saha sabbasattesu odhiso mettāpharaṇadassanam. **Mā mam apādako himsīti** tāya mettāya attarakkhāvidhānadassanam.

**Sabbe sattāti-ādi** attānam upamam katvā sabbasattesu anodhiso mettāpharaṇadassanam. Tattha **mā kañci pāpamāgamāti** kañci sattam lāmakam dukkhahetu, dukkhañca mā āgacchatu.

Evam mettāya attaguttiṃ dassetvā idāni ratanattayānussaraṇena dassetum **“appamāṇo”**ti-ādi vuttam. Tattha pamāṇakaradhammā akusalā, tabbipākā ca pamāṇā, tappaṭipakkhā sīlādayo guṇā, tabbipākā ca lokiyalokuttaraphalāni appamāṇā, te assa atthīti **appamāṇo**, appamāṇā vā aparimeyyaguṇā assātipi **appamāṇo**. **Pamāṇavantānīti** yathāvuttapamāṇakaradhammayuttāni. **Ahivicchikāti** sarīsapānaññeva pabhedadassanam. **Uṇṇanābhīti** lomasanābhiko makkaṭo. **Sarabūti** gharagoḷikā.

**Paṭikkamantūti** apagacchantu, mā mam vihesayimsūti attho. **Soham namoti** ettha “karomī”ti pāṭhaseso. Yasmā mayā mettādīhi tumhākañca mayhañca rakkhā katā, yasmā ca soham bhagavato namo karomī, vipassī-ādīnam sattannampi namo karomī, tasmā paṭukkamantu bhūtānīti yojanā.

**Aññamhīti** kāmarāge asubhamanasikārādīnā chedabbeti attho. **Aṅgajātanti** bijavirahitam purisanimittam. Bije hi chinne opakkamikapaṇḍako nāma abhabbo hotīti vadanti. Eke pana “bījassāpi

chedanakkhaṇe dukkaṭāpatti eva kamena purisindriyādiḱe antarahite paṇḁako nāma abhabbo hoti, tadā liṅganāsanāya nāsetabbo”ti vadanti. **Tādisaṃ vā dukkhaṃ uppādentassāti** muṭṭhippahārādīhi attano dukkhaṃ uppādentassa.

252. Paḷiyāṃ **tuyheso pattoti** “yo ca arahā ceva iddhimā ca, tassa dinnamevā”ti seṭṭhinā vuttaṃ, taṃ sandhāya vadati. **Taṃ pattam gahetvā tikkhattum rājagahaṃ anupariyāyīti** ettha veḷuparamparāya baddhapattassa uparibhāge ākāse nagaraṃ tikkhattum anupariyāyitvā ṭhitabhāvaṃ sandhāya “pattam gahetvā”ti vuttaṃ, na pana thero hatthena pattam sayameva aggaheṣi. Keci pana vadanti “iddhibalena taṃ pattam veḷuparamparato muñcitvā theram anubandhamāno aṭṭhāsi, so ca anena hatthena gahito viya ahoṣī”ti. Tathā ṭhitameva pana sandhāya “bhāradvājassa hatthato pattam gahetvā”ti vuttaṃ. **Teca manussā -pa- anubandhimsūti** ye ca manussā paṭhamam pāṭihāriyam nāddasaṃsu, te amhākampi pāṭihāriyam dassehīti theramanubandhimsu. Thero ca sīhabyagghādirūpaṃ gahetvā vikubbaniddhim dasseti, te ca acchariyabbhutaḱātā uccāsaddā mahāsaddā ahesuṃ. Tenāha **“kiṃ nu kho so ānanda uccāsaddo mahāsaddo”**ti. **Iddhipāṭihāriyam na dassetabbanti** ettha “yo pakativaṇṇam vijahitvā kumāraṇṇam vādasseti, nāgavaṇṇam vā -pa- vividhampi senābyūham dasseti”ti<sup>1</sup> evamaḱatā attano sarīrassa vikārāpādanavasappavattā vikubbaniddhi adhippetāti āha **“adhiṭṭhānidhi pana appaṭikkhittā”**ti. Pakatiyā eko bahukaṃ āvajjati, sataṃ vā sahasaṃ vā sataśahaṣaṃ vā āvajjetvā nāṇena adhiṭṭhāti “bahuko homī”ti<sup>2</sup> evaṃ dassitā adhiṭṭhānavasena nipphannā adhiṭṭhānidhi nāma. **Gihivikaṭānīti** gihisantakāni.

253. Paḷiyāṃ **na acchupiyantīti** na phusitāni honti. **Rūpakākiṇṇānīti** iddhirūpādīhi ākiṇṇāni.

254. **Bhūmi-ādhāraḱeti** dantādīhi kate valayādhāraḱe. Etassa valayādhāraḱassa anuccatāya ṭhapitā vattā na paripatantīti **“tayo**

1. Khu 9. 388 piṭṭhe Paṭisambhidāmagge. 2. Khu 9. 385 piṭṭhe Paṭisambhidāmagge.



**patte ṭhapetum vaṭṭati**”ti vuttaṃ. Anuccatañhi sandhāya ayaṃ “bhūmi-ādhārako”ti vutto. **Dāru-ādhārakadaṇḍādhārakesūti** ekadārunā kata-ādhārake, bahūhi daṇḍehi kata-ādhārake ca. Ete ca uccatarā honti pattehi saha patanasabhāvā tena “**susajjitesū**”ti vuttaṃ. **Bhamakoṭisadisoti** yattha dhamakaraṇādīm pavesetvā likhanti, tassa bhamakassa koṭiyā sadiso. Tādisassa dāru-ādhārakassa avitthiṇṇatāya ṭhapitopi patto patatīti “**anokāso**”ti vutto.

**Ālindakamiḍḍhikādīnanti** pamukhamiḍḍhikādīnam, uccavattukānanti attho. **Bāhirapasseti** pāsādādīnam bahikuṭṭe. **Tanukamiḍḍhikāyāti** vedikāya. Sabbattha pana hatthappamāṇato abbhantare ṭhapetum vaṭṭati. Ādhāre pana tato bahipi vaṭṭati.

Pāḷiyam **oṭṭhoti** mukhavaṭṭi. **Pattamālakanti** upacikānam anuṭṭhahanatthāya bhūmito uccataram kataṃ vedikākāramālakam. **Mahāmukhakuṇḍasaṅṭhānāti** mahāmukhacāṭisaṅṭhānā. **Laggentassa dukkaṭanti** kevalam pattaṃ laggentassa, na thavikāya laggentassāti vadanti. Vīmaṃsitabbaṃ. **Aññena pana bhaṇḍakenāti** aññena bhārabandhanena bhaṇḍakena. “**Bandhitvā olambetun**”ti vuttattā pattatthavikāya aṃsabaddhako<sup>1</sup> yathā laggitaṭṭhānato na parigaḷati, tathā sabbathāpi bandhitvā ṭhapetum vaṭṭati. **Bandhitvāpi upari ṭhapetum na vaṭṭatīti** upari nisīdantā ottharivā bhīdantīti vuttaṃ. **Tattha ṭhapetum vaṭṭatīti** nisīdanasāṅkābhāvato vuttaṃ. **Bandhitvā vāti** bandhitvā ṭhapitachatte vā. **Yo kecīti** bhattapūropi tucchapattopi.

255. **Pariharitunti** divase divase piṇḍāya caraṇatthāya ṭhapetum. Pattaṃ alabhantena pana ekadivasam piṇḍāya caritvā bhuñjitvā chaḍḍetum vaṭṭati. Tenāha “**tāvakālikam paribhuñjitum vaṭṭati**”ti. Paṇṇapuṭṭādisupi eseva nayo. **Abhum** meti abhūti mayham, vināso mayhanti attho. Pāḷiyam **pisāco vatamanti** pisāco vatāyam, ayameva vā pāṭho. **Pisācillikāti** pisācadārakā. **Chavasīsassa pattoti** chavasīsamayo patto. Pakativikārasambandhe cetam sāmivacanam.

---

1. Aṃsavaṭṭako (Sī), aṃsavaddhako (Ka)

**Cabbetvāti** niṭṭhubhitvā. “**Paṭiggahaṃ katvā**”ti vuttattā ucchiṭṭhahatthena udakaṃ gahetvā pattam̐ paripphositvā dhovanaghamsanavasena hattham̐ dhovituṃ vaṭṭati, ettakena pattam̐ paṭiggahaṃ katvā hattho dhovito nāma na hoti. **Ekam̐ udakagaṇḍusaṃ gahetvāti** pattam̐ aphasitvā tattha udakameva ucchiṭṭhahatthena ukkhipitvā gaṇḍusaṃ katvā, vāmahattheneva vā pattam̐ ukkhipitvā mukhena gaṇḍusaṃ gahetumpi vaṭṭati. **Bahi udakena vikkhāletvāti** dvīsu aṅgulīsu āmisamattam̐ vikkhāletvā bahi gahetumpi vaṭṭati. **Paṭikhāditukāmoti** ettha na sayam̐ khāditukāmopi aññesaṃ khādanārahaṃ ṭhapetuṃ labhati. **Tattheva katvāti** patteyeva yathāṭhapihāṭṭhānato anuddharitvā. **Luñcitvāti** tato maṃsameva niravasesam̐ uppaṭṭetvā.

256. **Kiṇṇacuṇṇenāti** surākiṇṇacuṇṇena. **Makkhetunti** sūcim̐ makkhetuṃ. **Nissenimpīti** catūhi daṇḍehi cīvarappamāṇena āyatacaturassam̐ katvā baddhapāṭalampi. Ettha hi cīvarakoṭiyo samakam̐ bandhitvā cīvaram̐ yathāsukham̐ sibbanti. **Tattha attharitabbanti** tassā nissenīyā upari cīvarassa upatthambhanatthāya attharitabbam̐. Kathinasaṅkhātāya nissenīyā cīvarassa bandhanakarajju kathinarajjūti majjhimapadalopīsamāsoti āha “**yāyā**”ti-ādi. Tattha yasmā dvinnam̐ paṭalānam̐ ekasmim̐ adhike jāte tattha valiyo honti, tasmā dupaṭṭacīvarassa paṭaladvayampi samakam̐ katvā bandhanakarajju kathinarajjūti veditabbam̐.

Pāliyam̐ **kathinassa anto jīratīti** kathine baddhassa cīvarassa pariyanto jīrati. Kathinanissitañhi cīvaram̐ idha nissayavohārena “kathinan”ti vuttam̐ “mañcā ghosantī”ti-ādīsu viya. **Anuvātam̐ paribhaṇḍanti** kathine bandhanarajjūhi cīvarassa samantā pariyantassa ajīraṇattham̐ yehi kehici coḷakehi dīghato anuvātam̐, tiriyato paribhaṇḍañca sibbitvā kātuṃ yattha rajjuge pavesetvā daṇḍesu paliveṭṭhetvā cīvarasamakam̐ ākaḍḍhituṃ sakkā, tādisanti attho. Keci pana “kathinasaṅkhātesu kilañjādīsu eva ajīraṇatthāya anuvātaparibhaṇḍakaraṇam̐ anaññātan”ti vadanti. **Tassa majjheti** purāṇakathinasseva anto. **Bhikkhuno pamāṇenāti** bhikkhuno cīvarassa pamāṇena. **Aññam̐ nissenīnti** dīghato ca tiriyato ca aññam̐ daṇḍam̐ ṭhapetvā bandhituṃ.

**Bidalakanti** diguṇakaraṇasaṅkhātakiriyāvisesassa adhivacanāṃ. Tenāha “**diguṇakaraṇan**”<sup>1</sup>. **Pavesanasalākanti** valīnaṃ aggahaṇatthāya pavesanakaveḷusalākādi. Pāliyaṃ **paṭiggahanti** aṅgulikañcukāṃ.

257. **Pāti** nāma bhaṇḍatthapanako bhājanaviseso. Pāliyaṃ **paṭiggahathavikanti** pāti-ādibhājanatthavikāṃ. **Cinitunti** uccavatthupariyantassa apatanatthāya iṭṭhakādīhi cinitum. **Ālambanabāhanti** ālambanarajjudaṇḍadi. **Paribhijjātīti** kaṭasārādikaṃ kathinamajjhe bhaṅgaṃ hoti. **Ussāpetvāti** daṇḍakathinaṃ sandhāya vuttaṃ.

258-9. **Udakaṃ akappiyanti** sappāṇakāṃ. **Upanandhīti** veraṃ bandhi. **Addhānamaggo paṭipajjitabboti** ettha addhayojanaṃ addhānamaggo nāma, taṃ paṭipajjitukāmassa sañcicca viharūpacārātikkamane āpatti. Asañcicca gatassa pana yattha sarati, tattha ṭhatvā saṅghāṭikaṇṇadim anadhiṭṭhahitvā **gamane** padavārena āpattīti veditabbaṃ. **Na sammatīti** na pahoti.

260. **Abhisannakāyāti** semhādidosasannicitakāyā. **Tattha majjheti** aggaḷapāsakassa majjhe. **Uparīti** aggaḷapāsakassa uparibhāge. **Udakatthapanatthānanti** udakatthapanatthāya paricchinditvā kataṭṭhānaṃ.

261. Pāliyaṃ **udapānanti** kūpaṃ. **Nīcavatthukoti** kūpassa samantā kūlaṭṭhānaṃ, bhūmisamaṃ tiṭṭhatīti attho. **Udakena otthariyyatīti** samantā vassodakaṃ āgantvā kūpe patatīti attho.

262. **Vāhentīti** ussiñcanti. **Arahaṭaḡhaṭiyantaṃ** nāma cakkasaṅghānaṃ anekāraṃ<sup>2</sup> are are ghaṭikāni bandhitvā ekena, dvīhi vā paribbhamiyamānayaṃtaṃ.

263. **Āviddhapakkhapāsakanti** kaṇṇikamaṇḍalassa samantā ṭhapitapakkhapāsakaṃ. **Maṇḍaleti** kaṇṇikamaṇḍale. **Pakkhapāsake ṭhapetvāti** samantā caturassākārena phalakādīni ṭhapetvā.

1. Diguṇakaraṇanti (Sī, Ka)

2. Anekākāraṃ (Sī)

264. **Namatakaṃ** nāma santhatasadisanti keci vadanti. Keci pana “rukkhatacamayan”ti. **Cammakhaṇḍaparihārenāti** anadhittahavitvā sayanāsanavidhināti attho. **Peḷāyāti** aṭṭhaṃsasolaṃsādi-ākārena katāya bhājanākārāya peḷāya. Yattha uṇhapāyāsādiṃ pakkhipitvā upari bhojanapātiṃ ṭhapenti bhattassa uṇhabhāvāvīgamanattham, tādisassa bhājanākārassa ādhārassetam adhivacanam. Teneva pāliyam “āsittakūpadhānan”ti vuttam. Tassa ca pāyāsādihi āsittakādhāroti attho. Idañca āsittakūpadhānam paccantesu na jānanti kātuṃ, majjhimadeseyeva karonti. Keci pana “gihparibhogo ayomayādisabbopi ādhāro āsittakūpadhānameva anulometi”ti vadanti, eke pana “kappiyalohamayo ādhāro maḷorikameva anulometi”ti. Vīmaṃsitvā gahetabbam. Pubbe pattavuttiyā ādhāro anuññāto. Idāni bhuñjituṃ **maḷorikā** anuññātā. **Chiddanti** chiddayuttam. **Viddhanti** antovinividdhachiddam. **Āviddhanti** samantato chiddam.

265. **Pattam nikkujjitunti** ettha kammavācāya asambhogakaraṇa-vaseneva nikkujjanam, na pattānam adhomukhaṭṭhapanena. Tenāha “**asambhogam saṃghena karotū**”ti-ādi, tam vaḍḍham kammavācāya saṃghena saddhim asambhogam saṃgho karotūti attho.

**Pattam nikkujjeyyāti** vaḍḍhassa pattanikkujjanadaṇḍakammam kareyya. **Asambhogam saṃghena karaṇanti** saṃghena vaḍḍhassa asambhogakaraṇam. Yathā asambhogo hoti, tathā karaṇanti attho. **Nikkujjito -pa-asambhogam saṃghenāti** ettha saṃghena asambhogo hotīti attho daṭṭhabbo. Evam bhagavatā asambhogakaraṇassa āṇattatthā, kammavācāya ca sāvitattā, aṭṭhakathāyañca “koci deyyadhammo na gahetabbo”ti vuttattā patte nikkujjite tassa santakam ñatvā gaṇhantassa dukkaṭamevāti gahetabbam.

**Accayoti** nāyappaṭipattim atikkamitvā pavatti, aparādhoti attho. **Maṃ accagamāti** maṃ atikkamma pavatto. **Tam te mayam paṭiggaṇhāmāti** tam te aparādham mayam khamāma. **Bhikkhūnam alābhāya parisakkatī**-ādīsu

alābhāya parisakkanādito viratoti evamattho gahetabbo. **Asambhogarū bhikkhusamghenā**ti ettha “kato”ti pāṭhaseso.

268. **Yāva pacchimā sopānakalevarā**ti paṭhamasopānaphalakaṃ sandhāya vuttam. Tañhi pacchā dussena santhatattā eva vuttam. **“Pacchimarū janatarū tathā gato anukampati”**ti idam thero anāgate bhikkhūnam celapaṭikassa akkamanapaccayā apavādam sikkhāpadapaññattiyā nivāraṇena bhagavato anukamparū sandhāyāha. **Apagatagabbhā**ti vijātaputtā. Tenāha **“maṅgalatthāyā”**ti.

269-270. **Bījaninti** caturassabījanim. **Ekapaṇṇacchattanti** tālapaṇṇādinā ekena pattena katachattam.

274-5. **Anurakkhaṇatthanti** pariggahetvā gopanattham. **Dīgharū kārantī**ti kesehi saddhim acchinditvā ṭhapāpentī. **Catukoṇanti** yathā upari nalāṭantesu dve, heṭṭhā hanukapasse dveti cattāro koṇā paññāyanti, evam caturassam katvā kappāpanam. Pāḷiyam **dāṭhikam ṭhapāpentī**ti uttarotṭhe massum acchinditvā ṭhapāpentī. **Rudhī**ti khuddakavaṇam.

277. Pāḷiyam **lohabhaṇḍakamsabhaṇḍasannicayoti** lohabhaṇḍassa, kamsabhaṇḍassa ca sannicayoti attho. **Bandhanamattanti** vāsidaṇḍādīnam koḷisu apātanattham lohehi bandhanam. **Tantakanti** āyogavāyanattham tadākārena pasāritatantam.

278. **“Yattha sarati, tattha bandhitabban”**ti etena asaṅcicca kāyabandhanam abandhitvā pavitṭhassa anāpattīti dasseti. **Murajavaṭṭisaṇṭhonam veṭhetvā katanti** evam bahurajjuka ekato katvā nānāvaṇṇehi suttehi katanti keci vadanti. Ekavaṇṇasuttenāpi valayaghaṭakādivikāram dassetvā veṭhitampi murajameva. Vikāram pana adassetvā maṭṭham katvā nīrantaram veṭhitam vaṭṭati. Teneva **dutiyapārājikasamvaṇṇanāyam** vuttam “bahurajjuka ekato katvā ekena nīrantaram veṭhetvā katam ‘bahurajjukan’ti na vattabban, vaṭṭati”ti. **Muddikakāyabandhanam** nāma caturassam

akatvā sajjitaṃ. **Pāmaṅgadasā** caturassā. **Mudiṅgasaṅṭhānenāti**<sup>1</sup>  
varakasisākārena. **Pāsantoti** dasāpariyosānaṃ.

279. Pāḷiyam **gaṅṭhikaphalakaṃ pāsakaphalakanti** ettha  
dārudantādimayesu phalakesu gaṅṭhikapāsakāni appetvā cīvare ṭhapetum  
anuññātaṃ. **Koṭṭo vivariyatīti**<sup>2</sup> anuvāto vivariyati.

280-1. **Pāḷikāarakoti** bhikkhūnaṃ yathāvuddhaṃ pāḷiyā patiṭṭhāpako.  
Tassāpi tathā pārupitum na vaṭṭati. Pāḷiyam **muṇḍavattīti** mallādayo.

282. **Pamāṅgaṅgulenāti** vaḍḍhakī-āṅgulena. Keci pana “pakati-  
āṅgulenā”ti vadanti, taṃ caturaṅgulapacchimakavacanena na sameti. Na hi  
pakataṅgulena caturaṅgulappamāṇaṃ dantakaṭṭhaṃ kaṅṭhe avilaggam  
khādītum sakkoti.

285. Pāḷiyam **sakāya niruttiyā buddhavacanaṃ dūsentīti**  
māgadhabhāsāya sabbesaṃ vattum sukaratāya hīnajaccāpi uggaṅhantā  
dūsentīti attho.

289. **Mā bhikkhū byābādhayimsūti** lasuṅagandhena bhikkhū mā  
bādhayimsu.

291. **Avalekhanapīṭharoti** avalekhanakaṭṭhānaṃ ṭhapanabhājanaviseso.  
**Apidhānanti** pidhānaphalakādi.

Khuddakavatthukathāvaṇṇanā niṭṭhitā.

Khuddakavatthukkhandhakavaṇṇanānayo niṭṭhito.

---

1. Muddikasaṅṭhānenāti (Sī), muddhikasaṅṭhānenāti (Ka) 2. Kappo vipariyatīti (Sī)

## 6. Senāsanakkhandhaka

### Vihārānujānanakathāvaṇṇanā

295. Senāsanakkhandhake **sisireti** sisirakāle himapātavasena sattāhavaddalikādivassapātavassena ca uppanno kharo sītasamphasso adhippetoti āha “**samphusitako**”ti. “**Tato**”ti idaṃ kattu-atthe nissakkavacanaṃ, tena ca<sup>1</sup>vihārena vātātapo paṭihaññatīti atthoti āha “**vihārena paṭihaññatī**”ti.

296. **Āviñchanachiddanti** yattha aṅgulim vā rajjusankhalikādim vā pavesetvā kavātaṃ ākaḍḍhantā dvārabāhaṃ plusāpentī, tassetāṃ adhivacanaṃ. Senāsanaparibhoge akappiyaṃ nāma natthīti dassanattham “**sacepi dīpinaṅguṭṭhenā**”ti-ādi vuttaṃ. **Cetiye vedikāsadisanti** vātapanadāruṃ<sup>2</sup> vā jālaṃ vā aṭṭhapetvā dāruṭṭhāne cetiye vedikāya paṭṭādīni viya iṭṭhakādīhi uddham, tiriyañca paṭṭikādayo dassetvā catuchiddayuttaṃ kataṃ. **Thambhakavātapanam** nāma tiriyaṃ dārūni adatvā uddham ṭhapitadārūhi eva kataṃ. **Coḷakapādapuñchanam bandhitunti** vātapanappamaṇena pādapuñchanasadiṣaṃ coḷakādīnā bandhitvā vaggulī-ādippavesananivāraṇattham, thaketunti attho. **Midḍhakanti** mañcākārena kaṭṭhamattikādīhi katavedikākāraṃ.

297. **Caturassapīṭhanti** samacaturassaṃ. **Aṭṭhaṅgulapādakam vaṭṭatīti** aṭṭhaṅgulapādakameva vaṭṭati. **Pamañātikkantopi vaṭṭatīti** samacaturassameva sandhāya vuttaṃ. Āyatacaturassā pana sattaṅgapañcaṅgāpi uccapādā na vaṭṭanti. Vetteheva caturassādi-ākārena kataṃ bhaddapīṭhanti āha “**vettamayam pīṭhan**”ti. **Dārupaṭṭikāya uparīti** aṭṭhaṅgādi-ākārena ṭhitadārupaṭṭalassa heṭṭhā uddham pādaṃ katvā. Pavesanakālañhi sandhāya “**uparī**”ti vuttaṃ. Eḷakassa pacchimapādadvayaṃ viya vañcākārena ṭhitattā panetaṃ “**eḷakapādapīṭhan**”ti vuttaṃ. **Paloṭṭenti**<sup>3</sup> saha mañcehi pavaṭṭenti. Rukkhe, latā ca muñcitvā avasesaṃ gacchādikaṃ sabbampi tiṇajāti evāti āha “**yesam kesañci tiṇajātikānan**”ti-ādi.

1. Kenaci (Sī, Ka)

2. ...dvāraṃ (Sī)

3. Paloṭṭenti (Ka)

**Upadahantī**ti ṭhāpenti. Sīsappamāṇaṃ nāma yattha gīvāya saha sakalaṃ sīsaṃ ṭhāpetuṃ sakka, tassa ca muṭṭhiratanaṃ vitthārappamāṇanti dassento “**vitthārato**”ti-ādimāha. Idañca bimbohanassa ubhosu antesu ṭhāpetabbacoḷappamāṇadassanaṃ. Tassa vasena bimbohanassa vitthārappamāṇaṃ paricchijjati, taṃ vaṭṭaṃ vā caturassaṃ vā katvā sibbitaṃ yathā koṭito koṭi vitthārato puthulaṭṭhānaṃ muṭṭhiratanappamāṇaṃ hoti, evaṃ sibbitabbaṃ. Ito adhikaṃ na vaṭṭati, taṃ pana antesu ṭhāpitacoḷaṃ koṭiyā koṭim āhacca diguṇaṃ kataṃ tikaṇṇaṃ hoti. Tesu tīsu kaṇṇesu dvinnaṃ kaṇṇānamantaraṃ vidatthacaturaṅgulaṃ hoti, majjhaṭṭhānaṃ koṭito koṭim āhacca muṭṭhiratanaṃ hoti, idamassa ukkaṭṭhappamāṇaṃ. Tenāha “**tīsu kaṇṇesū**”ti-ādi.

“**Kambalameva -pa- uṇṇabhisisaṅkhyameva gacchati**”ti sāmāññato vuttatā gonakādi-akappiyampi uṇṇamayattharaṇaṃ bhisīyaṃ pakkhipitvā sayitum vaṭṭatīti daṭṭhabbaṃ.

**Masūraketi** cammamaya bhisīyaṃ. Cammamayaṃ pana bimbohanaṃ tūlapuṇṇampi na vaṭṭati. Pāliyaṃ **senāsanaparikkhārādussanti** senāsanaparikkhārakaraṇatthāya dussaṃ. **Bhisim onandhitunti** bhisitthavikāya pakkhipitvā bandhitum. **Paribhijjati**ti mañcādito sārīyamānā pīṭhakoṭi-ādīsu nisīdantehi ghaṃsiyamānā bhisī paribhijjati. **Onaddhamañcanti** bhisim ekābaddhaṃ katvā baddhamañci. Pāliyaṃ **chavim uppāṭetvā haranti**ti bhisicchavim corā haranti. **Phositunti** corehi haritassa pacchā haritasaññānaphusitabindūni dātum. **Bhittikammanti** nānāvaṇṇehi vibhittirājikaraṇaṃ. **Hatthakammanti** hatthena yaṃ kiñci saññākaraṇaṃ.

298. Pāliyaṃ **na nipatatīti** na allīyati. **Paṭibāhetvāti** ghaṃsitvā. Na nibandhatīti **anibandhanīyo**, na lagganakoti attho.

299. “**Karohī**”ti **vattumpi na labbhatīti** āṇattiyā eva paṭikkhittatā dvārapālaṃ “**kiṃ na karosī**”ti-ādinā pariyāyena vattum vaṭṭati. **Jātakapakaraṇanti** jātakapaṭisaṃyuttaṃ itthipurisādi yaṃ kiñci rūpaṃ adhippetam. “**Parehi kārapetun**”ti vuttatā buddharūpampi sayam kātum na labhati. Pāliyaṃ **pañcapaṭikanti** jāti-ādipañcappakāraṇamaṭṭham.



300. **Upacāro na hotīti** gabbhassa bahi samantā anuparigamanassa okāso nappahoti. **Rukkham vijjhitvāti** tacchitasāradārum aggasamīpe vijjhitvā. **Katvāti** chidde katvā. Kappakatam viya sārakhāṇuke ākoṭetvā evam katameva “**āharimam bhittipādan**”ti vuttam. **Upatthambhanattham bhūmiyam patitthāpetunti** jññabhittipādena bahi samānabhāram khāṇukappasīsenā ussāpetvā mūlena bhūmiyam patitthāpetum. **Parittāṇatthanti** ullittāvalittakuṭiyā ovassanaṭṭhānassa parittāṇattham. **Kiṭikanti** tālapaṇṇādīhi katapadalam. **Madditamattikanti** ovassanachiddassa pidahanattham vuttam.

**Ubhatokuṭṭam nīharitvā katapadesassāti** yathā bahi ṭhitā ujukam anto nisinne na passanti, evam dvārābhimukham pidahanavasena bhittiñca aññato dvārañca yojetvā kataṭṭhānam vadati. **Samantā pariyāgāroti** samantato āviddhapamukham. **Vamsam datvāti** purisappamāṇe pāde nikkhaṇitvā tesam upari piṭṭhivamsasadisam passavamsam ṭhapetvā osāretvā. Ekam daṇḍakoṭim ati-uccāya vihārabhittikoṭiyā ekam koṭim nīce vamsapiṭṭhiyam ṭhapanavasena daṇḍake pasāretvā. **Cakkalayutto kiṭikoti** kavātam viya vivaraṇathakanasukhattham cakkalabandhakiṭikam. Pāliyam **ugghāṭanakiṭikanti** āpaṇā dīsu anattikakāle ukkhipitvā, upari ca bandhitvā pacchā otaraṇakiṭikam, kappasīsehi vā upatthabbhānihi ukkhipitvā pacchā otaraṇakiṭikampi.

301. **Pānīyam otappatīti** pānīyabhājanesu ṭhapitapānīyam ātapena santappati.

303. **Tayo vāṭeti** tayo parikkhepe. **Veḷuvāṭanti** sabbam dāruparikkhepaṃ saṅgaṇhāti. **Kaṇṭakavāṭanti** sabbasākhāparikkhepaṃ.

305. **Āloko antaradhāyīti** yo buddhārammaṇāya pītiyā ānubhāvena mahanto obhāso ahosi, yena cassa padīpasahassena viya vīgatandhakāro maggo ahosi, so bahinagare chavasārīrasamākulam duggandham bībhaccham āmakasusānam pattassa bhayena pītivege mandībhūte antaradhāyi.

**Sataṃ hatthī**ti gāthāya hatthino sataśahassānīti evaṃ paccekāṃ sahaśsa-saddena yojetvā attho ñātabbo. **Padavītihārassā**ti “buddhaṃ vandissāmī”ti ratanattayaṃ uddissa gacchato ekapadavītihārassa, tappaccayakusalaphalassāti attho. Tassa soḷasamo bhāgo **kalaṃ** nāma, taṃ soḷasiṃ kalaṃ yathāvuttā hatthi-ādayo sabbe nāgghanti nārahanti, nidassanamattañcetaṃ. Anekasatasahassabhāgampi nāgghanti.

**Andhakāro antaradhāyī**ti puna balavapītiyā āloke samuppanne antaradhāyi. **Āsattiyoti** taṅhāyo. **Vayakaraṇanti** deyyadhammamaṃlaṃ navakammaṃ.

309. **Dadeyyā**ti navakammaṃ adhiṭṭhātum vihāre issariyaṃ dadeyyāti attho. **Dinnoti** navakammaṃ kātum vihāro dinno, vihāre navakammaṃ dinnanti vā attho.

313-4. **Sandhāgāreti** sannipātamaṇḍape. **Okāseti** nivāso kāse. **Uddissa katanti** saṅghaṃ uddissa kataṃ. **Gihivikaṇanti** gihīhi kataṃ paññattaṃ, gihisantakanti attho.

Vihārānujānanakathāvaṇṇanā niṭṭhitā.

### Senāsanaggāhakathāvaṇṇanā

318. “**Chamāsaccayena chamāsaccayenā**”ti idaṃ dvikkhattum paccayadānakālaparicchedadassanaṃ, evaṃ upariṇi. “Taṃ na gāhetabban”ti vacanassa kāraṇamāha “**paccayeneva hi tan**”ti-ādinā, paccayaññeva nissāya tattha vasitvā paṭijagganā bhavissantīti adhippāyo.

**Ubbhaṇḍikā**ti ukkhittabhaṇḍā bhavissantī. **Dīghasālā**ti caṅkamanasālā. **Maṇḍalamāḷoti** upaṭṭhānasālā. **Anudahatī**ti pīḷeti. “**Adātum na labbhatī**”ti iminā sañcicca adadantassa paṭibāhane pavisanato dukkaṇanti dīpeti.

“Na gocaragāmo ghaṭṭetabbo”ti vuttamevatthaṃ vibhāvetuṃ **“na tattha manussā vattabbā”**ti-ādi vuttaṃ. **Vitakkaṃ chinditvā**ti “iminā nīhārena gacchantāṃ disvā nivāretvā paccaye dassantī”ti evarūpaṃ vitakkaṃ anuppādetvā. **Bhaṇḍappaṭicchādananti** paṭicchādanabhaṇḍaṃ, sarīrappaṭicchādanacīvaranti attho. **“Suddhacittattāva anavajjan”**ti idaṃ pucchitakkhaṇe kāraṇācikkhanaṃ sandhāya vuttaṃ na hoti asuddhacittassapi pucchitapañhavisajjane dosābhāvā. Evaṃ pana gate maṃ pucchissantītisaññāya agamaṇaṃ sandhāya vuttanti daṭṭhabbaṃ.

**Paṭijaggitabbānī**ti khaṇḍaphullapaṭisaṅkharāṇasammajjanādīhi paṭijaggitabbānī. **Muddavedikāyā**ti cetiyassa hammiyavedikāya ghaṭākārassa upari caturassavedikāya. **kasmā pucchitabbanti**-ādi yato pakatiyā labhati, tatthāpi pucchanassa kāraṇasandassanatthaṃ vuttaṃ.

**Paṭikkammā**ti vihārato apasakkitvā, tamatthaṃ dassento **“yo janadviyojanantare hoti”**ti āha. **Upanikkhepaṃ ṭhapetvā**ti vaḍḍhiyā kahāpaṇādīṃ ṭhapetvā, khettādīni vā niyametvā. **Iti saddhādeyyeti** evaṃ heṭṭhā vuttanayena saddhāya dātabbe vassāvāsikalābhavisayeti attho.

**Vatthu panā**ti tatrappāde upannarūpiyaṃ, tañca “tato catupaccayaṃ paribhuñjathā”ti dinnakhattādito upannattā kappiyakāraṇaṃ hatthe “kappiyabhaṇḍaṃ paribhuñjathā”ti dāyakehi dinnavatthusadisāṃ hotīti āha **“kappiyakāraṇaṃ hī”**ti-ādi.

**Saṅghasutṭhutāyā**ti saṅghassa hitāya. **Puggalavasenā**ti “bhikkhūcīvarena kilamantī”ti evaṃ puggalaparāmāsavasena, na “saṅgho kilamantī”ti evaṃ saṅghaparāmāsavasena.

“Kappiyabhaṇḍavasenā”ti sāmāññato vuttamevatthaṃ vibhāvetuṃ **“cīvarataṇḍulādivaseneva cā”**ti vuttaṃ. **Ca-kāro** cettha pana-saddatthe vattati, na samuccayattheti daṭṭhabbaṃ. Puggalavasenava, kappiyabhaṇḍavasena ca apalokanappakāraṃ dassetuṃ **“taṃ pana evaṃ kattabban”**ti-ādi vuttaṃ.

**Cīvarapaccayaṃ sallakkhetvā**ti saddhādeyyatatrappādādivasena tasmim vassāvāse labbhamānaṃ cīvarasaṅkhātaṃ paccayaṃ “ettakan”ti paricchinditvā. **Senāsanassā**ti senāsanaggāhāpanassa. **“Navako vuḍḍhatarassa, vuḍḍho**

ca **navakassā**”ti idaṃ senāsanaggāhassa attanāva attano gahaṇaṃ asāruppanti vuttaṃ, dve aññamaññaṃ gāhessantīti adhippāyo. **Aṭṭhapi soḷasapi jane sammannitum vaṭṭatīti** ekakammavācāya sabbepi ekato sammannitum vaṭṭati. Niggahakammameva hi saṃgho saṃghassa na karoti. Teneva **sattasatikakkhandhake** “ubbāhikakammasammutiyaṃ aṭṭhapi janā ekatova sammata”ti<sup>1</sup>.

**Āsanagharanti** paṭimāgharam. **Maggoti** upacārasīmabbhantaragate gāmābhikumhamagge katasālā vuccati. Evaṃ pokkharāṇirukkhamulādīsupi.

**Labhantīti** tatravāsino bhikkhū labhanti. **Vijaṭevvāti** “ekekassa pahonakappamāṇena viyojetvā. **Āvāsesu pakkhipivvāti** “ito uppannaṃ asukasmīṃ asukasmīṃca āvāse vasantā pāpetvā gaṇhantū”ti vācāya upasaṃharitvā. **Pavisitabbanti** mahālābhe pariveṇe vasitvāva lābho gahetabboti adhippāyo.

**Ayampīti** ettha yo paṃsukūliko paccayaṃ vissajjeti. Teneva vissatṭho yaṃ cīvarapaccayopīti yojanā. **Pādamūle ṭhapetvā sātakaṃ dentīti** paccayadāyakā denti. Etena gahaṭṭhehi pādamūle ṭhapetvā dinnampi paṃsukūlikānampi vaṭṭatīti dasseti. **Atha vassāvāsikaṃ demāti vadantīti** ettha paṃsukūlikānaṃ na vaṭṭatīti ajjhāharitvā yojetabbaṃ. **Vassaṃvutthabhikkhūnanti** paṃsukūlikato aññesaṃ bhikkhūnaṃ.

**Upanibandhitvā gāhāpetabbanti** idha rukkhādīsu vasitvā cīvaraṃ gaṇhathāti paṭibandham katvā gāhetabbaṃ.

**Pāṭipada-arūṇatoti** ādi vassūpanāyikadivasam sandhāya vuttaṃ. Antarāmuttakaṃ pana pāṭipadaṃ atikkamitvāpi gāhetum vaṭṭati. **Nibaddhavattaṃ ṭhapetvāti** sajjhāyamaṇasikārādīsu nirantarakaraṇīyesu kattabbaṃ katikavattaṃ katvā. **Kasāvaparibhaṇḍanti** kasāvarasehi bhūmiparikammaṃ.

**Tividhampīti** pariyattipaṭipattipaṭivedhavasena tividhampi. **Sodhetvāti** ācārādīsu upaparikkhitvā. **Ekacārikavattanti** bhāvanākammaṃ. Tañhi gaṇasaṅgaṇikaṃ pahāya ekacārikeneva vattitabbattā evaṃ vuttaṃ.

---

1. Vi 4. 491 piṭṭhe.

**Dasavatthukakathā** nāma appicchakathā, santuṭṭhi, paviveka, asaṃsagga, vīriyārambha, sīla, samādhi, paññā, vimutti, vimuttiñāṇadassanakathāti imā dasa.

**Dantakaṭṭhakhādanavattanti** dantakaṭṭhamāḷake nikkhittesu dantakaṭṭhesu “divase divase ekameva dantakaṭṭham gahetabban”<sup>1</sup>ti-ādinā<sup>1</sup> adinnādāne **dantaponakathāyaṃ** vuttam vuttam. **Pattam vā -pa- na kathetabbanti** pattaḡuttatthāya vuttam. **Visabhāgakathāti** tiracchānakathā. **Khandhakavattanti vattakkhandhake**<sup>2</sup> āgataṃ piṇḍacārikavattato avasiṭṭhavattam tassa “bhikkhācāravattan”<sup>2</sup>ti visum gahitattā.

Idāni yaṃ dāyakā pacchimavassamvutthānaṃ vassāvāsikaṃ denti, tattha paṭipajjanavidhiṃ dassetuṃ “**pacchimavassūpanāyikadivase panā**”<sup>1</sup>ti āradham. Āgantuko sace bhikkhūti cīvare gāhite pacchā āgato āgantuko bhikkhu. **Pattaṭṭhāneti** vassaggena pattaṭṭhāne. **Paṭhamavassūpagatāti** āgantukassa āgamanato puretameva pacchamikāya vassūpanāyikāya vassūpagatā. **Laddham laddhanti** punappunam dāyakānaṃ santikā āgatāgatasāṭakam.

**Neva vassāvāsikassa sāminoti** chinnavassattā vuttam. Paṭhamameva katikāya katattā “**neva adātuṃ labhanti**”<sup>1</sup>ti vuttam, dātabbam vārentānaṃ gīvā hotīti adhippāyo. **Tesameva dātabbanti** vassūpagatesu aladdhavassāvāsikānaṃ ekaccānameva dātabbam.

**Bhatiniviṭṭhanti** pānīyupaṭṭhānādibhatim katvā laddham. **Samghikam panāti**-ādi kesañci vādadassanam. Tattha **apalokanakammaṃ katvā gāhitanti** “chinnavassānaṃ vassāvāsikañca idāni uppajjanakavassāvāsikañca imesaṃ dātuṃ rucati”<sup>1</sup>ti anantare vuttanayena apalokanam katvā gāhitam samghena dinnattā vibbhantopi labhati, pageva chinnavasso. **Paccayavasena gāhitam** pana temāsam vasitvā gahetuṃ attanā, dāyakehi ca anumattattā bhatiniviṭṭhampi chinnavassopi vibbhantopi **na labhatīti** keci ācariyā vadanti. Idañca pacchā vuttattā pamāṇam. Teneva vassūpanāyikadivase eva dāyakehi dinnavassāvāsikaṃ gahitabhikkhuno vassacchedam akatvā vāsova heṭṭhā vihito, na pānīyupaṭṭhānādibhatikaraṇavattam. Yadi hi

1. Vi-Ṭṭha 1. 302 piṭṭhe.

2. Vi 4. 383 piṭṭhe.

taṃ niṅṅhameva siyā, bhatikaraṇameva vidhātabbam. Tasmā vassaggena gāhitam chinnavassādayo na labhantīti vedītabbam.

**Samghikam hoti**”ti etena vutthavassānampi vassāvāsikabhāgo samghikato amocito tesam vibbhamena samghiko hotīti dasseti. **Labhatīti** “mama pattabhāgam etassa dethā”ti dāyake sampañcchāpenteneva samghikato viyojitaṃ hotīti vuttaṃ.

**Varabhāgam sāmaṇerassāti** tassa paṭhamagāhattā, therena pubbe paṭhamabhāgassa gahitattā, idāni gayhamānassa dutiyabhāgattā ca vuttaṃ.

Senāsanaggāhakathāvaṇṇanā niṅṅhitā.

### Upanandavatthukathāvaṇṇanā

319. Pāliyam **ubhayattha paribāhiroti** kamena ubhayassapi muttattā vuttaṃ, na sabbathā ubhayato paribāhirattā. Tenāha “**pacchime -pa-tiṅṅhati**”ti.

320. **Yam tiṅṅnam pahotīti**<sup>1</sup> mañcapīṭhavinimuttaṃ yaṃ āsanam tiṅṅnam sukham nisīditum pahoti, idaṃ pacchimadīghāsanam. Ettha pañcapīṭharahitesu asamānāsanikāpi tayo nisīditum labhanti. Mañcapīṭhesu pana dve. Adīghāsanesu mañcapīṭhesu samānāsanikā eva dve nisīditum labhanti duvaggasseva anuññātattā.

Hatthinakho heṭṭhābhāge etassa atthīti **hatthinakho**, pāsādo. **Pāsādassa nakho** nāma heṭṭhimabhāgo pādanakhasadisattā, so sabbadisāsu anekehi hatthirūpehi samalaṅkato ṭhito. Tassūpari kato pāsādo hatthikumbhe patiṅṅhito viya hotīti āha “**hatthikumbhe patiṅṅhitan**”ti.

**Suvaṇṇarajatādivicitrānīti** samghikasenāsanam sandhāya vuttaṃ.

Puggalikam pana suvaṇṇādivicitraṃ bhikkhussa sampañcchitumeva na vaṭṭati “na kenaci pariyāyena jātarūparajataṃ sādītabban”ti<sup>2</sup> vuttattā. Tenevettha **aṭṭhakathāyam** “samghikavihāre vā puggalikavihāre vā”ti

1. Tiṅṅnam pahotīti (Sī)

2. Vi 3. 342 piṅṅthe.

na vuttaṃ, gonakādi-akappiyabhaṇḍavisaye eva vuttaṃ ekabhikkhussāpi tesam gahaṇe dosābhāvā. **Gihivikaṭaṇihārenā**ti gihīhi katanihārena, gihīhi attano santakam attharivā dinnaniyāmenāti attho. **Labbhantī**ti nisīditum labbhanti.

Upanandavatthukathāvaṇṇanā niṭṭhitā.

### Avissajjiyavatthukathāvaṇṇanā

321. **Arañjaro**ti bahu-udakagaṇhanikā mahācāṭi, jalam gaṇhitumalanti arañjaro.

**Thāvarena ca thāvaranti**-ādīsu pañcasu koṭṭhāsesu purimadvayaṃ thāvaram, pacchimattayaṃ garubhaṇḍanti veditabbaṃ. **Samakameva detī**ti ettha ūnakam dentampi vihāravatthusāmantam gahetvā dūrataram dukkhagopam vissajjetum vaṭṭatīti daṭṭhabbam. Vakkhati hi “bhikkhūnam ce mahagghataram -pa- sampaṭicchitum vaṭṭatī”ti<sup>1</sup>. **Jānāpetvā**ti bhikkhusamghassa jānāpetvā, apaloketvāti attho. “**Nanu tumhākam bahutarā rukkhāti vattabban**”ti idam sāmikesu attano bhaṇḍassa mahagghatam ajānitvā dentesu tam ñatvā theyyacittena gaṇhato avahāro hotīti vuttaṃ.

**Vihārena vihāro parivattetabboti** savatthukena aññesam bhūmiyam katapāsādādinā, avatthukena vā savatthukam parivattetabbam. Avatthukam pana avatthukeneva parivattetabbam, kevalam pāsādassa bhūmito athāvarattā. Evam thāvaresupi thāvaravibhāgam ñatvāva parivattetabbam.

“**Kappiyamañcā sampaṭicchitabbā**”ti iminā suvaṇṇādivicittam akappiyamañcam “samghassā”ti vuttepi sampaṭicchitum na vaṭṭatīti dasseti. “Vihārassa demā”ti vutte samghassa vaṭṭati, na puggalassa khettādi viyāti daṭṭhabbam. **Etesūti** mañcādīsu. **Kappiyākappiyam vuttanayamevā**ti āsandītūlikādivinicchayesu vuttanayameva. **Akappiyam vā**ti āsandī-ādi,

1. Vi-Ṭṭha 4. 78 piṭṭhe.

pamāṇātikkantaṃ bimbohanādi ca. **Mahagghaṃ kappiyaṃ vāti** suvaṇṇādivicittaṃ kappiyavohārena dinnam.

“Kāḷaloha -pa- bhājetabbo”ti vuttattā vaṭṭakaṃsalohamayampi bhājanam puggalikampi sampaṭicchitumpi pariharitumpi vaṭṭati puggalapariharitabbasseva bhājetabbattāti vadanti. Taṃ upari “kaṃsalohavaṭṭalohabhājanavikati saṃghikaparibhogena vā gihivikaṭā vā vaṭṭati”ti-ādikena mahāpacarivacanena virujjhati. Imassa hi “vaṭṭalohakaṃsalohānam yena kenaci kato sihaḷadīpe pādaggaṇhanako bhājetabbo”ti vuttassa mahā-aṭṭhakathāvacanassa paṭikkhepāya taṃ mahāpacarivacanam pacchā dassitam. Tasmā vaṭṭalohakaṃsalohamayam yaṃ kiñci pādaggaṇhanakavārakampi upādāya abhājanīyameva. Gihīhi diyyamānampi puggalassa sampaṭicchitumpi na vaṭṭati. **Pārihāriyam na vaṭṭati**ti pattādi parikkhāram viya sayameva paṭisāmetvā paribhuñjitum na vaṭṭati. Gihisantaṃ viya āramikādayo ce sayameva gopetvā viniyogakāle ānetvā paṭinenti, paribhuñjitum vaṭṭati. “Paṭisāmetvā bhikkhūnam dethā”ti vattumpi vaṭṭati.

**Paṇṇasūci** nāma lekhanīti vadanti. “**Attanā laddhānipī**”ti-ādinā paṭiggahaṇe doso natthi, pariharitvā paribhogova āpattikaroti dasseti. Yathā cettha, evaṃ upari abhājanīyavāsi-ādīsu attano santakesupi.

**Anāmāsampīti** suvaṇṇādimayampi sabbam taṃ āmasitvāpi paribhuñjitum vaṭṭati. **Upakkhareti** upakaraṇe. **Aḍḍhabāhuppamāṇā** nāma aḍḍhabāhumattā. Aḍḍhabyā mamattātipi vadanti. **Yottānīti** cammarajjukā.

**Aṭṭhaṅgulasūcidaṇḍamattopīti** tasaradaṇḍādisūci-ākāratanudaṇḍakamattopī. **Rittapotthakopīti** alikhitapotthako. Idañca paṇṇappasaṅgena vuttam.

“**Ghaṭṭanaphalakaṃ ghaṭṭanamuggaro**”ti idam rajitacīvaram ekasmim matṭhe daṇḍamuggare veḥetvā ekassa matṭhaphalakassa upari ṭhapetvā upari aparena matṭhaphalakena nikujjitvā eko upari akkamitvā tiṭṭhati. Dve janā upari phalakaṃ dvīsu koṭīsu gahetvā aparāparam ākaḍḍhanavikaḍḍhanam karonti, etaṃ sandhāya vuttam. Hatthe ṭhapāpetvā hatthena paharaṇam



pana niṭṭhitarajanassa cīvarassa allakāle kātabbam. Idam pana phalakamuggarehi ghaṭṭanam sukkhakāle thaddhabhāvavimocanattanti daṭṭhabbam. **Ambaṇanti** ekadoṇikanāvāphalakehi pokkharāṇīsadisam katam. Pāṇiyabhājanantipi vadanti. **Rajanakoṇīti** ekadārunāva katam rajanabhājanam. **Udakadoṇīpi** ekadārunāva katam udakabhājanam.

**Bhūmattharaṇam kātum vaṭṭatīti** akappiyacammaṃ sandhāya vuttam. Tattha bhūmattharaṇasaṅkhepena sayitumpi vaṭṭatiyeva. **“Paccattharaṇagatikan”**ti iminā mañcādīsu attharitabbam mahācammaṃ eḷakacammaṃ<sup>1</sup> nāmāti dasseti.

**Chattamuṭṭhipaṇṇanti** tālapaṇṇam sandhāya vuttam. **Pattakaṭāhanti** pattapacanakaṭāham.

Avissajjiyavatthukathāvaṇṇanā niṭṭhitā.

### Navakammadānakathāvaṇṇanā

323. Pāḷiyam **piṇḍanikkhepanamattenāti**-ādīsu khaṇḍaphullaṭṭhāne mattikāpiṇḍaṭṭhapanam piṇḍanikkhepanam nāma. **Navakammanti** navakammasammuti. **Aggalavaṭṭi** nāma kavāṭabandho. **Chādanam** nāma tiṇḍāḍhi gehacchādanam. **Bandhanam** nāma daṇḍavalli-ādīhi chadanabandhanameva. **Catuhatthavihāreti** vitthārappamāṇato vuttam. Ubbedhato pana anekabhūmakattā vaḍḍhakīhatthena vīsatihatthopi nānāsaṅṭhānavicittopi hoti. Tenassa catuvassikam navakammaṃ vuttam. Evaṃ sesesupi.

Pāḷiyam **sabbe vihāreti**<sup>2</sup> bhūmatthe upayogabahuvacanam<sup>3</sup>. Ekassa sabbesu vihāresu navakammaṃ deṭṭīti attho. **Sabbakālam paṭibāhantīti** navakammikā attano gāhitam varaseyyam sampattānam yathāvuddham akatvā utukālepi paṭibāhanti.

**“Sace so āvāso jīratī”**ti-ādī pāḷimuttakavinicchayo. **Mañcaṭṭhānam datvāti**<sup>4</sup> mañcaṭṭhānam puggalikam datvā. **Tibhāganti** tatiyabhāgam. Evaṃ vissajjanampi thāvarena thāvaraparivattanaṭṭhāne eva pavisati, na itarathā

1. Telacammaṃ (Sī)

3. Upayogavacanam (Sī)

2. Sabbam Vihāranti (Sī)

4. Gahetvāti (Ka)

sabbasenāsanānaṃ vinassanato. **Sace saddhivihārikānaṃ dātukāmo hotīti** sace so saṃghassa bhaṇḍakaṭṭhapanatṭhānaṃ vā aññesaṃ bhikkhūnaṃ vasaṇatṭhānaṃ vā dātuṃ na icchati, attano saddhivihārikānaññeva dātukāmo hoti, tādissa tuyhaṃ puggalikameva katvā jaggāti na sabbaṃ tassa dātabbanti adhippāyo. Tattha pana kattabbavidhiṃ dassento āha “**kamman**”ti-ādi. **Evañhīti**-ādimhi vayanurūpaṃ tatiyabhāge vā upaḍḍhabhāge vā gahite taṃ bhāgaṃ dātuṃ labhatīti attho.

**Yenāti** tesu dvīsu bhikkhūsu yena. **So sāmīti** tassā bhūmiyā vihāra karaṇe sova sāmī, taṃ paṭibāhitvā itarena na kātabbanti adhippāyo. So hi paṭhamaṃ gahito. **Akatatṭhāneti** cayādīnaṃ akatapubbatṭhāne. **Cayaṃ vā pamukhaṃ vāti** saṃghikasenāsanānaṃ nissāya tato bahi cayaṃ bandhitvā, ekaṃ senāsanānaṃ vā. **Bahikuṭṭeti** kuṭṭato bahi, attano kataṭṭhāneti attho.

Navakammadānakathāvaṇṇanā niṭṭhitā.

### Aññatraparibhogapaṭikkhepādikathāvaṇṇanā

324. **Vaḍḍhikammatthāyāti** yathā tammūlagghato<sup>1</sup> na parihāyati, evaṃ kattabbassa evaṃ nipphādetabbassa mañcapīṭhādino atthāya.

**Cakkalikanti** pādapuñchanatthaṃ cakkākārena kataṃ. **Paribhaṇḍakatabhūmi vāti** kāḷavaṇṇādikatasañhabhūmi vā. **Senāsanānaṃ vāti** mañcapīṭhādi vā.

“**Tatheva vaḷaṇjetuṃ vaṭṭati**”ti iminā nevāsikehi dhotapādādīhi vaḷaṇjanatṭhāne sañcicca adhotapādādīhi vaḷaṇjantasseva āpatti paññattāti dasseti.

“**Dvārampī**”ti-ādinā sāmāññato vuttattā dvāravātapānādayo aparikkammatāpi na apassayitabbā. Ajānitvā apassayantassapi idha lomagaṇanāya āpatti.

Aññatraparibhogapaṭikkhepādikathāvaṇṇanā niṭṭhitā.

---

1. Yathākammaṃ Agghato (Ka)

### Samghabhattādi-anujānanakathāvaṇṇanā

325. **Uddesabhattam nimantananti imam voharam pattānīti** ettha itti-saddo ādi-attho, uddesabhattam nimantananti-ādivoharam pattānīti attho. **Tampīti** samghabhattampi.

Samghabhattādi-anujānanakathāvaṇṇanā niṭṭhitā.

### Uddesabhattakathāvaṇṇanā

**Bhojanasālāyāti** bhattuddesaṭṭhānam sandhāya vuttam. **Ekavaḷaṅjanti** ekadvārena vaḷaṅjitabbam. **Nānānivesanesūti** nānākulassa nānūpacāresu nivesanesu.

**Nisinnassapi niddāyantassapīti** anādare sāmivacanam, vuḍḍhatare niddāyante navakassa gāhitam suggahitanti attho.

**Vissaṭṭhadūtoti** yathāruci vattum labhanato nirāsaṅkadūto. **Pucchāsabhāgenāti** pucchāvacanapaṭibhāgena. “Ekā kūḷaṭṭhitikā nāma”ti vuttamevattham vibhāvetum “**rañño vā hī**”ti-ādi vuttam.

**Sabbam pattassāmikassa hotīti** cīvarādikampi sabbam pattassāmikasseva hoti, mayā bhattameva sandhāya vuttam, na cīvarādinti vatvā gahetum na vaṭṭatīti attho.

**Akatabhāgonāmāti** āgantukabhāgo nāma, adinnapubbabhāgoti attho.

**Kim āharīyatīti avatvāti** “katarabhattam vā tayā āharīyatī”ti dāyakam apucchitvā<sup>1</sup>. **Pakatiṭṭhitikāyāti** uddesabhattaṭṭhitikāya.

Uddesabhattakathāvaṇṇanā niṭṭhitā.

---

1. Āpucchitvā (Sī)

### Nimantanabhattakathāvaṇṇanā

Vicchinditvāti “bhattam gaṇhathā”ti padam avatvā. Tenevāha “**bhattanti avadantenā**”ti.

Ālopasaṅkhepenāti ekekapiṇḍavasena, evañca bhājanam uddesabhatte na vaṭṭati. Tattha hi ekassa pahonakappamāṇeneva bhājetabbam.

Āruḷhāyeva mātikam, saṅghato aṭṭha bhikkhūti ettha ye mātikam āruḷhā, te aṭṭha bhikkhūti yojetabbam.

Uddesabhattanimantanabhattādisaṅghikabhattamātikāsu nimantanabhattamātikāya ṭhitivasena āruḷhe bhattuddesakena vā sayam vā saṅghato uddisāpetvā gahetvā gantabbam, na attano rucite gahetvāti adhippāyo. **Mātikam āropetvāti** “saṅghato gaṇhāmī”ti-ādinā vuttamātikābhedam dāyakassa viññāpetvāti attho.

Paṭibaddhakā lato pana paṭṭhāyāti tattheva vāsassa nibaddhakā lato paṭṭhāya.

Nimantanabhattakathāvaṇṇanā niṭṭhitā.

### Salākabhattakathāvaṇṇanā

Upanibandhitvāti likhitvā. **Gāmavasena**pīti yebhuyyena samalābhagāmavasena. **Bhahūni salākabhattānī**ti tiṃsam vā cattārīsam vā bhattāni. “Sace hontī”ti ajjhāharitvā yojetabbam.

**Sallakkhetvāti** tāni bhattāni pamāṇavasena sallakkhetvā. **Niggahena datvāti** dūram gantum anicchantassa niggahena sampaṭicchāpetvā datvā. **Puna vihāram āgantvāti** ettha vihāram anāgantvā<sup>1</sup> bhattam gahetvā pacchā vihāre attano pāpetvā bhuñjitumpi vaṭṭati.

**Ekagehasena**nāti vīthiyampi ekapasse gharapāḷiyā vasena. **Uddisitvāpīti** asukakule salākabhattāni tuyham pāpuṇantīti vatvā.

---

1. Āgantvā (Ka)

**Vāragāmeti** atidūrattā vārena gantabbagāme. **Saṭṭhito vā paṇṇāsato vāti** daṇḍakammatthāya udakaghaṭaṃ sandhāya vuttaṃ. **Vihāravāroti** sabbabhikkhūsu bhikkhatthāya gatesu vihārarakkhaṇavāro.

**Tesanti** vihāravārikānaṃ. **Phātikammamevāti** vihārarakkhaṇakiccassa pahonakapaṭipādanameva. **Ekasseva pāpuṇantīti** divase divase ekekasappa pāpitānīti attho.

**Rasasalākanti** ucchurasasalākānaṃ. **“Salākavasena gāhitattā pana na sādītābā”**ti idaṃ asārūppavasena vuttaṃ, na dhutaṅgabhedavasena. **“Saṃghato nirāmisasalākā -pa- vaṭṭatiyevā”**ti<sup>1</sup> hi **visuddhimagge** vuttaṃ. **Aggabhikkhāmattanti** ekakaṭacchubhikkhāmattaṃ. **Laddhā vā aladdhā vā svepi gaṇheyyāsīti** laddhepi appamattatāya vuttaṃ. Tenāha **“yāvadatthaṃ labhati -pa- alabhivā ‘sve gaṇheyyāsī’ti vattabbo”**ti.

**Tatthāti** tasmim disābhāge. **Taṃ gahetvāti** taṃ vāragāme salākānaṃ attano gahetvā. **Tenāti** disaṃgamikato aññena tasmim disaṃgamike. **Devasikānaṃ pāpetabbāti** upacārasīmāya ṭhitassa yassa kassaci vassaggena pāpetabbā. Evaṃ etesu agatesu āsannavihāre bhikkhūnaṃ bhuñjitum vaṭṭati itarathā saṃghikato.

**Amhākaṃ gocaragāmevāti** salākabhaddadāyakaṇaṃ gāmaṃ sandhāya vuttaṃ. **Vihāre therassa pattasalākabhaddanti** vihāre ekekasappa oḥinattherassa sabbasalākānaṃ attano pāpanavasena pattasalākabhaddanti.

Salākabhaddakathāvaṇṇanā niṭṭhitā.

### Pakkhikabhaddādikathāvaṇṇanā

**“Svepakkho”**ti ajja pakkhikānaṃ na gāhetabbanti aṭṭhamiyā bhuñjitabbaṃ sattamiyā bhuñjanatthāya na gāhetabbaṃ, dāyakehi niyamitadivaseneva gāhetabbanti attho. Tenāha **“sace panā”**ti-ādi. **Sve lūkhanti** ajja āvāhamaṅgalādikaraṇato atipaṇītabhojanaṃ karīyati, sve tathā na bhavissahi, ajjeva bhikkhū bhojessāmīti adhippāyo.

1. Visuddhi 1. 63 piṭṭhe.

Pakkhikabhaddato uposathikassa bhedaṃ dassento āha “**uposathaṅgāni samādiyivā**”ti-ādi. **Nibandhopitanti** “asukavihāre āgantukā bhuñjantū”ti niyamitaṃ.

**Gamiko āgantukabhaddampīti** gāmantarato āgantvā avūpasantena gamikacittena vasitvā puna aññattha gacchantaṃ sandhāya vuttaṃ. Āvāsikassa pana gantukāmassa gamikatattameva labbhati. “**Lesam oḍdetvā**”ti vuttattā lesābhāve yāva gamanaparibandho vigacchati. Tāva bhuñjitum vaṭṭatīti ñāpitanti daṭṭhabbaṃ.

**Taṇḍulādīni pesenti -pa- vaṭṭatīti** abhihaṭabhikkhattā vaṭṭati. **Tathā paṭiggahitattāti** bhikkhānāmena paṭiggahitattā.

**Avibhattaṃ saṃghikaṃ bhaṇḍanti** kukkucuppatti-ākāradassanaṃ. Evaṃ kukkucāṃ katvā pucchitabbakiccaṃ natthi, apucchitvā dātabbanti adhippāyo.

Pakkhikabhaddādikathāvaṇṇanā niṭṭhitā.

Senāsanakkhandhakavaṇṇanānayo niṭṭhito.

## 7. Saṅghabhedakakkhandhaka

### Chasakyapabbajjākathādivaṇṇanā

330. Saṅghabhedakakkhandhake pāḷiyam **anupiyam nāmā**ti anupiyā nāma. **Heṭṭhā pāsādā**ti pāsādato heṭṭhā heṭṭhimatalam, “heṭṭhāpāsādan”tipi pāṭṭho. **Abhinetabbanti** vapitakhettesu pavesetabbaṃ. **Ninnetabbanti** tato nīharitabbaṃ. **Niddhāpetabbanti** sassadūsakatiṇādāni uddharitabbaṃ. **Ujurm kārapetabbanti** puñjam kārapetabbaṃ, ayameva vā pāṭho.

332. **Paradattoti** parehi dinnapaccayehi pavattamāno. **Migabhūtena cetasā**ti katthaci alaggaṭāya migassa viya jātena cittena.

333. **Manomayam kāyanti** jhānāmanena nibbattaṃ brahmakāyam, “kim nu kho ahaṃ pasādeyyam, yasmim me pasanne bahulābhasakkāro uppajjeyyā”ti paṭhamam uppannaparivitakkassa mandapariyuṭṭhānatāya devadattassa tasmim khaṇe jhānaparihāni nāhosi, pacchā eva ahoṣīti daṭṭhabbaṃ. Tenāha “**saha cittuppādā**”ti-ādi. **Dve vā tīni vā māgadhakāni gāmakhettāni**ti ettha magadharaṭṭhe khuddakam gāmakhettaṃ gāvutamattaṃ, majjhimaṃ pana diyaḍḍhagāvutamattaṃ, mahantaṃ anekayojanampi hoti. Tesu majjhimena gāmakhettena dve vā khuddakena tīni vā gāmakhettāni, tassa sarīram tigāvutappamāṇo attabhāvoti vuttaṃ hoti.

334. **Satthāro**ti gaṇasatthāro. **Nāssassā**ti na etassa bhaveyya. **Tanti** satthāram. **Tenā**ti amanāpena. **Sammannatī**ti cīvarādinā amhākam sammānam karoti, parehi vā ayam satthā sammānīyatīti attho.

335. **Nāsāya pittaṃ bhindeyyū**ti acchapittaṃ vā macchapittaṃ vā nāsāpuṭe pakkhipeyyum. **Assatarī**ti vaḷavāya kuchhimim gadrabhassa jāṭā. Tassā hi gahitagabbhāya vijāyitumasakkontiyā udaram phāletvā potakam nīharanti. Tenāha “**attavadhāya gabbhaṃ gaṇhātī**”ti.

339. **Potthanikanti** churikam, “kharan”tipi vuccati.

342. **Mā kuñjara nāgamāsadoti** he kuñjara buddhanāgaṃ vadhakacittena mā upagaccha. **Dukkanti** dukkhakāraṇattā dukkham. **Itoti** ito jātito. **Yatoti** yasmā, yantassa vā, gacchantassāti attho. **Mā ca madoti** mado tayā na kātabboti attho.

343. **Tikabhojananti** tīhi bhuñjitabbaṃ bhojanaṃ, tato adhikehi ekato paṭiggahetvā bhuñjitum na vaṭṭanakaṃ gaṇabhojanapaṭipakkham bhojananti attho. **Kokālikoti**-ādīni devadattaparisāya gaṇapāmokkhānaṃ nāmāni. **Kappanti** mahāniraye āyukappaṃ, taṃ antarakappanti keci. Keci pana “asaṅkhyeyyakappaṃ”ti.

Chasakyapabbajjākathādivaṇṇanā niṭṭhitā.

### Saṅghabhedakakathāvaṇṇanā.

345. Parassa cittaṃ nātvā kathanāṃ **ādesanāpāṭihāriyaṃ**. Kevalaṃ dhammadeśanā **anusāsanīpāṭihāriyaṃ**. Tadubhayampi **dhammī kathā** nāma. Tāya thero ovadi. Iddhividhaṃ **iddhipāṭihāriyaṃ** nāma. Tena sahitā anusāsanī eva **dhammī kathā**. Tāya thero ovadi.

“**Thullaccayaṃ desāpehī**”ti idaṃ bheda purekkhārassa uposathādikaraṇe thullaccayassa uposathakkhandhakādīsū paṭhamameva paññattattā vuttaṃ, itarathā etesaṃ ādikammikattā anāpattiyeva siyā.

346. **Sarasīti** saro. **Mahim vikrubbatoti** mahim dantehi vilikhantassa. Idañca hatthīnaṃ sabhāvadassanaṃ. **Nadīsūti** saresu. Bhisam ghasamānassāti yojanā. **Jaggatoti** yūtham pālentassa.

347. **Dūteyyaṃ gantunti** dūtakammaṃ pattum, dūtakammaṃ kātunti attho. **Sahitāsahitassāti** yuttāyuttassa, yaṃ vattum, kātuñca yuttaṃ, tattha kusalo. Atha vā adhippetānādhippetassa vacanassa kusalo, byañjanamatte na niṭṭhati, adhippetatthameva ārocetīti attho.



350. Gāthāsu **jātūti** ekaṃsena. **Mā udapajjatha** mā hotūti attho. **Pāpicchānaṃ yathāgatīti** pāpicchānaṃ puggalānaṃ yādisī gati abhisamparāyo. **Taṃ** atthajātaṃ. **Imināpi** kāraṇena **jānāthāti** devadattassa “paṇḍito”ti-ādinā upari vakkhamānākāraṃ dasseti.

**Pamādaṃ anuciṇṇoti** pamādaṃ āpanno. **Āsīsāyanti**<sup>1</sup> avassaṃ bhāvī-atthasiddhiyaṃ. Sā hi idha āsīsāti adhippetā, na patthanā. Īdise anāgatathe atītavacanaṃ saddavidū icchanti.

**Dubbheti** dubbheyya. **Visakumbhenāti** ekena visapuṇṇakumbhena. **Soti** so puggalo. **Na padūseyya** visamissaṃ kātum na sakkotīti attho. **Bhayānakoti** vipulagambhīrabhāvena bhayānako. Tenāpi dūsetum na sakkuṇeyyataṃ dasseti. **Vādenāti** dosakathanena. **Upahimsatīti** bādhati.

Samghabhedakakathāvaṇṇanā niṭṭhitā.

### Upālīpañhākathāvaṇṇanā

351. **Na pana ettāvataṃ samgho bhinno hotīti** salākaggāhāpanamattena samghabhedānibbattito vuttam. Uposathādisamghakamme kate evahi samgho bhinno hoti. Tattha ca uposathapavāraṇāsu ñattiniṭṭhānena, sesakammesu apalokanādikammapariyosānena samghabhedo samatthoti daṭṭhabbo.

“**Abhabbatā na vuttā**”ti idaṃ “bhikkhave devadattena paṭhamam ānantariyakammaṃ upacitan”ti-ādinā ānantariyattaṃ vadatā bhagavatā tassa abhabbatāsaṅkhātā pārājikatā na paññattā. Etena āpatti viya abhabbatāpi paññatti-anantameva hoti, na tato pureti dasseti. Idha pana ādikammikassapi anāpattiyā avuttattā devadattādayopi na muttāti daṭṭhabbam.

**Tayo satipaṭṭhānāti**-ādīsu tayo eva satipaṭṭhānā, na tato paranti ekassa satipaṭṭhānassa paṭikkhepova idha adhammo, na pana tiṇṇam

1. Āsaṃsāyanti (Sī)

satipaṭṭhānattavidhānaṃ tassa dhammattā. Evaṃ sesesupi hāpanakoṭṭhāsesu. Vaḍḍhanesu pana **cha indriyānī**ti anindriyassapi ekassa indriyattavidhānameva **adhammo**. Evaṃ sesesupi. Na kevalaṅca eteva, “cattāro khandhā, terasāyatanānī”ti-ādinā yattha katthaci viparītato pakāsanam sabbam **adhammo**, yāthāvato pakāsanaṅca sabbam **dhammoti** daṭṭhabbam. **Pakāsananti** cettha tathā tathā kāyavacīpayogasamuṭṭhāpikā arūpakkhandhā va adhippetā, evamettha dasakusalakammaphādīsū anavajjaṭṭhena sarūpato dhammesu, akusalakammaphādīsū sāvajjaṭṭhena sarūpato adhammesu ca tadaññesu ca abyākatesu yassa kassaci koṭṭhāsassa bhagavatā paññattakkameneva pakāsanam “dhammo”ti ca viparītato pakāsanam “adhammo”ti ca dassitanti daṭṭhabbam. Kāmañcetta vinayādayopi yathābhūtato, ayathābhūtato ca pakāsanavasena dhammādhamesu eva pavisanti, vinayādināmena pana visesetvā visum gahitattā tadavasesameva dhammādhammakoṭṭhāse pavisaṭīti daṭṭhabbam.

**Imam adhammam dhammoti karissāmā**ti-ādi dhammaṅca adhammaṅca yāthāvato ñatvāva pāpiccham nissāya viparītato pakāsentasseva saṅghabhedo hoti, na pana tathāsaññāya pakāsentassāti dassanattam vuttam. Esa nayo “avinayam vinayoti dīpentī”ti-ādīsipi. Tattha **niyyānikanti** ukkaṭṭhanti attho. “**Tathevā**”ti iminā “evam amhākam ācariyakulan”ti-ādinā vuttamattham ākaḍḍhati.

**Saṃvaro pahānam paṭisaṅkhāti** saṃvaravinayo, pahānavinayo, paṭisaṅkhāvinayo ca vutto. Tenāha “**ayam vinayo**”ti. “Paññattam apaññattan”ti dukam “bhāsitam abhāsitan”ti dukena atthato samānameva, tathā duṭṭhulladukam garukadukena. Teneva tesam “**cattāro satipaṭṭhānā -pa- idam apaññattam nāmā**”ti-ādinā sadisaniddeso kato. **Sāvasesā pattinti** avasesasīlehi sahitāpattim. Natthi etissam āpannāyam sīlavasesāti **anavasesāpatti**.

354. Pāliyam **samaggānaṅca anuggahoti** yathā samaggānam sāmaggī na bhijjati, evam anuggahaṇam anubalappadānam.

355. **Siyā nu khoti** sambhaveyya nu kho. **Tasmim̐ adhammadiṭṭhīti** attano “adhammaṃ dhammo”ti etasmim̐ dīpane ayuttadiṭṭhi. **Bhede adhammadiṭṭhīti** “adhammaṃ dhammo”ti dīpetvā anussāvanasalākaggāhāpanādinā attānaṃ muñcitvā catuvaggādikaṃ saṅghaṃ ekasīmāyameva ṭhitato catuvaggādisaṅghato viyojetvā ekakammādinipphādanavasena saṅghabhedakaraṇe adhammadiṭṭhiko hutvāti attho. **Vinidhāya diṭṭhinti** yā tasmim̐ “adhammaṃ dhammo”ti dīpane attano adhammadiṭṭhi uppajjati, taṃ vinidhāya paṭicchādetvā “dhammo evāyaṃ”ti viparītato pakāsetvāti attho. Evaṃ sabbattha attho veditabbo.

**Bhede dhammadiṭṭhīti** yathāvuttanayena saṅghabhedane doso natthīti laddhiko. Ayaṃ pana “adhammaṃ dhammo”ti dīpane adhammadiṭṭhiko hutvāpi taṃ diṭṭhim̐ vinidhāya karaṇena saṅghabhedako atekiccho jāto. **Evaṃ bhede vematikoti** imassa pana bhede vematikadiṭṭhiyā vinidhānampi atthi. Sesāṃ samameva. **Tasmim̐ dhammadiṭṭhibhede adhammadiṭṭhīti** ayaṃ pana bhede adhammadiṭṭhim̐ vinidhāya katattā saṅghabhedako atekiccho jāto. Sukkapakkhe pana sabbattha “adhammaṃ dhammo”ti-ādidīpane vā bhede vā dhammadiṭṭhitāya diṭṭhim̐ avinidhāyeva katattā saṅghabhedakopi satekiccho jāto. Tasmā “adhammaṃ dhammo”ti-ādidīpane vā saṅghabhede vā ubhosupi vā adhammadiṭṭhi vā vematiko vā hutvā taṃ diṭṭhim̐, vimatiṅca vinidhāya “dhammo”ti pakāsetvā vuttanayena saṅghabhedam̐ karontasseva ānantariyaṃ hotīti veditabbaṃ.

Upālīpañhākathāvaṇṇanā niṭṭhitā.

Saṅghabhedakakkhandhakavaṇṇanānayo niṭṭhito.

## 8. Vattakkhandhaka

### Āgantukavattakathāvaṇṇanā

357. Vattakkhandhake **pattaritabbanti** ātape pattharitabbaṃ. Pāḷiyam **abhivādāpetabboti** vandanatthāya vassaṃ pucchanena navako sayameva vandatīti vuttaṃ. **Nilloketabboti** oloketabbo.

Āgantukavattakathāvaṇṇanā niṭṭhitā.

---

### Āvāsikavattakathāvaṇṇanā

359. “Yathābhāgan”ti ṭhapitaṭṭhānaṃ anatikkamitvā mañcapīṭhādīm papphoṭevā pattharivā upari paccattharaṇaṃ datvā dānampi senāsanapaññāpanamevāti dassento āha “**papphoṭevā hi pattharituṃ pana vaṭṭatiyevā**”ti.

Āvāsikavattakathāvaṇṇanā niṭṭhitā.

---

### Anumodanavattakathāvaṇṇanā

362. **Pañcame nisinneti** anumodanatthāya nisinne. **Na mahātherassa bhāro hotīti** anumodakaṃ āgametuṃ na bhāro. **Ajjhiṭṭhova āgametabboti** attanā ajjhiṭṭhehi bhikkhūhi anumodanteveva nisīditabbanti attho.

Anumodanavattakathāvaṇṇanā niṭṭhitā.

---

### Bhattaggavattakathāvaṇṇanā

364. **Manussānaṃ parivisanatṭhānanti** yattha antovihārepi manussā saputtadārā āvasitvā bhikkhū netvā bhojenti. **Āsanesu satīti**

nisīdanaṭṭhānesu santesu. **Idam bhante āsanam uccanti** āsanne samabhūmibhāge paññattam therāsanena samakam āsanam sandhāya vuttam, therāsanato pana uccatare āpucchitvāpi nisīditum na vaṭṭati. Yadi tam āsannampi nīcataram hoti, anāpucchāpi nisīditum vaṭṭati.

**Mahātherasseva āpattīti** āsanena paṭibāhanāpattiyā āpattī. **Avattharivāti** pārutasanḅhāim avattharivā, anukkipivāti attho.

Pāliyam “**ubho hi hatthehi -pa- odano paṭiggahetabbo**”ti idam hatthatale vā pacchipiṭṭhi-ādidussanḅhitādhāre vā pattam ṭhapetvā odanassa gahaṅakāle pattassa apatanatthāya vuttam, susajjite pana ādhāre pattam ṭhapetvā ekena hatthena tam parāmasitvāpi odanam paṭiggahetum vaṭṭati **eva. Ubho hi hatthehi -pa- udakam paṭiggahetabbanti** etthāpi ese va nayo.

**Hatthadhovana-udakanti** bhojanāvasāne udakam. Tenāha “**pānīyam pivitvā hatthā dhovitabbā**”ti. Tena pariyoṣāne dhovanameva paṭikkhittam, bhojanantare pana pānīyapivanādinā nayena hattham dhovitvā puna bhuñjitum vaṭṭatīti dasseti. Potthakesu pana “pānīyam pivitvā hatthā na dhovitabbā”ti likhanti, tam purimavacanena na sameti pariyoṣāne udakasseva “hatthadhovana-udakan”ti vuttattā. **Sace manussā dhovatha bhanteti**-ādi niṭṭhitabhattam nisinnam theram sandhāya vuttam. **Dhure**<sup>1</sup> dvārasamīpe.

Bhattachagavattakathāvaṅṅanā niṭṭhitā.

### Piṅḅacārikavattakathādivaṅṅanā

366. Pāliyam **ṭhāpeti vāti** tiṭṭha bhanteti vadanti.

367. **Atthi bhante nakkhattapadānīti** nakkhattapadavisayāni nātāni atthi, assayujādinakkhattam jānāthāti adhippāyo. Tenāha “**na jānāma āvuso**”ti. **Atthi bhante disābhāganti** etthāpi ese va nayo. **Kenajja bhante yuttanti** kena nakkhattena cando yuttoti attho.

1. Dūre (Sī, Syā, Ka), pure (Ka)

369. **Aṅgaṇeti** abbhokāse. **Evameva paṭipajjitabbanti** uddesadānādi āpucchitabbanti dasseti.

374. **Nibaddhagamanatthāyāti** attanova nirantaragamanatthāya. Ūhaditāti<sup>1</sup> ettha hada-dhātussa vaccavissajjanatthatāyāha “**bahi vaccamakkhitā**”ti.

Piṇḍacārikavattakathādivaṇṇanā niṭṭhitā.

Vattakkhandhakavaṇṇanānayo niṭṭhito.

---

1. Uhatāti (Sī, Ka)

## 9. Pātimokkhaṭṭhapanakkhandhaka

### Pātimokkhuddesayācanakathāvaṇṇanā

383. Pātimokkhaṭṭhapanakkhandhake pāliyaṃ **nandimukhiyā**ti odātadisāmukhatāya tuṭṭhamukhiyā. “Uddhastam aruṇan”ti vatvāpi “uddisatu bhante bhagavā”ti pātimokkhuddesayācanam anuposathe uposathakaraṇapaṭikkhepassa sikkhāpadassa apaññattattā therena katanti daṭṭhabbam. Kasmā pana bhagavā evam tuṇhībhūtova tiyāmarattim vītīnāmesīti? Aparisuddhāya parisāya uposathādisamvāsakaraṇassa sāvajjatan bhikkhusamghe pākaṭam kātum, tañca āyatim bhikkhūnam tathāpaṭipajjanattham sikkhāpadam ñāpetum<sup>1</sup>. Keci panettha “aparisuddhampi puggalam tassa sammukhā ‘aparisuddho’ti vattum mahākaruṇāya avisahanto bhagavā tathā nisīdi”ti kāraṇam vadanti, tam akāraṇam pacchāpi avattabbato, mahāmogallānattherenāpi tam bāhāyam gahetvā bahi nīharaṇassa akattabbatāpasāngato. Tasmā yathāvuttamevettha kāraṇanti. Teneva “aṭṭhānametaṃ bhikkhave anavakāso, yaṃ tathāgato aparisuddhāya parisāya uposatham kareyya, pātimokkham uddiseyyā”ti<sup>2</sup> vatvā “na ca bhikkhave sāpattikena pātimokkham sotabban”ti-ādinā<sup>3</sup> sāpattikaparisāya kattabbavidhi dassito.

**Saṅkassarasamācāranti** kiñcīdeva asāruppam disvā “idaṃ iminā katan bhavissatī”ti parehi saṅkāya saritabbasamācāram, attanā vā “mama anācāram ete jānantī”ti saṅkāya saritabbasamācāram. Samaṇavesadhāraṇena, saṅghikapaccayabhāgagahaṇādinā ca jīvikam kappento “aham samaṇo”ti paṭiññam adentopi atthato dento viya hotīti “**samaṇapaṭiññam brahmācāripaṭiññam**”ti vuttam. **Avassutanti** kilesāvassanena tintam. Sañjātadussilyakacavarattā **kasambujātam**, asāratāya vā kasambu viya jātam. **Bahidvāraḷakotṭhakā nikkhāmetvā**ti dvārasālato bahi nikkhamāpetvā.

1. Paññāpetum (Sī)

2. Am 3. 45; Vi 4. 424; Khu 1. 139 piṭṭhesu.

3. Vi 4. 424 piṭṭhe.

384. **Mahāsamudde abhīramantī**ti bahuso dassanapavisānādinā mahāsamudde abhīratim vīdanti. **Na āyatakeveva papātoti** chinnatāṭamahāsobbho viya na āditova ninnoti attho. **Ṭhitadhammoti** avatṭhitasabhāvo. **Pūrattanti** puṇṇattam. **Nāgāti** sappajātikā.

Pātimokkhuddesayācanakathāvaṇṇanā niṭṭhitā.

### Pātimokkhasavanārahakathādivaṇṇanā

386. **Udāharitabbanti** pāḷiyā avatvā tamattham yāya kāyaci bhāsāya udāhaṭampi udāhaṭamevāti daṭṭhabbam.

**Pure vā pacchā vāti** ñatti-ārambhato pubbe vā ñattiniṭṭhānato pacchā vā.

387. **Katañca akatañca ubhayaṃ gahetvāti** yassa katāpi atthi akatāpi, tassa tadubhayaṃ gahetvā. **Dhammikaṃ sāmagginti** dhammikaṃ samaggakammaṃ. **Paccādiyati**ti ukkoṭanādhippāyena puna kātum ādiyati.

388. **Ākāradisaññā veditabbāti** ākāraliṅganimittanāmāni vuttānīti veditabbāni.

Pātimokkhasavanārahakathādivaṇṇanā niṭṭhitā.

### Attādāna-aṅgathādivaṇṇanā

398. Puna codetum attanā ādātabbam gahetabbam adhikaraṇam attādānanti āha “**sāsanam sodhetukāmo**”ti-ādi. **Vassārattoti** vassakālo. Sopi hi dubbhikkhādikālo viya adhikaraṇavūpasamattham lajjiparisāya dūrato ānayanassa, āgatānañca piṇḍāya caraṇādisamācārassa dukkarattā akālo eva.

**Samanussaraṇakaraṇanti** anussaritānussaritakkhaṇe pītipāmojjajananato anussaraṇuppādakaṃ. **Vigatūpakkilesa -pa- samvattati**ti ettha



yathā abbhahimādi-upakkilesavirahitānaṃ candimasūriyānaṃ sassirīkatā hoti, evamassāpi codakassa pāpapuggalūpakkilesavigamena sassirīkatā hotīti adhippāyo.

399. **Adhigataṃ mettacittanti** appanāppattaṃ mettajhānaṃ.

400-1. Dosantaro”ti ettha antara-saddo cittapariyāyoti āha “**na duṭṭhacitto hutvā**”ti.

Kāruṇṇānaṃ nāma karuṇā evāti āha “**kāruṇṇatāti karuṇābhāvo**”ti. **Karuṇanti** appanāppattaṃ vadati. Tathā **mettanti**.

Attādāna-aṅgathādivaṇṇanā niṭṭhitā.

Pātimokkhaṭṭhapanakkhandhakavaṇṇanāyaya niṭṭhito.

## 10. Bhikkhunikkhandhaka

### Mahāpajātigotamīvatthukathāvaṇṇanā

403. Bhikkhunikkhandhake “mātugāmassa pabbajitattā”ti idam pañcavassasatato uddham saddhammassa appavattanakāraṇadassanam. **Sukkhavipassakakhīṇāsavavasena vassasahassanti-ādi khandhakabhāṇakānam** matam gahetvā vuttam. **Dīghanikāyaṭṭhakathāyam** pana “paṭisambhidāppattehi vassasahassam aṭṭhāsi, chaḷabhiññehi vassasahassam, tevijjehi vassasahassam, sukkhavipassakehi vassasahassam, pātimokkhehi vassasahassam aṭṭhāsi”ti<sup>1</sup> vuttam. **Ānguttara**<sup>2</sup>**samyuttaṭṭhakathāsupi**<sup>3</sup> aññathā va vuttam, tam sabbam aññamaññaviruddhampi taṁtaṁbhaṇakānam matena likhitasīhaḷaṭṭhakathāsu āgatanayameva gahetvā ācariyena likhitam īdise kathāvirodhe sāsana-parihāniyā abhāvato, sodhanupāyābhāvā ca. Paramatthavirodho eva hi suttādinayena sodhanīyo, na kathāmaggavirodhoti.

Mahāpajātigotamīvatthukathāvaṇṇanā niṭṭhitā.

### Bhikkhunī-upasampadānujānanakathāvaṇṇanā

404-8. Pāḷiyam **yadaggenāti** yasmim divase. **Tadāti** tasmim yeva divase. **Vimānetvāti** avamānam katvā.

410-1. **Āpattigāminiyoti** āpattim āpannāyo. **Kammavibhaṅgeti** parivāre kammavibhaṅge<sup>4</sup>.

413-5. Pāḷiyam **dve tisso bhikkhuniyoti** dvīhi tīhi bhikkhunīhi. **Na ārocentīti** pātimokkhuddesakassa na ārocenti.

416. **Dussaveṇiyāti** anekadussapaṭṭe ekato katvā kataveṇiyā.

1. Dī-Ṭṭha 3. 82 piṭṭhe.

3. Sam-Ṭṭha 2. 187 piṭṭhe.

2. Am-Ṭṭha 3. 238 piṭṭhe.

4. Vi 5. 380 piṭṭhādīsu.

417. **Visesakanti** pattalekhādivaṇṇavisesaṃ. **Pakiṇanti**ti vikkiṇanti.  
**Namanakanti** pāsukaṭṭhinamanakabandhanam.

422-5. **Samvelliyaṇti** kaccham bandhitvā nivāsanam. **Tayo nissayeti**  
rukkhamūlasenāsanassa tāsam alabbhanato vuttam.

426-8. **Aṭṭheva bhikkhuniyo yathāvuḍḍham paṭibāhantīti** aṭṭha  
bhikkhuniyo vuḍḍhapaṭipāṭiyāva gaṇhantiyo āgatapaṭipāṭim paṭibāhanti,  
nāññāti attho. **Anuvādam paṭṭhapentīti** issariyam pavattentīti attham vadanti.

430. **Bhikkhudūtenāti** bhikkhunā dūtabhūtena. **Sikkhamānadūtenāti**  
sikkhamānāya dūtāya.

431. **Na sammatīti** nappahoti. **Navakammanti** “navakammaṃ katvā  
vasatū”ti apaloketvā saṃghikabhūmiyā okāsadānam.

432-6. **Sannisinnagabbhāti** duviññeyyagabbhā. **Mahilātittethi** itthīnam  
sādhāraṇatitthe.

Bhikkhunī-upasampadānujānanakathāvaṇṇanā niṭṭhitā.

Bhikkhunikkhandhakavaṇṇanānayo niṭṭhito.

## 11. Pañcasatikakkhandhaka

### Khuddānukhuddakasikkhāpadakathāvaṇṇanā

437. Pañcasatikakkhandhake pāḷiyam “**apāvuso amhākaṃ satthāraṃ jānāsi**”ti idaṃ thero sayam bhagavato parinibbutabhāvam<sup>1</sup> jānantopi attanā sahaḡatabhikkhuparisāya nāpanatthameva, subhaddassa vuḍḍhapabbajitassa sāsanaṃ paṭipakkhavaḡanaṃ bhikkhūnaṃ viññāpanatthañca evaṃ pucchi. Subhaddo hi kusinārāyaṃ bhagavati abhippasannāya khattiyādigahaṭṭhaparisāya majjhe bhagavato parinibbānaṃ sutvā haṭṭhapahaṭṭhōpi bhayena pahaṭṭhākāraṃ vācāya pakāsetuṃ na sakkhissati, idheva pana vijanaḡadese sutvā yathājjhāsayaṃ attano pāpaladdhiṃ pakāsessati, tato tameva paccayaṃ dassetvā bhikkhū samussāhetvā dhammavinayaṃ saṅghaṃ kāretvā etassa pāpabhikkhussa, aññesañca īdisānaṃ manorathaviḡhātaṃ, sāsanaṭṭhitiñca karissāmiṃti jānantova taṃ pucchatīti veditaḡbaṃ. Teneva thero “ekamidāhaṃ āvuso samayaṃ”ti-ādinā subhaddavaḡanaṃ dassetvā dhammavinayaṃ saṅghāyāpesi. **Nānābhāvoti** sarīrena nānādesabhāvo, vippavāsoti attho. **Vinābhāvoti** maraṇena viyujjanaṃ. **Aññathā bhāvoti** bhavantarūḡpagaḡanaṃ aññākārappatti.

441. “**Ākaṅkhamāno -pa- samūhaneyyā**”ti idaṃ bhagavā mayā “ākaṅkhamāno”ti vuttatā ekasikkhāpadampi samūhanitaḡbaṃ aḡpassantā, samūhane ca dosaṃ disvā dhammasaṅghakā bhikkhū “apaññattaṃ na paññāpessāma, paññattaṃ na samucchindissāma”ti-ādinā puna “paññattisaḡdisāya akuppāya kammavācāya sāvetvā samādāya vattissanti, tato yāva sāsanaḡtaradhānā appaṭibāhiyāni sikkhāpadāni bhavissanti”ti iminā adhippāyena avocāti daṭṭhabbaṃ. Teneva mahātherāpi tatheva paṭipajjimsu.

**Gihigaṡānīti** gihīsu gaṡāni, khattiyamaḡsārādigihīhi nāṡānīti attho. Citakadhūmakālo attano pavattipariyosānabhūto etassāti **dhūmakālikam**.

---

1. Parinibbānabhāvaṃ (Ka)

443. **Oḷārike nimitte kariyamānepīti** “ākaṅkhamāno ānanda tathāgato kappam vā tiṭṭheyya kappāvasesam vā”ti evam thūlatare “tiṭṭhatu bhagavā kappan”ti yācanahetubhūte okāsanimitte kamme kariyamāne. **Mārena pariyuṭṭhitacittoti** mārena āviṭṭhacitto.

445. **Ujjavanikāyāti**<sup>1</sup> paṭisotagāminiyā. Kucchito lavo chedo vināso **kulavo**, niratthakaviniyogo. Tam na gacchantīti na **kulavam gamenti**.

Khuddānukhuddakasikkhāpadakathāvaṇṇanā niṭṭhitā.

Pañcasatikakkhandhakavaṇṇanānayo niṭṭhito.

## 12. Sattasatikakkhandhaka

### Dasavatthukathāvaṇṇanā

446. Sattasatikakkhandhake **bhikkhaggenā**ti bhikkhugaṇanāya. **Mahī**ti himaṃ.

447. **Avijjānivutā**ti avijjanīvaraṇena nivutā paṭicchannā. **Aviddasū**ti aññāṇino. **Upakkilesā vuttā**ti tesam samaṇabrāhmaṇānaṃ ete surāpānādayo upakkilesāti vuttā. Nettiyā taṇhāya sahitā **sanettikā**.

450-1. **Ahogaṅ**goti tassa pabbatassa nāmaṃ. **Paṭikacceva gaccheyyanti** yattha naṃ adhikaraṇaṃ vūpasamituṃ bhikkhū sannipatissanti, tatthāhaṃ paṭhamameva gaccheyyaṃ. **Sambhāvesunti** sampāpuṇimsu.

452. **Alonikanti** loṇarahitaṃ bhattaṃ, byañjanaṃ vā. **Āsutā**ti sabbasambhārasajjitā, “asuttā”ti vā pāṭho.

453. **Ujjavimsū**ti nāvāya paṭisotaṃ gacchiṃsu. **Pācīnakā**ti puratthimadisāya jātattā vajjiputtake sandhāya vuttaṃ. **Pāveyyakā**ti pāveyyadesavāsino.

454. **Nanu tvaṃ āvuso vuḍḍhoti** nanu tvaṃ thero nissayamutto, Kasmā taṃ thero paṇāmesīti bhedavacanaṃ vadanti. **Garunissayaṃ gaṇhāmā**ti nissayamuttāpi mayaṃ ekaṃ sambhāvanīyagaruṃ nissayabhūtaṃ gaḥetvāva vasissāmāti adhippāyo.

455. **Mūlādāyakā**ti paṭhamaṃ dasavatthūnaṃ dāyakā, āvāsikāti attho. **Pathabyā saṃghattheroti** loke sabbabhikkhūnaṃ tadā upasampadāya vuḍḍho. **Suññatāvihārenā**ti suññatāmukhena adhigataphalasaṃpattim sandhāya vadati.

457. **Suttavibhaṅgeti** padabhājanīye. Idañca “yo pana bhikkhu sannidhikāraṃ khādanīyaṃ vā bhojanīyaṃ vā”ti<sup>1</sup> sutte yāvakālikasseva

parāmaṭṭhattā siṅgiloṇassa yāvajīvikassa sannidhikatassa āmisena saddhim paribhoge pācittiyam vibhaṅganayeneva majjhatīti vuttam, tam pana pācittiyam vibhaṅge āgatabhāvam sādhetum **“katham suttavibhaṅge”**ti-ādi vuttam. Tattha hi loṇamettha sannidhikatam, na khādanīyam bhojanīyanti loṇamissabhojane vajjiputtakā anavajjasāñño ahesum. Tathāsāññinampi nesam āpattidassanatham **“sannidhikāre asannidhikārasāññi”**ti idam suttavibhaṅga uddhaṭanti veditabbam.

**Tena saddhinti** purepaṭiggahitaloṇena saddhim. **Dukkaṭenettha bhavitabbanti** **“yāvakālikena bhikkhave yāvajīvikam paṭiggahitan”**ti avatvā **“tadahupaṭiggahitan”**ti vacanasāmatthiyato purepaṭiggahitam yāvajīvikam yāvakālikena saddhim sambhinnarasam kālepi na kappatīti sijjhati, tattha dukkaṭena bhavitabbanti adhippāyo. **Dukkaṭenapi na bhavitabbanti** yadi hi sannidhikārapaccayā dukkaṭam maññatha, yāvajīvikassa loṇassa sannidhidosābhāvā dukkaṭena na bhavitabbam, atha āmisena sambhinnarasassa tassa āmisagatikattā dukkaṭam mā maññatha. Tadā ca hi pācittiyeneva bhavitabbam āmisattupagamanatoti adhippāyo. **Na hi ettha yāvajīvikanti-ādināpi dukkaṭābhāvam samattheti.**

Pāḷiyam **rājagahe suttavibhaṅgeti-ādīsu** sabbattha sutte ca vibhaṅge cāti attho gahetabbo. Tassa tassa vikālabhojanādino suttepi paṭikkhittattā vinayassa atisaraṇam atikkamo **vinayātisāro. “Nisīdanam nāma sadasam vuccatīti āgatan”**ti idam vibhaṅge ca āgatadassanatham vuttam. **Tam pamāṇam karontassāti** sugatavidatthiyā vidatthittayappamāṇam karontassa, dasāya pana vidatthidvayappamāṇam katam, adasakampi nisīdanam vaṭṭati evāti adhippāyo. Sesamidha heṭṭhā sabbattha suviññeyyameva.

Dasavatthukathāvaṇṇanā niṭṭhitā.

Sattasatikakkhandhakavaṇṇanāyaya niṭṭhito.

Iti samantapāsādikāya vinayaṭṭhakathāya vimativinodaniyam

**Cūlavaggavaṇṇanāyaya niṭṭhito.**





# Parivāraṇṇanā

Namo tassa Bhagavato Arahato Sammāsambuddhassa.

## Mahāvagga

### Paññattivāraṇṇanā

1. Visuddhaparivārassa sīlakkhandhādiddhamakkhandhasarīrassa bhagavato vinaya pariyattisāsane khandhakānaṃ anantaraṃ parivāroti yo vinayo saṅgahaṃ samāruḷho, tassa dāni anuttānatthavaṇṇanaṃ karissāmīti yojanā.

**Samantacakkhunā**ti sabbaññutaññāṇena. **Ativisuddhena maṃsacakkhunā**ti rattindivaṃ samantā yojanappamāṇe atisukhumānīpi rūpāni passanato ativiya parisuddhena pasādacakkhunā. “Atthi tattha paññattī”ti-ādīsu atthi nu kho tattha paññattīti-ādinā attho gahetabboti āha “**tattha paññattī -pa- kenābhatanti pucchā**”ti.

2. **Pucchāvissajjaneti pucchāya vissajjane. Vinītakathā**ti vinītavatthukathā, ayameva vā pāṭho.

**Dvaṅgikena ekena samuṭṭhānenā**ti aṅgadvayasamudāyabhūtena ekena. Aṅgadvayavimuttassa samuṭṭhānassa abhāvepi tesu ekenaṅgena vinā ayaṃ āpatti na hotīti dassanattameva “ekena samuṭṭhānenā”ti vuttam. Idāni tesu dvīsu aṅgesu padhānaṅgaṃ dassetumāha “**ettha hi cittaṃ aṅgaṃ hotī**”ti-ādi. Yasmā pana maggenamaggappaṭipattisaṅkhātāya kāyaviññattiyā sevanacitteneva sambave sati ayaṃ taṃ aṅgadvayaṃ upādāya bhagavatā paññattā āpattisammūti hoti, nāsati. Tasmā taṃ cittaṃ kāyaviññattisaṅkhātassa kāyassa aṅgaṃ kāraṇaṃ hoti, na āpattiyā. Tassa pana taṃsamuṭṭhitakāyo eva aṅgaṃ abyavahitakāraṇaṃ, cittaṃ pana kāraṇakāraṇanti adhippāyo. Evaṃ uparipi sabbattha cittaṅgayuttasamuṭṭhānesu

adhippāyo veditabbo. “Ekena samuṭṭhānena samuṭṭhātī”ti-  
 ādiparivāravacaneneva āpattiyā akusalādiparamatthasabhāvata<sup>1</sup>pāli-  
 aṭṭhakathāsu pariyāyatova vuttā, sammutisabhāvā eva āpattīti sijjhati  
 samuṭṭhāna samuṭṭhitānaṃ bhedasiddhitoti gahetabbaṃ. **Imamatthaṃ**  
**sandhāyāti** āpannāya pārājikāpattiyā kehicipi samathehi  
 anāpattibhāvāpādanassa asakkuṇeyyattasaṅkhātamatthaṃ sandhāya.

3. **Porāṇakehi mahātherehīti** saṅgītittayato pacchā  
 potthakasaṅgītikārahehi chaḷabhiññāpaṭisambhidādiguṇasamujjalehi  
 mahātherehi. Catutthasaṅgītisadisā hi **potthakārohasaṅgīti**.

188. **Mahāvibhaṅgeti** bhikkhuvibhaṅge. **Soḷasa vārā dassitāti** yehi  
 vārehi ādibhūtehi-upalakkhitattā ayaṃ sakalopi parivāro soḷasaparivāroti  
 voharīyati, te sandhāya vadati.

Paññattivāraṇṇanā niṭṭhitā.

### Samuṭṭhānasīsaṇṇanā

257. Pāliyaṃ **nibbānañceva paññattīti** ettha yasmā saṅkhatadhamme  
 upādāya paññattā sammutisaccabhūtā puggalādipaññatti paramatthato  
 avijjamānattā uppattivināsayutta<sup>2</sup> vatthudhammaniyatena  
 aniccadukkhalakkhaṇadvayena yuttāti vattum ayuttā, kārakavedakādirūpena  
 pana parikappitena attasabhāvena virahitattā “anattā”ti vattum yuttā. Tasmā  
 ayaṃ paññattipi asaṅkhatattasāmaññato vatthubhūtena nibbānena saha  
 “**anattā iti nicchayā**”ti vuttā. Avijjamānāpi hi sammuti kenaci paccayena  
 akatattā asaṅkhatā evāti.

Karuṇāsītalattam, paññāpabhāsitatthaṅca bhagavato dassetum  
 “**buddhacande, buddhādicce**”ti etaṃ ubhayaṃ vuttam. Hāyati etenāti hāni  
 dukkhassa hāni **dukkhahāni**, sabbadukkhāpanūdanakāraṇanti attho. **Piṭake**  
**tīṇi desayīti** yasmā aññepi mahāvīrā sammāsambuddhā saddhammam  
 desayanti,

1. ...sabhāvato (Sī)

2. Uppattivināsayopi (Sī, Ka)

tasmā aṅgīraso piṭakāni tīṇi desayīti yojanā. **Mahāguṇanti** mahānisaṁsaṁ. **Evaṁ nīyati saddhammoti** yadi vinayapariyatti aparihīnā tiṭṭhati, evaṁ sati paṭipattipaṭivedhasaddhammopi nīyati pavattīyati, na parihāyatīti attho.

Vinayapariyatti pana katham tiṭṭhatīti āha “**ubhato cā**”ti-ādi. Parivārena ganthitā tiṭṭhatīti yojetabbaṁ. **Tasseva parivārassāti** tasmim eva parivāre. **Samuṭṭhānaṁ niyato katanti** ekaccaṁ samuṭṭhānena niyataṁ kataṁ. Tasmim parivāre kiñci sikkhāpadaṁ niyatasamuṭṭhānaṁ aññehi asadhāraṇaṁ, taṁ pakāsīti attho.

**Sambhedam nidānañcaññanti** sambhedo sikkhāpadānaṁ aññamaññasamuṭṭhānena saṁkiṇṇatā, nidānañca paññattiṭṭhānaṁ, aññaṁ puggalādivatthādi ca. **Sutte dissanti uparīti** heṭṭhā vutte, upari vakkhamāne ca parivārasutte eva dissanti. Yasmā ca evaṁ, tasmā sakalasāsanādhārassa vinayassa ṭhitihetubbhūtaṁ parivāraṁ sikkheti evamettha yojanā daṭṭhabbā.

**Sambhinnasamuṭṭhānānīti** aññehi sādharmaṇasamuṭṭhānāni. **Ādimhi tāva purimanayeti** sabbapaṭhame paññattivāre āgatanayaṁ sandhāya vadati, tattha pana paññattivāre “paṭhamam pārājikam kattha paññattanti, vesāliyam paññattan”ti-ādinā<sup>1</sup> nidānampi dissati eva. **Paratoti** āgatabhāvaṁ pana sandhāya parato āgate sutte dissatīti veditabbanti vuttam. **Tassāti** ubhatovibhaṅgapariyāpannassa sikkhāpadassa.

258. **Aniyatā paṭhamikāti** āpattim apekkhitvāva itthilingam kataṁ, paṭhamāniyataṁ sikkhāpadanti attho. Pāliyam **nānubandhe pavattininti** vuṭṭhāpitaṁ pavattinim ananubandhanasikkhāpadaṁ.

260. **Elakalomasikkhāpadavatthusmim** “bhikkhuniyo elakalomāni dhovantiyo rajantiyo vijāṭentiyo riñcanti uddesaṁ paripucchan”ti<sup>2</sup> āgatattā imaṁ riñcantipadaṁ gahetvā sikkhāpadaṁ upalakkhīti dassento “**vibhaṅge ‘riñcanti uddesaṁ’ti āgataṁ elakalomadhovāpanasikkhāpadan**”ti āha.

1. Vi 5. 1 piṭṭhe.

2. Vi 1. 342 piṭṭhe.

**Vassikasāṭīkasikkhāpadanti** asamaye vassikasāṭīkapariyesanasikkhāpadam<sup>1</sup>. **Ratanasikkhāpadanti** ratanam vā ratanasammataṃ vā paṭisāmanasikkhāpadam<sup>2</sup>.

265. Pāḷiyam **buddhaññenā**ti paṭividdhasabbaññutaññāṇena.

267. “**Na desenti tathāgatā**”ti etena chattapāṇissa dhammadesanāpaṭikkhepaṃ dasseti.

269. **Akatanti** aññehi amissīkatam, niyatasamuṭṭhānanti attho. **Akatanti** vā pubbe anāgataṃ, abhinavanti attho.

270. **Samuṭṭhānam hi saṅkhepanti** ettha saṅkhipanti saṅgayhanti sadisasamuṭṭhānāni etthāti saṅkhepo, samuṭṭhānasīsam. Neti vineti kāyavacīduccaritanti netthi, vinayapāḷi, sā eva dhammoti nettidhammoti āha “**vinayapāḷidhammassā**”ti.

Samuṭṭhānasīsavannaṇā niṭṭhitā.

---

1. Vi 1. 365 piṭṭhe.

2. Vi 2. 210 piṭṭhe.

# Antarapeyyāla

## Katipucchāvāraṇṇanā

271. **Kati āpattiyoti** pārājikādīsu pañcasu āpattīsu methunādinnādānādi-antogadhabhedam apekkhitvā jātivasena ekattam āropetvā pucchā katā. **Kati āpattikkhandhāti** antogadhabhedam apekkhitvā<sup>1</sup>paccekam rāsaṭṭhenāti ettakamevettha bhedo. **Vinītānīyeva vinītavattḥūnīti** āpattito viramaṇāni eva avippatisārapāmojjādiddhammānam kāraṇattā vatthūnīti vinītavattḥūni, tāni ettha atthato virati-ādi-anavajjadhammā eva. **Veram maṇatīti** verahetuttā “veran”ti laddhanāmam rāgādi-akusalapakkham vināseti.

**Dhammassavanaggaṃ bhinditvā gacchatītibahūsu** ekatonisīditvā dhammam suṇantesu tam dhammassavanasamāgamam kopetvā uṭṭhāya gacchati. **Anādarovāti** tussitabbaṭṭhāne tuṭṭhim, samvijitabbaṭṭhāne samvegañca apavedento eva. **Kāyapāgabbhiyanti** unnativasena pavattanakāyānācāram.

274. Mettāya sambhūtam **mettam**, kāyakammaṃ. **Ubhayehipīti** navakehi, therehi ca. **Piyam karotīti** tam puggalam pemaṭṭhānam karoti, kesanti āha “**sabrahmacārīnam**”ti.

Puggalam paṭivibhajitvā bhuñjatīti pakatena sambandho. Tameva puggalapaṭivibhāgaṃ dassetuṃ “**asukassā**”ti-ādi vuttam.

**Bhujissabhāvakaraṇatoti** taṇhādāsabyato mocetvā samathavipassanāsu serivihāritākaraṇatoti attho. **Niyyātīti** pavattati, sammādukkhakkhayāya samvattatīti attho.

Katipucchāvāraṇṇanā niṭṭhitā.

## Cha āpattisamuṭṭhānavāraṇṇanā

276. **Paṭhamena āpattisamuṭṭhānenāti** kevalam kāyena. Pārājikāpattiyā ekantasacittakasamuṭṭhānattā “**na hīti vattabban**”ti vuttam.

---

1. Anapekkhitvā (Sī, Ka)

saṅghādisesādīnaṃ dukkaṭapariyosānānaṃ pañcannaṃ acittakānampi sambhavato “**siyā**”ti vuttaṃ, āpajjanaṃ siyā bhaveyyāti attho. Hīnukkaṭṭhehi jāti-ādīhi omasane eva dubbhāsitaṃ paññattatā sā ekantavācācittasamuṭṭhānā evāti.

Dutiyasamuṭṭhānanaye vācāya eva samāpajjitabbapāṭidesanīyassa abhāvā “**na hī**”ti vuttaṃ.

Tatiye pana vosāsamānarūpaṃ bhikkhuniṃ kāyavācāhi anapasādanapaccayā pāṭidesanīyasambhavato “**sighā**”ti vuttaṃ.

Omasane pācittiyassa adinnādānasamuṭṭhānattepi tappaccayā paññattassa dubbhāsitaṃ pañcameneva samuppattīti dassetuṃ catutthavāre “**dubbhāsitaṃ āpajjeyyāti na hīti vattabban**”ti vatvā pañcamavāre “**siyāti vattabban**”ti vuttaṃ. Kāyavikārenea omasantassa panettha dubbhasitabhāvepi kāyakīlābhāpābhāvato dukkaṭamevāti daṭṭhabbaṃ.

Chaṭṭhavāre pana vijjamānopi kāyo dubbhāsitaṃ aṅgaṃ na hoti, pañcamasamuṭṭhāne eva chaṭṭhampi pavisaṭīti dassetuṃ “**na hī**”ti paṭikkhittaṃ, na pana tattha sabbathā dubbhāsitena anāpattīti dassetuṃ. Na hi davakamyatāya kāyavācāhi omasantassa dubbhāsitāpatti na sambhavati. Yañhi pañcameneva samāpajjati, taṃ chaṭṭhenapi samāpajjati eva dhammadesanāpatti viyāti gahetabbaṃ. Sesāṃ samuṭṭhānavāre suviññeyyameva.

Cha āpattisamuṭṭhānavāravaṇṇanā niṭṭhitā.

### Katāpattivāravaṇṇanā

277. Dutīye pana kativāre paṭhamasamuṭṭhānena āpajjitabbānaṃ āpattīnaṃ lahudassanasukhatthaṃ kuṭikārādīni eva samuddhaṭāni, na aññesaṃ abhāvā, sañcarittādīnampi vijjamānattā. Evaṃ dutiyasamuṭṭhānādīsupi. “**Kappiyasaññī**”ti iminā acittakattaṃ dasseti. “**Kuṭim karoti**”ti iminā vacīpayogābhāvaṃ. Ubhayenāpi kevalaṃ kāyeneva dukkaṭādīnaṃ sambhavaṃ dasseti. Evaṃ uparipi yathānurūpaṃ kātabbaṃ.

“**Ekena samuṭṭhānena samuṭṭhahanti**”ti idaṃ idha viresetvā dassitānaṃ kāyatova samuṭṭhitānaṃ vasena vuttaṃ, avisesato pana tā āpattiyo itarasamuṭṭhānehipi yathārahaṃ samuṭṭhahanti eva. Evaṃ uparipi.

“**Tiṇavattthārakenacā**”ti idaṃ saṃghadisesavajjitānaṃ catunnaṃ āpattīnaṃ vasena vuttaṃ.

279. **Samvidahitvā kuṭim karotīti** vācāya samvidahati, sayañca kāyena karotīti attho.

Katāpattivāraṇṇanā niṭṭhitā.

---

### Āpattisamuṭṭhānagāthāvaṇṇanā

283. Tatiyo pana gāthāvāro dutiyavārena vuttamevattham saṅgahetvā dassetuṃ vutto. Tattha kāyova kāyikoti vattabbe vacanavipallāsena “**kāyikā**”ti vuttaṃ. Tenāha “**tena samuṭṭhitā**”ti, kāyo samuṭṭhānaṃ akkhātoti attho.

**Vivekadassinā**ti sabbasaṅkhatavivittatā, tato vivittahetuttā ca nīvaraṇavivekañca nibbānañca dassanasīlena. **Vibhaṅgavidā**ti ubhatovibhaṅgakusalāti ālapanam. Idha panevaṃ añño pucchanto nāma natthi, **upālitthero** sayameva attham pākaṭam kātuṃ pucchāvisajjanañca akāsīti iminā nayena sabbattha attho veditabbo.

Āpattisamuṭṭhānagāthāvaṇṇanā niṭṭhitā.

---

### Vipattipaccayavāraṇṇanā

284. Catutthe pana vipattipaccayavāre **sīlavipattipaccayā**ti sīlavipattiṭṭhādanapaccayā.

286. **Diṭṭhivipattipaccayā**ti diṭṭhivipattiyā appaṭinissajjanapaccayā.

287. **Ājīvavipattipaccayā**ti ettha āgama jīvanti etenāti ājīvo, catupaccayo, sova micchāpattiyā vipannattā vipattīti **Ājīvavipatti**, tassā ājīvavipattiyā hetu, taduppādanataparibhoganimittanti attho.

Vipattipaccayavāraṇṇanā niṭṭhitā.

### **Adhikaraṇapaccayavāraṇṇanā**

291. Pañcame adhikaraṇapaccayavāre **kiccādhikaraṇapaccayā**ti apalokanavacanañattikammavācāsaṅkhatakammavācāpaccayā. **Pañcā**ti ettha adhammikakatikādiṃ apaloketvā karontānaṃ animittanti attho. Pañcame adhikaraṇapaccayavāre kiccādhikaraṇapaccayā apalokanāvasāne dukkaṭaṃ, adhippāyādinā ñattikammādiṃ karontānaṃ thullaccayādi ca saṅgayhatīti daṭṭhabbaṃ. **Avasesā āpattiyoti** sotāpattiphalaśamāpatti-ādayo. “**Natthaññā āpattiyo**”ti idaṃ vipatti-ādibhāginiyo sāvajjāpattiyo sandhāya vuttaṃ.

Adhikaraṇapaccayavāraṇṇanā niṭṭhitā.



# Samathabheda

## Adhikaraṇapariyāyavāraṇṇanā

293. Chaṭṭhe pariyāyavāre **alobho pubbaṅgamoti**-ādi sāsaṇaṭṭhitiyā aviparītato dhammavādissa vivādaṃ sandhāya vuttaṃ. **Aṭṭhārasa bhedakaravatthūni ṭhānānī**ti dhammādīsu adhammoti-ādinā gahetvā dīpanāni idheva bhedakaravatthūni, tāni eva kāyakalahādivivādassa kāraṇattā **ṭhānāni**, okāsattā **vatthūni**, ādhārattā **bhūmiyoti** ca vuttani. **Abyākatahetū**ti asekkhānaṃ vivādaṃ sandhāya vuttaṃ. **Dvādasa mūlānī**ti kodho upanāho, makkho palāso, issā macchariyaṃ, māyā sāṭheyyaṃ, pāpicchatā mahicchatā, sandiṭṭhiparāmāsītā ādhānaggāhīduppaṭinissajjitānīti imesaṃ channaṃ yugaḷānaṃ vasena cha dhammā ceva lobhādayo cha hetū cāti dvādasa dhammā vivādādhikaraṇassa mūlāni.

294. **Cuddasa mūlānī**ti tāneva dvādasa kāyavācāhi saddhim cuddasa anuvādādhikaraṇassa mūlāni.

295. Pathavīkhaṇanādīsu paṇṇattivajjesu kusalābyākatacittamūlikā āpatti hotīti dassetuṃ “**alobho pubbaṅgamo**”ti-ādi vuttaṃ. **Satta āpattikkhandhā ṭhānānī**ti-ādi sattannaṃ āpattikkhandhānaṃ paṭicchādanapaccayā āpattisambhavato vuttaṃ. “Āpattādhikaraṇapaccayā catasso āpattiyo āpajjati”ti<sup>1</sup> hi vuttaṃ. “**Cha hetū**”ti idaṃ kusalānaṃ āpattihetuvohārassa ayuttatāya vuttaṃ, na pana kusalahetūnaṃ abhāvato. “alobho pubbaṅgamo”ti hi ādi vuttaṃ. Āpattihetavo eva hi pubbaṅgamanāmena vuttā.

296. **Cattāri kammāni ṭhānānī**ti-ādīsu apalokanavācā, ñatti-ādivācāyo ca kammānīti vuttaṃ. Tā eva hi ekasīmāyaṃ sāmaggimupagatānaṃ kammappattānaṃ anumatiyā sāvanakiriyānipphattisaṅkhātassa saṅghaṇakiccasabhāvassa kiccādhikaraṇassa adhiṭṭhānābhāvena “ṭhānavatthubhūmiyo”ti vuccanti. **Ekam mūlaṃ saṅghoti** yebhuyyavasena vuttaṃ.

---

1. Vi 5. 180 piṭṭhe.

Gaṇaṇatti-apalokanānaṇhi gaṇopi mūlanti. **Ñattito vāti** ñattiñattidutiya ñatticatutthakammavācānaṇ ñattirūpattā, ñattipubbakattā ca vuttaṇ. Kammañattikammavācāñattivāsena hi duvidhāsu ñattīsu anussāvanāpi kammamūlakantvepa saṅgayhanti. Ñattivibhāgo cāyaṇ upari āvi bhavissati.

“**Ime satta samathā -pa- pariyāyenā**”ti idaṇ puccāvacanaṇ. “**Siyā**”ti idaṇ visajjanaṇ. “**Kathaṇca siyā**”ti idaṇ puna puccā. **Vivādādhikaraṇassa dve samathā**ti-ādi puna visajjanaṇ. Tattha “**vatthuvāsenā**”ti idaṇ “satta samathā dasa samathā hontī”ti imassa kāraṇavācanaṇ. “**Pariyāyenā**”ti idaṇ “dasa samathā satta samathā hontī”ti imassa kāraṇavācanaṇ. Catubbidhādhikaraṇasaṅkhātavattthuvāsenā ca desanākkamasāṅkhātāpariyāyavāsenā cāti attho.

Adhikaraṇāpariyāyavāravaṇṇanā niṭṭhitā.

### Sādhāraṇavārādivaṇṇanā

297. Sattame sādharāṇavāre **sādhāraṇā**ti vivādādhikaraṇassa vūpasamanakiccasādhāraṇā. Evaṇ sabbattha.

298. Aṭṭhame tabbhāgiyavāre **tabbhāgiyā**ti vivādādhikaraṇassa vūpasamanato tappakkhikā.

Sādhāraṇavārādivaṇṇanā niṭṭhitā.

### Samathāsamathassasādhāraṇavāravaṇṇanā

299. Navame samathāsamathasādhāraṇavāre “sabbe samathā ekatova adhikaraṇaṇ samenti udāhu nānā”ti puccantena “**samathā samathassa sādharāṇā, samathā samathassa asādharāṇā**”ti vuttaṇ. Vivādādi-adhikaraṇakkamena tabbūpasamahetubhūte samathe uddharanto “**yebhuyyasikā**”ti-ādimāha. Sammukhāvinayaṇ vinā kassaci samathassa asambhavā sesā chapī samathā sammukhāvinayassa sādharāṇā vuttā,

tesaṃ pana channaṃ aññamaññāpekkhābhāvato te aññamaññaṃ asādhāraṇā vuttā. Tabbhāgiyavārepi eseva nayo.

Samathāsamathassasādhāraṇāvāraṇṇanā niṭṭhitā.

### Samathasammukhāvinayavārādivaṇṇanā

301-3. Ekādasamavārepi **sammukhāvinayoti-ādi** pucchā. **Yebhuyya sikā sativinayoti-ādi** visajjanaṃ. Evaṃ vinayavāre kuslavāre tato paresupi pucchāvisajjanaparicchedo veditabbo.

Tattha **sammukhāvinayo siyā kusaloti-ādīsu** tasmim tasmim vinayakamme, vivādādimhi ca niyuttapuggalānaṃ samuppajjanakakusalādīnaṃ vasena sammukhāvinayādīnaṃ, vivādādīnaṃca kusalādibhāvo tena tena upacārena vutto. Yasmā panetassa sammukhāvinayo nāma saṃghasammukhatādayo honti, tesaṃca anavajjasabhāvattā akusale vijjamānepi akusalattūpacāro na yutto āpattādhikaraṇassa akusalattūpacāro viya, tasmā natthi sammukhāvinayo akusaloti attho.

304. Tato paresu **yattha yebhuyyasikā labbhati, tattha sammukhāvinayo labbhatī-ādi** sammukhāvinayassa itarehi samathehi niyamena saṃsaṭṭhataṃ, itaresaṃ pana channaṃ aññamaññaṃ saṃsaggābhāvaṃca dassetuṃ vuttam.

Samathasammukhāvinayavārādivaṇṇanā niṭṭhitā.

### Saṃsaṭṭhavārādivaṇṇanā

306. **Adhikaraṇanti vā samathāti vā ime dhammā saṃsaṭṭhāti-ādi** samathānaṃ adhikaraṇesu eva yathārahaṃ pavattim, adhikaraṇāni vinā tesaṃ visum aṭṭhānaṃca dassetuṃ vuttm. **Vinibbhujitvā nānākaraṇaṃ paññāpetunti** adhikaraṇato samathehi viyojetvā asaṃsaṭṭhe katvā nānākaraṇaṃ aññamaññaṃ asaṃsaṭṭhatāya ṭhitabhāvasaṅkhātānaṃ nānattaṃ paññāpetuṃ adhikaraṇavūpasamakkaṇe eva tesaṃ asaṃsaggam paññāpetuṃ kim sakkāti pucchati.

**Adhikaraṇanti**-ādi gārayhavādadassanaṃ<sup>1</sup>. **So mā hevanti** yo evaṃ vadati, so “mā evaṃ vadā”ti vacanīyo assa, na ca labbhati samathānaṃ aññatra adhikaraṇā vūpasamalakkhaṇanti pahānāvattthānasaṅkhātāṃ<sup>2</sup> nānā karaṇaṃ paṭikkhipati. Lakkhaṇato pana adhikaraṇehi samathānaṃ nānākaraṇaṃ atthevāti daṭṭhabbaṃ. **Samathā adhikaraṇehi sammantīti** apalokaṇādīhi catūhi kiccādhikaraṇehi sabbehi samathā niṭṭhānaṃ gacchanti, nāññehīti imamatthaṃ sandhāya vuttaṃ. Teneva vakkhati “sammukhāvinayo vivādādhikaraṇena na sammati. Anuvāda -pa- āpattādhikaraṇena na sammati, kiccādhikaraṇena sammatī”ti-ādi<sup>3</sup>.

307-313. **Vivādādhikaraṇaṃ katihi samathehi sammatīti**-ādiko sammātivāro. Tadanantaro sammatinasammativāro ca adhikaraṇehi samathānaṃ saṃsaṭṭhataṃ, viasaṃsaṭṭhatañca dassetuṃ vutto. **Samathā samathehi sammantīti**-ādiko samathādhikaraṇavāro samathānaṃ aññamaññaṃ, adhikaraṇehi ca adhikaraṇānañca aññamaññaṃ, samathehi ca vūpasamāvūpasamaṃ dassetuṃ vutto.

314. Samuṭṭhāpetivāro pana adhikaraṇehi adhikaraṇānaṃ uppattippakāradassanattamaṃ vutto. **Na katamaṃ adhikaraṇanti** attano sambhavamattena ekampi adhikaraṇaṃ na samuṭṭhāpetīti attho. Kathañcarahi samuṭṭhāpetīti āha “**api cā**”ti-ādi. Tatha **jāyantīti** anantameva anuppajjitvā paramparapaccayā jāyantīti adhippāyo. “**Dhammo adhammo**”ti-ādinā ubhinnaṃ puggalānaṃ vivādapaccayā aññamaññaṃ akhemabhaṅgā honti, tappaccayā tesāṃ pakkhaṃ pariyesanena kalahaṃ vaḍḍhantānaṃ vivādo kañci mahāparisaṃ saṃghapariṇāyakaṃ lajjim āgamma vūpasamaṃ gacchati. Tathā avūpasamante pana vivādo kamena vaḍḍhitvā sakalepi saṃghe vivādaṃ samuṭṭhāpeti, tato anudādīnīti evaṃ paramparakkamena vūpasamakāraṇābhāve cattāri adhikaraṇāni jāyanti. Taṃ sandhāyaha “**saṃgho vivadati vivādādhikaraṇaṃ**”ti. Saṃghassa vivadato yo vivādo, taṃ vivādādhikaraṇaṃ hotīti attho. Ese nayo sesesupi.

Saṃsaṭṭhavārādivaṇṇanā niṭṭhitā.

1. ...vāradassanaṃ. (Si) 2. Samānāvattthānasaṅkhātāṃ (Ka) 3. Vi 5. 201 piṭṭhe.

**Bhajatīvāraṇṇanā**

318. Tadanantaravāre pana **vivādādhikaraṇaṃ catunnaṃ** **adhikaraṇānanti-**ādi adhikaraṇānaṃ vuttanayena aññamaññapaccayattepi saṃsaggabhāvadassanattaṃ vuttaṃ. **Vivādādhikaraṇaṃ catunnaṃ** **adhikaraṇānaṃ vivādādhikaraṇaṃ bhajatīti-**ādīsu vivādādhikaraṇaṃ catūsu adhikaraṇesu vivādādhikaraṇabhāvameva bhajati, nāññādhikaraṇabhāvaṃ, catūsu adhikaraṇesu vivādādhikaraṇattameva nissitaṃ vivādādhikaraṇameva pariyāpannaṃ vivādādhikaraṇabhāveneva saṅgahitanti evamattho gahetabbo.

319. **Vivādādhikaraṇaṃ sattannaṃ samathānaṃ kati samathe bhajatīti-**ādi pana catunnaṃ adhikaraṇaṃ vūpasamane sati niyatasamathe dassetuṃ vuttaṃ. Tattha **kati samathe bhajatīti** attano upasamattāya kittake samathe upagacchati, kittake samathe āgama vūpasamaṃ gacchatīti attho. **Kati samathapariyāpannanti** attānaṃ vūpasametum katisu samathesu tehi samānavasena pavitṭhaṃ. **katihi samathehi saṅgahitanti** vūpasamaṃ karontehi katihi samathehi vūpasamakaraṇatthaṃ saṅgahitaṃ.

Bhajatīvāraṇṇanā niṭṭhitā.

# Khandhakapucchāvāra

## Pucchāvisajjanāvaṇṇanā

320. **Upasampadakkhandhakanti** pabbajjākhandhakam<sup>1</sup>. Saha niddesenāti **saniddesam**. “Sanniddesan”ti vā pāṭho, so evattho. **Nidānena ca niddesena ca saddhinti** ettha paññattiṭṭhānapuggalādippakāsakam nidānavacanam nidānam nāma, tannidānam paṭicca niddiṭṭhasikkhāpadāni niddeso nāma, tehi avayavabhūtehi sahitaṃ taṃsamudāyabhūtaṃ khandhakam pucchāmīti attho. **Uttamāni padānīti** āpattipaññāpakāni vacanāni adhippetāni. **Tesam -pa- kati āpattiyo hontīti** tehi vacanehi paññattā kati āpattikkhandhā hontīti attho. Nanu āpattiyo nāma puggalānaññeva hontī, na padānam, kasmā pana “samukkaṭṭhapadānam kati āpattiyo”ti sāmivasena niddeso katoti āha “**yena yena hi padenā**”ti-ādi. Pāḷiyam **uposathanti**-ādi uposathakkhandhakādīnaññeva<sup>2</sup> gahaṇam.

Pucchāvisajjanāvaṇṇanā niṭṭhitā.

---

1. Vi 3. 90 piṭṭhādīsu.

2. Vi 3. 139 piṭṭhe.

# Ekuttarikanaya

## Ekakavāraṇṇanā

321. Ekuttarikanaye pana **ajānantena vītikkantā**ti paṇṇattiṃ vā vatthum vā ajānantena vītikkantā pathavīkhaṇanasahaseyyādikā, sāpi pacchā āpannabhāvaṃñatvā paṭikammaṃ akarontassa antarāyikāva hoti.

**Pārivāsikādīhi pacchā āpannā**ti vattabhedesu dukkaṭāni sandhāya vuttam. Tasmim khaṇe āpajjitabba-antarāpattiyo sandhāyāti keci vadanti, tassa pubbāpattīnam antarāpattipadeneva vakkhamānattā purimameva yuttataram. **Mūlavisuddhiyā antarāpattī**ti mūlāyapaṭikassanādīni akātvā sabbapaṭhamam dinnaparivāsamānattavisuddhiyā caraṇakāle āpanna-antarāpattisaṅkhātasaṃghādiseso. **Agghavisuddhiyāti** antarāpattiṃ āpannassa mūlāya paṭikassivā odhānasamodhānavasena odhunitvā purimāpattiyā samodhāya tadagghavasena puna dinnaparivāsādisuddhiyā caraṇakāle puna āpannā antarāpatti.

**Sa-ussāhenevāti** punapi tam āpattiṃ āpajjitukāmatācittena, evam desitāpi āpatti na vuṭṭhātīti adhippāyo. Dhuranikkhepaṃ akatvā āpajjane sikhāpattadosam dassento āha “**aṭṭhame vatthusmiṃ bhikkhuniyā pārājikamevā**”ti. Na kevalaṅca bhikkhuniyā eva, bhikkhūnampi dhuranikkhepaṃ akatvā thokaṃ thokaṃ sappi-ādikaṃ theyyāya gaṇhantānam pādagghanake punṇe pārājikameva. Keci pana “aṭṭhame vatthusmiṃ bhikkhuniyā pārājikameva hotīti vuttattā aṭṭhavatthukamevetam sandhāya vuttan”ti vadanti.

**Dhammikassa paṭissavassāti** “idha vassam vasissāmi”ti-ādīnā gihīnam sammukhā katassa dhammikassa paṭissavassa, adhammikassa pana “asukam paharissāmi”ti-ādikassa paṭissavassa asaccāpanena āpatti natthi.

**Tathā coditoti** adhammena codito, sayam sacce, akuppe ca aṭṭhatvā paṭicchādentopi adhammacuditako eva. Pañcānantariyaniyatamicchādiṭṭhiyeva **micchattaniyatā** nāma. Cattāro maggā **sammattaniyatā** nāma.

Ekakavāraṇṇanā niṭṭhitā.

### Dukavāraṇṇanā

322. Dukesu sayameva sapuggaloti āha “**mudupiṭṭhikassā**”ti-ādi. **Ādi-**saddena aṅgajātaccheda-attaghātādi-āpattiyo saṅgahitā.

**Bhaṇḍāgārikacittakammāni** vāti gahaṭṭhānaṃ bhaṇḍapaṭisāmanāṃ, itthipurisādipaṭibhānacittakammāni vā. “**Cīvarādīni adento āpajjati**”ti idaṃ “upajjhāyena bhikkhave saddhivihāriko saṅgahetabbo anuggahetabbo -papatto dātabbo”ti-ādi<sup>1</sup>vacanato anādariyena āmisasaṅgahaṃ akarontassa dukkaṭaṃ, bhikkhuniyā pācittiyaṅca sandhāya vuttaṃ. Nissaṭṭhacīvarādīnaṃ adāna-āpattiyo ettheva saṅgahitā.

Pāliyaṃ **desentoti** sabhāgāpattiṃ, adesaṅgāmini-ādīṅca desento. Nidānuddese āpattiṃ anāvikaṅkanto, na desento ca āpajjati nāma. **Ovādaṃ aṅgahantoti** bhikkhūhi bhikkhuni-ovādatthāya vuttaṃ vacanaṃ aṅgahanto bālagilānagamiyavivajjito. Attano paribhogatthaṃ dinnāṃ aññassa dāne, saṅghāṭiṃ apārupitvā santaruttarena gāmapavesanādīsu ca āpattiyopi aparibhogena āpajjitabbāpattiyova. **Pamāṇanti** saṅghabhedānantariyanipphattiyā lakkhaṇāṃ. **Bālāssāti** nissayaggaṇavidhiṃ ajānantassa lajjibālasseva. **Lajjissāti** byattassa nissayadāyakaṣabhāgataṃ parivīmaṃsantassa. Vinaye āgatā atthā venayikāti āha “**dve atthā vinayasiddhā**”ti.

Pāliyaṃ **appatto nissāraṇanti** ettha pabbājanīyakammaṃ viharato nissāraṇatā nissāraṇanti adhippetāṃ, taṅca yasmā kuladūsakaṃ akaronto puggalo āpattibahulopi āveṇikalakkhaṇena appatto nāma hoti. Tasmā appatto nissāraṇāṃ. Yasmā pana āpattādibahulassāpi “ākāṅkhamāno saṅgho pabbājanīyakammaṃ kareyyā”ti<sup>2</sup> vuttaṃ, tasmā sunissārito, sabbathā pana suddho nirāpattiko dunnissāritoti daṭṭhabbo.

**Appatto osāraṇanti**-ādīsu upasampadākammaṃ ettha osāraṇāṃ adhippetāṃ, taṅca hatthacchinnādiko ekacco paṭikkhittatā appattopi sosārito, paṇḍakādiko dosāritoti attho.

Dukavāraṇṇanā niṭṭhitā.

1. Vi 3. 63 piṭṭhe.

2. Vi 4. 31 piṭṭhe.



### Tikavāraṇṇanā

323. Tikesu **lohituppādāpattinti** pārājikāpattim. **Āvusovādanāti** “āvuso”ti ālapanena. **Āpattinti** dukkaṭāpattim. **Sesā rattinīceva divā cāti** ettha aruṇuggamane āpajjitabbā paṭhamakathinādī<sup>1</sup> sabbā āpattiyopi rattindivānaṃ vemajjheyeva āpajjitabbattā tatiyakoṭṭhāsāññeva pavittihāti daṭṭhabbā. Atha vā uddhaste aruṇe āpajjitabbattā divā āpajjitabbesu eva pavittihāti daṭṭhabbā, atthaṅgate sūriye bhikkhuniyo ovādanāpattiyo, pana rattandhakāre purisena saddhim santiṭṭhanāpatti ca rattiyaññeva āpajjitabbā.

Purebhattham kulāni upasaṅkamana-anatirittabhojanādīni divā eva āpajjitabbāni. Keci pana “bhojanapaṭisaṃyuttāni sekhiyāni, gaṇabhojanādīni ca divā eva āpajjitabbāni”ti vadanti. Tasmā idisā āpattiyo muñcitvā sesāva tatiyakoṭṭhāsam bhajantīti veditabbam.

**Na unadasavassoti** dasavassassa bālasseva paññattasikkhāpadattā vuttam. Saddhivihārika-antevāsikesu asammāvattanāpattim, alajjīnam nissayadānādimpī dasavassova āpajjati, vuṭṭhāpinim dve vassāni ananubandhādimpī unadasavassā āpajjanti. **Abyākatacittoti** supantassa bhavaṅgacittam sandhāya vuttam.

**Appavārentoti** anādariyena appavārento kenaci paccayena appavāretvā kālapakkhacātuddase saṅghe pavārente tattha anādariyena appavārento tameva āpattim kāḷepi āpajjatīti juṅhe evāti niyamo na dissati, pacchimavassamvuttho pana pacchimakattikapuṇṇamiyameva pavāretum labbhatīti. Tattha appavāraṇāpaccayā āpattim āpajjamāno eva juṅhe āpajjatīti niyametabboti daṭṭhabbam. **Juṅhe kappatīti** etthāpi eseva nayo.

“**Apaccuddharitvā hemante āpajjati**”ti iminā “vassānam cātumāsam adhiṭṭhātun”ti niyamavacaneneva apaccuddharantassa dukkaṭanti dasseti. Vassānupagamana-akaraṇīyena pakkamādayopi vasse eva āpajjati. Vatthikammādimpī gilāno eva. Adhotapādehi akkamanādīnīpi anto eva

---

1. Vi 1. 294 piṭṭhe.

āpajjati. Bhikkhuniyā anāpucchā ārāmapavesanādi ca antosīmāyameva. Nissayaapaṭipannassa anāpucchā disāpakkamanādi ca bahisīmāyameva. Pātimokkhuddese santiyā āpattiyā anāvikaṇṇāpattisamanubhāsana-ūnavīsativassūpasampādanādisabba-adhammakammāpattiyopi saṅghe eva. Adhammena gaṇuposathādīsupi gaṇādimajjhe eva. Alajjissa santike nissayaggahaṇādipi puggalassa santike eva āpajjati.

**Tīṇi adhammikāni amūḷhavinayassa dānānī**ti yo ummattakopi vītikkamakāle, anummatto sañcicca āpattim āpajjitvā bhikkhūhi pacchā codito saramāno eva “na sarāmī”ti vadati, yo ca “supinaṃ viya sarāmī”ti vā musā vadati, yo ca ummattakakāle kataṃ sabbampi sabbesaṃ vaṭṭatīti vadati, imesaṃ tiṇṇaṃ dinnāni tīṇi amūḷhavinayassa dānāni adhammikāni.

**Apakatattoti** vinaye apakataññū. Tenāha “āpattānāpattim na jānātī”ti<sup>1</sup>. **“Diṭṭhiṅca anissajjantānaṃyeva kammaṃ kātabban”**ti idaṃ bhikkhūhi ovadiyamānassa diṭṭhiyā anissajjanapaccayā dukkaṭaṃ, pācittiyampi vā avassameva sambhavaṭīti vuttaṃ.

**Mukhālambarakaṇṇādhedoti** mukhabherivādanādippabhedo. **Upaghātetīti** vināseti. **Bījaniggāhādiketi** cittaṃ bījanim gāhetvā anumodanādikaraṇeti attho.

Tikavāraṇṇanā niṭṭhitā.

### Catukkavāraṇṇanā

324. Catukkesu soti gihparikkhāro. **Avāpuraṇaṃ dātunti** gabbhaṃ vivarivā anto parikkhāraṭṭhapanatthāya vivaraṇakuñcikaṃ dātum. Saṅghatthāya upanītaṃ sayameva anto paṭisāmitumpi vaṭṭati. Tenāha **“anto ṭhapāpetuṅca vaṭṭatī”**ti.

Ādikammikesu paṭhamam purisaliṅgam uppajjatīti āha **“paṭhamam uppannavasenā”**ti. Pāḷiyam **anāpatti vassacchedassātī** vassacchedasambandhiniyā

1. Vi 5. 232 piṭṭhe.

anāpattiyā evamattho. **Mantabhāsā**ti mantāya paññāya kathanam.

“**Navamabhikkhunito paṭṭhāyā**”ti idam “anujānāmi bhikkhave aṭṭhannaṃ bhikkhunīnaṃ yathāvuḍḍhaṃ avasesānaṃ yathākatikan”ti<sup>1</sup> vacanato ādito aṭṭhannaṃ bhikkhunīnaṃ paccuṭṭhātabbattā vuttaṃ.

“**Idha na kappantīti vadantopi paccantimesu āpajjati**”ti-ādinā sañcicca kappiyaṃ akappiyanti vā akappiyaṃ kappiyanti vā kathentassa sabbattha dukkaṭanti dasseti.

**Pubbakaraṇanti vuccatīti** aṭṭhakathāsu vuttaṃ, tāni idha parivāre uddhaṭānīti adhippāyo. Idhādhippetāni pana dassento “**chandapārisuddhī**”ti-ādimāha.

Catukkavāraṇṇanā niṭṭhitā.

### Pañcakavāraṇṇanā

325. Pañcakesu **āpucchitvā cārassa abhāvoti** piṇḍapātikassa “nimantito sabhatto”ti imassa aṅgassa abhāvā tena sikkhāpadena tassa sabbathā anāpattīti adhippāyo. **Susānaṃ netvā puna ānītakanti** susāne petakiccaṃ katvā nikkhantehi nhatvā chaḍḍitāni nivatthapārutavatthāni evaṃ vuccanti.

Pāliyaṃ **pañcahākārehīti** pañcahi avahāraṅgehi. Vatthuto pana garukalahukabhedena pārājikathullaccayadukkaṭāni vuttāni. Itthipurisasamyogādikaṃ kilesasamudācārahetukaṃ **paṭibhānacittakammaṃ** nāma. **Pañhāsahassam pucchīti** samathavipassanā kammaṭṭhānesu pañhāsahassam sammajjitvā ṭhitam daharam pucchi. Itaropi daharo attano gatamaggattā sabbam vissajjesi, tena thero pasīdi. **Vattam paricchindīti** vattam niṭṭhāpesi. **Kim tvam āvusoti**-ādikaṃ thero khīṇāsavo sammajjanānisamsam sabbesam pākaṭam kātum avocāti daṭṭhabbam.

1. Vi 4. 468 piṭṭhe.

“Jaṇṇukehi paṭiṭṭhāya padacetiyan”ti pāṭhaseso. **Codanaṃ kāressāmīti** bhagavatā attānaṃ codāpessāmi, attānaṃ niggaṇhāpessāmīti attho.

**Ettakaṃ gayhūpaganti** ettakaṃ adhikaraṇavūpasamatthāya gahetabbavacananti yathā sutvā viññātum sakkoti, evaṃ anuggaṇhantoti yojanā. Ettha ca “attano bhāsapariyantaṃ anuggahetvā parassa bhāsapariyantaṃ anuggahetvā”ti ekaṃ, “adhammena karotī”ti ekaṃ, “appaṭiññāyā”ti ekañca katvā purimehi dvīhi pañcaṅgāni veditabbāni. **Vatthunti** methunādivītikkamaṃ.

**Kathānusandhivinicchayānulomasandhivasena vatthum na jānātīti** codakena vā cuditakena vā vuttakathānusandhinā tesam vacanapaṭivacanānurūpena vadanto kathānusandhinā vatthum na jānāti nāma, tañca suttavibhaṅge vinītavatthu saṅkhātena vinicchayānulomeneva vadanto vinicchayānulomasandhivasena vatthum na jānāti nāma. **Ñattikammaṃ nāma hotīti** ñattikammaṃ niṭṭhitaṃ nāma hotīti na jānātīti sambandho. **Ñattiyā kammappatto**ti ñattiyā niṭṭhitāyapi kammappatto eva hoti. Anussāvanaṭṭhāne eva kammaṃ niṭṭhitaṃ hotīti ñattikammaṃ niṭṭhitaṃ nāma hoti, taṃ ñattiyā kāraṇaṃ na jānātīti attho.

Pāḷiyam **pañca visuddhiyoti** āpattito visuddhihetuttā, visuddhehi kattabbato ca pātimokkhuḍdesā vuttā.

Pañcakavāraṇṇanā niṭṭhitā.

### Chakkavārādivaṇṇanā

326. Chakkādīsu pāḷiyam **cha agāravāti** buddhadhammasaṅghasikkhāsu, appamāde, paṭisanthāre ca cha agāravā, tesu eva ca cha gāravā veditabbā. **“Chabbassa paramatā dhāretabban”**ti idaṃ vibhaṅge āgatassa paramassa dassanaṃ.

328. Pāḷiyam **āgatehi sattahīti** “pubbevassa hoti musā bhaṇissan”ti-ādinā **musāvādasikkhāpade**<sup>1</sup> āgatehi sattahi.

1. Vi 2. 3 piṭṭhe.

329. **Taṃ kutettha labbhāti** taṃ anathassa acaraṇaṃ ettha etasmim̐ puggale, lokasannivāse vā kuto kena kāraṇena sakkā laddhanti **āghātaṃ paṭivineti**.

330. **Sassato lokoti-ādinā vassenāti** “sassato loko, asassato loko. Antavā loko, anantavā loko. Taṃ jīvaṃ taṃ sarīranti vā, aññaṃ jīvaṃ aññaṃ sarīranti vā. Hoti tathāgato parammaraṇā, na hoti tathāgato parammaraṇā. Hoti ca na hoti ca tathāgato parammaraṇā, neva hoti na na hoti tathāgato parammaraṇā”<sup>1</sup> evaṃ āgatā dasa antaggāhikā diṭṭhiyo sandhāya vuttaṃ. **Micchādiṭṭhi-ādayoti** micchādiṭṭhimicchāsāṅkappādayo aṭṭhamicchāñāṇamicchāvimuttīhi saddhim̐ dasa micchattā. Tatha **micchāñāṇanti** micchādiṭṭhisampayutto moho. Avimuttasseva vimuttasaññitā **micchāvimutti** nāma.

**Viparītāti** sammādiṭṭhi-ādayo sammāñāṇasammāvimuttipariyosānā dasa. Tatha **sammāvimutti** arahattaphalaṃ, taṃsampayuttaṃ pana ñāṇaṃ vā pacca vekkhaṇaṇāṇaṃ vā **sammāñāṇanti** veditabbaṃ.

Ekuttarikanayo niṭṭhito.

### Uposathādipucchāvissajjanāvaṇṇanā

332. Uposathādipucchāsu **pavāraṇagāthāti** diṭṭhādīhi tīhi ṭhānehi pavāraṇāvācā eva. Evaṃ vuttānaṃ pana chandovicitilakkhaṇena vuttajātibhedā gāthā.

Chakkavārādivaṇṇanā niṭṭhitā.

Mahāvaggavaṇṇanāyayo niṭṭhito.

---

1. Ma 1. 212 piṭṭhe.

## Paññattivagga

### Paṭhamagāthāsangaṇika

#### Sattanagaresu paññattasikkhāpadavaṇṇanā

335. **Aḍḍhuḍḍhasatānī**ti paññāsādhikāni tīṇi satāni. Viggahapadena manussaviggahaṃ vuttaṃ.

**Atirekanti** paṭhamathinaṃ. **Kāḷakanti** suddhakāḷakaṃ. **Bhūtanti** bhūtārocaṇaṃ. **Bhikkhunīsu ca akkosoti** “yā pana bhikkhunī bhikkhuṃ akkoseyyā”<sup>1</sup>ti<sup>1</sup> vuttaṃ sikkhāpadaṃ.

**Dvepi ca bhedaṭi** dve saṅghabhedasikkhāpadāni. **Antaravāsakanāmena** aññātikāya bhikkhuniyā hatthato cīvarapaṭiggahaṇaṃ vuttaṃ. **Suttanti** suttaṃ viññāpetvā vāyāpanaṃ. **Vikāleti** vikālabhojanaṃ. **Cārittanti** purebhattaṃ pacchābhattaṃ cārittaṃ. **Nahānanti** orenaddhamāsanahānaṃ.

**Cīvaraṃ datvāṭi** samaggena saṅghena cīvaraṃ datvā khiyyanaṃ. **Giragganti** naccagītaṃ. **Cariyāṭi** antovassaṃ cārikacaraṇaṃ. **Tatthevāṭi** vassaṃvutthāya cārikaṃ apakkamitvā tattheva nivāsaṇaṃ paṭicca paññattasikkhāpadaṃ. **Chandadānenāṭi** pārivāsikena chandadānena.

**Pārājikāni cattārīṭi** bhikkhunīnaṃ asādhāraṇāni. **Soḷasāṭi-ādito** pañca sikkhāpadāni, kuladūsanañcāṭi cha, bhikkhunīnaṃ asādhāraṇāni dasa nissaggiyāni.

**Catuttiṃsāṭi** paṭhamakathina suddhakāḷakacīvarapaṭiggahaṇa rūpiya cīvaravāyāpanakoseyyamissaka eḷakalomadhovāpana dutiyapattavajjitāni bhikkhuvibhaṅge dvāvīsati, bhikkhunīnaṃ asādhāraṇāni dvādasa cāṭi catuttiṃsa. **Chapaññāsasatanti** vesāliyaḍīsu paññattāni dvattiṃsasikkhāpadāni ṭhapetvā sesā chapaññāsasataṃ.

**Dasa gārayhāti** vosāsa-appaṭisaṃviditasikkhāpadadvayañca ṭhapetvā sesāni dasa pāṭidesanīyāni. **Dvesattati sekhiyāni** surusurukāraḥasāmisenaṭṭhenapānī-yathālakapaṭiggahaṇasasitthakapattadhovanānīṭiṇi ṭhapetvā sesāni sekhiyāni.

**Seyyāti** anupasampanna saḥaseyyasikkhāpadaṃ. **Khaṇaneti** pathavīkhaṇanaṃ. **Gacchadevateti** bhūtagāmasikkhāpadaṃ vuttaṃ. **Sappānakamsiṅcanti** sappāṇodakasiṅcanaṃ. **Mahāvihāroti** mahallakavihāro.

**Aññanti** aññavādaḥkaṃ. **Dvāranti** yāva dvārakoṣā aggaḷaṭṭhapanāṃ. **Sahadhammoti** sahadhammikaṃ vuccamāno. **Payopānanti** surusurukāraḥasikkhāpadaṃ.

**Elakalomoti** elakalomadhovāpanāṃ. **Patto cāti** dutiyapatto. **Ovādoti** bhikkhunupassayaṃ upasaṅkamtivā ovādo. **Bhesajjanti** catumāsapaccayapavāraṇāsikkhāpadaṃ. **Āraññikoti** catutthapāṭidesanīyaṃ. **Ovādoti** ovādāya vā saṃvāsāya vā agamaṃ.

337. “Ye ca yāvatatiyakā”ti pañhassa “ime kho yāvatatiyakā”ti vissajjanaṃ vatvā tadanantaraṃ “sādhāraṇaṃ asādhāraṇaṃ”ti-ādipaṇhānaṃ vissajjane vattabbe yasmā taṃ avatvā “katichedanakānī”ti-ādike aṭṭha pañhe antarā vissajjetvā tesāṃ anantarā “vīsaṃ dve satāni bhikkhunaṃ -pa-chacattārīsā bhikkhūnaṃ, bhikkhūnihi asādhāraṇā”ti-ādinā ukkameneva sādhāraṇādipaṇhā vissajjitā, tasmā taṃ ukkamavissajjanakāraṇaṃ dassetuṃ “yasmā pana ye ca yāvatatiyakāti yaṃ pañho”ti-ādimāha.

338. **Dhovanañca paṭiggahoti**-ādigāthā aṭṭhakathācariyaṇaṃ gāthāva. **Chabbassāni nisīdananti** dve sikkhāpadāni. **Dve lomāti** tiyojanātikkamadhovāpanavasena dve elakalomasikkhāpadāni. **Vassikā āraññakena cāti** vassikasāṭikā pariyesana-araññakesu senāsanesu vihaṇasikkhāpadena saha.

**Pañṭanti** pañṭabhojanaviññāpanāṃ. **Ūnanti** ūnavīsativassūpasampādanaṃ. **Mātugāmena saddhinti** saṃvidhāya gamanaṃ vuttaṃ. **Yā sikkhāti** yaṃ sikkhāpadaṃ.

**Nisīdane ca yā sikkhā**ti pamāṇātikantaniśīdanakārāpane yaṃ sikkhāpadam.  
Tathā **vassikā yā ca sāṭikā**ti etthāpi.

Pāḷiyam **sataṃ sattati chacevime honti ubhinnaṃ asādhāraṇā**ti  
bhikkhūnaṃ bhikkhunīhi asādhāraṇā chacattārīsa, bhikkhunīnaṃ bhikkhūhi  
asādhāraṇā timsādhikam satañcāti<sup>1</sup> evaṃ ubhinnaṃ asādhāraṇā ca  
chasattati-adhikam sataṃ sikkhāpadānīti attho. **Sataṃ sattati cattārī**ti  
ubhinnaṃ sādharmaṣikkhānaṃ gaṇanā catusattati-adhikam sataṃ  
sikkhāpadānīti attho.

**Vibhattiyoti** āpattikkhandhā ceva uposathapavāraṇādayo ca adhippetā.  
Te hi pārājikādibhedena, bhikkhu-uposathādibhedena ca vibhajiyanti.  
Tenāha “vibhattiyo”ti-ādi. **Tesanti** aṭṭhannaṃ pārājikādīnaṃ. **Dvīhī**ti-ādi  
vivādādhikaraṇādīnaṃ samathe hi vūpasamadassanaṃ.

Sattanagaresu paññattasikkhāpadavaṇṇanā niṭṭhitā.

### Pārājikādi-āpattivaṇṇanā

339. **Idanti** “pārājikanti yaṃ vuttan”ti-ādinā vuttaṃ vacanaṃ sandhāya  
vadati. Idañhi heṭṭhā “garuka lahukan”ti-ādinā uddhaṭapañhesu anāgatampi  
“sabbānipetāni viyākarohi, handa vākyam suṇoma te”ti ettha yathāvuttāni  
aññānīpi “sabbānipetāni viyākarohi, handa vākyam suṇomā”ti evaṃ  
gahitamevāti dassento “**iminā pana āyācanavacanena saṅgahitassā**”ti-ādi  
vuttaṃ.

**Ativassatī**ti ovassati, vassodakam pavisatīti attho. **Dhammānanti** yathā  
catupaccaye dhārayatīti dhammo, tesam. Tenāha “**saṅkhatadhammānan**”ti.  
**Gāthāsaṅgaṇikanti** gāthāsaṅgaho, te te atthā gāthāhi saṅgahetvā gaṇiyanti  
kathiyanti etthāti hi gāthāsaṅgaṇikam.

Pārājikādi-āpattivaṇṇanā niṭṭhitā.

Paṭhamagāthāsaṅgaṇikavaṇṇanānayo niṭṭhito.

---

1. Chasatañcāti (Sī, Ka)



## Adhikaraṇabheda

### Ukkoṭanabhedādikathāvaṇṇanā

341. “**Alaṃ āvuso**”ti attapaccatthike saññāpetvāti pattacīvarādi-atthāya alaṃ bhaṇḍanādikaraṇanti vivādādīsu dosadassanamattena saññāpetvā aññamaññaṃ khamāpetvā vūpasamenti, na pana aññamaññaṃ āpattānāpattidassanavasenāti adhippāyo. Tenāha “**pālimuttakavinicchayevā**”ti.

Visamāni kāyakammādīni nissito bhikkhu **visamanissito** nāma, micchādīṭṭhinissito **gahananissito**, balavante purise nissito **balavanissito** nāmāti dassento “**eko visamāni**”ti-ādimāha.

Ukkoṭanabhedādikathāvaṇṇanā niṭṭhitā.

### Adhikaraṇanidānādivaṇṇanā

342. **Āpattiṃ nissāya uppajjanaka-āpattivasenāti** paresaṃ, attano ca āpattiṃ paṭicchādentānaṃ vajjapaṭicchādīnaṃ pārājikādi-āpattimeva sandhāya vuttaṃ, na sabbāpattiyo. **Kiccaṃ nissāya uppajjanakakiccānanti** ukkhepanīyādikammaṃ nissāya uppajjanakānaṃ tadanuvattikāya bhikkhuniyā yāvattiyānussāvanānaṃ kiccānaṃ vasena, na sabbesaṃ kiccānaṃ vasenāti.

344. Pāliyaṃ “**katihi adhikaraṇehī**”ti pucchāya “**ekena adhikaraṇena kiccādhikaraṇenā**”ti vuttaṃ. “**Katisu ṭhānesū**”ti pucchāya “**ūsuṭhānesu saṃghamajjhe, gaṇamajjhe, puggalassa santike**”ti vuttaṃ. “**Katihi samathehī**”ti pucchāya “**tīhi samathehī**”ti vuttaṃ. Tīhipi etehi eko vūpasamanappakārova pucchito, vissajjito cāti veditabbo.

348. **Vivādādhikaraṇaṃ hoti anuvādādhikaraṇanti-ādīsu** vivādādhikaraṇameva anuvādādhikaraṇādīpi hotīti pucchāya vivādādhikaraṇaṃ vivādādhikaraṇameva hoti, anuvādādayo na hotīti vissajjanaṃ.

Adhikaraṇanidānādivaṇṇanā niṭṭhitā.

**Sattasamathanānāthādivaṇṇanā**

354. Adhikaraṇapucchāvissajjane pāḷiyam **vipaccayatāya vohāroti** virūpavipākāya aññamaññaṃ dukkhāppādanāya kāyavacīvohāro. **Medhaganti**<sup>1</sup> vuddhippatto<sup>2</sup> kalaho.

**Anusampavaṅkatā**ti vipatticodanāya anu anu saṃyujjanavasena ninnatā.

**Abbhussahanatā**ti ativiya sañjātussāhatā. **Anubalappadānanti** codakānampi upatthambhakarāṇam. **Kammasaṅgahābhāvenā**ti saṅghasammukhatādimattassa sammukhāvinayassa saṅghādīhi kattabbakiccesu saṅgahābhāvā.

Sattasamathanānāthādivaṇṇanā niṭṭhitā.

Adhikaraṇabhedavaṇṇanānayo niṭṭhito.

---

1. Medhakanti (Ka)

2. Vaḍḍhappatto (Sī)

# Dutiyagāthāsāṅgaṇika

## Codanādipucchāvissajjanāvaṇṇanā

359. Dutiyagāthāsāṅgaṇikāya “codanā kimatthāyā”ti-ādikā pucchā upālittherena katā. “Codanā sāraṇatthāyā”ti-ādivissajjanaṃ bhagavatā vuttaṃ. Upālitthero sayameva pucchitvā vissajjanaṃ akāsītipi vadanti.

**Mantaggahaṇanti** tesaṃ vicāraṇāgahaṇaṃ, suttantikattherānaṃ, vinayadharattherānaṃca adhippāyagahaṇanti attho. **Pāṭekkaṃ vinicchayasanniṭṭhāpanatthanti** tesaṃ paccekaṃ adhippāyaṃ ñatvā tehi samuṭṭhāpitanayampi gahetvā vinicchayapariyosāpanatthanti adhippāyo.

“**Mā kho turito abhaṇī**”ti-ādinā abhimukhe ṭhitāṃ kañci anuvijjakaṃ ovadantena viya therena anuvijjakavatta kathitaṃ.

**Anuyuñjanavattanti** anuyujjanakkamaṃ, taṃ pana yasmā sabbasikkhāpadavītikkamavisayepi taṃtaṃsikkhāpadānulomena kattabbaṃ, tasmā “sikkhāpadānulomikaṃ”ti vuttaṃ. **Attano gatirṃ nāsetīti** attano sugatigamaṃ vināseti.

Anusandhitasaddo bhāvasādhanoti āha “**anusandhitanti kathānusandhī**”ti. **Vattānusandhitenā**ti etthāpi eseva nayo. **Vattānusandhitenā**ti ācārānusandhinā, ācārena saddhim samentiyā paṭiññāyāti attho. Tenāha “**yā assa vattenā**”ti-ādi.

Pāḷiyaṃ **sañcicca āpattinti**-ādi alajjilajjilakkhaṇaṃ bhikkhubhikkhunīnaṃ vasena vuttaṃ tesaññeva sabbappakārato sikkhāpadādhiḱārattā. Sāmaṇerādīnampi sādharmaṇavasena pana sañcicca yathāsakaṃ sikkhāpadavītikkamaṇādikaṃ alajjilajjilakkhaṇaṃ veditabbaṃ.

**Kathānusandhivacanaṃ**ti cuditaka-anuvijjakānaṃ kathāya anusandhiyuttaṃ vacanaṃ na jānāti, tehi ekasmiṃ kāraṇe vutte sayāṃ taṃ asallakkhetvā attano abhirucitameva asambandhitatthanti attho. **Vinicchālānusandhivacanañcā**ti anuvijjakena katassa āpattānāpattivinicchayassa anugaṇaṃ, sambandhavacanaṃca.

Codanādipucchāvissajjanāvaṇṇanā niṭṭhitā.

# Codanākaṇḍa

## Anuvijjakakiccavaṇṇanā

360. Pāḷiyam **yaṃ kho tvanti-**ādīsu tvaṃ āvuso yaṃ imaṃ bhikkhum codesi, taṃ kimhi dose codesi, katarāya vipattiyā codesīti attho. Evaṃ sabbattha.

361. **Asuddhapaṇisaṅkito**ti asuddhāya aṭṭhāne uppannāya paṇisaṅkāya paṇisaṅkito. Tenāha “**amūlakapaṇisaṅkito**”ti.

364. Pāḷiyam **uposatho sāmaggatthāyā**ti visuddhānaṃ bhikkhūnaṃ aññaññanirapekkho ahutvā uposatho uposathaṭṭhānaṃ sannipatitvā “pārisuddhiṃ āyasmanto ārocetha, paṇisuddhetthāyasmanto, paṇisuddho ahaṃ āvuso”ti-ādinā aññaññaṇṇaṃ paṇisuddhivīmaṇṇasaṇārocanavasena ayutte vivajjetvā yutteheva kāyacittasāmaggikaraṇatthāya.

**Visuddhāya pavāraṇā**ti diṭṭhasutādīhi aññaññaṇṇaṃ kathāpetvā visuddhisampādanatthāyāti attho. **Ubho eteti** āmisapuggalanissayane ete ubho.

Anuvijjakakiccavaṇṇanā niṭṭhitā.

## Cūlasaṅgāma

### Anuvijjakassa paṭipattivaṇṇanā.

365. **Tatra hīti** tasmim sannipāte. **Attapaccatthikāti** lajjipesalassa codakapāpagarahīpuggalassa anattakāmā verīpuggalā. **Sāsanapaccatthikāti** attano anācārānugūṇaṃ buddhavacanaṃ pakāseṇo taṇhāgatikā, diṭṭhigatikā ca. **Ajjhogāhetvāti** alajji-abhibhavanavasena saṃghamaṃjham pavisitvā. **So saṅgāmāvacaroti** so codako saṅgāmāvacaro nāma. **Diṭṭhasutamutampi rājakathādikanti** diṭṭhasutavaseneva rājacorādikathaṃ, mutavasenapi annādikathaṃca akathentenāti yojetabbaṃ. **Kappiyākappiyanissitā vāti**-ādīsu rūpārūpapaṭicchedapadena sakala-abhidhammatthapaṭakattaṃ dasseti. **Samathācārādīhi paṭisamyuttanti** sakalasuttantapaṭakattaṃ. Tatha **samathācāro** nāma samathabhāvanākkamo. Tathā **vipassanācāro**. **Ṭhānanisajjavattādinissitāti** saṃghamaṃjhadīsu garucittikāraṃ paccupaṭṭhapetvā ṭhānādikkamanissitā ceva cuddasamahāvattādivattanissitā ca, **ādi**-saddena appicchatādinissitā cāti attho. **Pañhe uppanneti** kenaci uppanne pañhe pucchite. Idaṃca upalakkhaṇamattaṃ, yaṃ kiñci upaṭṭhitam dhammaṃ bhāsassūti adhippāyo.

**Kulapadeso** nāma khattiyādiṃjātiyampi kāsikarājakulādikulaviseso. Etamevāha “**kulapadeso khattiyakulādivaseneva veditabbo**”ti. **Sannipātamaṇḍaleti** attano anuvijjamānappakāraṃ saṃghassa ñāpanatthaṃ uṭṭhāya saṃghasannipātamaṃjhe ito cito ca paresaṃ mukhaṃ oloketena na caritabbaṃ. Yathānisinneneva dhammavinayānugūṇaṃ vinicchayaṃ yathā sabbe suṇanti, tathā vattabbanti attho.

Pāḷiyaṃ **acaṇḍikatenāti** akatacaṇḍabhāvena, aphaṛusenāti attho. “**Hitānukampinā**”ti etena mettāpubbabbhāgo vutto. “**Kāruṇikena bhavitabban**”ti iminā appanāppattakaruṇā vuttā. “**Hitaparisakkinā**”ti iminākaruṇāpubbabbhāgo. Tenāha “**karuṇā ca karuṇāpubbabbhāgo ca upaṭṭhāpetabboti ayaṃ padadvayepi adhippāyo**”ti. Lijjiyāti lajjinī.

**Anuyogavattaṃ kathāpetvāti** “kālena vakkhāmī”ti-ādinā<sup>1</sup> vuttavattaṃ. Anuyuñjanācārakkameneva anuyuñjanaṃ **anuyogavattaṃ** nāma, taṃ kathāpetvā teneva kamena anuyuñjāpetvāti attho. **Ujumaddavenāti** ettha ajjhāharitabbapadaṃ dasseti “**upacaritabbo**”ti. “Dhammesu ca puggalesu cā”ti idaṃ “majjhattena bhavitabban”ti pakatena sambandhitabbanti āha “**dhammesu ca puggalesu ca -pa- majjhattoti veditabbo**”ti. Yañhi yattha katthaci kattabbaṃ, taṃ tattha atikkamanto majjhatto nāma na hoti, dhammesu ca gāraṃ kattabbo. Puggalesu pana mettābhāvena<sup>2</sup> pakkhapātagāraṃ. Tasmā imaṃ vidhiṃ anatikkantova tesu majjhattoti veditabbo.

366. **Sāmsandanatthanti** āpatti vā anāpatti vāti sāmsaye jāte sāmsanditvā nicchayakaraṇatthaṃ vuttanti adhippāyo. **Atthadassanāyāti** sādhetabbassa āpattādi-upameyyatthassa codakacuditake attano paṭiññāya eva sarūpavibhāvanatthaṃ. **Attho jānāpanatthāyāti** evaṃ vibhāvito attho codakacuditakasamghānaṃ nāpanatthāya nijjhāpanatthāya, sampaṭicchāpanatthāyāti attho. **Puggalassa ṭhapanatthāyāti** codakacuditake attano paṭiññāya eva āpattiyāṃ, anāpattiyāṃ vā paṭiṭṭhāpanatthāya. **Sāraṇatthāyāti** pamuṭṭhasarāpanatthāya. **Savacanīyakaraṇatthāyāti** dose sārītepi sampaṭicchitvā paṭikammaṃ akarontassa savacanīyakaraṇatthāya. “**Na te apasādetabbā**”ti idaṃ adhippetatthadassanaṃ. Tattha avisamvādakatthāne ṭhitā eva na apasādetabbā, na itareti daṭṭhabbaṃ.

**Appaccayaparinibbānatthāyāti** āyatim paṭisandhiyā akāraṇabhūtaparinibbānatthāya. Parinibbānañhi nāma khīṇāsavānaṃ sabbapacchimā cuticittakammajarūpasaṅkhātā khandhā, te ca sabbākārato samucchinnānusayatāya punabbhavāya nantarādipaccayā na honti aññehi ca taṇhādipaccayehi virahitattā. Tasmā “appaccayaparinibbānaṃ”ti vuccati. **Tanti** vimuttiññānadassanaṃ. Tenevāha “**tasmin**”ti. **Vinayamantaṇāti** vinayavinicchayo. **Sotāvadhānanti** sotassa odhanaṃ, savananti attho. Tenāha “**yam uppajjati nāṇaṃ**”ti. Yathāvuttāya vinayasamvarādikāraṇaparamparāya vimuttiyā eva padhānattā sā puna cittaṃ vimokkhoti uddhaṭoti āha “**arahattaphalasaṅkhāto vimokkho**”ti. Atha vā **yo** yaṃ kiñci dhammaṃ

1. Vi 5. 283 piṭṭhe.

2. Mettābhāvane (Ka)

**anupādiyitvā** parinibbānavasena **cittassa** cittasantatiyā,  
 tappaṭibaddhakammajarūpasantatiyā ca **vimokkho** vimuccanaṃ  
 apunappavattivasena vigamo, **etadatthāya** etassa vigamassatthāya<sup>1</sup> evāti  
 evaṃ nigamanavasena pettha attho veditabbo.

367. Anuyogavattagāthāsu **kusalena buddhimatāti** sammāsambuddhena.  
**Katanti nibbattitaṃ**, pakāsitaṃ attho. **Tenevāti**-ādīsu teneva katākatassa  
 ajānaneva pubbāparaṃ ajānassa, aññassapi bhikkhuno yaṃ katākataṃ  
 hoti, tampi na jānātīti attho. **Attano sadisāyāti** yathāvuttehi dosehi yuttatāya  
 attanā sadisāya.

Anuvijjakassa paṭipattivaṇṇanā niṭṭhitā.

---

1. Etassādhigamatthāya (?)

# Mahāsaṅgāma

## Voharantena jānitabbādivaṇṇanā

368-374. Mahāsaṅgāme pāliyaṃ **saṅgāmāvacarenā**ti anuvijjakam sandhāya vuttam. **Vatthū**ti methunādivitikkamo. **Nidānanti** vesālī-ādipaññattiṭṭhānam. **Puggalo akārako jānitabboti** ettha saṅghe vā gaṇe vā pariṇāyakabhūto puggaloti daṭṭhabbam.

375. **Vissaṭṭhisikkhāpadanti** nīlādidasannaṃ sukkānaṃ mocanasena vuttam sukkavissaṭṭhisikkhāpadam. Tañhi telādimandavaṇṇanam nīlādīpacuravaṇṇānam vasena “**vaṇṇāvaṇṇā**”ti vuttam. Pacuratthe hi idha avaṇṇoti **a-kāro**.

379. **Yāva akaniṭṭhabrahmāno dvidhā hontī**ti ettha avihādisuddhāvāsikā aññabhūmīsu ariyā dhammavādīpakkham eva bhajanti, itare duvidhampīti daṭṭhabbam.

Voharantena jānitabbādivaṇṇanā niṭṭhitā.



# Kathinabheda

## Kathina-atthatādivaṇṇā

404. Kathine **anāgatavasenā**ti udakāharaṇādipayoge uppanne pacchā dhovanādipubbakaraṇassa uppattito tappayogassa anāgatavaseneva anantarapaccayo. Paccayattañcassa kāriyabhūtaṣṣa yasmā nipphādetabbatam nissāya paccayā pavattā, na vinā tena, tasmā tena pariyāyena vuttam, na sabhāvato sabbattha. Tenāha “**payogassa hī**”ti-ādi. Tattha payogassa sattavidhampi pubbakaraṇam paccayo hotīti sambandho. Kāraṇamāha “**yasmā**”ti-ādi. **Pubbakaraṇassatthāyā**ti pubbakaraṇassa nipphādanatthāya. **Purejātapaccayeti** purejātapaccayassa visaye. **Esā**ti payogo. Dhovanādiddhammesu ekampi attano purejātapaccayabhūtam dhammam na labhati, attano uppattito purejātaṣṣa pubbakaraṇassa abhāvāti attho. **Labhatī**ti pacchājātapaccayam pubbakaraṇam labhati, pacchājātapaccayo hotīti attho.

Pāḷiyam **pannarasa dhammā sahajātapaccayena paccayoti** ettha pubbakaraṇassāti vā payogassāti vā aññassa kassaci paccayuppannassa aparāmaṭṭhattā pannarasa dhammā sayam aññamaññasahajātapaccayena paccayoti evamattho gahetabbo, tehi saha uppajjanakassa aññassa abhāvā. Evam upari sabbattha. Tenāha “**sahajātapaccayam panā**”ti-ādi. **Mātikā ca palibodhā cāti** ettha **ca**-saddena pañcānisamsāni gahitānīti daṭṭhabbam. **Evam mātikānañca palibodhānañcāti** etthāpi. Tehipi attho anantameva mātikādīhi saha jāyanti. Teneva “pannarasa dhammā sahajātapaccayena paccayo”ti vuttā. **Āsāti** cīvarāsā. **Vatthū**ti āsāya nimittabhūtam anuppannacīvaram. “Dassāma karissāmā”ti hi dāyakehi paṭiññātacīvaram nissāya anantaram uppajjamānā cīvarāsā anantarapaccayādibhāvena vuttā. **Āsānañca anāsānañcāti** labbhamānakacīvare uppajjanakacīvarāsānañceva alabbhamāne cīvare uppajjanaka-anāsānañca, āsānam, tabbigamānañcāti attho. Khaṇe khaṇe uppattibhedam sandhāya “**āsānan**”ti bahuvacanam katam,

āsāya, anāsāya cāti attho. Tenāha “**āsā ca anāsā cā**”ti.

Kathina-atthatādivaṇṇanā niṭṭhitā.

---

### Pubbakaraṇanidānā divibhāgavaṇṇanā

406-7. **Cha cīvarānī**ti khomādīsu chasu aññataram sandhāya vuttam. Sabbasaṅgāhikavasena pana “**cīvarānī**”ti bahuvacanam kataṃ. Pāḷiyam panettha **vatthu, āsā ca anāsā cāti**-ādīsu atthate kathine ānisaṃsavasena uppajjanakapaccāsācīvaram “vatthū”ti vuttam. Kathinacīvaram hetupaccaya-saddehi vuttanti veditabban.

408. **Paccuddhāro tīhi dhammehī**ti-ādi kathinatthārathāya ticīvarato aññam vassikasāṭīkādim paccuddharitum, adhiṭṭhahitvā attharituṅca na vaṭṭatīti dassanattham vuttam. “**Vacībhedenā**”ti etena kevalam kāyena kathinatthāro na ruhatīti dasseti.

Pubbakaraṇanidānādivibhāgavaṇṇanā niṭṭhitā.

---

### Kathinādi jānitabbavibhāgavaṇṇanā.

412. **Yesu rūpādidhammesū**ti “purimavassamvutthā bhikkhū, pañcahi anūno saṅgho, cīvaramāso, dhammena samena samuppannam cīvaran”ti evamādīsu yesu rūpārūpadhammesu. **Satī**ti santesu. **Missībhāvoti** saṃsaggatā samūhapaññattimattam. Tenāha “**na paramatthato eko dhammo atthī**”ti.

416. **Ekato uppajjantī**ti kathinuddhārena saha uppajjamānārahā hontīti attho. Kathinatthārato hi pabhuti sabbe kathinaddhārā taṃ taṃ kāraṇantaramāgamma uppajjanti, tasmā sabbe **ekuppādā** nāma jātā. Tesu antarubbhārasahubbhārā dve eva taṃ vihāram anattatakathinavihārasadisam karontā sayam sakalena kathinatthārena saha nirujjhanti uddhārabhāvam

pāpuṇanti. Avasesā pana taṃ taṃ pāḷipuggalikameva kathinatthāraṃ dvinnāṃ palibodhānaṃ upacchindanavasena niromentā sayāṃ uddhārabhāvaṃ pāpuṇanti, na sakalaṃ kathinatthāraṃ. Kathinuddhārānañca **nirodho** nāma taṃ taṃ kāraṇamāgamma uddhārabhāvappatti, evañca uppatti nāma kathinuddhāro eva. Tenāha “**sabbepi atthārena saddhim ekato uppajjantī**”ti-ādi. Tattha **purimā dveti** “ekuppādā ekanirodhā”ti pāḷiyāṃ paṭhamāṃ vuttā antarubbhārasahubbhārā dve. **Tesūti** pakkamanantikādīsu. **Uddhārabhāvaṃ pattesūti** uddhārabhāvappattisaṅkhātānirodham pattesūti attho. **Atthāro tiṭṭhatīti** katacīvaram ādāya pakkantādipuggalaṃ ṭhapetvā tadavasesānaṃ palibodhasabbhāvato kathinatthāro tiṭṭhati.

Kathinādijānitabbavibhāgavaṇṇanā niṭṭhitā.

Paññattivaggavaṇṇanāyā niṭṭhito.

# Saṅgahavagga

## Upāḷipañcaka

### Nappaṭippassambhanavaggaṇṇanā

421. **Samaggehi karaṇīyānī**ti vivādādhikaraṇehi pubbe asamaggā hutvā pacchā sāmaggim upagatehi kattabbāni. Kim pana asaṇṇatamissaparisāya<sup>1</sup> saddhim lajjino sāmaggim karontīti āha “**uposathapavāraṇādīsu hī**”ti-ādi. Tattha **ṭhitāsūti** uposathapavāraṇāsu appavattīsu<sup>2</sup>. **Upatthambho na dātabboti** uparūpari appavattanathāya mayampi uposatham na karissāmāti-ādinā kalahassa upatthambho na dātabbo, dhammena vinayena sāmaggim katvā samaggeheva asaṇṇatā bhikkhū vinetabbāti adhippāyo. Tenāha “**sace saṅgho accayaṃ desāpetvā**”ti-ādi. **Bhikkhuno nakkhamatīti** kesuci puggalesu appamattakadosadassanena na ruccati. **Diṭṭhāvikkammampi katvāti** “na metaṃ khamatī”ti sabhāgassa bhikkhuno attano diṭṭhim āvikatvā. **Upetabbāti** sāsanaḥāniyā abhāvā sāmaggim akopetvā kāyasāmaggī dātabbā, īdise ṭhāne alajjiparibhogo āpattikaro na hoti, vaṭṭatiyeva. Ye pana sāsanaḥāniyā paṭipannā, tehi saha na vattati, āpatti eva hoti sāsanaḥāniyā ca. Tenāha “**yatra pana uddhamman**”ti-ādi. “**Diṭṭhāvikkammaṃ na vaṭṭatī**”ti iminā diṭṭhiyā āvikatāyapi āpattim dasseti.

422. **Kaṇhavācoti** rāgadosādīhi kiliṭṭhavacano. Anattakavacanassa dīpanaṃ pakāsaṇaṃ assāti **anattakadīpano**. **Mānaṃ nissā yāti** vinicchayakaraṇaṃ tava bhāroti saṅghena bhāre akatepi “ahamevettha voharituṃ araharūpo”ti mānaṃ nissāya. **Yathādiṭṭhiyāti** anurūpaladdhiyā. Yassa hi atthassa yādisī diṭṭhi anurūpā, taṃ gahetvā nabyākatāti attho. **Assa attanoti** adhammādi-attham sandhāya vadati, na puggalaṃ, assa adhammādi-atthasaṅkhātassa attano sarūpassa yā anurūpā

1. Aṇṇathāpissā parisāya (Sī)

2. Sampavattīsu (Sī, Ka)

diṭṭhīti attho. **Laddhim nikkhipitvā** anurūpaladdhim chaḍḍetvā, aggahetvāti attho. Tenāha “**adhammādīsu dhammādīladdhiko hutvā**”ti. Atha vā attano laddhim nigūhitvā puggalānugunaṃ tathā byākaronto na yathādiṭṭhiyā byākatā nāma. Imasmim pakkhe **adhammādīsu dhammādīladdhiko hutvā**ti ettha adhammādīsu dhammādīladdhiko viya hutvāti attho gahetabbo.

Nappaṭippassambhanavaggavaṇṇanā niṭṭhitā.

### Vohāravaggādivaṇṇanā

424. **Kammañattī**ti kammabhūtā ñatti. Anussāvananirapekkhā ñattikammabhūtā ñattīti attho. **Kammapādañatti** nāma ñattidutiyakammādīsu anussāvanakammassa pādabhūtā adhiṭṭhānabhūtā ñatti. **Navasu ṭhānesūti** osāraṇādīsu navasu ṭhānesu. **Dvīsu ṭhānesūti** ñattidutiyāñatticatutthakammesu.

**Suttānulomanti** ubhatovibhaṅge suttānulomabhūte mahāpadese sandhāya vuttam. **Vinayānulomanti** khandhakaparivārānulomabhūte mahāpadese. **Suttantike cattāro mahāpadeseti** suttābhidhammapiṭakesu anuññātaṭṭhānāsuttānulomavasena nayato gahetabbe cattāro atthe.

425. **Diṭṭhīnaṃ āvikammānīti** āpattiladdhīnaṃ pakāsanāni, āpattidesanākammānīti attho.

**Yathā catūhi pañcahi diṭṭhi āvikatā hotīti** yathā āvikate catūhi pañcahi ekībhūtehi ekassa puggalassa santike āpatti desitā nāma hoti, evaṃ desetīti attho. Evaṃ desento ca attanā saddhim tayo vā cattāro vā bhikkhū gahetvā ekassa santike deseti. Evaṃ desetum na vaṭṭati. Desitā ca āpatti na vuṭṭhāti, desanāpaccayā dukkaṭaṅca hoti. Dvinnam tiṇṇam pana ekato desetum vaṭṭati.

444. **Adassanenāti** imassa akappiyaṃ parivajjentānaṃ vinayadharānaṃ paṭipattiyā adassanena, tesam diṭṭhānugatiṃ anāpajjanenātipi attho gahetabbo. **Akappiye kappiyasaññitāyāti** rajatādi-akappiye

tipu-ādisaññitāya. **Pucchitvā<sup>1</sup> vā aññesaṃ vā vuccamānaṃ asuṇanto āpajjati** ettha pucchitvā<sup>1</sup> asuṇanto vā pucchiyamānaṃ asuṇanto vāti paccekaṃ yojetabbaṃ. **Ekarattātikkaṃ mādivasenāti** adhiṭṭhitacīvarena vippavasitvā ekarattātikkaṃena pācittiyam āpajjati. **Ādisaddena charattātikkaṃ mādivaṇaṃ saṅgaho.**

450. **Anatthaṃ kalisāsananti** anathhāvahaṃ kodhavacanaṃ āropento dosaṃ āropento upaddavāya parisakkatīti attho.

454. **Vohāraniruttiyanti** tassa tassa atthassa vācakasadde pabhedagatañāṇappatto na hotīti attho.

455. **Parimaṇḍalabyañjanāropane kusalo na hotīti** parimaṇḍalena padabyañjanena vattu, parehi vuttaṃ jānituṅca asamatthoti attho.

458. **Anussāvanenāti** anu anu kathanena. Tenāha “**nanutumhe**”ti-ādi, yaṃ avocumha, svāyaṃ pakāsītoti sambandho. Tattha **yanti** idaṃ yasmā vacanāpekkhaṃ na hoti, vacanathāpekkhameva, tasmā tena vacanena nānākaraṇābhāvaṃ pakāsayissāmāti yamatthaṃ avocumhāti attho gahetabbo. Teneva “**svāyan**”ti pulliṅgavasena paṭiniddeso kato tassa so ayaṃ nānākaraṇābhāvoti attho.

467. **Mañcapadādīsipi naḷāṭaṃ paṭihaññeyyāti** andhakāre cammakhaṇḍaṃ paññapetvā vanditum onamantassa naḷāṭaṃ vā akkhi vā mañcādīsū paṭihaññati. Etena vandatopi āpatti-abhāvaṃ vatvā vandanāya sabbathā paṭikkhepābhāvaṅca dīpeti. Evaṃ sabbattha suttantarehi appaṭikkhittesu. Naggādīsū pana vanditum na vaṭṭatīti. **Ekato āvaṭṭoti** ekasmim dosāgatipakkhe parivatto pavīṭṭhoti attho. Tenāha “**sapattapakke ṭhito**”ti. **Vandiyamānoti** onamitvā vandiyamāno. Vanditabbesu uddesācariyo, nissayācariyo ca yasmā navakāpi honti, tasmā te vuḍḍhā eva vandiyāti veditabbā.

470. **Pubbe vuttamevāti** sahaseyyādipaṇṇattivaṃjam. **Itaranti** sacittakaṃ.

Vohāravaggādivaṇṇanā niṭṭhitā.

# Aparadutiyaḡāthāsaṅgaṇika

## Kāyikādi-āpattiyaṅṅaṇā

474. “**Kati āpattiyo**”ti-ādinā upālittherena vinayassa pāṭavattamaṁ sayameva pucchitvā vissajjanaṁ kataṁ. **Bhikkhunīnaṁyeva -pa-aṭṭhavatthukā nāmaṭi** bhikkhunīnaṁ paññattā ekā eva āpatti aṭṭhavatthukā nāmaṭi attho.

475. **Kammaṅca kammaṭpāḡakā cāti** ettha yasmā ñattikammesu ñatti sasameva kammaṁ hoti, ñattidutiyañatticatutthesu kammesu anussāvanasaṅkhātassa kammaṣṣa ñattipāḡakabhāvena tiṭṭhati, tasmā imāni dve “ñattikiccāni”ti vuttāni.

**Pācittiyena saddhiṁ dukkaṭā katāti** dasasupi sikkhāpadesu ekato upasampanāya vasena vuttadukkaṭaṁ sandhāya vuttaṁ. **Paṭhamasikkhāpadamhīti** bhikkhunovādavaggassa paṭhamasikkhāpadavibhaṅge<sup>1</sup>. **Adhammakamme**ti bhikkhunovāḡakasammutikamme adhammakamme jāte āpajjitabbā dve āpattinavakā, dhammakamme dve āpattinavakāti cattāro navakā vuttā. **Āmakadhaññaṁ viññāpetvā bhuñjantiyā** viññāpanāḡipubbapayoge dukkaṭaṁ, ajjhohāre pācittiyaṁ. Pācittiyena saddhiṁ dukkaṭā katāyevāti vuttaṁ.

**Vijahantī tiṭṭhatīti**-āḡisu yadā bhikkhuniyā ekena pādena hatthapāsaṁ vijahitvā ṭhatvā kiṅci kammaṁ katvā tato aparena pādena vijahitvā ṭhātukāmatā uppajjati, tadā sā yathākkamaṁ “vijahantī tiṭṭhati, vijahitvā tiṭṭhatī”ti imāni vohāraṁ labhati. Aññathā hissā gāṁupacāramokkantiyā viseso na siyā hatthapāsavijahanassāpi gamanattā. **Nisīdati vā nipajjati vāti** etthāpi yathāvuttāḡhippāyena addhāsanena hatthapāsaṁ vijahantī nisīdati, sakalena vā āsanena vijahitvā nisīdati, addhasarīrena vijahantī nipajjati, sakalena sarīrena vijahitvā nipajjatīti yojetabbaṁ.

Kāyikādi-āpattiyaṅṅaṇā niṭṭhitā.

### Pācittiyavaṇṇanā

476. **Sabbāni nānāvattukāni**ti sappinavanitādīnaṃ pañcannaṃ vatthūnaṃ bhedenā pācittiyāni pañca nānāvattukāni. Esa nayo paṇitabhojanavisaye **nava pācittiyāni**ti-ādīsupi. Etena bhesajjapaṇitabhojanasikkhāpadāni ekekasikkhāpadavasena paññattānīpi vatthubhedena paccekam pañcasikkhāpadanavasikkhāpadasadisāni bhikkhunīnaṃ paṭidesanīyāpattīyo viyāti dasseti. Teneva “nānāvattukāni”ti vuttaṃ. Sappim eva paṭiggahetvā anekabhājanesu ṭhapetvā sattāhaṃ atikkāmentassa bhājanagaṇanāya sambhavantiyo bahukāpi āpattīyo ekavatthukā eva honti, evaṃ sappibhojanameva bahūsu ṭhānesu viññāpetvā ekato vā visum visumeva vā bhuñjantassa āpattīyo ekavatthukā evāti daṭṭhabbā.

Pāliyaṃ **ekavācāya deseyya, vuttā ādiccabandhunāti** ettha “deseyyāti vuttā”ti iti-saddaṃ ajjhāharitvā yojetabbaṃ. Evaṃ sesesupi.

**Bhedānuvattakānanti** ettha ādi-saddo luttaniddiṭṭho. Yāvataiyakā ca sabbe ubhatovibhaṅge āgatā, saṅghādisesasāmañña ekam, pācittiyasāmañña ca ekam katvā “**yāvataiyake tisso**”ti vuttanti daṭṭhabbaṃ. Ettha ca ñattiyā dukkaṭaṃ, dvīhi kammavācāhi thullaccayāpi santi eva. Tāni mātīkāya na āgatāni. Mātīkāgatavasena hettha “tisso”ti vuttaṃ.

**Saṅghādīhīti** saṅghagaṇapuggalehi kāraṇabhūtehi. **Abbhūhasīloti** parisuddhabhāvūpagamanena abhinavuppannasīlo. Abhinavuppannañhi “abbhūhan”ti vuccati, parisuddhasīloti attho. Tenāha “**pākatiko**”ti.

“**Kosambakakkhandhake vuttānisamse**”ti idaṃ kosambakakkhandhake “sace maṃ ime bhikkhū āpattiyā adassane ukkhipissanti, na mayā saddhim uposathaṃ karissanti”ti-ādīnā āpattiyā adassane ādīnavam dassetvā paresampī saddhāya āpattidesanāvīdhanamukhena sāmattiyato pakāsīto. Ekato uposathakaraṇa, pavāraṇākaraṇa, saṅghakammakaraṇa, āsanenisīdana, yāgupānenisīdana, bhattaggenisīdana, ekacchanne sayana, yathāvuddha-abhivādanādīkaraṇasaṅkhāte aṭṭhānisamse sandhāya vuttaṃ.



**Catunnanti** vinayapiṭake āgatānaṃ vasena vuttam. **Katamā pana sāti** sā catubbidhā accayadesanā katamāti attho. **Abhimārānanti** māraṇatthāya payojitadhanuggahānaṃ. **Upatthāyikāyāti** sahaseyyasikkhāpadavatthusmiṃ āgatāya.

**Aṭṭhannaṃ bhikkhunīnanti** therāsanato paṭṭhāya aṭṭhahi bhikkhunihi itarāya āgatāya vuḍḍhāya bhikkhuniyā āsanaṃ dātabbam. Aṭṭhannaṃ pana bhikkhunīnaṃ navakāya āgatāya adātumpi vaṭṭati. Tāya pana saṃghanavakāsane laddhokāse nisīditabbam. Atha vā aṭṭhannaṃ vuḍḍhānaṃ bhikkhunīnaṃ itarāya navakatarāya āsanaṃ dātabbam. **Kammāni navāti** osāraṇādīni nava eva.

Pācittiyavaṇṇanā niṭṭhitā.

### Avandanīyapuggalādivaṇṇanā

477. **Dasa janāti** “dasa ime bhikkhave avandiyā”ti-ādinā<sup>1</sup> vuttā navaka-anupasampannanānāsamaṃvāsakamātugāmapaṇḍakā pañca, pārivāsikādayo ca pañcāti dasa janā.

**Dvādasa kammadosāti** dosayuttakammāni dvādasāti attho. **Kammasampattiyoti** sampannakammāni, visuddhakammānīti attho. **Etadevāti** dhammena samaggameva.

Anantaṃ nibbānaṃ ajini jinitvā paṭilabhatīti anantajinoti āha “**pariyanta**”iccādi. **Snevāti** so eva bhagavā.

“**Vinayaṃ paṭijānantassa, vinayāni suṇoma te**”ti-ādinā upālithereveva ekaṃ vinayadharanaṃ sammukhe ṭhitaṃ pucchantena viya pucchitvā tena vissajjitaṃ viya vissajjanaṃ kataṃ. Tatha **vinayaṃpaṭijānantassāti** vinayaṃ jānāmīti paṭijānantassa. **Vinayānīti** vinaye tayā vuccamāne suṇoma.

478. Paḷiyaṃ **pārājikā**ti-ādi ubhatovibhaṅgesu āgatesu aggahitaggahaṇavasena vuttam.

Avandanīyapuggalādivaṇṇanā niṭṭhitā.

## Sedamocanagāthā

### Avippavāsapañhāvaṇṇanā

479. Sedamocanagāthāsu **akappiyasambhogoti** anupasampannehi saddhim kātum paṭikkhitto uposathādisamvāso eva vutto. **Pañhā mesāti** ettha **ma-kāro** padasandhikaro. **Esāti** ca liṅgavipallāsavasena vuttam, pañho esoti attho. **Pañha**-saddo vā dvilingo daṭṭhabbo. Tenāha “**esā pañhā**”ti-ādi.

**Garubhaṇḍam sandhāyāti** garubhaṇḍena garubhaṇḍaparivattanam sandhāya. **Dasāti** dasa avandiyapuggale. **Ekādaseti** abhabbapuggale. **Sikkhāya asādhāraṇoti** khurabhaṇḍam dhāretum anuññātasikkhāpadena bhikkhūhi asādhāraṇasikkhāpadoti attho.

**Ubbhakkhake na vadāmīti** akkhato uddham sīse ṭhitamukhamaggepi pārājikam sandhāya na vadāmi. **Adhonābhinti** nābhito heṭṭhā ṭhitavaccapassāvamaggepi vivajjiya aññasmim sarīrappadese methunadhammapaccayā katham pārājiko siyāti attho.

**Chejjavatthunti** pārājikam.

Avippavāsapañhāvaṇṇanā niṭṭhitā.

### Pārājikādipañhāvaṇṇanā

480. **Dussakuṭi-ādīnīti ādi**-saddena acchataratipupattādīhi, tiṇapaṇṇādīhi ca paṭicchannakuṭiyo saṅgaṇhāti. Tādisāya hi kuṭiyā bahi ṭhatvā anto ṭhitāya itthiyā magge dussādīnā santhatam katvā pavesentopi pārājiko siyā. **Liṅgaparivattam sandhāya vuttāti** liṅge parivatte paṭiggahaṇassa vijahanato puna appaṭiggahetvā paribhuñjanāpattim sandhāya vuttam.

Pāḷiyam **bhikkhū siyā vīsatiyā samāgatāti** vīsatiyā saṅkhātāya bhikkhū samāgatā, etena sabbakammārahataṃ saṅghassa dasseti.

**Nivatthoti** gāthāya antaravāsakena nivattho uttarāsaṅgena diguṇaṃ katvā pārutasāṅghāṭiyo. Iti tāni tīṇipi cīvarāni kāye gatāneva bhikkhuniyā bindumattaṃ kāḷakaṃ udakena dhovitamatte nissaggiyāni hontīti attho.

**Itthim haneti** gāthāya na mātubhūtaṃ itthim haneyya, na pitubhūtaṃ purisaṃ haneyya. **Anariyanti** tañca anarahantameva haneyya, etena arahantaghātakopi na hotīti dasseti. **Anantaram phuseti** ānantariyaṃ phusatīti attho.

481. **Suppatiṭṭhitanigrodhasadisanti** yojanavittataṃ rukkhaṃ sandhāya vuttaṃ.

**Sattarasakesūti** bhikkhunīnaṃ paññattasattarasasaṅghādisesesu.

Pārājikādīpañhāvaṇṇanā niṭṭhitā.

# Pañcavagga

## Kammavaggavaṇṇanā

483. Kammavagge ṭhapita-uposathapavāraṇānaṃ kattikamāse sāmaggīyā katāya sāmaggīpavāraṇaṃ muñcitvā uposathaṃ kātum na vaṭṭatīti āha “**ṭhapetvā kattikamāsan**”ti. Sace pana tesam nānāsīmāsu mahāpavāraṇāya visum pavāritānaṃ kattikamāsabbhantare sāmaggī hoti, sāmaggī-uposatho eva tehi kattabbo, na pavāraṇā. Ekasmim vasse katapavāraṇānaṃ puna pavāraṇāya avihitattā. **Sāmaggīdivasoti** anuposathadivase sāmaggīkaraṇaṃ sandhāya vuttaṃ. Sace pana cātuddasiyaṃ, pannarasiyaṃ vā saṃgho sāmaggim karoti, tadā sāmaggī-uposathadivaso na hoti, cātuddasīpannarasī-uposathova hoti. Upari pavāraṇāyapi eveda nayo.

**Paccukkaddhitvā ṭhapitadivasoti** bhaṇḍanakārahehi upaddutā vā kenacideva karaṇīyena pavāraṇāsaṅgahaṃ vā katvā ṭhapito kāḷapakkhacātuddasīdivasova. **Dve ca puṇṇamāsiyoti** pubbakattikapuṇṇamā, pacchimakattikapuṇṇamā cāti dve puṇṇamāsiyo. **Evaṃ catubbidhampīti** puṇṇamāsidvayena saddhim sāmaggīpavāraṇaṃ, cātuddasīpavāraṇāṅca sampiṇḍetvā vuttaṃ. Idaṅca pakaticārittavasena vuttaṃ. Tathārūpapaccaye pana sati ubhinnaṃ puṇṇamāsināṃ purimā dve cātuddasiyopi kāḷapakkhacātuddasiyā anantarā pannarasīpīti imepi tayo divasā pavāraṇādivasā evāsi imāṃ sattavidhampi pavāraṇādivasaṃ ṭhapetvā aññasmim divase pavāretum na vaṭṭati.

484. **Anussāvanakammaṃ katvāti** paṭhamāṃ anussāvanaṃ sāvetvā “esā ñattī”ti anussāvanānantarameva sakalaṃ ñattim vatvā, pariyoṣāne “esā ñattī”ti vatvāti adhippāyo.

485. **Yvāyanti** byañjanappabhedo adhippeto. **Dasadhā** byañjanabuddhiyā pabhedoti ettha dasadhā dasavidhena byañjanānaṃ pabhedoti yojetabbaṃ. Kenāyaṃ pabhedoti āha “**byañjanabuddhiyā**”ti. Yathādhippetatthabyañjanato byañjanasaṅkhātānaṃ akkhārānaṃ janikā buddhi byañjanabuddhi, tāya

byañjanabuddhiyā, akkharasamuṭṭhāpakacittabhedenevāti attho. Yamā vā saṃyogaparam katvā vuccati, idampi garukanti yojanā.

Tattha āyasmatoṭi-ādīsu yāni anantaritāni **sa-kāra ma-kārādibyañjanāni** “saṃyogo”ti vuccanti, so saṃyogo paro yassa **a-kārādino**, so **saṃyogaparo** nāma. **Rassanti** akārādibyañjanarahitaṃ saram. **Asaṃyogaparanti** “yassanakhamatī”ti-ādīsu **ya-kāra na-kārādibyañjanasahasaram** sandhāya vuttaṃ. **Ta-kārassa tha-kāra**ṃ akatvā vaggantare sithilameva katvā “suṇāṭu me”ti-ādīṃ vadantopi duruttaṃ karotiyeva ṭhapetvā anurūpaṃ ādesaṃ. Yañhi “saccikatthaparamatthenā”ti vattabbe “saccikatthaparamatthenā”ti ca “atthakathā”ti vattabbe “aṭṭhakathā”ti ca tattha tattha vuccati, tādisaṃ pāli-aṭṭhakathāsu diṭṭhapayogaṃ, tadanurūpaṃca vattum vaṭṭati, tato aññaṃ na vaṭṭati. Tenāha “**anukkamaḡataṃ paveṇiṃ avināsentenā**”ti-ādi.

**Dīghe vattabbe rassanti**-ādīsu “bhikkhūnaṃ”ti vattabbe “bhikkhunaṃ”ti vā “bahūsū”ti vattabbe “bahusū”ti vā “nakkhamatī”ti vattabbe “na khamatī”ti vā “upasampadāpekkho”ti vattabbe “upasampadāpekho”ti vā evaṃ anurūpaṭṭhānesu eva dīgharassadī rassadīghādivasena parivattetuṃ vaṭṭati, na pana “nāgo”ti vattabbe “nago”ti vā “saṃgho”ti vattabbe “sagho”ti vā “tisso”ti vattabbe “tiso”ti vā “yācatī”ti vattabbe “yācantī”ti vā evaṃ ananurūpaṭṭhānesu vattum. Sambandhaṃ, pana vavatthānaṃca sabbathāpi vaṭṭatīti gahetabbaṃ.

486. **Sesasīmāsupīti** atimahatī-ādīsu dasasupī.

488. **Catuvaggakaraṇeti** catuvaggena saṃghena kattabbe. **Anissāritāti** uposathatthapanādinā vā laddhinānāsamvāsakabhāvena vā na bahikatā. Aṭṭhakathāyañhi “apakatattassāti ukkhittakassa vā, yassa vā uposathapavāraṇā ṭhapitā hontī”ti<sup>1</sup> vuttattā ṭhapita-uposathapavāraṇo bhikkhu apakatatto evāti gahetabbaṃ. **Parisuddhasīlāti** pārājikaṃ anāpanā adhippetā. Parivāsādikammesu pana garukaṭṭhāpi apakatattā evāti gahetabbaṃ. **Avasesā -pa- chandārahāva hontīti**.

1. Vi-Ṭṭha 4. 219 piṭṭhe.

saṅghato hatthapāsam vijahitvā ṭhite sandhāya vuttam. Avijahitvā ṭhitā pana chandārahā na honti, tepi catuvaggādito adhikā hatthapāsam vijahitvāva chandārahā honti. Tasmā saṅghato hatthapāsam vijahitvā ṭhiteneva chando vā pārisuddhi vā dātabbā.

Kammavaggavaṇṇanā niṭṭhitā.

### Apalokanakammakathāvaṇṇanā

496. **Etarahi sacepi sāmaṇeroti**-ādīsu buddhādīnam avaṇṇabhāsanampi akappiyādiṃ kappiyādibhāvena dīpanampi diṭṭhivipattiyāññeva pavisati teneva vakkhati “taṃ laddhiṃ nissajjāpetabbo”ti. Bhikkhūnampi eseva nayo. **Micchādiṭṭhikoti** buddhavaacanādhippāyam viparītato gaṇhanto, **so eva antaggāhikāya diṭṭhiyā samannāgatoti** ca vutto. Keci pana “sassatucchedānam aññataradiṭṭhiyā samannāgato”ti vadanti, taṃ na yuttam, sassatucchedaggāhassa sāmaṇerānam liṅganāsanāya kāraṇattena heṭṭhā **aṭṭhakathāyameva**<sup>1</sup> vuttattā, idha ca daṇḍakammanāsanāya eva adhippetattā.

**Tassāpi dātabboti** vijjamānam mukharādibhāvam nissāya appaṭipucchitvāpi paṭiññam aggahetvāpi āpattim anāropetvāpi desitāyapi āpattiyā khumsanādito anoramantassa dātabbova. Oramantassa pana khamāpentassa na dātabbo.

**Brahmadaṇḍassa dānanti** kharadaṇḍassa ukkaṭṭhadaṇḍassa dānam. Tajjanīyādikamme hi kate ovādānusāsanippadānapaṭikkhepo natthi. Dinnabrahmadaṇḍe pana tasmim saddhim tajjanīyādikammakatehi paṭikkhittampi katum na vaṭṭati, “neva vattabbo”ti-ādina ālāpasallāpādimmattassāpi nakārena paṭikkhittattā. Tañhi disvā bhikkhū gīvam parivattetvā olokanamattampi na karonti, evam vivajjetabbam nimmādanakaraṇatthameva tassa daṇḍassa anuññatattā. Teneva channattheropi ukkhepanīyādikammakatopi abhāyitvā brahmadāṇḍe dinne “saṃghenāham sabbathā vivajjito”ti mucchito papati. Yo pana brahmadāṇḍakatena saddhim ṇatvā saṃsaṭṭho avivajjetvā viharati, tassa dukkaṭamevāti gahetabbam aññathā

1. Vi-Ṭṭha 3. 297 piṭṭhe.

brahmadanḍavidhānassa niratthakatāpasaṅgato. **Tenā**ti brahmadanḍakatena. Yathā tajjanīyādikammakatehi, evameva tato adhikampi saṅghaṃ ārādhentena sammāvattitabbaṃ. Tañca “sorato nivātavuttī”ti-ādinā sarūpato dassitameva. Tenāha “**sammāvattitvā khamāpentassa brahmadanḍo paṭippassambhetabbo**”ti.

Yaṃ taṃ bhagavatā avandiyakammaṃ anuññātanti sambandho. “Tassa bhikkhuno danḍakammaṃ kātun”ti sāmāññato anuññātappakāraṃ dassetvā puna visesato anuññātappakāraṃ dassetuṃ “**atha kho**”ti-ādipāli uddhaṭṭāti veditabbaṃ. **Imassa apalokanakammassa thānaṃ hotī**ti apalokanakammassa sāmāññassa pavattiṭṭhānaṃ hotīti. Visesyatirekena avijjamānampi tadaññattha appavattim dassetuṃ visesanissitaṃ viya voharīyati. “**Kammaññeva lakkhaṇaṃ**”ti iminā osāraṇādivasena gahitāvasesānaṃ sabbesaṃ apalokanakammassa sāmāññalakkhaṇavasena<sup>1</sup> gahitattā kammaññeva lakkhaṇamassāti kammalakkhaṇanti nibbacaṇaṃ dasseti. Idañca vuttāvasesānaṃ kammānaṃ niṭṭhānaṭṭhānaṃ, saṅkhārakkhandhadhammāyatanāni viya vuttāvasesakhandhāyatanānanti daṭṭhabbaṃ. Teneva vakkhati “ayaṃ panettha pāḷimuttakopi kammalakkhaṇavinicchayo”ti-ādi<sup>2</sup>. Yathā cettha, evaṃ upari ñattikammādīsupi kammalakkhaṇaṃ vuttanti veditabbaṃ. **Tassa karaṇanti** avandiyakammassa karaṇavidhānaṃ.

“**Na vanditabbo**”ti iminā vandantiyā dukkaṭanti dassetīti daṭṭhabbaṃ. Saṅghena kataṃ katikaṃ ñatvā maddanaṃ viya hi saṅghasammūtiṃ anādarena atikkamantassa āpatti eva hoti.

**Bhikkhusaṅghassāpi panetaṃ labbhatiyevā**ti avandiyakammassa upalakkhaṇamattena gahitattā bhikkhusaṅghassāpi kammalakkhaṇaṃ labbhati eva.

Salākadānaṭṭhānaṃ **salākaggaraṃ** nāma. Yāgubhattānaṃ bhājanaṭṭhānāni **yāgaggabhattaggāni** nāma. Etesupi hi thānesu sabbo saṅgho uposathe viya sannipatito, kammañca vaggakammaṃ na hoti, “mayametaṃ na jānimhā”ti pacchā khiyyantāpi na honti. Khaṇḍasīmāya pana kate khiyyanti. Saṅghikapaccayañhi acchinnacīvarādīnaṃ dātuṃ apalokentehi upacārasīmaṭṭhānaṃ

1. Apalokanakammaṃ Hoti Visesa-sāmāññalakkhaṇavasena (Sī, Ka)

2. Vi-Ṭṭha 4. 253 piṭṭhe.

sabbesaṃ anumatiṃ gahetvāva kātabbam. Yo pana visabhāgapuggalo dhammikaṃ apalokanaṃ paṭibāhati, taṃ upāyena bahi-upacārasīmāgataṃ vā katvā khaṇḍasīmaṃ vā pavisitvā kātuṃ vaṭṭati.

Yaṃ sandhāya “apalokanakammaṃ karotī”ti sāmāññato dasseti, taṃ apalokanakammaṃ sarūpato dassetumāha “**acchinnacīvaram**”iccādi. Yadi apaloketvāva cīvaram dātabbam, kiṃ pana appamattakavissajjakasammutiyāti āha “**appamattakavissajjanakena panā**”ti-ādi. **Nāli vā upadḍhanāli vāti** divase divase apaloketvā dātabbassa pamānadassanaṃ. Tena yāpanamattameva apaloketabbam, na adhikanti dasseti. **Ekadivasamyeva vāti**-ādi dasavīsatidivasānaṃ ekasmiṃ divaseyeva dātabbaparichedadassanaṃ, tena yāva jīvanti vā yāva rogā vuṭṭhahatīti vā evaṃ apaloketuṃ na vaṭṭatīti dasseti. **Ṇapalibodhanti** iṇavatthum dātuṃ vaṭṭatīti sambandho. Tañca iṇāyikehi palibuddhassa lajjipesalassa sāsanaupakāraḥassa pamāṇayuttameva kappiyabhaṇḍaṃ niyametvā apaloketvā dātabbam, na pana sahasaṃ vā satahasaṃ vā mahā-ṇaṃ. Tādisañhi bhikkhācariyavattena sabbehi bhikkhūhi tādisassa bhikkhuno pariyesitvā dātabbam.

**Upanikkhepatoti** cetiyapaṭijagganathāya vaḍḍhiyā payojetvā kappiyakāraḥkehi ṭhapitavatthuto. **Samghikenapīti** na kevalaṅca tatruppādato paccayadāyakehi catupaccayatthāya samghassa dinnavatthunāpīti attho.

**Samghabhattaṃ kātuṃ na vaṭṭatīti** mahādānaṃ dentehipi kariyamānaṃ samghabhattaṃ viya kāretuṃ na vaṭṭatīti adhippāyo.

“**Yathāsukhaṃ paribhuñjituṃ ruccati**”ti vuttattā attano paribhogappahonakaṃ appaṃ vā bahuṃ vā gahetabbam, adhikaṃ pana gahetuṃ na labhati. **Uposathadivaseti** nidassanamattaṃ, yasmim kismiñci divasepi kataṃ sukatameva hoti. Karontena “yaṃ imasmiṃ vihāre antosīmāya samghasantakaṃ -pa- yathāsukhaṃ paribhuñjituṃ mayham ruccati”ti evaṃ katikā kātabbā, tathā dvīhi tīhipi “āyasmāntānaṃ ruccati”ti vacanameva hettha piseso. **Tesampīti** rukkhaṇaṃ. **Sā eva katikāti** visum katikā na kātabbāti attho.



**Tesanti** rukkhānaṃ. Saṃgho sāmīti sambandho. **Purimavihāreti** purime yathāsukhaṃ paribhogatthāya katakatike vihāre. **Pariveṇāni katvā jaggantīti** yattha arakkhiyamāne phalāphalāni, rukkhā ca vinassanti, tādisaṃ ṭhānaṃ sandhāya vuttam, tattha saṃghassa katikā na pavattīti adhippāyo. Ye pana rukkhā bījāni ropetvā ādito paṭṭhāya paṭijaggitā, tepi dasamabhāgam datvā ropakeheva paribhuñjitabbā. **Tehīti** jaggakehi.

**Tatthāti** tasmim vihāre. **Mūleti**-ādikāle, pubbeti attho. **Dīghā katikāti** aparicchinnakālā yathāsukhaṃ paribhogatthāya katikā. **Nikkukkucenāti** “abhājitamidana”ti kukkucam akatvāti attho. **Khiyyanamattamevetanti** tena khiyyanena bahum khādantānaṃ doso natthi attano paribhogappamaṇasseva gahitattā, khiyyantepi attano pahonakaṃ gahetvā khāditabbanti adhippāyo.

**Gaṇhathāti na vattabbāti** tathāvutte teneva bhikkhunā dinnam viya maññeyyūm, tam nissāya micchājīvasambhavo hotīti vuttam. Tenāha **“anuvicāritvā”**ti-ādi. **Upaḍḍhabhagoti** ekabhikkhuno paṭivīsato upaḍḍhabhāgo. Dentena ca “ettakaṃ dātum saṃgho anuññāsī”ti evam attānaṃ parimocetvā yathā te saṃghe eva pasīdanti, evam vatvā dātabbam.

**Apaccāsīsentenāti** gilānagamikissarādīnaṃ anuññātapuggalānampi attano santakaṃ dantena apaccāsīsenteneva dātabbam, ananuññātapuggalānaṃ pana apaccāsīsentenāpi dātum na vaṭṭatīti. Saṃghikameva yathākatibhāya dāpetabbam. Attano santakampi paccayadāyakādī sayameva vissāsenā gaṇhanti, na vāretabbā, laddhakappiyanti tuṇhī bhavitabbam. **Pubbe vuttamevāti** “kuddho hi so rukkhepi chindeyyā”ti-ādinā tuṇhībhāve kāraṇaṃ pubbe vuttameva. Tehi kata-anatthābhāvepi kāruññena tuṇhī bhavitum vaṭṭati, “gaṇhathā”ti-ādi pana vattum na vaṭṭati.

**Garubhaṇḍattā -pa- na dātabbanti** jīvarukkhānaṃ ārāmaṭṭhānīyattā, dārūnaṅca gehasambhārānupagatatā “sabbaṃ tvameva gaṇhā”ti dātum na vaṭṭatīti vuttam. **Akatāvāsaṃ vā katvāti** pubbe avijjamānaṃ senāsanaṃ katvā jaggitakāle phalavāre sampatte.

Apalokanakammakathāvaṇṇanā niṭṭhitā.

### Atthavasavaggādivaṇṇanā

498. **Vipākadukkhasaṅkhātānaṃ samparāyikaverānanti** ettha pāṇātipātādiverena nibbattatā, verappattiyā hetuttāca “vipākadukkhavedanā”ti vuttā. Pāṇātipātādipaṅcaveravinimuttānampi akusalānaṃ verehi saha ekato saṅgaṇhanatthaṃ “**dasa akusalakammappathapphedānaṃ**”ti puna vuttaṃ.

499-500. **Taṃ kammani** tajjanīyādikammameva, sattā āpattikkhandhā paññattaṃ nāmāti sambandho. **Antarā kenaci apaññatte sikkhāpadeti** imasmiṃ kappe ādito paṭṭhāya yāva amhākaṃ bhagavato abhisambodhi, tāva antarākāle kakuśandhādiṃ ṭhapetvā kenaci apaññatte sikkhāpadeti attho. **Vinītakathā sikkhāpadanti** vinītavatthūni eva. Tāni hi taṃtaṃsikkhākoṭṭhāsānaṃ pakāsanato “sikkhāpadan”ti ca āpatti-anāpattīnaṃ anupaññāpanato “anupaññattan”ti ca vuccanti.

Atthavasavaggādivaṇṇanā niṭṭhita.

Saṅgahavaggavaṇṇanānayo niṭṭhito.

Iti mahāvaggo, paññattivaggo, saṅgahavaggoti tīhi mahāvaggehi paṭimaṇḍito **parivāro**ti veditabbo.

Iti samantapāsādikāya vinayaṭṭhakathāya vimativinodaniyaṃ

**Parivāravaṇṇanānayo niṭṭhito.**

## Nigamanakathāvaṇṇanā

Avasānagāthāsu ubhatovi bhaṅgakhandhakaparivārehi vibhattatā vibhāgapaṭidesanā yasmim̐ vinayapiṭake, so ubhatovibhaṅgakhandhakaparivāravibhattadesano āhāti yojanā. **Tassāti** vinayapiṭakassa.

**Satthu mahābodhī**ti dakkhiṇasākhāṃ sandhāya vadati. Yaṃ padhānagharaṃ nāma pariveṇaṃ, tattha cārupākārena sañcitaṃ parikkhitaṃ yaṃ pāsādaṃ kārayi, tatra tasmim̐ mahānigamasāmino pāsāde vasatāti yojetabbā.

Buddhasirim̐ uddisitvā nissāya, tassa vā ajjhesanampi paṭicca yā iddhā paripuṇṇavinicchayatāya samiddhā vinayasamvaṇṇanā āraddhāti yojanā.

**Sirinivāsassāti** siriya nivāsanaṭṭhānabhūtaṃ **siripālanā**makassa rañño. **Jayasamvacchareti** vijayayutte samvacchare. Āraddhakāladassanattamaṃ puna “jayasamvacchare yaṃ āraddhā”ti vuttaṃ.

**Kāle vassanti** yuttakāle vassanasīlo. **Devoti** megho.

Nigamanakathāvaṇṇanā niṭṭhitā.

**Nigamanakathā**

Ettāvata ca āradhā, vinayaṭṭhakathāya yā.

Vaṇṇanā nātivitthiṇṇā, paripuṇṇavinicchayā.

Paññāsabhāṇavārāya, tantiyā parimāṇato.

Samijjhaniṭṭhiparamā, yā **vimativinodanī**.

Anantarāyena katā, ayaṃ niṭṭhamupāgatā.

Yaṃ taṃ niṭṭhaṃ tathā sabbe, pāṇino samanorathā.

Therehi vinayaññūhi, sucisallekhavuttihi.

Avissatthātivitthiṇṇa-ganthabhīrūhi patthitaṃ.

Karontena mayā evaṃ, vinaya-atthavaṇṇanaṃ.

Yaṃ pattamaṃ kusalaṃ tena, patvā sambodhimuttamaṃ.

Vinayatthamaṃ pakāsetvā, yo sopāyena lakkhaṇaṃ.

Sopāyaṃ vimaticcheda-ñāṇacakkhupadāyataṃ.

Viraddhatthavipallāsa-ganthavitthārahāniyā.

Visuddhiṃ pāpayissāmi, satte saṃsāradukkhato.

Lokiyehi ca bhogehi, guṇehi nikhilā pajā.

Sabbehi sahitā hontu, ratā sambuddhasāsaneti.

**Vimativinodanīṭikā niṭṭhitā.**

## Vimativinodanīṭkāya dutiyabhāge

### Samvaṇṇitapadānaṃ anukkamaṇikā

Padānukkamo	Piṭṭhaṅko	Padānukkamo	Piṭṭhaṅko
[ A ]		[ A ]	
Akaṭayūsena	186	Aṅgappahonakamā	225
Akataṃ	274	Acaṇḍikatena	299
Akatapabbhāre	10	Acāletvā	30
Akatabhāgo	249	Accagamā	234
Akallako	35	Accayo	234
Akāraṇe	207	Accāyatā	182
Akusalaṃ	225	Acciyo	96
Akkadussāni	201	Accuggamma	88
Akkamantiyā	73	Acchadanam	10
Akkharasamūho	4	Acchiddakagaṇanā	2
Akkhicakkalehi	127	Acchupiyanti	230
Akkhitārakā	127	Acchupeyyam	198
Akkhipākena	127	Ajapadake	127
Agadappayogo	79	Ajinappaveṇī	184
Agamanapathe	168	Ajjaṇho	96
Agaru	96	Ajjhattam	223
Aggabhikkhāmattam	251	Ajjhiṭṭhova	258
Aggaḷavaṭṭi	247	Añjanūpapisanam	186
Aggisālamhi	96	Aññakamma	213
Aggihutamissaṃ	98	Aññathābhāvo	266
Aggihuttamukhā	191	Aññavādakam	13
Agghavisuddhiyā	285	Aññānam	50
Aṅgam	224	Aṭṭhakavaggikāni	185
Aṅgajātam	229	Aṭṭhaṅgulasūcidaṇḍamatto	246
Aṅgaṇe	260	Aṭṭhapadakacchannena	199

Padānukkamo	Piṭṭhaṅko	Padānukkamo	Piṭṭhaṅko
[ A ]		[ A ]	
Aṭṭhapadākārena	228	Adhotapādaṭṭhapanakam	216
Aṭṭhikaṅkalūpamā	48	Adhonābhim	312
Aṭṭhitā	28	Anagāriyam	90
Aḍḍhacandapāsāṇe	182	Anatthakadīpano	306
Aḍḍhayogo	104	Anadhiṭṭhitena	196
Aḍḍhuḍḍhasatāni	292	Anantajino	89
Atikaḍḍhiyamānena	8	Anapagataṃ	210
Atipiṅgalakkhi	127	Anariyam	313
Atirekalābho	104	Anariyapaṇḍake	69
Atisithilā	182	Anariyā	70
Atītavassam	204	Anavassavāya	223
Attakāmarūpā	209	Anāpattiyā	212
Attakilamathānuyogo	90	Anāmaṭṭhapiṇḍapātāṃ	126
Attaparittam	229	Anālayo	91
Atthatakathinā	193	Anāsāya	195
Atthato	210	Anicchamānaṃ	114
Attharittabbaṃ	232	Anibandhanīyo	238
Atthāro	305	Animantitacatutthaṃ	27
Adinnādānaṃ	115	Aniyatā	273
Adesanāgāminiyā	213	Anissāritā	315
Addahatthena	228	Anuggaho	256
Addāriṭṭhakavaṇṇanā	183	Anuciṅṇo	255
Adhammadiṭṭhi	257	Anudahati	240
Adhammena	169	Anudhammaṃ	188
Adhikāraṃ	104	Anupavisitvā	17
Adhikuṭṭanaṭṭhena	48	Anupasampannaṃ	13
Adhigataṃ	263	Anupubbatanukena	127
Adhiṭṭhātabbaṃ	18	Anuppage	189
Adhimattaṃ	114	Anuppavecchati	187
Adhimutto	182	Anubandhimsu	230

Padānukkamo	Piṭṭhaṅko	Padānukkamo	Piṭṭhaṅko
[ A ]		[ A ]	
Anubalappadānaṁ	296	Apaññāte	14
Anurakkhaṇattham	235	Apaṇṇakapaṭipadā	217
Anulomaṁ	84	Apanāmetvā	30
Anuvātaṁ	232	Aparicchinnaḡabbhūpacāre	6
Anuvātādīnaṁ	198	Aparipūrūpacārā	18
Anuvādaṁ	265	Apavāhanaṁ	123
Anuviccekāraṁ	189	Apavilāyamāno	196
Anusandhitaṁ	297	Apassamānānaṁ	110
Anusampavaṅkatā	296	Apādaḡehi	229
Anussāvaṇā	163	Apārutā	88
Anussāvaṇena	308	Apidhānaṁ	236
Anūpalitto	89	Appagghaṁ	201
Anokāse	77	Appaṭicchannācāro	210
Antaggāhikā	180	Appaṭiññāya	212
Antaggāhikāya	107	Appatto	128
Antaragħare	102	Appamāṇo	229
Antaradhāyi	239	Abbhūḡhasīlo	310
Antarā	8	Abbhussahaṇatā	296
Antarāpatti	285	Abbhuyyāsi	208
Antarāyaṁ	48	Abyāpajjaṁ	182
Antalikkhacaro	94	Abyāpajjādhimutto	182
Antā	90	Abrahmacariyaṁ	115
Antonadiyaṁ	164	Abhikkantavaṇṇā	97
Antonimuggaposīni	88	Abhikkantāya	97
Antosāramissakānaṁ	141	Abhiññā	90
Antosārānaṁ	141	Abhinissāya	185
Antohemante	203	Abhinetaḡbaṁ	253
Apakatatto	288	Abhimārānaṁ	311
Apagataḡabbhā	235	Abhimāre	26
Apagatā	210	Abhiramanti	262

Padānukkamo	Piṭṭhaṅko	Padānukkamo	Piṭṭhaṅko
[ A ]		[ A ]	
Abhivādāpetabbo	258	Avisayham	180
Abhivitaranti	174	Avissajjikam	201
Abhivinaye	20	Avissatthā	187
Abhisañkharesi	93	Avebhaṅgikam	201
Abhisannakāyā	233	Asaṃhārime	36
Abhisamparāyo	199	Asañjicca	63
Abhihaṭṭatā	36	Asatiyā	63
Abhum	231	Asappāyam	58
Amatadundubhim	89	Asambhinnena	44
Amissikataṃ	183	Asammoho	182
Amūḷhavinayo	222	Asekkho	107
Ambarṃ	168, 229	Assatarī	253
Ambakāya	188	Ahuvunti	11
Ambaṇaṃ	247	[ Ā ]	
Arañjaro	245	Ākārādisaññā	262
Arahaṭaghaṭiyantaṃ	233	Ākāsapabbhāraṃ	146
Ariyaṃ	187	Āgantukapaṭṭaṃ	27, 198
Ariyavāsā	99	Āgametabbo	258
Alajjitā	49	Ājīvakassa	108
Alamariyo	90	Ājīvavipattipaccayā	278
Aloṇikam	268	Āthabbaṇamanto	79
Avakkārapātim	180	Ādinnamate	122
Avattharivā	259	Ādibrahmacariyakā	107
Avalekhanapīṭharo	236	Ādīnavam	93
Avassutaṃ	261	Ādesanāpāṭihāriyaṃ	254
Avāpuraṇaṃ	288	Ānantariyadhammā	48
Avijjā	84	Ānantariyena	123
Avijjānivutā	268	Ānītakam	289
Aviññattiyā	76	Āpattigāminiyo	264
Aviddasū	268	Āpadā	64



Padānukkamo	Piṭṭhaṅko	Padānukkamo	Piṭṭhaṅko
[ Ā ]		[ Ā ]	
Ābhisamācārikā	107	Āhāraṃ	35
Āmisakiñcikkhasampadānaṃ	108	Āḷambaraṃ	93
Āmisabhāgo	126	[ I ]	
Āyatanaṃ	187	Iti	137
Āyatanuppādaṃ	183	Itibhavābhavakathā	55
Āraññaṅkena	174	Itthattāya	93
Āraddhā	187	Iddhābhisaṅkhāraṃ	93
Ārāme	77	Iddhipāṭihāriyaṃ	97
Āropeti	37	Issāso	45
Ālambanabāhaṃ	233	[ U ]	
Ālindakamiḍḍhikādīnaṃ	231	Ukkaḍḍhanti	47
Ālokasandhi	18	Ukkhittacīvaro	62
Ālopasaṅkhepena	250	Ukkhepimaṃ	143
Āvaraṇaṃ	116	Uggacchanti	189
Āvaraṇena	167	Ugghāṭanaḱiṭikaṃ	239
Āvasathassa	54	Ugghāṭetukāmo	13
Āviñchanachinnaṃ	237	Uccā	116
Āviddhaṃ	234	Uccāletvā	10
Āviddhapakkhapāsakaṃ	233	Uccāsayaṇaṃ	116
Āveṇikena	205	Ujjuṃ	253
Āsanagharaṃ	242	Ujjhāpanaṃ	13
Āsanesu	258	Uṇṇanābhī	229
Āsānañca	303	Uṇṇapāvāraṇaṃ	182
Āsīsanā	98	Uṇṇāmayattharaṇo	184
Āsīsāyaṃ	255	Uṇṇāhi	184
Āsutā	268	Utuvasseyeva	171
Āsumbhivā	76	Uttarimanussadhammā	90
Āhacca	148	Uttiṭṭhapattaṃ	101
Āhañchaṃ	89	Uttiṭṭhe	113
Āhaṭaṃ	178		

Padānukkamo	Piṭṭhaṅko	Padānukkamo	Piṭṭhaṅko
[ U ]		[ U ]	
Udakagaṇḍusaṃ	232	Upadaṃsenti	208
Udakatārakā	127	Upadahanti	238
Udakatumbo	192	Upanandhi	233
Udakadoṇī	247	Upanayhanti	208
Udakavāhako	97	Upanibandhitvā	242
Udakasaṅṭhānakappadese	45	Upanento	48
Udakukkhepā	162	Upapattibhavo	84
Udapajjatha	255	Uparamanti	118
Udapānaṃ	233	Upavadanā	223
Udānesi	93	Upasaṃharatha	188
Udāharitabbariṃ	262	Upasampajja	90
Udicchare	96	Upasampadā	92
Udukkhalaṃ	144	Upassuti	52
Uddalomī	184	Upahimsati	255
Uddhaṭamatte	30	Upādānaṃ	84
Uddharatu	132	Upādānakkhayassa	183
Uddhārabhāvaṃ	305	Upādānakkhayo	182
Upakkhare	246	Upāyāso	84
Upacāraṃ	4	Upetabbā	306
Upacāratthāya	162	Uposatham	174
Upacāre	197	Uppaṇḍuppaṇḍukajāto	104
Upacāro	24	Uppatitvā	167
Upajjhā	132	Ubbhakkhake	312
Upajjhāyaṃ	101	Ubbhaṇḍikā	240
Upaṇṇātaṃ	101	Ubbhidam	186
Upaḍḍham	7	Ubhatolohitakūpadhāne	184
Upaḍḍhakāsinam	197	Ummattakaṃ	222
Upaḍḍhaparikkhitto	189	Uruvelāyaṃ	83
Upaḍḍhupaḍḍham	110		
Upatthambho	306		

Padānukkamo	Piṭṭhaṅko	Padānukkamo	Piṭṭhaṅko
[ U ]		[ O ]	
Ullokaṃ	103	Opātetī	5
Ussūyāya	119	Opāyikaṃ	102
Ussannadoso	197	Obaddhaṃ	217
Ussāpetvā	233	Oraṃ	11
Ussārento	43	Orapāraṃ	10
[ E ]		Oraṃ	11
Ekagehavasena	250	Oravasaddaṃ	189
Ekacārikavattaṃ	242	Orimantena	35
Ekato-upasampannāya	21	Orohati	63
Ekaddhānamaggaṃ	24	Oloṇī	62
Ekapaṇṇacchattaṃ	235	Osāraṇaṃ	128
Ekaparicchedāni	53	Osāretvā	210
Ekasaṅghātaṃ	208	[ Ka ]	
Ekasālasanniveso	7	Kaṅkhā	50
Ekasikhāmattadharo	112	Kaṭākaṭena	186
Ekasīmāvihārehi	200	Kaṇṭakavāṭaṃ	239
Ekānussāvaṇaṃ	131	Kaṇṇamūle	127
Ekārakkho	99	Kaṇṇasakkhalikāya	127
Ekūpacāro	5	Kaṇhavāco	306
Eḷamukho	128	Kataññaṇaṃ	91
[ O ]		Katapādukā	184
Okāraṃ	93	Katavedino	104
Oṭṭhacchinnako	128	Katimī	171
Oṭṭho	231	Kathanāṃ	170
Otappati	239	Kathānusandhivacaṇaṃ	297
Otthariyyati	233	Kathinaṃ	193
Onaddhamañcaṃ	238	Kathinavatthaṃ	23
Onandhituṃ	238	Kantāre	190
		Kappaṃ	254
		Kappakataṃ	78

Padānukkamo	Piṭṭhaṅko	Padānukkamo	Piṭṭhaṅko
[ Ka ]		[ Ka ]	
Kappagatikam	72	Kiccādhikaraṇapaccayā	278
Kappasīso	127	Kiṭṭikam	239
Kabaḷikā	186	Kiṇṇapakkhittā	42
Kammañatti	307	Kilañjacchattam	192
Kammantānuṭṭhānena	121	Kucchi-anuvātāropanamattena	193
Kammapādakā	309	Kuṭṭigehe	144
Kammapādañatti	307	Kuṇḍake	37
Kammabhavo	84	Kumbhaṭṭhānakatham	54
Kammavipākam	197	Kumbhathūṇikā	78
Kammārabhaṇḍu	111	Kulapadeso	299
Karaṇīyam	93	Kulavo	267
Karambako	30	Kullena	188
Karuṇam	263	Kekaro	127
Kalahavasena	207	Keṇī	76
Kalaho	208	Kevalakappam	97
Kalisāsanam	308	Kesavissajjanam	113
Kallam	92	Kokanadam	22
Kallakāyā	199	Kocchena	228
Kallacittam	93	Kojavo	16
Kalyāṇavākkaraṇo	21	Koṭi	46
Kasambujātam	261	Koṭṭakabandhanena	167
Kasāvehi	186	Koṭṭā	236
Kāmatanḥā	91	Koṭṭhakāni	17
Kāmasukhallikānuyogo	90	Koṭṭhabbantaragatam	186
Kāyapāgabbhiyam	275	Koṇam	142
Kāyikā	277	Kodaṇḍo	65
Kālasīho	185	Komudī	179
Kāsāvaparibhaṇḍam	242	Kolaññā	120
Kāsinam	89		
Kiccañānam	91		

Padānukkamo	Piṭṭhaṅko	Padānukkamo	Piṭṭhaṅko
<b>[ Ka ]</b>		<b>[ Ga ]</b>	
Kolaṭṭhimattako	109	Gambhīro	20
Koseyyakaṭṭissamayam	184	Gayāyam	98
<b>[ Kha ]</b>		Gayāsīse	98
Khandhako	83	Garukehi	21
Khandhā	83	Garunissayam	268
Khamati	137	Gahaṇī	54
Khamanīyam	209	Gahananissito	295
Khamamānam	197	Gāmo	11
Khalimakkhitasāṭako	193	Gārayham	189
Khallakam	183	Giraggam	292
Khāṇumatthake	178	Gihigatāni	266
Khārikājam	98	Ghipārutam	61
Khārī	98	Gihivikaṭam	240
Khiyyanti	36	Gihivikaṭanīharena	245
Khīlanamanto	79	Gihivikaṭāni	230
Khujjasarīro	127	Guhā	105
Khuddakānam	1	Guḷakaraṇam	187
<b>[ Ga ]</b>		Guḷāsavo	42
Gaṅgāmahakīlikāya	184	Geham	190
Gati	199	Gottenapi	129
Gatigatam	71	<b>[ Gha ]</b>	
Gandham	115	Ghanapupphako	184
Gandhikaseṇī	72	Ghanabaddho	35
Gabbhaparikkhepo	6	Gharadinnakābādho	186
Gabbhavīso	46	<b>[ Ca ]</b>	
Gamanuppādanam	70	Cakkalayutto	239
Gamikābhisankhāro	188	Cakkalikam	248

Padānukkamo	Piṭṭhaṅko	Padānukkamo	Piṭṭhaṅko
[ Ca ]		[ Cha ]	
Cakkasamāruḷhā	24	Chakaṇaṃ	186
Cakkhum	91	Chaḍḍitamodakaṃ	167
Cakkhukaraṇī	90	Chaḍḍetvā	197
Catukoṇaṃ	235	Chattakaṃ	12
Catuddisā	97	Chattapādukāya	64
Caturāṅgulādhikāni	184	Chattamaṅgalaṃ	113
Caturassapīṭhaṃ	237	Chattamuṭṭhipaṇṇaṃ	247
Caturāpasseno	99	Chadanehi	5
Catussālabhattaṃ	216	Chandaso	191
Cabbetvā	232	Chandena	54
Cammakāraṇīlaṃ	44	Chavasīsassa	231
Cayaṃ	189	Chiddaṃ	234
Caraṇaṃ	20	Chejjaṃ	70
Carukena	36	Chejjavatthum	312
Calitappavattānaṃ	226	[ Ja ]	
Cāgo	91	Jagatiyā	6
Cātuddiso	20	Jaggato	254
Cātumāsini	179	Jaṭilo	191
Cāpo	65	Janapadakalyāṇī	114
Cāresum	2	Jarā	84
Cikkalena	228	Jātakapakaraṇaṃ	238
Cittadukkhaththaṃ	223	Jātarukkhe	164
Cittavipariyāsakato	222	Jāti	84
Cinitum	233	Jātu	255
Cipiṭṭanāsiko	128	[ Ña ]	
Ciraṃ	185	Ñatti	137
Cuṇṇacālinim	186		
Cūḷakaṃ	7		

Padānukkamo	Piṭṭhaṅko	Padānukkamo	Piṭṭhaṅko
[ Ṭa - Ṭha ]		[ Tha ]	
Ṭaṅkitamañco	178	Thambhakavātapānaṃ	237
Ṭapita-upanikkhepato	199	Thambhā	189
Ṭhānantaraṃ	76	[ Da ]	
Ṭhānāni	279	Daṇḍakammaṃ	116
Ṭhitadhammo	262	Dadhimatthu	76
Ṭhito	18	Dasabalo	99
[ Ta ]		Dasasataṃ	219
Takaṃ	32	Daharapotakehi	209
Takapaṇṇiṃ	32	Dārakā	191
Takapattīṃ	32	Dārupaṭṭikāya	237
Tacchakakammaṃ	2	Dārumayaṇṇiṭṭhaṃ	16
Taṇhakkhayo	182	Diṭṭhadhammo	92
Taṇhā	84	Diṭṭhivipattipaccayā	277
Tatīyāya	18	Diṭṭheva dhamme	90
Tanukamiḍḍhikāya	231	Dirattatirattaṃ	5
Tantakaṃ	235	Dīghapattānaṃ	198
Tantibaddho	205	Dīghasālā	240
Tapataṃ	191	Dukkhaṃ	84
Tālamūlakapabbate	146	Dukkhaḥāni	272
Tiṇṇā	188	Dupaṭṭacīvarassa	201
Titthaṃ	140	Dubbhe	255
Titthāyatanaṃ	105	Dussaveṇiyā	264
Tiparivaṭṭaṃ	91	Dussikaseṇī	72
Tibhāgaṃ	247	Dūtaṅgehi	210
Tiracchānabhūtaṃ	20	Domanassaṃ	84
Tuṇhībhūtassa	13	Dvaṅgule	228
Tumbā	192	Dvattimsatiracchānakathā	55
Tulādhāraṃḍako	111	Dvāraṃ	293
Tulādhārā	111		
Tuvaṭṭaṃ	114		

Padānukkamo	Piṭṭhaṅko	Padānukkamo	Piṭṭhaṅko
[ Dha ]		[ Na ]	
Dhammagaṇo	72	Nānūpacārehi	200
Dhammacakkam	92	Nāmaṃ	84
Dhammadiṭṭhi	257	Nāmarūpaparicchede	108
Dhammīkathā	254	Nāvāya	97
Dhāraṇaṃ	115	Nāsanavatthu	116
Dhārayāmi	137	Nāseti	297
Dhuravihāraṭṭhāne	197	Nāḷiyāvāpakena	191
Dhūmakālikam	266	Nāḷisīso	127
Dhotavālikāya	102	Nikkujjeyya	234
Dhovanam	208	Nikkhamanīyapuṇṇamāsī	47
		Nikkhāmetvā	261
		Niggahānaṃ	139
[ Na ]		Niggahetuṃ	10
Nakhapiṭṭhippamaṇaṃ	109	Niccāletuṃ	38
Nacchādenti	186	Nidānaṃ	83
Naṭanaṭakā	31	Nidānena	284
Nadim	143	Niddesena	284
Nandimukhiyā	198, 261	Niddhāpetabbaṃ	253
Nandirāgasahagatā	91	Niddhūme	102
Namatakaṃ	234	Ninnetabbaṃ	253
Namanakaṃ	265	Nipatati	238
Navakammaṃ	247	Nippakhumakkhi	127
Navavāyimo	14	Nibaddhagamanatthāya	260
Nāgamaṇḍalaṃ	79	Nibandhāpitaṃ	252
Nāgamāsado	254	Nibbiṭṭho	76
Nānattakathaṃ	54	Nibbindati	93
Nānābhāvo	266	Nibbutim	81
Nānālābhehi	200	Nimantaṇaṃ	28
Nānāverajjake	27	Nimittakamma	189
Nānāsaṃvāsakabhāvaṃ	174		



Padānukkamo	Piṭṭhaṅko	Padānukkamo	Piṭṭhaṅko
[ Na ]		[ Pa ]	
Niyatamicchādiṭṭhidhammā	48	Paccayaṃ	217
Niyato	273	Paccāgacchanto	182
Niyyāti	275	Paccāgataṃ	27
Niyyānikaṃ	256	Paccādiyati	262
Nirāsaṅkaṭṭhāne	155	Pañcakaṃ	193
Nirupadhinaṃ	185	Pañcaṅgavippahīno	99
Nirodho	305	Pañcapaṭikaṃ	238
Nilloketabbo	258	Pañcasikho	112
Nissayakaraṇīyo	129	Paṭaṅgamaṇḍūko	128
Nissāmikadāso	111	Paṭapotalikaṃ	184
Nissāraṇaṃ	206	Paṭā	192
Nissīmāgataṃ	199	Paṭākaṃ	189
Nissenṇimpi	232	Paṭikacceva	268
Nīcavatthuko	233	Paṭikkamantu	229
Nīlavaṇṇā	188	Paṭikkamena	102
Nīhārabhatto	92	Paṭikkamma	241
Nekkhammaṃ	182	Paṭiggahaṃ	233
Netthāravatte	73	Paṭiggahaṇūpagaṃ	37
No kallo	85	Paṭiggahathavikaṃ	233
[ Pa ]		Paṭicayaṃ	182
Pakati-āmise	33	Paṭiccannaparissaye	208
Pakati-āhāravasena	32	Paṭinissaggo	91
Pakatiṭṭhitikāya	249	Paṭipajjitabbaṃ	260
Pakatitūlikā	184	Paṭipādentō	101
Pakiṇanti	265	Paṭippassambhati	200
Pakkamaṇaṃ	194	Paṭibaddhakālatō	250
Pakkhapāsakamaṇḍalaṃ	190	Paṭibāhanti	265
Pakkhibiḷālā	183	Paṭibāhetvā	238
Paccaññāsinaṃ	91	Paṭiyālokaṃ	29
		Paṭiladdhaṃ	75

Padānukkamo	Piṭṭhaṅko	Padānukkamo	Piṭṭhaṅko
[ Pa ]		[ Pa ]	
Paṭivaṭṭesi	188	Paradatto	253
Paṭivadatha	211	Paramparabhojane	28
Paṭisaṅkhāpi	187	Paravitāraṇo	50
Paṭṭabandho	113	Parasamudde	202
Paṭhamacimilikā	193	Parikathanattham	20
Paṇavasāṅṭhāno	146	Paricchindi	289
Paṇunnapaccekasacco	99	Parittāṇattham	239
Paṇṇattivītikkamaṃ	104	Paridevo	84
Paṇṇasūci	246	Paripātiṃsu	176
Paṇho	128	Paripaṇṇakosakoṭṭhāgāro	208
Patanuppatanavāresu	43	Paripuṇṇassa	134
Patiṭṭhitārappadesaṃ	2	Paribhaṇḍaṃ	201
Pattakaṭāhaṃ	247	Paribhijjati	233
Pattakallaṃ	135	Paribhogapaccayā	74
Pattaṭṭhāne	243	Parimaṇḍalapadabyañjanāya	21
Pattapuṭena	83	Parimaddantā	192
Pattamāḷakaṃ	231	Pariyādinnarūpā	208
Pattasalākabhattaṃ	251	Pariyuṭṭhitacitto	267
Pattharitabbaṃ	258	Parivaṭṭumo	127
Pathavīkhaṇaṇādike	224	Parivattanaṃ	27
Paḍaṃ	4	Parisuddho	134
Paḍavītiḥārassa	240	Pariharitum	231
Paḍumapuṇḍarīka- pattavaṇṇaṃ	109	Parihareyyum	189
Paḍhānavibbhanto	90	Parihāni	175
Pannaḷomā	213	Parūpahāravādā	50
Papāto	262	Palibhaṅjanaṭṭhena	48
Papphoṭetvā	258	Palujjati	16
Pabbajanti	90	Paloṭṭhenti	237
Pabbajjā	119	Pallaṅkassa	77
Pamaṅgaṅguleṇa	236		

Padānukkamo	Piṭṭhaṅko	Padānukkamo	Piṭṭhaṅko
[ Pa ]		[ Pa ]	
Pavattāro	191	Pārupitum	203
Pavattiniṃ	273	Pālileyyakam	209
Pavattiyā	84	Pāvārikassa	75
Paviṭṭhasākāhāya	167	Pāvāro	16
Pavivekādhimutto	182	Pāveyyakā	268
Paviveko	182	Pāsanto	236
Pavisanadvāram	178	Pāsādikena	102
Pavesanasalākam	233	Pāsādo	104
Pahānam	256	Pālikārako	236
Pahoti	198	Piṭṭhehi	186
Pākaṭaparissaye	208	Piṇḍi	127
Pākatikacuṇṇam	186	Piṇḍiyālopabhojanam	104
Pākavaṭṭam	202	Pittam	186
Pācīnakā	268	Piyam	275
Pāṭekkam	143, 297	Pire	49
Pāṭekkasannivesā	6	Pisācillikā	178, 231
Pāṇe	45	Piṭṭhakasivikam	184
Pāṇo	114	Pucchāsabhāgena	249
Pātāpetvā	229	Putābhedanam	187
Pāti	233	Puṇṇamāsiyo	314
Pādakathalikam	16	Puthupāṇikam	228
Pādaghamsanam	216	Pupphāsavo	42
Pādavemajjhe	128	Pupphitakālato	12
Pāde	95	Pubbakaraṇam	172
Pāpicche	139	Pubbakiccam	172
Pāpimā	94	Pubbapetakatham	54
Pāmaṅgadasā	236	Pubbāparaviruddham	76
Pāram	11	Pūtimuttam	105
Pārayati	154	Pūrattam	262
		Pūreyya	103

Padānukkamo	Piṭṭhaṅko	Padānukkamo	Piṭṭhaṅko
[ Pa ]		[ Ba ]	
Pelletvā	36	Bidalakam	233
Pesuññam	3	Biḷālasaṅkhalikapārisuddhi	171
Peḷāya	234	Bījanim	235
Pokkharavassam	112	Buddhādhiyuttho	202
Poṭakitūlam	56	Buddhimatā	301
Potthanikam	253	Byañjanasim	70
Ponobhavikā	91	Byābādhayimsu	236
Porī	21	Brahmadaṇḍassa	316
[ Pha ]		Brahmarūpavaṇṇam	114
Pharanti	32	Brahmujjugatto	127
Phalatumbo	192	[ Bha ]	
Phalāsavo	42	Bhaṭiputtā	72
Phātikammaṃ	198, 251	Bhaṇḍakam	176
Phuse	313	Bhaṇḍakena	231
Phosituṃ	238	Bhaṇḍanam	208
[ Ba ]		Bhaṇḍanaajātā	3, 208
Badarasālavam	76	Bhaṇḍanādīni	215
Baddhasīmā	143	Bhaṇḍappaṭicchādanam	241
Bandhanam	247	Bhatiniviṭṭham	243
Bandhanamattam	235	Bhantam	10
Balavābalavam	211	Bhayakatham	54
Bahalam	38	Bhayena	54
Bahiddhā	223	Bhavataṇhā	91
Bahidvārakoṭṭhakā	261	Bhavanetti	188
Bahukato	191	Bhikkhācāro	113
Bālassa	286	Bhikkhudūtena	265
Bāhirapasse	231	Bhikkhusabhāgatā	129
Bāhiralomim	228	Bhittim	144

Padānukkamo	Piṭṭhaṅko	Padānukkamo	Piṭṭhaṅko
[ Bha ]		[ Ma ]	
Bhittikammaṁ	238	Maṇati	275
Bhindeyyum	253	Maṇḍanam	115
Bhinna-uro	128	Maṇḍapatthambhaṁ	10
Bhinnagalo	128	Maṇḍalabaddhāni	64
Bhinnamukho	128	Maṇḍalamāḷo	240
Bhisim	238	Maṇḍale	233
Bhujissabhāvakarāṇato	275	Matakacīvaram	193
Bhusā	183	Madditamattikaṁ	239
Bhusāgāre	191	Madhupiṅgalam	127
Bhūtakālo	132	Madhvāsavo	42
Bhūtānaṁ	11	Manomayaṁ	253
Bhūmi-ādhārake	230	Mantabhāsā	289
Bhūmiyaṁ	15	Mammaṇaṁ	128
Bhūmiyo	279	Maraṇaṁ	84
Bhogā	182	Mariyādā	83
Bhojanaṁ	115	Mallagaṇo	72
		Masūrake	238
[ Ma ]		Mahāguṇaṁ	273
Maṁsacakkhunā	271	Mahājaṅgho	128
Makkaṭabhamuko	127	Mahānāmo	40
Makkhadhammo	221	Mahāpadese	307
Makkhetum	232	Mahāpādo	128
Magganto	101	Mahāpitṭhiyakojavaṁ	197
Maggānaṁ	19	Mahāpeḷabhatte	216
Maṅku	132	Mahābhūmikaṁ	193
Maṅkubhūto	214	Mahāmattikaṁ	10
Maccharasaṁ	30	Mahāmukhakuṇḍasaṅṭhānā	231
Majjhe	142	Mahāsayaṇaṁ	116
Mañcapīṭhakavānaṁ	16	Mahilātitthe	265
Maññe	93	Maḷorikā	234

Padānukkamo	Piṭṭhaṅko	Padānukkamo	Piṭṭhaṅko
[ Ma ]		[ Ya ]	
Mānaso	94	Yatindriyaṃ	185
Māro	94	Yathākathaṃ	209
Mālā	115	Yathādiṭṭhiyā	306
Migāramātuyā	67	Yathārutam	11
Micchattaniyatā	285	Yathāvuḍḍham	265
Micchāñāṇam	291	Yasassī	94
Micchādiṭṭhi	180	Yāpanīyam	209
Micchāvimutti	291	Yāvakīvañca	91
Miḍḍhakaṃ	237	Yāvata	187
Mukhadvāram	35	Yiṭṭhe	98
Mukhasannidhi	190	Yebhuyyasikā	222
Muṇḍavaṭṭi	236	Yojetvā	178
Mutti	91	Yottāni	246
Mudīngasaṅṭhānena	236	Yobbannātītā	108
Muddavedikāya	241		
Muddikakāyabandhanam	235	[ Ra ]	
Murajavaṭṭisaṅṭhānam	235	Rajanam	183
Musā	115	Rajanadoṇi	247
Musāvāde	1	Rajanakuṇḍam	198
Musāvādo	115	Rajohatabhūmi	217
Muḷālam	32	Rajoharaṇam	22
Mūlādāyakā	268	Raṭṭhabhede	24
Mūsikukkaram	10	Ratanaparisibbitam	184
Mettaṃ	229, 275	Rattacitto	51
Medhagam	296	Rattavitānena	184
Moggallāno	100	Ratticchedavinicchayo	175
Moghapuriso	56	Rattinissaggiyena	193
		Rathareṇuṃ	35
[ Ya ]		Rasaṃ	48
Yakkhummāro	109	Rasakhīrādīnam	76
Yaññā	98		

Padānukkamo	Piṭṭhaṅko	Padānukkamo	Piṭṭhaṅko
[ Ra ]		[ Va ]	
Rasasalākaṃ	251	Vatthipīḷanaṃ	187
Rasā	191	Vatthupuggalo	46
Rasena	48	Vatthūni	279
Rukkhadhamme	10	Vandāpetvā	95
Rukkhasaṅghāṭamayo	154	Vapayanti	85
Rūpaṃ	84	Valayaṃ	228
Rūpakākiṇṇāni	230	Valeti	27
Rūpasippaṃ	46	Vassaṃ	138
Rūpūpajīvikā	108	Vassāratto	262
[ La ]		Vācuggatavasena	5
Lakkhaṇena	205	Vātaṇḍiko	128
Lajjiyā	299	Vātavuṭṭhi	183
Luñcitvā	232	Vādānuvādo	188
Lokakkhāyikaṃ	55	Vānacitro	184
Loṇabilaṃ	186	Vāyamantopi	217
Loṇasovīrakaṃ	42	Vāragāme	251
Loṇī	168	Vāraye	10
Lohituppādāpattim	287	Vāsamattaṃ	38
[ Va ]		Vāhe	183
Vaṃsaṃ	239	Vāhenti	233
Vaṅkamukho	128	Vāḷarūpāni	184
Vajjāvajjaṃ	101	Vāḷasaṅghāṭo	6
Vajjiputtakā	50	Vikaṭo	128
Vaṇippatho	187	Vikālabhojanaṃ	115
Vaṇṇāvaṇṇaṃ	198	Vikālo	115
Vaṇṇāvaṇṇāyo	227	Vikesikaṃ	93
Vaṇṇāvaṇṇo	70	Vikkheḷikaṃ	93
Vatthabhedadukkaṭaṃ	217	Vikrubrato	254
		Vicitrā	183

Padānukkamo	Piṭṭhaṅko	Padānukkamo	Piṭṭhaṅko
[ Va ]		[ Va ]	
Vicchinditvā	250	Vivādo	208
Vijaṭetvā	242	Vivekadassinā	277
Vijjhivā	239	Visakumbhena	255
Viññattiyam	63	Visaṭam	10
Viññāṇam	84	Visamanissito	295
Viññāpeti	171	Visikhākatham	54
Vitānasaṅṭhāno	146	Visibbetvā	77
Viddham	234	Visukāyikavipphanditānam	185
Vinayamantanā	300	Visūkadassanam	115
Vinayānulomam	307	Visesakam	265
Vinābhāvo	266	Visesakāraṇam	83
Vinidhāya	257	Vissajjetabbo	219
Vinipātanahetunā	65	Vissaṭṭhadūto	249
Vinibbhujitvā	281	Vissarabhayena	123
Vinītavatthūni	275	Vihāragonisādikā	189
Vinetum	20	Vihārapacchāyāyam	182
Vipaccayatāya	296	Vihāravāro	251
Vipassanāvasena	20	Vihāro	104
Vibhavataṅhā	91	Vītarāgattā	182
Vibhūsanam	115	Vītarāgā	39
Vimānetvā	264	Vītikkamato	226
Vimuccati	93, 183	Vīriyasamatham	182
Vimokkho	301	Vuṭṭhāpeti	72
Virajjati	93	Vuḍḍho	268
Virajjitvā	198	Vutthavāso	99
Virāgo	91	Vedayāmi	218
Vilīvacchattam	64	Vematiko	257
Vilepanam	115	Veyyākaraṇasmim	92
Vivaṭṭūpanissitam	4	Verajjakā	27
Vivari	191	Veramaṇi	115



Padānukkamo	Piṭṭhaṅko	Padānukkamo	Piṭṭhaṅko
[ Va ]		[ Sa ]	
Vesiyāgocaro	108	Sattumodako	29
Veḷuvāṭaṃ	239	Saddhādeyye	241
Vohāraniruttiyaṃ	308	Saddhāmatṭakaṃ	182
Vohāro	223	Santhavaṃ	69
[ Sa ]		Sandhāgāre	188, 240
Samkilesaṃ	93	Sandhāvitaṃ	188
Samghasuttatūyā	241	Sanniṭṭhānantiko	195
Samyamassa	197	Sannivatto	175
Samvaro	256	Sannisinnagabbhā	265
Samvidahite	24	Sapadānaṃ	63
Samvelliyaṃ	265	Sappatisso	102
Samṣaṭṭhaṃ	186	Sappaphaṇasadiṣo	146
Samṣaṭṭhaviṭṭapā	168	Sappaviṣaṃ	10
Samṣaritaṃ	188	Sappibhattaṃ	34
Samharatha	191	Sabbāsavapaṇaṃ	81
Sa-ussāhena	285	Sabhāsaṅkhepena	6
Sakaṭavāhe	183	Samaṇakappehi	12
Samkassarasamācāraṃ	261	Samanussaraṇakaraṇaṃ	262
Samkuṭṭitapādattā	128	Samantacakkhunā	271
Samkhārā	84	Samabharitaṃ	63
Sacittakaṃ	59	Samabhāre	30
Saccakālo	132	Samavayasaṭṭhesano	99
Saccañāṇaṃ	91	Samādhivasena	20
Sacchikatvā	90	Samānavassā	180
Sajotibhūtānaṃ	96	Samiddho	20
Samññācitakena	75	Samūhanitvā	154
Sativinayo	222	Sampajānamusāvāde	1
Sattāhaṃ	84, 175	Sampavesetvā	27
		Sambhama-atthavasena	207

Padānukkamo	Piṭṭhaṅko	Padānukkamo	Piṭṭhaṅko
[ Sa ]		[ Sa ]	
Sambhārasaṃyuttā	42	Sārato	182
Sambhāvesi	190	Sāriputto	100
Sambhāvesuṃ	268	Sāvasesāpattim	256
Sambhindanti	168	Sāhu	102
Sambhinnarasam	192	Sikkhamānadūtena	265
Sambhedam	273	Sikkhāpetum	108
Sammati	233	Siṅgīsuvapaṇṇanikkhena	98
Sammattaniyatā	285	Siṅghāṭakam	24
Sammanti	282	Siyā	257
Sammāñāṇam	100	Silakabuddho	64
Sammādiṭṭhi	100	Siluccayaleṇam	16
Sayam	90	Sisire	237
Saram	187	Sītīkato	64
Sarabū	229	Sīmantarikapāsāṇā	144
Sarabhaññam	170	Sīmātikkantiko	195
Saravatī	182	Sīmānam	168
Saliṅge	121	Sīmāsaṅkaram	169
Savacanīyam	216	Sīmāsambhedam	155
Savarabhayaṃ	170	Silabbataparāmāsam	182
Sahadhammiko	188	Silavipattipaccayā	277
Sahitattho	20	Sisavasena	193
Sahibhāsahitassa	254	Suci	185
Sahite	84	Suññatāvihārena	268
Saḷāyatanam	84	Sutapariyattisīlaguṇam	8
Sādiyatha	28	Sutena	170
Sādhāraṇalakkhaṇam	189	Suttānulomam	43
Sādhugītam	228	Suddhakoseyyam	184
Sāmaṇerabhāgasamako	126	Suddhassa	218
Sāmukkamsikā	93	Sumanamanaso	96

Padānukkamo	Piṭṭhaṅko	Padānukkamo	Piṭṭhaṅko
[ Sa ]		[ Ha ]	
Surāmerayaṁ	115	Hatthakukkuccena	12
Suvaṇṇageruko	186	Hatthadhovana-udakaṁ	259
Susukā	186	Hatthamuddāgaṇā	2
Sūcidaṇḍakappamāṇo	142	Hatthinakho	244
Seti	113	Hatthukkhepakena	180
Senāsanaggāho	200	Hane	313
Seleyyakaṁ	12	Hammiyaṁ	105
Seve	69	Harite	18
Soko	84	Hāpanaṁ	205
Sotāvadhānaṁ	300	Hiṅgu	32
Sodhetvā	242	Hiṅgujatu	32
Sosabyādhi	109	Hiṅgusipāṭikā	32
[ Ha ]		Himakarakā	38
Hatavatthakasāṭakena	194	Himapātasamaye	97
Hatthaṁ	64	Hute	98
Hatthakammaṁ	238	Hupeyya	89
		Heṭṭhāpathavitale	148